

College Form No. 4

This book was taken from the Library on the date
last stamped. It is returnable within 14 days.

2 1 67

18.6 62

12.8.71

30.8.71

25.7.78

7/3/71

6.4.74

CAPA-17-2-61-10,000

ମନ-ମନ

କୁହାଣି ଶାସ



6282

24.2.69

ହେଲ୍ ପାରଲିମାଟ୍ସ ପ୍ରାଭେର୍ଟାଲିମିଟେଡ୍
। କଲିକତା ଗାନ୍ଧୀ ।

কাঁজ আর অকাঁজে ভরা
এই ব্যস্ত জীবনে
ক'দিনের কাঁক আর কাঁকিটুকু
যাদের সাহচর্যে
মধুময় হ'য়ে উঠেছিল—
সেই
সাগর-নগরের নাগরিকদের
উদ্দেশে

লেখকের অন্য বই

উপভাস । ডাঙাগড়া

পণ্যা

নীল ঢেউ সাদা কেনা

ভ্রমণ সাহিত্য । ইংরেজের দেশে

গল্প । কাঠের ঘোড়া

কবিতা । কটাক্ষ

নতুন মিছিল

সমকালীন ব্যঙ্গ কবিতা।

(সম্পাদনা)

বম্বারচনা । স্বামী পালন পদ্ধতি

যদি গদি পাই

প্রবন্ধ । ওগো মেয়ে সাবধান

অমুবাদ । পংকিল

ভ্যাগাবত্‌স্

সালোম

খেলমা

ছোটদের বই । ফাঁকিস্থান

ম্যানিষা

ফ্যাশন ট্রেনিং স্কুল

চক্র

বেনছব

ইংল্যাণ্ডে কাজ-সারা যাত্রী-বোঝাই ট্রেনখানা এঁকেবেঁকে দাঁড়ালো এসে ব্রিটেনের শেষপ্রান্তে সানাম্পটন ডক ঘেঁষে। বেরিয়ে এলো যাত্রীদল, মালপত্র। মরা প্রাটফর্মটা হলো জীবন্ত, চঞ্চল। নানা জাতির পানাম্পর্শ হলো ধস্ত। নানা ভাষার গুঞ্জে হলো মূখর। কিন্তু অন্তরে তার একটি কক্ষ স্বর : হে বন্ধু বিদায় !

এই যাত্রীরা এসেছিলো আশা নিয়ে। বেঁধেছিলো বাসা কিছুদিনের জন্তে। অনেকেই সফল হয়েছে, মুখে তাদের গর্বের হাসি। অনেকেই বিফল হয়েছে, কপালে তাদের পবাজয়েব কলঙ্ক। অনেকে সুনামটুকু সজোপনে বেঁধে নিয়েচে সঙ্গে। অনেকে সব কিছু দিয়ে নিয়েচে সাথে ছুরারোগ্য রোগু। বিধির খুঁইয়ে বিষ। তবু সবাই চলেচে বাসা ভেঙে দেশের টানে, দেশের পানে। জানে তারা, এদেশ তাদের নয়, তাই এখানে বাস করা যায় না, কদিনের জন্তে শুধু বাসা বাঁধাই যায়।

এদেশের বাসিন্দাও আছে এই যাত্রীদলে। বন্ধু-বান্ধব, আত্মীয়-স্বজন বাস আর বাসা ছেড়ে চলেচে তারা বিদেশে নতুনের সন্ধানে, অর্থের আশায়, ব্যবসার বাসনায়, কর্তব্যের তাড়নায়। তাদের প্রাণ পড়ে আছে দেশের মাটিতে। তবু প্রাণপণে বিদায়-পর্বের দুর্বল মুহূর্তটুকু গোপন করবার চেষ্টার জন্ত নেই। অন্তর তাদের কণ্ঠনালির কাছে কেবলই ধাক্কা দিয়ে বলচে : বলো, শুভবাই মাই ইংল্যাণ্ড !

পোর্টার বা কুলিরা সর্বদেশেই আবেগহীন। আসা-যাওয়ার মাঝখানে হাসি-অশ্রুর দোলায় দোলা যাত্রীকূলের মনের খবর রাখে না এরা একটুও, তাদের মাল রাখতেই বাস্তব শুধু ! ঈর্ষিতে মাল বোঝাই করে হাঙ্গির করে কার্টমুসে। হাত পেতে নেয় মজুরি। আর সেই সঙ্গে টিপস। চুকিয়ে দেয় সম্পর্ক। আতুড়ে ধাই, শ্রমশানে ভোম আর স্টেশনের কুলি মারা-মমতার বাইরে।

কালো, হলদে, বাদামি, লাল, গোলাপী রংয়ের যাত্রীর ভিড়। পরনে কোট-প্যাণ্ট, সালোয়ার পায়জামা, আলখাল্লা, আর শাড়ী, স্কার্ট, ব্রক—নানান রকমের পোশাক। নানারকমের স্যুটকেস, এ্যাটাচি-কেস, ট্রাঙ্ক—যাত্রীদের অস্থাবর সম্পত্তি, প্রায় সবগুলিই মেড-ইন-ইংল্যান্ডের, চলেচে দেশান্তরে।

যাত্রীদের সবাই দাঁড়িয়েচে কার্টমসের সামনে লাইনে। হাতে পাশপোর্ট। আত্মপরিচিতি। ভিতরে নিজের ছবি সাঁটা। নাম-ধাম, কোন দেশেতে বাড়ি, বাপের নাম, গায়ের রং, চোখের তারার রং, চুলের রং, উচ্চতা, শরীরে উল্লেখযোগ্য কাঁটা-ছেঁড়ার দাগ এবং কোন কোন দেশে বেড়াবার অধিকার আছে—সব কিছু লেখা ঐ পকেট বইয়ে। নিজের সরকারের নীলমোহর-আঁকা ঐ ছোট বইখানিই হলো বর্ণপরিচয়। বিদেশে বিপদ-আপদে নিজের দেশের প্রতিনিধির সাহায্যের হাতখানা ধবতে পারবে ঐ পরিচয়টুকুর জন্তেই। ওটি হারালে, সব হারালে। হারিয়ে গেলে এই বিরাট জনসমুদ্রে। ডুবে গেলে। কোনো বিদেশী সরকারের জেলেতেই হয়তো কাটাতে হলো বেশ কয়েকটা দিন, যতদিন না আবাব তোমার পরিচয়টুকু খুঁজে পাওয়া যাচ্ছে!

বেআইনী কিছু যদি সঙ্গে কারোর না থাকে, কার্টমসের বেড়া পেরোনো কষ্টের নয়। শুধু পাশপোর্টটা এগিয়ে ধরা, খটাং করে সীল মারলে, সেটি মুড়ে পকেটে ভরা আর বাস-প্যাকেজ দেখতে চাইলে বিনাধিযায় খুলে দেওয়া। বাস!

সাদাম্পটন ডকের গায়ে নোঙর-বাঁধা বিরাট সাদা জাহাজখানা। ‘বাতরি’। পোলিশ লাক্সারি লাইনার। সাগর-নগর। জলে-ভাসা সাজানো-গোছানো ছোট একটা নগর। ক’দিনের জন্তে ভাসে অকূল সাগরে, কিছুক্ষণের জন্তে আসে নানা দেশের কূলে কূলে।

নানা নগরের নাগরিক আসে এই সাগর-নগরে। মিলে-মিশে এক হয়ে যায়, আত্মীয় হয়ে যায়; শেষে চলে যায়—বার যেখা দেশ। এই সাগর-নগরে শুধু দোলা, চেউয়ের দোলা, বৈচিত্র্যের দোলা। এখানে কোনো কাজ নেই। সবাই বেকার। তবু অন্ন-কষ্ট নেই, ভাবনা-চিন্তা নেই। শুধু আরাম, শুধু বিজ্ঞাম। শুধু গল্প, শুধু হালি। শুধু আহার, শুধু নিদ্রা। ঘড়ির এখানে

দাম নেই। লোকে এখানে ঘোড়ার মত ছোটো না। ব্যস্ত জীবনের খানিকটা ফাঁক এবং ফাঁকি।

এখানে কাজের তাড়া নেই। তাড়াতাড়ি নেই। ঘড়ির কাঁটার দশটা-পাঁচটা বাজে বটে, তবে অফিস যাতায়াতের জন্তে নয়, পেটের খলি ভরাবার জন্তে। দশটা-পাঁচটা করে যা জমিয়েচো, তা থেকে কিছুটা যখন খরচ করেচো এই সাগর-নগরের নাগরিকত্ব পাবার জন্যে, তখন তোমার খুশিমত খরচ করতে পারো তোমার সময়। যত পারো খাও, যত পারো ঘুমোও, যত পারো আড্ডা মারো। আর নয়তো ডেক চেয়ারটা রেলিং-এর ধারে টেনে নিয়ে হাত-পা ছড়িয়ে শুয়ে শুয়ে দেখতে থাকো নীল সমুদ্রে সাদা ঢেউয়ের ফেণা আর ফেণা। আর উপরে নীল আকাশে সাদা মেঘের চলা; দুইয়ের মাঝে ফিকে গাঢ় নীলের খেলা, নীলের মেলা। মাঝে মাঝে সাদা-সাদা সী-গাল পাখির ঝাঁক, হাঙ্কা পাখায় শুধু ওড়ে আর ঘোরে। কখনো বা ফ্ল্যাটারেস চালায় চলমান সাগর-নগর-জাহাজখানার সঙ্গে। নগরের জানলা দিয়ে জলে যখন পড়ে যত ঝড়তি-পড়তি ফল-মূল, অমনি রেস থামিয়ে সবাই জলের 'পরেই বসে যায় হঠাৎ-পরম ভোজে।

সাঁজ-সকালে নীল জলেতে সিঁদুর গোলে সূর্যমিমা; বাকি দিনটায় বসে তার চূনের ভাঁটি নিয়ে। আকাশটাকে চুনকামের ইচ্ছে বুঝি মনে। আর রাজ্জে; ঠাণ্ডা চাঁদের ঢেউ খেলানো চাঁদির পাত্ ভাসতে থাকে থরথর কালচে-কালো বিশাল জলে। এ গেলার শেষ নেই, দেখারও শেষ নেই। কাজেই চোখ খুলে, মন খুলে দেখো। আর যদি দেখতে-দেখতে ঘাড় ঘুরিয়ে ঘুমিয়েই পড়ো, ক্ষতি নেই, ভাঙাবে না কেউ সে ঘুম এসে। এখানে তোমার খুশিতে দিন চলা, কথা বলা, ঢলে পড়া—ঘড়ির এখানে কোনো হাত নেই।

এই সাগর-নগরে হিন্দু নেই, মুসলমান নেই, খৃষ্টান নেই, ইহুদী নেই—শুধু আছে মানুষ। এখানে হিন্দুস্থানী নেই, পাকিস্থানী নেই, সিংহলী নেই, মিশরী নেই, ইংরেজ নেই, রুশ নেই, জার্মান নেই, মার্কিন নেই, চীনা নেই, জাপানী নেই—আছে এক বিশ্ব জাতি। এখানে কমুনিষ্ট নেই, ক্যাপিটালিস্ট নেই, সোশালিস্ট নেই—আছে ভাইয়েরা। সমস্ত নগরময় একজাতি একপ্রাণ একতা।

এরা প্রায় একসঙ্গে ওঠে, একসঙ্গে খায়, একসঙ্গে গল্প করে, একসঙ্গে খেলে, একসঙ্গে ঘুমোয় আবার।

ভবে দল আছে। নীল সাগরে একটি বোটার শতদল। কোনো দল তর্ক করে, কোনো দল নিষ্পা করে, কোন দল হাওয়া খায়, কোনো দল মদ খায়, কোনো দল প্রেম করে, কোনো দল হিংসা করে, কোনো দল হাসে আর কোনো দল কাঁদে। তারপর একদিন শতদল ঝরে পড়ে। যাত্রা হয় শেষ।

মহানগরীর যাত্রীদল একে একে পাতা-ভক্তাব উপর দিয়ে চুকলো গিয়ে সাগর-নগরে। ঝকঝকে তকতকে সুরু সুরু গলি, কার্পেট পাতা। গলির মোড়ে-মোড়ে গাইড—স্টুয়ার্ড আর স্টুয়ার্ডেস। সাদা ধবধবে পোশাক পরা, মুখে মুহু হাসি। সাদর আহ্বান। স্বাগতম্। কোন তলায় কোন ঘরে আস্তানা হবে, টিকিটেই তা লেখা। সেটি দেখিয়ে তাদের নির্দেশ মত এগলি সেগলি দিয়ে এগিয়ে যাওয়া। গলির দুধারে পাশাপাশি নম্বর দেওয়া ঘর আর ঘর। কেবিন। মাঝে মাঝে আলো। ফাঁকে ফাঁকে এমপ্লিফায়ার, গলে পডচে মুহু মধুর সুর। কোথাও বা কার্পেট-পাতা চণ্ডা কাঠের সিঁড়ি—নিচের ডেক থেকে উপরের ডেক-এ যাবার।

অলি-গলিতে ছড়িয়ে গেচে সবাই। কোথায় আমার ঘব? কোথায় আমার আস্তানা? কোন কোণে? কোনখানে? এই, এই যে পেয়েচি। এই তো নম্বর। বন্ধ সাদা দরজাটির হাতল ঘুরিয়ে ঘরে চুকলেই চোগট। জুড়িয়ে যায়।

বার্ষগলিতে সুরু নরম বিছানা পাতা। ধবধবে চাদর ঢাকা। মাথার কাছে বই পড়বার আলো, বই-পত্র রাখার ব্রাকেট। হাতের কাছে স্টুয়ার্ড বা স্টুয়ার্ডেসকে ডাকবার আলাদা আলাদা চাপা বোতাম। একপাশে টেবিল-চেয়ার-প্যাড। আর এদিকে মুখ ধোবার বেসিন, আর্শি, ব্রাকেট, ছাফার। ঠাণ্ডা-গরম জলের কল। মেঝের রবার সীট পাতা, মাথার উপরে বিজলী পাখা আর বাতি। পাশে পোর্ট-হোল, জানলা—দূরে নীল সমুদ্রের এক ঝলক গোলাকার দৃশ্য। সমুদ্রের গাঢ় নীলে আর আকাশের ফিকে নীলে মিলে যাওয়ায় ঝজু-রেখাটি উঠচে আর নামচে ডেউয়ের তালে তালে।

সাগর-নগরে কী স্নেহ? দোকান-পাট, ব্যাক, সেলুন, ক্লাব, সিনেমা,

রেস্টুরেন্ট, হোটেল, বার, ড্যান্সিং হল, নার্শরী, ডাক্তারখানা, হাসপাতাল, জিমনেসিয়াম, বাথরুম, সুইমিং হল, লাইব্রেরী, প্লে-গ্রেস, বেড়াবার জায়গা, বসবার ডেক আর ডেক চেয়ার কিছুই অভাব নেই।

‘এ’ ডেক-এর খোলা জায়গাটা বাজীর জিনিসে ভর্তি। নানা শাইজের ব্যাগ, ব্যাগেজ আর স্যাকেশ। এক বোঝা আভিজাত্য। ঝিলের কালো কেবিন-ট্রাক আছে বেশ কয়েকটা, কিন্তু পোটলা-পুঁটলির নামগন্ধ নেই। ওসব ট্রেনের বাক্সে মানায় ভালো, জাহাজের ডেক-এ দৃষ্টিকটু। যেন সাহেবের মুখে বিড়ি।

সাদাম্পটন ডেকের দুটো রান্সুসে ফ্রেন শশঙ্কে কর্মবাস্ত। একটা ফ্রেন ডেক-রাখা জিনিসগুলো এককামড়ে যতটা পারে তুলে নিয়ে, ঘাড় ঘুরিয়ে, ‘এ’ ডেক-এর উপরে এসে আশ্তে করে ঢেলে দিচ্ছে সেগুলো।

ডেকের আর একটি ফ্রেন যেন রান্সুসী মা। ডেকের অন্ত পাশে জড়ো-করা জিনিসগুলো খাবলা-খাবলা ক’রে তুলে জাহাজের ডেকের পর পর চোকো গর্তের ভিতরে ঢুকে মাল নামাচ্ছে একেবারে জাহাজের পেটের মধ্যে। বৃষ্টি রান্সুসে ছেলে এসেচে মায়ের কাছে, একটু পরেই চলে যাবে; তাই যত পারে গেলাচ্ছে : আয় বাবা, আয় খাইয়ে দিই।

জাহাজের তলপেটে যে সব মাল গেলো, সেগুলো ফের বার হবে ঘাজীয়ের নামার সময়। আর যেগুলো রইলো ‘এ’ ডেক-এ, সেগুলির স্থান কেবিনে, ঘাজীদের হাতের কাছে। পনেরো কুড়িটা দিন কাটানো মানে অনেক কিছু। রোজ দাড়ি কামানো, তেড়ি বাগানো, মুখ হাত ধোয়া, জামা বদলে শোয়া, দু’ তিনবার দাঁত মাজা, সুবিধামত সাজাগোজা, লুকিয়ে নিজের জুতো পাশিশ, মাথা ধরলে কপালে মালিস—অনেক কাজ! অফিস নেই বটে, বাজার নেই বটে—তা বলে কি কাজ নেই? কাজেই হাতের কাছে দরকারি জিনিস-ভরা বাক্স একটা চাই-ই। যে ব্যাগেজের দরকার নেই, তা বরং যাক জাহাজের পেটে; নামবার সময় সেসব টেনে বার করলেই হবে।

রান্সুসে জাহাজগুলোর ঐ এক গুণ। পেটের মধ্যে ভরে সব, কিন্তু হজম করে না কিছুই। দরকার যত আবার উগড়ে দেয়, ঠিক যেমনটি ছিল। মানুষের শরীরে হজম না হওয়া ভয়ের কারণ, এদের পক্ষে হজম করাটা

দোষের। এই জলে-ভাসা যান্ত্রিক জীবগুলি বড় কাউকে ডোবায় না, বরং জোবে যখন সবাইকে নিয়েই ডোবে। আর যাদের ডুবেমরা কপালে নেই—তাদের ভাসিয়ে দেয় বোটে করে, বেণ্টে করে।

আহাজের লোকগুলোর কাজের অন্ত নেই। ডেকের মালগুলোর গায়ে-শীটা লেবেল দেখে দেখে যার-যার কেবিনে পৌঁছে দেওয়া, বার্ণের তলায় সেগুলো সাবধানে গুছিয়ে রাখা—খুব সহজ কাজ নয়। গায়ে শক্তির দরকার, মাথায় বুদ্ধির দরকার। তুমি তো তোমার জিনিসের গায়ে লেবেল মেরেই খালাস, কোনগুলো আহাজের পেটে যাবে, কোনগুলো তোমার কেবিনে যাবে; কিন্তু সেসব কেবিন নম্বর বার্ণ নম্বর মিলিয়ে যথাস্থানে পৌঁছে দেওয়ার ভার তো তাদেরই উপর। তোমার মাল যদি অগ্নের কেবিনে যায়, আর অগ্নের মাল যদি তোমার কেবিনে আসে—তা হলেই তো তোমার চোখ উঠবে কপালে; তোমার টাটকা সাহেবি মেজাজ যাবে বিগড়ে। অথচ ওদের কর্মকুশলতার গুণে তুমি খোস মেজাজেই রইলে। শুধু সিগ্রেট ফুঁকতে ফুঁকতে কেবিনে গিয়ে একবার দেখে নাও, সব ঠিক আছে কিনা!

অবশেষে যাত্রা হলো শুরু।

শক্ত মাটির মহানগরীর নাগরদল এসে ভিড় করে দাঁড়ালো জলে-ভাসা সাগর-নগরের রেলিং ধরে। সতৃষ্ণ নয়নে চেয়ে রইলো—ধীরে ধীরে সরে যাওয়া মাটির ঐ নগরের দিকে!

দুই মগরের মাঝখানে দেখা দিয়েছে নীল জলের বিচ্ছেদ রেখা। আর মত বদলাবার পথ নেই। শুধু চেয়ে থাকা। মনের নোঙর ফেলে-রাখা ঐ মাটির মহানগরীর তীরে। মন তখনও মায়ায় বাঁধা পড়ে আছে ঐ মাটি আঁকড়ে! চ্যারিং ক্রশ। অক্সফোর্ড সার্কাস। পিকাডিলি। ট্রাফালগার স্কোয়ার। লিচেস্টার স্কোয়ার। মার্বল আর্চ। হাইড পার্ক। হ্যামারস্মিথ। হ্যামস্টেড। ইণ্ডিয়া হাউস। শ্রালকট গার্ডেনসের সেই ছায়াঘেরা বাড়িখানা। হাসিমাখা ল্যাণ্ডলেডি মিসেস ল্যাফরকেড। মিস ফোর্ড। ক্রান্সী। বার, নাইট ক্লাব। ডাব্লিং হল। সেনফ্রিজ! উলওয়ার্থ। বিগবেন। সেই—সেই—সেই যে!

ঐ, ঐ, ঐ যে ক্রমে সরে যাচ্ছে সাদাম্পটনের চওড়া ডক, ব্রান্সে ক্রেন,

ছোটো লম্বাটে কাস্টম হাউস। তীরে-বাঁধা ছোট ছোট লঞ্চ। ছোট ছোট জাহাজ।
সরে যাচ্ছে, ক্রমেই সরে যাচ্ছে সব। নীলজলের ঢেউএর নাচন হয়েচে শুক।

সরে যাচ্ছে সব, ছোট হয়ে যাচ্ছে সব, আবছা হয়ে যাচ্ছে সব। ঝাপসা
হয়ে যাচ্ছে সব। মনের নোঙরেব রবাবেব দড়িটা শেষপর্যন্ত আর বাড়লো না,
ছিঁড়ে গেলো। হে ইংল্যাণ্ড বিদায়।

বিদেশ, কিন্তু বিষেব নেই কাবোর মনে। বিষ-নজরে দেখেনি তেমন
কেউ। তাই দীর্ঘনিঃশ্বাস ফেলে যাজীবা সবাই ঘুরে দাঁড়ালো। নিজের দিকে
তাকালো প্রায় সকলেই।

তা হলে ডাঃ রয়, শেষপর্যন্ত দেশে ফিরিচি আমবা। গেমস ডেকে
দাঁড়িয়ে মিঃ সানিয়াল য়ুহু হেসে জিগ্যেস করলেন।

মিঃ রয় বললেন হেসে : তাই তো দেখচি। তিন বছর বাদে ফিরিচি
দেশে। কিন্তু মনটা এখনো যেন ইংল্যাণ্ডের মাটিতেই গড়াগড়ি যাচ্ছে।

কেন ? দেশে টানেন কিছু নেই বুঝি ?

না।

যাক, এবার দর বাড়িয়ে চললেন। এখন আপনার কদম দেখে কে ?

বিয়েলি ? বিবক্ত হলেন ডাঃ রয় : ব্যাট, আই হেট্‌ জাট ডাউরি
সিসটেম্‌।

মিঃ সানিয়াল হাসলেন : এখনো আমরা ইংলিশ চ্যানলেই আছি।
কাজেই বলে যান, শুনে যাই।

শুনে ডাঃ রয় কাঁধ ঝাঁকালেন একবার।

ডাঃ রয় আর মিঃ সানিয়ালের পরিচয় খুব বেশিক্ষণের নয়। ঘণ্টা ছয়েকের
হবে। ওয়াটারলু স্টেশনে বোট-ট্রেনের এক কামরায় উঠেছিলেন দু'জনে।
বসেছিলেন পাশাপাশি। সেই থেকেই আলাপ।

ডাঃ রয়ের বয়স বেশি নয়। আটাশ-তিরিশ হবে। ফর্সা। ছিপছিপে।
কালো একজোড়া সরু গঁোফ। কোঁকড়ানো কালো চুলগুলো ভেসিলিন
হেয়ার টনিকে মাজা, পালিশ করা। পরনে নেভি ব্লু স্মাট, চকোলেট রংয়ের
টাই, চকচকে কালো জুতো।

কলকাতায় ভবানীপুবে বাড়ি। মেডিকেল কলেজে ডাক্তারি পাশ করে,

আরো পক্ষারের আশা, বাপের পয়সায় বিলেত এসেছিলেন। অজান্তে অনেক কষ্ট দামের ভাতারের মত লগুনের বাইরে কোন হাসপাতালে চাকরি করে সেই পয়সায় পড়তে হয় নি। কাজেই পড়া নিয়মিতই করেচেন। ছুটিতে সারা ইংল্যাণ্ড, স্কটল্যাণ্ড ঘুরে বেড়িয়েচেন, এক ছুটিতে কটিনেটেও এক চক্কর দিয়েচেন। দ্বিতীয়-তৃতীয় বছরে অর্থাৎ একটু পাকা-পোক্ত হলে একাধিক ঘেয়েকে বগলে নিয়ে ঘুরেচেন এবং সব চাইতে বড় কথা, তাদের সঙ্গে ঠিক যেটুকু খরচ করা দরকার, ঠিক সেইটুকুই করেচেন তাছাড়া, ডাক্তারি শাস্ত্রে উচ্চশিক্ষা এবং লম্বা উপাধি পেতে হলে যে সময়টা হাসপাতালে কাটাতে হয় এবং বই মুখে রাখতে হয়—ডাঃ রয় সে সময়টার যোলো আনা কাজেই লাগিয়েচেন। কাজেই, তাঁকে পস্তাতে হয়নি; তিন বছর আগে যে আশা নিয়ে ইংল্যাণ্ডের মাটিতে পা দিয়েছিলেন, সে আশা, শত-আশা হয়ে তাঁর অন্তরে স্বপ্নের জাল বিস্তার করচে।

মিঃ সানিয়ালের বাংলা মানে সান্যাল মশায়। বয়েস হয়েচে। চল্লিশের চৌকাঠ হয়েচেন পার। লম্বা দোহারা চেহারার মানুষটি। মুখখানা হাসি-হাসি। সরকারী চাকুরে, মানে, সরকারী ব্যাঙ্কে কাজ করেন। অফিসে বেশ সুনাম। কামাই বলতে নেই আর ‘বস’ কথা বলতে না বলতেই বুঝে নেন তাঁর মনোভাব! অতএব অফিসে তাঁর দোঁদগিও প্রতাপ।

সরকারী অফিসে ছুটি না নিলে জমা হয়, তবে বেশি জমানো যায় না। সময়ের মধ্যে না নিলে নষ্ট হয়ে যায়। গর্তে ময়লা জমলে ‘সার’ হয়, ব্যাঙ্কে টাকা জমলে স্বদে বাড়ে, কিন্তু অফিসের ছুটি জমলে ‘পচে’ যায়। তাই মিঃ সানিয়াল পাওনা ছুটি নিয়ে এবং সেই সঙ্গে বাড়তি ছুটি মিশিয়ে মাস ছয়েকের একটা ‘গ্যাপ’ তৈরি করে ইংল্যাণ্ডে এসেছিলেন দেশটার হালচাল দেখতে। অবশ্য, অফিসের লোকেরা জানে, মিঃ সানিয়াল বিলেত গেছেন ব্যাঙ্কিংয়ের বিষয়ে হাইয়ার ট্রেনিং নিতে।

অনেক দিনের শখ। অথচ মিটছিলো না কিছুতেই। ছাত্রাবস্থায় ভাবতেন, বি-এ পাশ করে ব্যারিস্টারি পড়তে যাবেন বিলেতে। যৌবনে ভাবতেন, বিয়ে করে স্বত্ত্বের পয়সায় একবার সাগর পাড়ি দিতে হবে। প্রৌঢ়ত্বের দ্বারে এসে দেখলেন, বাঃ, কিছুই ভোঁ হলো না। বয়ঃ সংসারের

সব-কটা বেড়ি এক এক করে কখন যেন অজ্ঞাতে পরে বসেচেন। কাজেই একদিন সংসারের বুট-ঝামেলা গিন্নীর ঘাড়ে চাপিয়ে, ছেলে-মেয়েদের গালে-মুখে চুমু দিয়ে বেরিয়ে পড়লেন ‘দুগ্‌গা’ বলে। শ্রেফ দড়ি-ছেঁড়া গন্ধর মতো ছুটে এলেন প্রাক্তন রাজার দেশটা দেখতে।

মিঃ সানিয়াল বড় রসিক। কেবল মিটিমিটি হাসেন। আসবার সময় মিসেসের হাত ধরে ‘আসি’ বলতে গিয়ে অবশ্য চাপা-কান্নার ধাক্কা আর কিছু বলতে পারেন নি, চোখ দুটো ছলছল করে উঠেছিলো তাঁর—কিন্তু একদিন ড্যানিং হলে মিঃ রেজা-র যেন কী কথার উত্তরে বললেন, জানো হে ছোকরা, আসবার সময় মিসেসকে বলেছিলাম, গিন্নী, অনেকদিন তো একসঙ্গে ঘর করলাম, এবার বাইরে একটু চরে আসি? ঘোবন তো যায়-যায়, উপবনটা দেখা হবে না? অবশ্য, তোমার কপালে আমার দেওয়া সিঁদুর রইলো বটে, তবে বাধা নিষেধ কিছুই রইলো না। যা ইচ্ছে ক’রো, তবে ফিরে এলে আবার তোমার মনটা যেন পাই।……কিন্তু বুঝলে রেজা, এসেছিলাম বটে হৈ-হৈ করে, তবে ঘাচ্চি শ্রেফ হায়-হায় করে। আসার দিন যেমন ‘নাল’ ঝরছিলো, আজো তেমনই ঝরচে রে ভাই। শেতবরনী ললনাদের শুধু দূর থেকেই দেখলাম, কাছে ঘেঁষতে সাহসই ছাই হলো না।

বলেই এক টোক, মদ গিলে গলাটা ভিজিয়ে নিলেন সানিয়াল। টেবিলের সবাই শুনে হো-হো করে হেসে উঠলেন।

কানে কম শোনেন সানিয়াল; তাই ‘হিয়ার-এড’ কানে গোঁজা। হাসলেন তিনিও।

রামস্বামী চুপচাপ বসে শুনে যান। হঠাৎ এক একটা কোড়ন কেটে বসেন। একদিন বললেন, মিঃ সানিয়াল, ‘হিয়ার-এড’টা ইংল্যাণ্ড থেকে আনলেন নাকি?

সানিয়াল বললেন, ই্যা। গর্ভ করে বললেন, ক্রান্তাল হেল্‌থ স্কীমে ফোকটে যোগাড় করেচি।

তা ওটি যোগাড় করবার আগে দেশে মিসেসের সঙ্গে প্রেমালাপ করতেন কেমন করে—জ্ঞানতে পারি?

সানিয়াল দমবার পাত্র নন। বললেন. দেখুন রামস্বামী, প্রেমালাপটা

টেটিয়ে করা অভদ্রতা। হৃদয়ের ভাষা দিয়ে করতে হয়, চোখের ভাষা থেকে বুঝতে হয়। বিয়ে করেচেন?

খতমত খেয়ে রামস্বামী বললেন, না।

সানিয়ারাল বললেন, তবে ওসব কিস্তি বুঝতে পারবেন না। কান ভাল থাকলে প্রিয়তমার মুখ থেকে কেবল একটি আলাপই শুনতে পাবেন, দেহি-দেহি। প্রেম শ্রেফ চটকে যাবে। আমার মনে হয়, লর্ড কৃষ্ণের আর এক নাম 'কাল'—কারণ কানে তিনি কাল ছিলেন। কাজেই লাভার রাধিকার 'দেহি দেহি' তাঁকে শুনতে হয় নি এবং তাই তাঁদের প্রেম অমন ক্লাসিক হয়ে গেলো। বুঝলেন?

সানিয়ারালের কথায় টেবিলে আবার হাসির ধুম পড়ে গেলো।

৭০৬নং কেবিনে রামস্বামী থাকেন। 'এ' ডেকে ফোর-বার্থ কেবিন। কেবিনটায় বেশ আলো-হাওয়া। ড্যালিং হল, ডাইনিং হল, লাউঞ্জ, লাইব্রেরি, বাথরুম, ব্যাক, সেলুন—প্রায় সবই ঐ ডেকে, কাজেই সিঁড়ি ভাঙার দায় নেই। কেবিনের বাইরেই এ্যাম্‌পিফার। মৃদু-মধুর সুরে পোলিশ কনসার্ট বাজে। কেবিনের পোর্ট হোল দিয়ে দেখা যায় গোল এক চাকতি নীল আকাশ আর নীল জলের কানাকানি। অলস দুপুরে উপরের বার্ষে ওয়ে ওয়ে রামস্বামী তাদের কানাকানি দেখেন আর সিগ্রেট ফোঁকেন।

রামস্বামী মজ্জদেনীয়। মস্কো থেকে আসছেন। মস্কো থেকে পোলিশ বন্দর Gdynia এসেছিলেন ট্রেনে, সেখান থেকে ধরেচেন এই পোলিশ লাক্সারি 'লাইনার'। Gdyniaরই যুক্তপূর্ব নাম ডানজিগ। যুক্তের জল প্রথমে ঘোলাটে হয়েছিলো এইখানেই।

রামস্বামী মস্কোতে ভারত সরকারের অফিসে কাজ করেন। ছুটিতে দেশে যাচ্ছেন। বেশ শান্ত মাহুঘটি। আন্তে আন্তে কথা বলেন, আর কম কথা বলেন। নিজের পোশাক-আশাকের দিকে তত নজর নেই, পরের সাজ-পোছ নিয়ে মন্তব্য করতেও রাজী নন। বিয়ে করেন নি, আপাতত করবার ইচ্ছেও নেই। যাচ্ছেন দিল্লীতে। সেখানে মা-বোন-ভাই আছেন। আবার ফিরবেন মাস দুই বাদে।

রামস্বামীর ঠিক নীচের বার্থে থাকেন সালিম হক। আমেরিকায় পড়া সাক্ষ করে লওনে কদিন থেকে এই জাহাজেই ফিরছেন দেশে, করাচীতে। বেশ নম্র, গভীর—কিন্তু অসম্ভব ‘বাবু’। মানে, ‘সাহেব’। ফপিশ। স্মার্টকেশ থেকে প্রায় পনেরো-ষোলটা নানারকম টাই বার করে হাঙ্গারে সারি সারি সাজিয়ে রেখেছেন। যেন বেচতে বেরুবেন এখুনি। কেবিনের আর তিনজন আড়চোখে দেখেন আর ‘ই’ হয়ে যান। আরো ‘ই’ হয়ে যান, রোজ তাঁর স্মার্ট বদলানোর বহর দেখে। অনেক রাত পর্যন্ত বাইরে বসে মদ গেলেন আর ফ্লাস খেলেন—কখন যে কেবিনে ঢোকেন কেউ তা জানতেও পারেন না। আর তিন জনই তখন যার-যার বার্থে শুয়ে নাক ডাকেন।

আর তিনজন মানে, রামস্বামী, ডাঃ সেন (সানিয়েলের বন্ধু) আর মিঃ ঘোষ। তাঁরা ভোরে যখন জাগেন, সালিম হকের তখন গভীর রাত্রি। তাঁর ভোর হয় বেলা বারোটায়। তখন এই সাগর-নগরের আর সবাইয়ের লাঞ্চের সময়। সারা নগরের সব ডেকেই বেজে ওঠে লাঞ্চের ঘণ্টা—টুং টাং। সেই মৃদু ঘণ্টায় ইয়াকি সালিমের ঘুম ভাঙে না, মস্কোয়ের রামস্বামী মুচকে হাসতে থাকেন।

সন্দেহ হয়, কার আদর্শ ঠিক।

উপরের বার্থে মস্কো, নীচের বার্থে নিউইয়র্ক—দু’জনের চাল-চলনে আকাশ-পাতাল তফাত। মস্কো যখন বার্থে শুয়ে নাক ডাকায়, নিউইয়র্ক তখন ফ্লাসের আড্ডায় হাত ডাকে। মস্কো যখন গভীর নিদ্রায় স্বপ্ন দেখে, নিউইয়র্ক তখন বারে বসে রঙীন নেশায় চুর-চুরে! সকালে মস্কো যখন ব্রেকফাস্ট সারে, নিউইয়র্ক তখন পাশ ফিরে শোয়। দুপুরে লাঞ্চ শেষ করে যখন মস্কো, নিউইয়র্ক তখন দাঁতে ত্রাশ ঘষে। মস্কোর ঘড়ির সঙ্গে নিউইয়র্কের ঘড়ির অনেক তফাত—তাই দু’জনেই নিজের নিজের ঘরেই একঘরে।

সাগর-নগরের এই এক কেবিনেও তাই রামস্বামী আর সালিম প্রায় অপরিচিত। বরং এই দু’জনের সঙ্গেই ইণ্ডিয়ার সেন আর ঘোষের আলাপ, কিন্তু সালিম-রামস্বামীর সঙ্গে প্রায় বাক্যালাপই নেই।

ঐ কেবিনের আর দুটি বার্থের উপরটিতে ডাঃ মহাবিশ্ব সেনের আস্তানা এবং নীচের বার্থটি কে, ঘোষের। ডাঃ সেনের বয়েস ত্রিশের মধ্যে। রং ফর্সা,

দৌহারী চেহারার, আর সব চাইতে আশ্চর্যের, বাংলার কথা বলেন যখন তিনি, তখন সবটাই প্রায় বাংলা ভাষাই হয়। ইয়ার-নোজ-খোঁট বিশারদ হয়ে সেন বর্তমানে দেশমুখী। ইয়ার-নোজ-খোঁট যখন দেহের উপরাংশেরই ব্যাপার, তখন তার বিশারদের স্থান উপরেব বার্থেই হবার কথা এবং হয়েছেও দেখে খুশিই ক্রিয়ুত ঘোষ। উপরন্তু শুধু বিষ্ণু হলেও বা কথা ছিল, মহাবিষ্ণু সর্বদাই শিরোধার্য। আসলে উপরের বার্থে বিষ্ণু মশায় বিরাজ করায় ঘোষ মশায়ের খুশি হবার মুখ্য এবং গোপনীয় কারণ : মই বেয়ে মাচায় শোবার দায় ঘোষ মশায়ের নেই।

মহাবিষ্ণু মশায় মহাবৈষ্ণব কিনা জানিনে, তবে তিন বছর বিলেতে কাটিয়েও তিনি সম্পূর্ণ অহিংস—অর্থাৎ রীতিমত নিরামিষাশী। এমন কি, বিলিভী মতে ‘ডিম’কেও নিরামিষের দলে টানেন নি। শুধু তাই নয়, ঘোষ একদিন ভোরে উঠে দেখেন, মহাবিষ্ণু তাঁর মাচায় বসে আছেন। দবে নীল সমুদ্রের শেষ সীমার লাল সূর্য উদ্বিগ্নগামী।

অমন চূপচাপ বসে আছেন যে ?

ঘোষ অিগোস করায় অপ্রস্তুতে পড়ে গেলেন মহাবিষ্ণু। বললেন, এই ইয়ে, এই আফিকের মত কবচি একটু।

এবার অপ্রস্তুতে পড়লেন ঘোষ। বুঝলেন, ভদ্রলোক অদ্বৈত শ্রব্যবস্থা স্বরূপে বিলেত গেছিলেন বটে, কিন্তু জাত বিলিয়ে আসেন নি, ছাড়েন নি অদ্বৈত জন্তে আফিক।

ক্রিয়ুত ঘোষও একজন নিরামিষাশী। একই কেবিনের উপব-নিচে বার্থে সমানীন আরো আশ্চর্যের। পোলিশরা কি পুলিশ ? মানে, গোয়েন্দা পুলিশ—মাছয়ের পেটেব খবর জানতে পারে। নইলে কখনো দুই অহিংস-বাদীকে বিনা সংশয়ে এক ঘরেতেই পুরে দেয়।

তবে গোপনে বলি, ঘোষ মশায় কিন্তু একেবাবে পুরো নিরামিষাশী নন। হবার চেষ্টা কবেছিলেন, কিন্তু মায়ের মেহের চাপে পড়ে হতে পারেন নি। তাই চিংড়ি রুই ইলিশ পেলে তার খোসা বা তেল ছাড়িয়ে খসখসে অংশটুকু খান এবং আসটে গন্ধ তাড়াবার জন্তে ঝোলে মাখেন লেবু। ঘোষ-পুত্রকে অস্বস্ত মন্ত্রাবী করবার জন্তে ঐ অভ্যুত পদ্ধি অবলম্বন করতেন মেহময়ী ঘোষ-

জননী—এবং সেই থেকেই ঐ পছাই চালু রেখেচেন তাঁর আধা-নিরামিশাষী পুত্রপ্রবর।

তবে এটা সত্যিই, যে ভ্রলোক ডিম বা মাংস খান না। শুধু তাই নয়, বাড়িতে মিসেস কয়েকবার ডিমের ভালনার ডিম তুলে নিয়ে ~~কিছু~~ দম বলে চালাবার চেষ্টা করেছিলেন, কিন্তু গন্ধে সন্দেহ জাগায়, পেঁরে ওঠেনি।

অথচ ভ্রলোক গোস্-রেটির দেশ বেকট, দামাস্কাস, ইস্তাম্বুল সব চেষ্টে বেড়িয়েচেন, ঘুরেচেন ইয়োরোপের হাম-বিফ-পর্কের দেশে—ইংল্যাণ্ডে দারুণ শীতেও বেশ কিছুদিন কাটিয়েচেন, তবু ঐ লেবু আর রুই-ইলিশ-চিংড়ি না জোটায়ে শ্রেফ সেন্ট-পারসেন্ট নিরামিশাষী ব'নেই ছিলেন। ছ' সাতটা মাস ধ'রে চালিয়েচেন শুধু দই-ভাত, আলু-মটর সেক, রুটি-মাখন, জ্যাম-জেলি, আর সেই সঙ্গে বীয়ার।

বঁটে-মোটা মাহুৰটি। গায়ে রং মেটে, মাথায় অল্প টাক, মুখে হাসি, চোখে লাইব্রেরি ক্রেমের চশমা। বয়েস চল্লিশেব সামান্য ওপারে। ভ্রলোক তিন ছেলে মেয়ের বাবা, একটি পতিব্রতা স্ত্রীর স্বামী, বাপের এক-মাত্র পুত্র, শব্দের দ্বিতীয় নম্বর জামাই, বহু শালা-শালীর জামাইবাবু, দু-তিনটি কোম্পানীর ডাইরেক্টর, একটি পত্রিকার এডিটর এবং বাঙালী নাট্রেই যা—রাইটার! অর্থাৎ, একটি হোয়াট-নট।

ডার্লিং, ইজন্ট্ ইট্ নাইস ?

ইয়েস, মাই ডিয়ার !

ডেক চেয়ারে বসে সমুদ্রের দিগে চেয়ে মিঃ এবং মিসেস গ্র্যাটন গল্প করছেন। বয়স্ক দম্পতি। যাচ্ছেন বঙ্গে। তবে যে ক'দিন এই সাগর-নগর নোঙর বেঁধে থাকবে বোম্বাই মহানগরীর গায়ে, সে ক'দিনই তাঁরা ভারতীয় মাটির নগরে নড়ে-চড়ে বেড়াবেন। তারপর আবার ঐ জাহাজেই ফিরবেন তাঁদের স্বদেশে।

মিঃ এবং মিসেস গ্র্যাটন নীল রক্তের ইংরেজ। এসেন্সে রায়ফোর্ড সহরে নোরা-হিল পাড়ায় বাড়ি। বাড়ির নাম 'দি মাউন্ট'। কর্তা বিজিৎ কন্ট্রাক্টর, গিন্নী, সত্যিই গিন্নী। অর্থাৎ পেটের পাউরুটি আর নেশার স্বরাস জন্মে নটা-পাঁচটা অফিস করতে হয় না। আর ছেলে-পুলে নেই, দু'টি তো

প্রাণী ! আর লর্ড বীশাস নিয়মিতই তাঁদের খাবার টেবিলে খাদ্য পানীয়
সুগিষে যাত্চেন ।

এ বছরের হলিডে প্রোগ্রাম করবার সময় মিসেস জেন গ্র্যাটন
বলেছিলেন, ডার্লিং অনেকদিন থেকেই ইণ্ডিয়া দেখার ইচ্ছে । আমার বাবা
একবার সেখানে একটা ফ্যাক্টরীর মেনিনারী ইরেকশনের ব্যাপারে গেছিলেন,
কিন্তু তার কিছুদিন আগে আমি রোগ থেকে ওঠায় দুর্বল ছিলাম, কাজেই
সেবার যাওয়া হলো না । এবার যাবে ?

মিঃ হারি গ্র্যাটন বিস্ময় ইংরেজ । বেশ জানেন, স্ত্রীর ঐ জিজ্ঞাসার চিহ্ন
দিয়ে মত জানতে চাওয়া মানেই নিজের মতটা জানানো । তাছাড়া
পাশ্চাত্যের ধর্ম : গিন্নীর ইচ্ছেয় কর্ম । কাজেই কতটা এক কথায় রাজী হয়ে
গেলেন : বেশ তো ডিয়ার, চলো !

জেন গ্র্যাটন খুশিতে উপচে পড়লেন, নিজের সোফা থেকে উঠে আচমকা
কর্তার গালে একটা চুমু দিয়ে বললেন, ও, হারি, আই লাভ্ ইউ সো মাচ !
রিয়েলি, আ'ল বি সো হ্যাপি ! ট্যাজমাহাল, ক্যাশমিয়ার, লর্ড বুড়ার দেশ
দেখবার আমার ভারি ইচ্ছে !

ইচ্ছে কিন্তু পূর্ণ হলো না, যদিও হারি গ্র্যাটন টমাস কুককে তাঁদের
ইচ্ছা প্রকাশ করায়, তাঁরা ইণ্ডিয়া টুরের জন্তে একটা হাজার-কয়েক-টাকা-
গলানো প্রোগ্রাম পেশ করেছিলেন : বম্বে থেকে ক্যাশমিয়ার, ক্যাশমিয়ার
থেকে ডেল্‌হি ; সেখান থেকে হিল-রিসর্ট সিমলা এবং ব্যাক টু ডেল্‌হি । পরে
আগ্রায় ট্যাজমাহাল অ্যাণ্ড ফোর্ট, সেখান থেকে বেনারাসের হিন্দু টেম্পলস্ ।
তারপর বোম্‌ব্‌ গায়ায় লর্ড বুড়ার টেম্পল এবং কাছেই ক্যালকাটা, যা একদিন
ব্রিটিশ এম্পায়ারের সেকেন্ড সিটি ছিলো ; তা ছাড়া এটি হিস্টরিক সিটি : ইস্ট
ইণ্ডিয়া কোম্পানীর প্রেসিডেন্সি মার্কেট, লর্ড ক্লাইভের ব্রিটিশ কালের রোলার
চালাবার স্টাটিং পয়েন্ট ! তাছাড়া আছে ক্যালিঘাট—টেম্পল অব্ গডেস
ক্যালি, ভিক্টোরিয়া মেমোরিয়াল, ফোর্ট উইলিয়াম ইত্যাদি, অলসো পোয়েট
টেগোরস্ স্মৃতি নিকেট্যান । দেন্‌ প্রসিড টুয়ার্ডস্ ম্যাড্রাস অ্যাণ্ড ভিজিট সাউথ
ইণ্ডিয়ান টেম্পলস্ । অন দি ওয়ে ব্যাক টু বম্বে, ভিজিট মিঃ গ্যাণ্ডিজ
সেওয়াগ্যার্ড, অলসো ইণ্ডিয়ান আর্কিটেকচার অ্যাট আজান্টা অ্যাণ্ড এলোরা ।

প্রোগ্রাম শুনে জেন গ্র্যাটন আনন্দে নেচে উঠলেন । অবশ্য হারি

গ্র্যাটনকেও হাসতে হলো, কিন্তু মানস চক্রে দেখলেন যখন তাঁর লয়েডেস্ ব্যাক্সের পাশ-বইখানার বেশ কতকগুলো পাউণ্ড ক্রেডিট ঘর থেকে লাফিয়ে ডেবিট ঘরে এসে বসচে, বেচারি ভদ্রলোকের প্রাণ শুকিয়ে স্রেফ ড্রাইড পটেটো হয়ে গেছলো। (ভদ্রলোক ইংরেজ, তাই ইণ্ডিয়ান আমচুরের সঙ্গে তুলনা করা ঠিক নয়)।

কিন্তু উপায় কি ? ইণ্ডিয়া তো ইংল্যান্ড নয়, যে, একটুখানি এদিক ওদিক পা বাড়াতে গেলেই সমুদ্রে গিয়ে হুমড়ি খেয়ে পড়তে হয়। ভাস্ট ল্যান্ড ! সবটা ঘুরে দেখতে গেলে খরচা তো হবেই !

ও লর্ড ! সেভ মি ! হারি গ্র্যাটন হয়তো বাথরুমে সশব্দে ওয়াটার ট্যাপ খুলে দিয়ে (যাতে মিসেসের কানে না যায়) গোপনে সন্ধ্যা প্রার্থনা জানিয়েছিলেন, তাই দেখা গেলো পরম কারুণিক লর্ড তাঁর প্রিয় সম্ভানকে স্ত্রীরূপী অর্থ-ঘাতিকার হাত থেকে বাঁচালেন !

অর্থাৎ স্টর্ক ওয়াইডস ক্লাবে মিসেস স্লামসনের সঙ্গে দেখা হলো জেন গ্র্যাটনের। সর্ব দেশেই, মেয়েদের পেটে কথা থাকে না। জেন গ্র্যাটন হাতের কাছে মিসেস স্লামসনকে পেয়ে কামিং হলিডে-তে তাঁদের ইণ্ডিয়া ঘাবার প্রোগ্রাম খুলে বললেন।

অবশ্য, বলবার মতই খবর ! কারণ বেশির ভাগ মধ্যবিত্ত ইংরেজের হলিডে-প্রোগ্রাম হচ্ছে দু' পা এগিয়ে ব্রাইটন বা ক্যান্ডিফে সী-সাইডে যাওয়া, না হয় বড়জোর চ্যানেল পেরিয়ে প্যারি ঘুরে আসা ! আর, কবে টার্কি বা মার্টিন্ থেয়েচে তারই কাঁটা চামচে শোঁকা ! (যি খেয়ে হাত শোঁকার উপমাটাও এখানে অচল !)

কিন্তু মিসেস স্লামসন শুনেই কপালে চোখ তুললেন : সর্বনাশ ! মাই ডিয়ার, প্রীজ তোমাদের ঐ প্রোগ্রাম ভুপ করো !

কেন ? কেন ? ভয় পেলেন মিসেস গ্র্যাটন।

কেন, জানো না ? ইংল্যান্ডের 'মিস্ মেয়ো' চোখ ঘুরিয়ে হাত ঘুরিয়ে বলতে লাগলেন, আমাদের ইণ্ডিয়া ছেড়ে চলে আসতে হ'লো কেন জানো না ? জাট ইণ্ডিয়ান হাফ-নেকেড ফকির গ্যাণ্ডি তার দেশের লোককে নাছার ওয়ান অ্যাক্টি-ব্রিটিশ করে তুলেছিলো। ন্যাউ এভরিবডি হেট্‌স্ ব্রিটিশ ! তা ছাড়া পথে ইংলিশ গার্লস বা উইমেন দেখলেই সব ইনসান্টিং রিমার্কস পাস্

করে। সুবিধে পেলে এসন্ট্ করবারও চেষ্টা করে। এ ব্যাণ্ড অব ব্যাণ্ডিট্‌স্, জাইন্স, ট্রাবল্-মক্কারস্।

জেন গ্র্যাটন শুনে আঁতকে উঠলেন।

মিসেস স্লামসন দেখলেন ওষুধ ধরেচে। কাছেই জের টানলেন, তা ছাড়া রিলিজিয়াস ফ্যানাটিক্‌স্ এত বেশি যে কী বলবো মাই ডিম্মার। হিন্দুজ্ এ্যাণ্ড মুসলিম্ অলওয়েজ্ কাটিং ইচ্ আদার্স থ্রোট্‌স্। স্পেসালি, হিন্দুজ্ আর হরিব্ল্। আইডল্ ওয়াশিয়ার। তাদের গডেস ক্যালি একটি ব্র্যাক নেকেড উদ্যোয়ান, তার হাজব্যাণ্ডের বুক্‌র উপর দাঁড়িয়ে। ওদের লর্ড ক্লফায়েকস্ লাত্ উইথ হিজ্ অ্যাটি। ভাবতে পারো? আমি এসব বইয়ে পড়েছি। চাওতো, দেবো তোমাকে বইখানা। ভেরি ইন্টারেস্টিং। তা ছাড়া জানো।—

হঠাৎ নিজের মুখখানা জেন গ্র্যাটনের কানের কাছে এনে বললেন, তা ছাড়া জানো, দোজ্ ইণ্ডিয়ানস্—ও-ও-ও আ'ম ব্রাশিং—

থেকে গেলেন মিসেস স্লামসন। কিন্তু চিবন্তন কৌতূহলী নারী জেন গ্র্যাটন তাঁর কানটা এগিয়ে দিয়ে বললেন, কি, কি?

মিসেস স্লামসন এদিক ওদিক চেয়ে চুপিচুপি বললেন, দোজ্ পিপ্ল ওয়াশিয়ার অর্গানস্—আই মিন্—মেল অর্গানস্। আই জাস ফবগেট্ জ নেম ...আ, ইয়েস, ইয়েস, লিঙ্গম।

শুনেই জেন গ্র্যাটনের মিষ্টি মুখখানা পাকা আপেলের মত লাল হ'য়ে গেল। তাত্তাত্তি বলে উঠলেন, আ, মিসেস স্লামসন, প্লীজ, স্টপ।

কিন্তু টপ্ করে স্টপ করা বড় শক্ত। বিশেষ করে পবনিন্দা। প্রশংসা ছ' কথায় শেষ হয়, নিন্দা ছ'শো কথাতেও শেষ হয় না। অবশ্য মিসেস স্লামসন পান্টে দিলেন কথাব চাল। বললেন, অবশ্য তোমরা যাচ্ছো বাণ্ড, তবে সাবধানে থেকো। নেটিভগুলো ভয়ানক জাষ্টি, রাস্তাগুলো ভার্টি, গাড়িগুলো নয়েজি এবং স্পিডি। তা ছাড়া, নেকেড ফকিরস্, বেগার্স, পিকপকেট্‌স, কাউজ্ অ্যাণ্ড ব্লস্ অ্যাণ্ড ডগস্-এ সব টাউনগুলো ভর্তি।

মিসেস গ্র্যাটনের মুখের চেহারা দেখে বোঝা গেলো, ভয় পেয়েচেন। তাঁর আর দোব কি? অত ভয় দেখালে ভয় পাবারই কথা। কেউ ভয় পেলে আরো তাকে ভয় দেখাতে ইচ্ছে করে। মিসেস স্লামসন বলতে

লাগলেন, তবে মাই ভিয়ার, তোমরা শহর ছেড়ে এক পা-ও বাইরে যেয়ো না। চারদিকে ডেনস্ ফরেস্ট! টাইগারস, লাইয়নস, এলিফ্যান্টস, স্নেকস ইত্যাদি দেশটায় গিজগিজ করচে। তা ছাড়া এখনো ইণ্ডিয়ায় বহু ম্যান-ইটার্স, মানে, ক্যানিবালাস আছে! কাজেই—

আরো বলতে বাচ্ছিলেন মিসেস শ্রামসন, কিন্তু ক্লাব-ঘরের ঘোরানো দরজা ঠেলে মিস হ্যামারস্মিথকে চুকতে দেখেই তাড়াতাড়ি উঠে দাঁড়ালেন তিনি: ইল্লকিউজ মি, মাই ভিয়ার! ঐ যে কিটি আসচে, ওর সঙ্গে আমার একটু দরকার আছে!

মিসেস জেন গ্র্যাটন বাড়িতে এসে ভেঙে পড়লেন। স্বামীকে বললেন, হারি, আমাদের আর ইণ্ডিয়ায় গিয়ে দরকার নেই। বরং—

হারি গ্র্যাটন অবাক হলেন, সে কি, আমি যে আজই প্যাসেজ বুক করে এলাম!

আ-আ ডার্লিং! জেন গ্র্যাটন বিরক্ত হলেন: আমি দেখেচি, যেটা আমি চাইনে, ঠিক সেটাই আগে ঘটে! একটু ভেবে বললেন, অ'রাইট, ঐ সঙ্গে রিটার্ন প্যাসেজও বুক করে ফেলো। ঐ জাহাজেই ফিরবো। যে ক'দিন জাহাজ থাকবে বসেতে আমরা সিটিটা দেখে নেবো, কি বলো?

হারি গ্র্যাটনের বুকের উপর থেকে কে যেন একখানা ভারি পাথর সরিয়ে নিলো। তবু মুখখানা যথসম্ভব ভার করে বসলেন, কিন্তু—মানে, সে আবার কেমন হবে?—

জেন বোঝাতে বসলেন: কেন? বেশ তো হবে। এ পারফেক্ট হলিডে। নো ওয়্যারি, নো হোটেল। তাছাড়া পথে জেব্রলটার, সুয়েজ, ইজিপ্ট, এডেন, করাচী দেখবো। দেখো, পারফেক্ট রেস্ট পাবে। তাছাড়া সী-ভয়েজ চমৎকার, এ নিউ লাইফ!

অতএব বাগস অ্যাণ্ড ব্যাগেজেস গোছানো হলো। আসা-যাওয়ার টিকিট কেটে সাগর পাড়ি দিলেন গ্র্যাটন দম্পতি। বিল্ডিং কন্ট্রাক্টারি কাজে জীতকালটা মন্ডার সময়। কাজেই অসুখা সময় নষ্ট না করে কিছু পাউণ্ড-শিলিং পেন্স (নষ্ট নয়), খরচ করে স্বাস্থ্যোন্নতি করা এবং অভিজ্ঞতা সঞ্চয় করা বুদ্ধিমানের কাজ। অন্তত ইংরেজ তাই মনে করে।

সাগর-নগর হেলচে, হুলচে, চলচে রাজের কালো সমুদ্রের বুক চিরে ।
গভীর রাত । ক্রান্ত যাজ্ঞীদের বেশির ভাগই যার যার কেবিনে নিদ্রামগ্ন ।
অতি উৎসাহী যারা তারা তখনো লাউঞ্জে বসে গল্প করচে, কেউবা
মদের শেষ গেলাসটা সামনে রেখে বার-এ বসে ঢুলচে ।

অনেকেই আর বাইরে থাকতে পারেনি । যা ঠাণ্ডা ! হিমেল হাওয়ায় রক্ত
জমাট বেঁধে যাবার ষোণাড় ! তাই ডেক-চেয়ারগুলো খালি-কোল নিয়েই
গড়ে আছে ইতস্তত । যাজ্ঞীদের প্রথম দিনের আলাপ পরস্পরের পরিচয়ের
মধ্যেই সীমাবদ্ধ ছিল, ঘনিষ্ঠতা গড়ে উঠতে পারেনি এখনো ।

আপনার দেশ কোথায় ?

ইংল্যান্ডে কোথায় ছিলেন আপনি ?

কত দিন ছিলেন ?

আপনি ?—অর্থাৎ আপনি কি করেন ?

ব্যস ! ঐ পর্যন্ত ! যতটুকু জিগোস করা যায়, অথচ অভদ্রতা হয় না ।
মাহুষ নাকি সামাজিক জীব । তা যদি হয়, তবে এই সাগর-নগরেব
নাগরিকদের পরস্পরের পরিচয় নেবার দেবার অধিকারটুকু আছে বৈকি ?
তাতে যদি কেউ ঠোট ঝাঁকায়, তবে আর সবাই তার কাছ থেকে ঠোট
বৈকিয়ে চলে যাবে । তুমি এসেচো, স্বাগতম ! এসো বসি, গল্প করি ।
বলো, তুমি কে, কোথাকার, কে তোমার আছে ? বললে না ? সরি,
গুডবাই ! তবে মনে রেখো, এই সাগর নগরে কারোর ইনট্রোডাকশনের
দরকার নেই । এ ইংল্যান্ড নয় । ইংলিশ চ্যানেলও পার হয়ে এসেচো ।

বে অব বিস্কে বড় চঞ্চল ।

সাদা রংয়ের এক টুকরো শহরখানা ঢেউয়ের তালে তালে চঞ্চল হয়ে
উঠলো । ছুটু ছেলের সঙ্গে মিশলে ভাল ছেলেও যেমন ছুটু হয়ে ওঠে, ঠিক
তেমনই ।

বিস্কের ঢেউয়ে সারা শহরটায় যেন ভূমিকম্প । ভূমি-কম্প নয়,
জল-কম্প ।

অল্প দোলায় মন দোলে, প্রাণ দোলে—বেশ লাগে । বেশি দোলায় গা
গুলোয়, গা বমি-বমি করতে থাকে । বমি হয়েও যায় ।

এক ধরনের বমি নাকি বামা-দেরই একচেটিয়া ব্যাপার। তাও বিবাহিতা স্বামী সোহাগিনী বামা হওয়া চাই, নইলে বড় নিম্নের কথা! বিবাহিতা মেয়েরা কোন এক বিশেষ সময়ে ঐ ধরনের শব্দ তুললে তাদের শত্রু-শাস্ত্রীদের মনে স্তরের দোলা লাগে, বাঁধানো দাঁতে হাসির ঝলক দেখা যায়, কড়া-গিট্টী হুঁজনে কানাকানি করেন; কিন্তু এই দোলানি-সহরে এই আগমনী-ধ্বনি সার্বজনীন। এ 'কোরাসে' মেয়ে-পুরুষ ছেলে-বুড়োর সমান অধিকার। চলমান ধীপটির 'যাত্রা হলো শুরু'র এক অন্তত যাত্রা-সঙ্গীত।

সত্যিই অন্তত। জাহাজখানার এখানে ওখানে মাইকে বিদেশী কনসার্ট বাজতে থাকে, আর তারই ফাঁকে ফাঁকে এক মহাজাতীয় ঐক্যতান: ওয়াক্-ওয়াক্! চীন দেশ বা অচীন কোন দেশের বাসিন্দার ঐ একই বমন-স্বর! সাগর-নগরে কোন ভেদাভেদ নেই!

প্রথম দু-তিনটে দিন সাগর-নগরের এখানে-সেখানে বমি আর বমি। চলার পথে সিঁড়িতে, বেসিনে, বাথরুমে, লাউন্ড্রের মেঝেয়, ডেকের কোণে—সর্বত্র বমি। টকো গন্ধ—হুর্গন্ধ!

তবে রক্ষে, শহরটি গোড় দেশের পৌরসভার অধীনে নয়। তাই মেঝেয় ময়লা পড়তে না পড়তেই ক্লিনার আসে ছুটে, ঠেলা-বুরুশ হাতে। সেই হুঁচায় ঝলক বমি মুছে নেয় অন্তত কোশলে; মেঝেটা ফের ঝকঝক করতে থাকে।

লোকগুলোর মুখে যখন বিরক্তি ভাব নেই, তখন মনেও নেই হয়তো। এ কাজ তাদের গা-সওয়া, এ তাদের কর্তব্য! যাত্রা শুরুর প্রথম ক'টা দিন তারা তাই বুরুশ-বালতি নিয়ে প্রস্তুত হয়েই থাকে, অপ্রস্তুত যাত্রীদের লজ্জাটুকু মুছে ফেলে চটপট, তড়িৎ ঘড়িৎ!

সত্যিই লজ্জায় পড়তে হয়। প্রথমে তেমন কিছু বোঝা যায় না। মাথাটা ভার হয়ে থাকে, শরীরটা হয়তো খারাপ হয়েছে। কাজেই লাউন্ড্রে সোফায় চুপচাপ বসে বই পড়তে থাকে, কেউবা টেবিলে গিয়ে চিঠি লিখতে শুরু করে দেশের ঠিকানায়: শুরু হয়েছে যাত্রা, শেষ হবে শীঘ্রই, দেখা হবার দিন গুনচি; কেমন আ.....

লিখতে লিখতে গা-টা কেমন গুলিয়ে ওঠে। তাড়াতাড়ি নিজের কেবিনে যেতে চেষ্টা করে, কিংবা কাছেই কোন বাথরুমে। কিন্তু হুঁপা যেতে না

যেতেই পেরুটর ভিতরটা মোচড় দিয়ে ওঠে, হড়হড় করে বেরিয়ে আসে
বসি! ছড়িয়ে পড়ে মেঘের!

তখন সারা শরীর স্বস্তির সিক্ততায় ভরে যায়, কিন্তু মনটা ভরে যায়
অস্বস্তিতে। ছিঃ ছিঃ! লোক কি ভাবলো!

কিন্তু তার কাছেই লোকটি তখন ভাবচে, তার শরীরটাও গুলোজে যেন!

এই ক'দিন ডাইনিং সেলুনের অনেকগুলো চেয়ার-টেবিলই খালি থাকে।
সাগর-দোলায় সাগর-নগরের অনেক নাগরেরই এমন অবস্থা হয় যে, কেবিন
ছেড়ে ডাইনিং হলে বসবার উপায় থাকে না। অথচ না খেলেও উপায় নেই।
পেট খালি থাকলে পা আরো গুলোয়, শরীর দুর্বল হয়ে পড়ে। কাজেই
নিজের বার্থে শুয়ে শুয়েই বেল টিপে স্টুয়ার্ডকে ডাকতে হয়, বলতে হয় : যা
ইচ্ছে দিয়ে যাও!

এই 'সী-সিকেনেস'এ ওষুধের তেমন দরকার নেই। পথা, হাঙ্গা, মিল্ক
পাওয়া। সাগর-নগরের কর্মীদের সে সব জানা। ছুটে গিয়ে কিচেন থেকে
এনে দেয় ফলের রস, বিস্কুট, জ্যাম-জেলি, চা বা কফি!

এমনি করে বড়জোর দু'তিনটে দিন কাটাতে হয়। তারপর ডাইনিং
সেলুনে যার যার চেয়ারে সে-সে জাঁকিয়ে বসে, মেহু দেখে অর্ডার
দেয় পছন্দমত খাবার। লাউঞ্জে ভিড় জমতে শুরু হয়। ডেকে
চেয়ারগুলো খালি পাওয়া হয় মুশ্কিল।

সারা জাহাজটা চষে বেড়াচ্ছে রেজা। কে. এম. রেজা। ছোট্ট-খাটো
মাহুঘটি। গায়ের রং চকোলেটের মতই। বয়েস পঁচিশ-ছাব্বিশ হবে। পরনে
কর্ডের প্যান্টালুন আর ছিটের সার্ট। মুখে মুহু হাসি।

রেজার সঙ্গে কে. ঘোষের আলাপ হয় প্যারিতে, এফেল টাওয়ারের
মাধ্যম। কয়েক হাজার ফিট উপরে এই দুই বাদামী রংয়ের ভদ্রলোকের
দেখা হওয়ার স্বভাবতই আলাপটা জমে ওঠে। এবং কথায় কথায় জানা
যায় দু'জনেরই এই 'বাতরি' জাহাজেই ফিরতি টিকিট কাটা। ফেরবার
পথের সঙ্গী। সঙ্গে সঙ্গে আত্মীয়তা আপনা থেকেই গড়ে উঠলো যেন।

এফেল টাওয়ারের সর্বোচ্চ প্ল্যাটফর্মটার রেলিংয়ে হেলান দিয়ে সেইন
নদীর দিকে মুখে করে শুক হলো গল্প :



12350

আপনি বুকি হাইয়ার স্টাডিতে এসেচেন? প্রশ্ন করলেন কে.
ঘোষ!

তুনে হেসে উঠলেন কে. এম. রেজা : তা বলতে পারেন, হাইয়ার স্টাডিই
বটে! পশ্চিমের দেশগুলোকে আর লোকগুলোকে স্টাডি করতে এসেছি।
বলেই আসল উদ্দেশ্যটা ব্যক্ত করলেন রেজা : মানে, ইচ্ছেটা এদেশের
হালচাল দেখা!

ঘোষ বললেন, ও বুঝেছি। পূজিগতি। চাপ-চাপ পূজি থেকে কিছুটা
গলাতে চান!

যা বলেন! রেজা বললেন, তবে শুনুন। চাকরি করি কালকাটা
ইলেকট্রিক সাপ্লাইয়ে। খাই বাপের হোটেলে। পায়ে বাধন নেই, মন
মেঘমুক্ত। মাথার উপরে চারটি চাকরে দাড়া। কাছেই আমার খরচের
ঘর শূন্য। চাকরির প্রায় সব টাকাটাই ব্যাংকে জমতে জমতে ক্রমেই
হয়ে পড়লাম পাতি-বুজোয়া!

কেন, নেশা-টেশা?

নাথিং অব দ্য স্ট! সিনেমা-সিগ্রেট কিছূ না। মাসে চার-পাঁচ গ্যালন
গুধু পেট্রল খরচ—ছুটির দিনে মোটর সাইকেলটা নিয়ে কলকাতার আশে-
পাশে বেরিয়ে পড়া! আর ইচ্ছে ছিলো বেরিয়ে পড়া এই দেশে! হ্যাঁ, এই
দেশে আসা আমার স্বপ্ন ছিলো, সাধ ছিলো, প্রতিজ্ঞা ছিলো। তাই অর্থ
সঞ্চয়ের সাধনা শুরু করেছিলাম।

তুনে ঘোষ চমকিত হলেন : বলেন কি? আমার ধারণা ছিলো, হয়
সরকারী পয়সায়, না হয় বড়লোক স্বত্তর বা বাপের পয়সা ছাড়া এদেশের
মাটিতে পা দেওয়া শক্ত। আপনি আমার ভুল ভাঙলেন দেখছি।

রেজা বললেন, তা ভাঙলাম হয়তো এবং সেজ্ঞে হুঃখিত। তবে জেনে
রাখুন, ইচ্ছে থাকলে ইচ্ছামত তার ব্যবস্থা করেন।

তা বটে! তা বটে! ঘোষ সায় দিলেন : তারপর, কি রকম দেশ-টেশ
দেখলেন বলুন।

রেজা বললেন, পায়দলে যতটা দেখা যায়, সবটাই খুঁটিয়ে খুঁটিয়ে
দেখেছি।

তার মানে?

রেজা হাসলেন, তার মানে পরসা কম, পিয়াস বেশি। এসেচি জাহাজের টুরিস্ট ক্লাসের নীচুতলার ডেকে প্রায় জাহাজের খোলের মধ্যে। খাচ্ছি জ্যাম-কুটি আর কফি। রাত কাটাচ্ছি ওয়াই-এম-সি-এ বা ইয়ুথ হোস্টেলে আর হাটটি পাশদলে। অর্থাৎ দেশগুলোর মাটি ছুঁয়ে ছুঁয়েই চলেচি, দেখচি হাতড়ে হাতড়ে।...চলুন, এই পোস্ট অফিস থেকে চিঠি ফেলে নীচেয় নামা যাক!

এফেল টাওয়ারের চূড়ায় পোস্ট অফিস। ওখানে বসে টাওয়ারের ছবিআঁকা পোস্টকার্ডে চিঠি লেখা আর টাওয়ারের সচিত্র ষ্ট্যাম্প মেয়ে দেশের ঠিকানায় সে চিঠি ছাড়ায় একটা উত্তেজনা আছে। এফেল টাওয়ারে উপস্থিতির স্বাক্ষর! এত খরচ করে গেলাম, অথচ লোককে তা জানানো যাবে না—এ দুর্বলতা মনুষ্য-জনোচিত। ফরাসী সরকার এই দুর্বলতার স্বযোগ নিতে ছাড়েন নি।

চিঠি ফেলে ছুজনে লিফটে করে নেমে এলেন নীচেয়। এসেই দেখেন, এফেল টাওয়ারের তলায় সাজানো বাগানটায় লোকে লোকারণ্য! কী ব্যাপার? না, মেট্রো গোল্ডেন মায়ায় ছবি তুলচে। সঙ্গে রয়েছেন নাগক লুইস জর্ডন! জর্ডন, টাওয়ারের একটি পাথর কাছে ক্যাম্প-চেয়ারে বসে আছেন, তাঁর পালা তখনো আসেনি। কাজেই ভক্তবৃন্দ তাঁর চারধারে দাঁড়িয়ে তাঁকে সশ্রদ্ধ-নেত্রে গিলচে।

রেজা বললেন, ঠুর অটোগ্রাফ নেবো।

ঘোষ বললেন, সেকি? ঐ ব্যুহ ভেদ করে?

নিশ্চয়ই।

আর আশ্চর্য, রেজা লগবগ করতে করতে জর্ডনের সামনে গিয়ে কী যেন বলে মেলে ধরলেন তাঁর ডায়েরি-বই আর কলমটা। ঘোষ দূর থেকে দেখলেন, জর্ডন হাসলেন, কী যেন বললেন, পরে কলমটা নিয়ে রেজার ডায়েরি বইতে লিখে দিলেন তাঁর নাম। রেজা 'খ্যাংকস' জানিয়ে হাসিমুখে বিজয়-গর্বে চলে এলেন। ফরাসী ভক্তবৃন্দের চোখ পড়লো রেজার উপর। হাঁ হয়ে দেখলো তারা বাদামী লোকটার সাহসটা।

ঘোষ জিগ্যেস করলেন, কী বললেন গিয়ে?

বললাম, ইউ আর ক্রম আমেরিকা অ্যাণ্ড আই'ম ক্রম ইউরোপ; অ্যাণ্ড উই

মীট্ . ইন্ প্যারী ! ইজনট্ ইট্ নাইস ! এবং জর্ডন দেখলাম নাইস
ভ্রলোক !

তারপর ছবি তোলা দেখে, দু'জনে বিদায় নিলেন । ঠিক রইলো আবার
দেখা হবে 'বাতরি' জাহাজে, ফেরবার দিনে ।

ফরাসী জনসমুদ্রে মিশে গেলেন রেজা আর ঘোষ ।

কিন্তু আবার তাঁদের দেখা হলো লগুনে ইণ্ডিয়া হাউসে । রেজা তাঁর
ডায়েরি বইখানা বার করে দেখালেন ঘোষকে, এই দেখুন !

ডায়েরিতে ইনগ্রীড বার্জম্যানের সই ।

এসই কেমন করে যোগাড় করলেন ?

ইনগ্রীড বার্জম্যান তখন লগুনের এক থিয়েটারে 'জোয়ান অব আর্ক'
বইতে নিম্নমিত জোয়ানের পার্ট করছেন ।

রেজা বললেন, অভিনয়ের শেষ দু'তিন দিন চেষ্টা করেছিলাম, কাছে
ঘেঁষতেই পারিনি । যা ভিড় ! শেষে একদিন গাড়িতে ওঠবার সময় ভিড়
ঠেলে কোনরকমে গিয়ে দাঁড়িলাম তাঁর সামনে, অটোগ্রাফ দাও ! আশ্চর্য,
বার্জম্যান অনেকের খাতাই সরিয়ে দিচ্ছিলেন, কিন্তু আমার ডায়েরিখানা
টেনে নিয়ে ঘ্যাঁচ-ঘ্যাঁচ করে সই করে দিলেন ; জিগোস করলেন, ইউ
ইণ্ডিয়ান ?

বললাম, ইয়েস !

ঘোষ বললেন, আশ্চর্য আপনার অধ্যবসায় । অথচ বলেছিলেন না—
আপনার সিনেমার নেশা নেই ?

রেজা হাসলেন, ঠিকই বলেছিলাম । সিনেমা দেখার নেশা নেই, তবে
সিনেমা স্টারদের দেখার নেশা আছে ; অর্থাৎ যা দেখতে পয়সা খরচ হয় না ।
এক কথায় অনর্থক নেশা করে অর্থনাশ করার বিপক্ষে আমি ।

ঘোষ খুশিই হলেন রেজার কথায় ।

সেদিন বিকেলটা রেজা আর ঘোষ একসঙ্গে বেড়িয়ে বিদায় নিলেন এবং
তার পর আবার দেখা এই সাগর-নগর 'বাতরি'তে !

সাগর-নগরের নীচের ডেকে কম দামের কেবিনে রেজা থাকেন বলে নয়,
বয়েসে রেজা ঘোষের চাইতে অনেক ছোট, উপরন্তু এই নগরের নাগরিকদের
মধ্যে রেজাই হচ্ছে তাঁর পূর্ব-পরিচিত, কাজেই ঘোষ তাঁকে একদিন

‘তুমি’ সন্ধান করে বললেন, দেখো রেজা, তোমাকে দেখা অবধি কেমন যেন ছোট ভাইয়ের মত ‘তুমি’ বলতে ইচ্ছে করচে। মে আই ?

নিশ্চয়ই। রেজা এক কথায় রাজী হয়ে গেলেন। উপরন্তু রেজাও একটি প্রস্তাব করলেন : দেখুন, আপনাকে দেখার পর থেকেই আমার দাদাদেব কথা মনে চলে। কাজেই আপনাকে কে-জি প্রাস দা’—কেজি-দা’ বলে ডাকলে কেমন হয় ?

চমৎকার হয়। কে-জি আনন্দে জড়িয়ে ধরলেন বেজাকে।

জড়িয়ে ধরে নেই বটে, কিন্তু মিস এনাক্সী রাওয়ের গা ঘেঁষে এমন ভাবে দাঁড়িয়ে আছেন সি. মিটার যে, সেদিকে চোখ পড়লে চোখ সরানো দায়। অবশ্য সাগর-নগরে চক্ষুজ্জ্বার বালাই নেই। এ সমাজে প্রকাশ্যে ছি-ছি করবারও অধিকার নেই কারোর। মনের মিল হলেই হলো, ভাব জমাতে ক্ষতি নেই।

প্রমেনেড ডেকের শেষ প্রান্তে যে নির্জন জায়গাটুকু বাড়তি এগিয়ে গিয়ে খুঁকে পড়েছে সমুদ্রের উপর, সেইখানেই তাঁরা জায়গা কবে নিয়েচেন একটু নিভৃত্তে আলাপ কববার আশায়।

কাদের দৃষ্টি তাঁদের দিকে সে থেয়াল নেই হু’জনেবই, দৃষ্টি তাঁদের সমুদ্রের স্তূর্ভ সীমায়। সেই শেষ সীমানায় আকাশ-সমুদ্রের মেশামেশি।

ভারতের দক্ষিণী মেয়ে মিস এনাক্সী বাও যেন আপন মনেই বললেন, ওয়াওয়াফু।

সি. মিটার মানে চিত্ত মিত্র তাঁর ফ্রেক-কাট দাড়িতে একবার হাত বুজিয়ে নিয়ে জিগোস করলেন, হোয়াট !

এনাক্সী বললেন, কেন, ঐ আকাশ আর সমুদ্র। কেমন মিশে আছে এক হয়ে। আকাশের ফিকে নীল, আর সমুদ্রের গাঢ় নীলের মিলটুকু দেখবাব মত।

সি. মিটার এবার তাঁর সূচলো গোঁফের ডগাটা একপাক মুচড়ে দিয়ে বললেন, আমাদের মিলটাও কিন্তু দেখবার মত মিস রাও।

ভার মানে ? হোয়াট ডু ইউ মিন ?

মিটার হাসলেন, কেন আপনার ঐ ফিকে নীল শাড়ি আর আমার এই নেভি ব্লু স্কাট। এই দুই নীলওতো প্রায় মিশে আছে।

এনাকী হাসলেন, ইউ নট! একটু সরে দাঁড়ালেন এনাকী : এবার ?

বিচ্ছেদ। অবশ্য বাইরে থেকে তাই-ই মনে হচ্ছে। ঐ সীমান্তেও তেমন মনে হয়, যখন ওখানে দেখা দেয় কালো মেঘ। তা বলে কি দুই নীল আলাদা হয়ে যায় মিস রাও ? আসলে ব্যাপারটা কি জানেন—থাক সে সব কথা।

থেমে গেলেন সি. মিটার। অর্থাৎ কোথায় থামতে হয়, জানা আছে তাঁর।

কিন্তু এনাকী থামবেন কেন ? আসল ব্যাপারটা তো জানা দরকার! থামা-কথা নিয়ে মাথা ঘামানো বড় কষ্টকর! বললেন, কী বলছিলেন বলুন!

থাক! চলুন বরং নীচেয় যাই। এখানে বড় ঠাণ্ডা হাওয়া! মিটার ঘুরে দাঁড়ালেন।

নো, আই ওট্। রেলিং ধরে দাঁড়িয়ে রইলেন এনাকী।

আচ্ছা, চলি তবে মিস রাও! আবার দেখা হবে। সি. মিটার কাঠের সিঁড়ি বেয়ে নীচেয় নেমে গেলেন।

এনাকী চেয়ে রইলেন দূর-সীমান্তে। দুই নীল তেমনই মিশে আছে!

সত্যিই বাইরে ঠাণ্ডা হাওয়া। ডেক-এ বেশিক্ষণ দাঁড়ানো দায়। ইংল্যান্ডের মেঘলা আকাশে সূর্যের কোন দায়িত্ব নেই। কিন্তু এই মেঘহীন আকাশে খর সূর্যেরও কোন তাপ নেই যেন। হিমেল হাওয়ায় মুছে গেছে সূর্যের রোদ্দ-প্রতাপ। নরম ঠাণ্ডা সূর্যের কাজ এখানে দিনের আলোটুকু জালিয়ে রাখা। পূর্বের সূর্য-কাতর লোকগুলোর কাছে পশ্চিমের সূর্য হাওয়াস্পদ।

ক্রমে বেলা গড়িয়ে এলো সন্ধ্যার দিকে। আকাশের ক্যাকাসে সূর্য, লাল হয়ে গেলো, বৃষ্টি লজ্জায়। শেষ পর্যন্ত সমুদ্রের জলে ডুবে বাচলো। আকাশ-সমুদ্রের দুই নীল কখন যেন অহুরাপে লজ্জা-রাঙা হয়ে গেলো।

মিস এনাকী রাও সেই মুহূর্তে প্রায়মেনড ডেক থেকে নেমে এলেন। লাউঞ্জের টেবিলে ছড়ানো সচিৎ পোলিশ ম্যাগাজিন একখানা খুলে নিয়ে হলে বসলেন সোফায় : মিটার লোকটা অদ্ভুত! মিষ্টিরিয়াস্।

সি. মিটার কাঠের সিঁড়ি দিয়ে প্রমেনেড ডেক থেকে নেমে গেলেন বটে 'এ' ডেকে, কিন্তু চিলড্রেন'স রুমের পাশ দিয়ে, লাউঞ্জের ভিতর ঢুকে সোফা কোঁচ বাঁচিয়ে ঢুকলেন বাঁ। দিকের সব প্যাসেজটায়। প্যাসেজের শেষপ্রান্তে দরকারি জিনিসপত্রের দোকানখানার কাউন্টারে হাসিমুখে দাঁড়িয়ে এক পোলিস তরুনী। মিটার সেই চিত্তাকর্ষক মেয়েটির দিকেও চেয়ে দেখলেন না। বরং অন্তমনস্ক হয়েই দোকান পার হয়ে, বাঁবার শপ্, বিউটি পার্লারের পাশ দিয়ে এসে পড়লেন এন্ট্রেন্স হলে। সামনেই চওড়া সাজানো বড় সিঁড়ি : সাগর-নগরে উপর-নীচ করবার কার্পেট-বিছানো ধাপ।

আশ্চর্য, সি. মিটার সিঁড়ি দিয়ে উপরে উঠতে লাগলেন আবার সেই প্রমেনেড ডেকে। অবশ্য সিঁড়ি দিয়ে উঠেই সামনে শ্যো কিং রুম আব 'বার'। কাজেই এনাকী রাণ্ডের অলক্ষেই ঢুকে গেলেন বার-এ।

ঘরে সবাই প্রায় দল পাকিয়ে জটলা করচে। তাসের আড্ডাও চলেচে। সামনে রাখা সোডা জইস্কির বোতল গেলাস। আর চারদিকে কুওলি-পাকানো সিগ্রেটের ধোঁয়া। এখানেও অ্যামপ্লিফায়ারে বাজচে মৃদু মধুর সুর এবং সেইসঙ্গে আড্ডার হঠাৎ বেসুরো আওয়াজ আর সফেন সুরার বোতল খোলার আচমকা শব্দ!

বার-এর এক কোণে আড্ডা জমিয়েছেন সানিয়াল, রামস্বামী, রয় আর কে-জি। সি. মিটারকে ঢুকতে দেখে সবাই ঘেন লুফে নিলেন তাঁকে।

আসুন, আসুন, সি. মিটার! ছ'হাত বাড়িয়ে দিলেন সানিয়াল।

এক শ্রাস হবে নাকি বীঘার? কে-জি প্রস্তাব করলেন।

সোফায় রয় আর রামস্বামীর ফাঁকটায় নিজের দেহটাকে ঢুকিয়ে দিয়ে সি. মিটার বললেন, আপত্তি নেই। তবে পরস্পরদী হওয়া চাই।

অপরোধ?

সামনে আমার অনেক খরচ!

কারণ?

ঐ যে মেয়ে! জানলার ফাঁক দিয়ে মিটার দূরে দেখালেন এনাকীকে। সেই তেমনি দাঁড়িয়ে নিরালা বাড়তি কোণটায়!

কিন্তু দাড়ি-শাড়ির হঠাৎ ছাড়াছাড়ি কেন জানতে পারি কি? সানিয়াল প্রশ্ন করলেন।

রয় বললেন, আমরা এখান থেকে লক্ষ্য করছিলাম, দিবি। দু'টি কপোত-কপোতী রেলিং ভর দিয়ে দাড়িয়ে আছেন—হঠাৎ কপোত পতপত করে উড়ে গেলেন।

এবং জুড়ে বসলেন আমাদের মাঝখানে! রামস্বামী কথাটা শেষ করলেন।

ব্যাপারটা আংশকাজনক!

তাইতো মনে হচ্ছে।

আজ্ঞে না! মিটার যেন খাবা মেয়ে খামিয়ে দিলেন সবাইকে : জেনে রাখুন, প্রেমের পথ ঘোরালো। তাই ঐ মিস রাওয়ের কাছ থেকে সোজা এখানে না এসে অনেকটা পথ ঘুরে আসতে হলো। ...কই, আমার গেলাস কই?

রয় বললেন, আমি দিচ্ছি এনে। ইউ আর মাই গেট। কিন্তু অন্ দিস্ কণ্ডিশন, যে, শাড়ি-দাড়ির প্রেমোপাখ্যান শোনাতে হবে!

মিটার ফ্রেঞ্চকাট দাড়িতে হাত বুলিয়ে হেসে বললেন, নিশ্চয়ই নিশ্চয়ই। আমি তো বলবার জন্তে মুখিয়ে আছি! আপনারা অল্পগ্রহ করে শুনলেই হয়। মানে, প্রেম করায় যত না আনন্দ, সে কথা প্রকাশ করায় ততোধিক শাস্তি। একটি মেয়ে আমাকে ভালবাসে, আমার জন্তে পাগল, আমার কথা শয়নে-স্বপনে ভাবচে—এতবড় একটা খবর চেপে রাখলে হার্ট ডিজিজ হবেই।

রয় ততক্ষণে সোফা ছেড়ে উঠে বার-এর কাউন্টারে গিয়ে একগেলাস বীয়ার এনে রাখলেন সামনের টেবিলে : এবার শুক্ হোক উপাখ্যান!

মিটার এক চুমুক খেয়ে গলাটা ভিজিয়ে নিলেন : ঐ যে মেয়ে মিস এনাকী রাও, উনি ফিরচেন ইংল্যাণ্ড থেকে মিডওয়াইফ্রি পাশ করে। বয়েস বেশি নয়, ভদ্রমহিলার মুখ চোখ চেহারা দেখেই বুঝেচেন নিশ্চয়ই, কিন্তু এই বয়েসেই তিনি নিজেই নিজের অভিজ্ঞাবিকা। ইণ্ডিয়ায় বৃদ্ধো মা আর ছোট ভাই। মিস রাও ওখানে হস্পিটালে চাকরি করেচেন, পড়চেন, পাশ করেচেন এবং খরচ-খরচা করেও দেশে মা-ভাইকে খরচ পাঠিয়েচেন!

বলেন কি ? কে-জি বললেন, রীতিমত গুণবতী মহিলা !

শুধু গুণবতী নয়, রূপবতীও ! ইন্সট ইট ?

অ'কোর্স ! প্রায় সবাই সায় দিলেন !

কাজেই—মিটার বললেন, জাহাজে উঠিয়া ও-রূপ নেহারিছ, সেই হতে লেগে গেলো ভালো ! আর ভালো লাগলেই আমার কেমন একটা রোগ, কেবল 'ভালো-ভালো' বলা। কাজেই এই দু'টো দিন স্বযোগ মত কেবল 'ভালো-ভালো' বুলি কপচেচি। তোমায় দেখতে ভালো, তোমার চলন ভালো, বলন ভালো, শাড়ি পরার ধরন ভালো, হাতে পায়ের গড়ন ভালো ইত্যাদি সব স্বমন্ত্র যদি কোন মেয়ের কানের কাছে ক্রমাগত জপ করা যায়—তবে সে মেয়েকে জপাতে বেশিদিন লাগে না। ভালো যে বলে, তাকে ভালো লাগে না, এমন পাষণী কে আছে এই ছুনিয়ায় ?

তা ঠিক ! রামস্বামী বললেন !

সানিঘাল একটা দীর্ঘনিশ্বাস ফেললেন, আমি ছাই তাও পারলাম না। গিন্নীকে 'ভালো' বলতে না পারায় তাঁর মুখ-ঝামটাই খেয়ে গেলাম। আবার ওদেশটার ভালো-ভালো মেয়ে দেখলাম কত, কত কথাও বললাম, কিন্তু মুখ দিয়ে 'হাউ বিউটিফুল' এই কথাটুকু বলতে পারলাম না ভয়ে আর সঙ্কোচে।

ব্রাদার ! ঐখানেই তো মজা ! মিটার হাসলেন : নিন্দে করা সোজা, ভালো বলা বড় শক্ত। ...আমার তো এই চল্লিশের কাছাকাছি বয়স হলো—এবং নেতির দৌলতে এবার নিয়ে এই সমুদ্র পথে চতুর্থবার যাত্রা। এই সমুদ্রে পেরেছি মলয় হাওয়া, দেখেছি ঝড়ো হাওয়া ; শুষ্কিত হয়েছি বোমার আলোড়নে, বিহ্বল হয়েছি জাহাজ-ডুবিতে। দেখেছি ব্রাদার, এই সমুদ্রে অনেক কিছুই দেখেছি। দেখেছি এই সমুদ্রের তীরে তীরে নানা আভের, নানা লোকের বসতি। গিছেচি তাদের সঙ্গে, একাত্মা হয়ে গেছি তাদের সঙ্গে। বসুধৈব কুটুমকম্। আর এই কুটুমিতা পাতাতে পরসা খরচ নেই, শুধু মুখে একটু যধু ঝরানো : ঐ হাউ-বিউটিফুল ! কী স্বন্দর ! বিদেশে শুধু এইটুকুতেই বাজীমাং ! তাদের একজন হয়ে যেতে আর কোন বাধা থাকে না ! কুটনীতি বিশারদদের এই কথাটুকু শ্রাণ খুলে বলতে বাধে বলিই তো আজ এত বোমা ফাটাকাটি আর মাথা ফাটাকাটি।

হঠাৎ রয় থামিয়ে দিলেন মিটারকে : তখনতে চাইলাম প্রেমোপাখ্যান,
আর শুরু করলেন রাজনীতি ! বামা ছেড়ে বোমা-র কথা কেন ?

সরি ! মিটার বললেন : হাউ বিউটিফুল কথাটুকুতে যেমন এই
বহুকরা বশ, তেমনি বহুকরার সুন্দরী বাসিন্দারাও বশ । অতএব মিস
এনাকী রাও-ও বশ হলেন !

কে-জি তাল দিলেন, বেশ, বেশ ! তা কতদূর এগিয়েচে ?

মিটার বললেন, শুকনো কথার পালা হয়েছে সাক্ষ, এবার চলচে মন-দেয়া-
নেয়ার পালা !

সানিয়ার টিল্লনি কাটলেন, কিন্তু হঠাৎ পালিয়ে এলেন কেন ?

মিটার বললেন, একটা সমস্যা দিয়ে এলাম, সমস্যা দিলাম সমাধান করতে !
মাষ্টারমশায় ছাত্রকে জিওমেট্রির প্রলেম দিয়ে বলেন যেমন, কষো, এও ঠিক
তেমনি । প্রেমের ব্যাপারে প্রলেম এগিয়ে ধরতে হয়, যাতে অংক কষে
উত্তর বার করতে পারে ; হঠাৎ উত্তর যদি দেওয়া যায়, 'আমি তোমায়
ভালবাসি'—তাতে গালে আঁচমকা চড়্ খাবার সম্ভাবনা, আর চাড্ থাকে না
মেয়েদের ! আদার, প্রেমের-ব্যাপারে প্রলেম বড় প্রয়োজন !

রয় সিগ্রেট টানছিলো । বললেন, মশায় দেখিচি প্রেমের গুরুঠাকুর !

মিটার আর এক চুমুক বীয়ার খেয়ে ঠোট দিয়ে গৌফটা মুছে নিয়ে
বললেন, তা যা বলেচেন ! প্রেম-ভিখারিনীদের প্রেম বিতরণ করতে
করতে কখন যে গুরু ব'নে গেচি, তা নিজেরই খেয়াল নেই । তা
কম তো হলো না ? আঙুলের দাগে যে ক'টা দাগ গোনা যায়, তার
চাইতে বেশিই হবে ! এই সব জাহাজের দৌলতে কত ঘাটের জলই
না খেলাম ! দেখলাম কত জাঁহাজ মেয়ে, কত সরল শাস্ত নব্বলতা !
আর বুঝেচি স্ক্রুট, ব্ল্যাকস্, শাড়ি, ঘাঘরা, কিমোনো, পায়জামা—আলাদা
জাতের হলেও, তাদের প্রেমের স্বতোর টানা-পোড়েন একই রকম ।

রায়স্বামী গম্ভীর হয়ে শুনছিলেন আর গেলাসে চুমুক দিচ্ছিলেন ।
হেসে বললেন, আছেন বেশ !

তা আর কি করা যায় ? মিটার নিজের গৌফ চুমুকে নিলেন :
নিজের বলতে কেউ নেই, সব খেয়ে বসে আছি । বাপের ভিটে এখন
পাকিস্তানের কবলে । তাই ঘাটে ঘাটে ঘুরে বেড়াই এই জাহাজখানার

মতোই। নিঃসঙ্গ জীবন! সঙ্গী চাই তো! কিন্তু কোন পুরুষের সঙ্গে সময় কাটানো অসম্ভব। মনে হয়, সময়টা নষ্ট হলো। বলেই হাসলেন, অবশ্য এখন নয়! এ সময়টা ইস্টারভ্যাল!

এমন সময় বার-এর জানালা দেখা গেলো মিস্ এনাস্কী রাও প্রমেনেড ভকের নিরালা কোণ থেকে নেমে গেলেন নীচেয়।

সানিঘাল হেসে বললেন, রাই নীচেয় নামলেন।

মিটার বললেন, যাই, আমিও যাই।

তবে কে-জি ছাড়া সবাইকেই উঠতে হলো। সারা সাগর-নগরে বেজে উঠলো প্রথম ব্যাচের ডিনার বেল—টুং টাং-টুং টাং।

কে-জি সেকেন্ড ব্যাচে ডিনারে বসেন।

সেকেন্ড ব্যাচেও ডাইনিং হলটা প্রায় ভর্তি হয়ে যায়। পোর্ট-হোলের পাশেই একটা চার-চেয়ারের টেবিলে বসেন কে-জি আর দুই শান্তডী-বৌ : মিসেস ফোর্ড সিনিয়র এবং জুনিয়র। শান্তডী ফোর্ডের কুক্ষিত, রেখায়িত মুখে 'ব্রিটিশ-মেড' ছাপ, কিন্তু বৌ-ফোর্ডটির ঢলঢলে মুখে লাংগোর তুলি বোলানো। গোলাপী গালের ডান দিকে একটি তিল - বিউটি-স্পট। ঢেউ-তোলা কালো চুল, কাজল-কালো চোখ দু'টি, হুল-হুল করে দোলায়মান কানে রূপোর ছল। স্কাটের চাইতে সোয়েটার-পায়জামারই ডক্ত তিনি। অতএব তাঁর যৌবন-দেহতটে উচু-নীচু ঢেউয়ের খেলা। সে খেলা উপভোগ্য! 'তাই অনেকেরই দৃষ্টি গিয়ে হুমড়ি খেয়ে পড়ে। সর্বনাশা ফোর্ড-বধূ মজান এবং মজা দেখেন।

এ হেন জলন্ত আগুন সামনে নিয়ে কে-জি রোজ চারটি বেলা ডাইনিং টেবিলে খেতে বসেন। কী যে খান, আর কী যে গেলেন, তা তিনিই জানেন। তবু রন্ধে, পানের চেয়ারে এক কলসী জল থাকে—শান্ত-শিষ্ট শান্তডী ঠাকরণ। সত্যি, ভারি মিষ্টি বুড়ি! মুখখানি হাসি-হাসি। দেখলেই 'গ্র্যাগি' বলে জড়িয়ে ধরতে ইচ্ছে করে! বৌমার সৌন্দর্য প্রদর্শন প্রচেষ্টায় শান্তডী-ঠাকরণের যে কোনরকম আপত্তি আছে—অন্তত তাঁর মুখের আশ্রিতে তা বোঝা যায় না। বরং শান্তডী-বৌয়ে বেশ ভাব! দু'টিতে হরদম সিগ্রেট কৌকেন আর কথার কঁকে কঁকে কিক-কিক হাসেন।

প্রথম দিনের দু'টি বেলা তিনজনেই বিনা বাক্যব্যয়ে খাওয়ার সন্ধ্যাবহারেই ব্যস্ত ছিলেন। অবশ্য দেখা হতেই গুড-মর্নিং, গুড-ডে ইত্যাদি বলতে হয়েছিলো—নেহাং ভদ্রতা! কিন্তু এই সাগর-নগর যখন ইংল্যান্ড নয়, আর এর বাসিন্দারা যখন নিজের মজি মতই চলেন, তখন আলাপ জমাতেই বা বাধা কি? আর আশ্চর্য, ফোর্ড-বধূই প্রথম দিনের তৃতীয় বেলায় চায়ের টেবিলে কথা পাড়লেন : উইল ইউ ম্যাব সিগ্রেৎ? এগিয়ে ধরলেন তাঁর চকচকে সিগ্রেটের কেস।

থ্যাংকস্! কেজি বললেন, আই শোক পাইপ! ইফ ইউ পারমিট—
অ'কোস'! শাশুড়ী-ফোর্ড অহুমতি দিলেন।

কে-জি টোবাকো পাউচ্ আর পাইপ বার করে টোবাকো ভরতে লাগলেন পাইপে। পাউচে এখনো লগুনে কেনা 'খিনান' টোবাকো আছে : এক আউন্স সাড়ে চার শিলিং! কাজেই ইংল্যান্ডে একটু বেশি ইন্টারভ্যালের পাইপ টানতে হতো কে-জিকে। অথচ ইতিমধ্যে থাকতে ঐ কোয়ালিটির টোবাকো মিস্সচার কিনেচেন সাড়ে পাঁচ টাকায় দু' আউন্সের কোটো। তবে এই সাগর-নগরে কোন পার্চেস ট্যাক্স নেই, কোন কাষ্টম ডিউটি নেই, কাজেই টোবাকোর দাম জলবৎ সস্তা। কে-জির মেজাজটাও তাই খুশি।

মেজাজ খুশি অনেকেরই। ইংল্যান্ডের এক শিলিং চার পেন্স দশটি সিগ্রেটের প্যাকেট কিনে হিসেব করে ধূমপান করতে হতো অনেককেই। আর এই সাগর-নগরে ঐ দামে টিনের চ্যাপ্টা কেসে কুড়িটা গোল্ডস্মোক কিনতে আর ফুকচে সবাই। লাউঞ্জের টেবিলে সিগ্রেটের খালি কোটোর ছড়াছড়ি।

এই একই কারনে সুরাপায়ীরাও মদ-মত্ত। রকম রকম স্বাদের মদ আর বীয়ার তাই অহরহ মাসে আর ডিকেণ্টারে। হইস্কি, ব্র্যাণ্ডি, রাম, শেরি, জিনু, ভড্কা—কি চাও? বসে যাও। দেশে এক বোতল লেমনেডের দামে একপাঞ্জ সোমরস।

কে-জি পাইপের ধোঁয়া ছেড়ে জিগোস করলেন, আর ইউ বাউও ফন্স বয়ে?

নো! লিপষ্টিক রাডানো ঠোটে সিগ্রেট চেপে ফোর্ড-বধূ উত্তর দিলেন, তু জেব্রলতার।

হায়রে! জেব্রলটার! এই মধুর সঙ্গ লাভ হবে কয়েকদিনের পরেই! কিন্তু উপায় কি? পারের ঝুঁঝার এই তো রীতি। আসে, হাসে, বসেও পাশে; শেষে হঠাৎ হেসে পালিয়ে যায়।

যাকগে! বললেই হয়তো কে-জি সাব্বনা দেন মনকে। পাইপটাকে একটু জোরেই টানেন। শুক করেন গল্প।

খাবার টেবিলের পোলিশ ওয়েটার কোর্স বদলে-বদলে দেয় আর সেই সঙ্গে তিনজনের গল্পের কোর্সও বদলাতে থাকে।

কে-জি বললেন, আমি ইণ্ডিয়ান। ক্যালকাটার বাড়ি।

আমি হচ্ছি স্পেনের মেয়ে। জেব্রলতারে বাড়ি। আরো বললেন ফোর্ড-বধু: তবে শস্তরবাড়ি ইংল্যান্ড, আর ইনি হচ্ছেন শান্তডী।

শান্তডী বললেন, আমি কিন্তু ইংল্যান্ডের। ইংল্যান্ডেই জন্ম, কর্ম, বিয়ে!

কে-জি বললেন, তা, ছেলের শস্তরবাড়ি যাওয়া কেন?

রোদ পোহাতে!

বৌ গা ঝাঁকানি দিয়ে বললেন, উঃ ওদেশটায় যা নীত! জমে যেতে হয়।

কে-জি হাসলেন, যা বলেচো! তা এখন আর উঃ-আঃ করলে চলবে কেন? বর পছন্দ করবার সময় ঘর কোথা তার জানতে না?

ঠিক বলেচো! শান্তডী ফোর্ড ডিটে মিলেন। হেসে বললেন, তবে আমার একটা রোদুর পোহাবার জায়গা হয়েছে। ছেলে গেছলো ওদের দেশে ভালো একটা চাকরি নিয়ে। ফিরলো যখন, সঙ্গে আনলো টাকা আর আমার এই স্নইট ডিম্বার 'টকি'-টিকে!

'টকি'ই বটে! এক নম্বরের পল্লি। ইংরেজের বৌ, কিন্তু গোমরা মুখো ইংরেজের আদব-কায়দার ধার ধারে না একটুও! হয়তো জেব্রলটারের রোদুরের মতই ঝলমলে, ইংল্যান্ডের মেঘলা আকাশের ছোঁয়াচ লাগেনি গায়ে।

কে-জি প্রশ্ন করলেন, ভাগ্যবানটি কোথায়?

হাসলেন ফোর্ড-বধু: জেব্রলতারে।

শান্তডী বললেন, উইলি আমার ভাবি ভালো ছেলে। ম্যামি নীতে কট পাচ্ছে, অথচ সে দিবি রোদুরে দিন কাটাচ্ছে, তাই বোধ হয়—

ইয়েস ! বধু বললেন, উইলি বললে আমি তো ছুটি পাচ্ছি নে। তুমি যাবে হোমে ? ম্যামিকে নিয়ে আসবে কয়েক হস্তার জুড়ে ?

পুত্রগর্বে মা বললেন, তাই এই শুভযাত্রা !

এতক্ষণ মেসিনের মত কাজ করে গেচে পোলিশ গুয়েটারটি ! কখন যে কোর্স শেষ হয়ে গেচে, কারোর খেয়াল নেই। অথচ কিছুই বলেনি গুয়েটার। আকটার-ডিনার-কফির তিনটি ট্রে টেবিলে সাজিয়ে দিয়ে এক পাশে চুপ করে দাঁড়িয়ে আছে ! আর যদি কিছুর দরকার হয় : টর্ট কেক বা ফ্রুট মেলবা বা ড্রিংক !

গুয়েটারটির নাম দ্লা পাসাৎসা নাসত্‌ক্‌স্‌। পোলাণ্ডে কোতেনিয়া সহরে বাড়ি। চমৎকার স্ত্রী চেহারা। বয়েস চব্বিশ-পঁচিশ হবে। এক মাথা সোনালী চুল, রেশমের মত, সযত্নে আঁচড়ানো। নীল দুটি চোখ—সরল, সুন্দর, স্নিগ্ধ ! কালো ফুলপ্যাণ্টের উপর সাদা ধবধবে জ্যাকেট। কাঁধে নীল ষ্ট্রাইপ ! চাল-চলনে ভদ্রতার ছাপ। কথা বোঝে না, তবে ইশারা বোঝে ! যেই একটি কোর্স শেষ হয়ে যায়, নিমেষে সরিয়ে নেয় ডিশ, পেতে দেয় নতুন ডিশ ধবধবে ফুলকাটা টেবিল ক্লেথের উপর !

পাশাপাশি তিনটি টেবিলের ভূভার পাসাৎসার উপর। তার কাজ প্রত্যেকদিন খাবার সময় পরিষ্কার টেবিলক্লেথ পাতা, ফুলদানিতে ফুল সাজানো, এ্যাস-ট্রে, টেবলসন্ট-এর পট সাজিয়ে রাখা, প্রত্যেক চেয়ারের সামনে ভাইনিং প্রেট, কাঁটা-চামচ-ছুরি-ন্যাপকিন গুছিয়ে রাখা এবং সেই সঙ্গে প্রতিদিনের ছাপানো মেহু। তারপর চারটি বেলায় দু'ঘাচ করে আটবার সার্ভ করা নির্ভুলভাবে, ঠিক তাল রেখে—খুব সহজ কাজ নয়।

কিন্তু অতি সহজেই যেন সব কিছু করে যায় পাসাৎসা। যন্ত্রের মত। মুখখানায় ঈষৎ বিষন্নতা। দেখলে মায়ী হয়। জিগোস করতে ইচ্ছে হয়, কী তোমার মনের দুঃখ ? হয়তো কোতেনিয়ার ছোট্ট বাড়িটার কথা ভাবে। ভাবে তার বৃদ্ধি মায়ের কথা, তার বোনের কথা, তার ছোট্ট ভাইটির কথা। তার বাবা ছোট্ট বেলায় যারা গেচে। তার কথা মনেই পড়ে না পাসাৎসার। তবে মনে পড়ে কি ঐ সহরেই কোন 'ভিলা'র নীল-নয়না কুমারী মেয়ের মুখ ! হয়তো এই এবারেই 'বাতরি' যখন নোঙর বেঁধে ঝিমুচ্ছিলো

পোলাণ্ডের বন্দরে এক হস্তার মেয়াদে তখন পাশাংসা নিশ্চয়ই দেখা করেছে প্রতি
সন্ধ্যায় তার মনের-মেয়ের সঙ্গে। হয়তো পার্কে কোন বেঞ্চে বসে প্রিয়ার
সরু কোর ধরে, নরম গালে চুমু দিয়ে প্রতিশ্রুতি দিয়েছে তাকে : আর ক'টা
মাস খৈর্ষ ধরো, জমিয়ে নিই হাতে কিছু, তখন পাতবো সংসার ! তুমি আর
আমি, আর ঐ আকাশের চাঁদ।

তোমার মা, বোন, ভাই ?

তাদেরও দেখতে হবে বৈকি ? ষতদিন মা আছেন, বোন বড় না হয়,
ভাই চাকরি না পায় !

তবে ? কী করে সব হবে ?

হবে। হবে! সব হবে। পাশাংসার গলার স্বর আবেগে হয়তো
কঁপেছিলো : তুমি যদি পাশে থাকো, আমি কী না করতে পারি !

কে-জি-দের টেবিলের পাশে দাঁড়িয়ে পাশাংসা তার প্রতিশ্রুতির কথাই
ভাবছিলো কি ? কে জানে !

কফির কাপে শেষ চুমুক দিয়ে ফোর্ড মহিলাদের কে-জি বললেন, রাজ্জে
কিন্স-শো, দেখবে নাকি ?

যেতে পারি। ম্যামি, তুমি ?

নো, মাই ডিয়ার !

কী বই হবে ?

ফল্লবিডন্ কারগো। 'গুনেচি ভালো বই।

তাই নাকি ? খন্ডবাদ !

সবাই উঠে দাঁড়ালেন। পাশাংসা ট্রে গুছিয়ে নিয়ে গেলো কিচেনে।

রাত ন'টায় সিনেমা শো।

ডিনারের পর্ব শেষ হয়ে গেছে। অনেকেই আড্ডা জমিয়েছে লাউজে।
কেউ বা ষখারীতি বার-এ। চারধারে কাঁচের দরজা-জানলা সব বন্ধ।
কনকনে শীতে বাইরের ডেকগুলো নীরব নিঅর্ন।

গল্লের ফাঁকে ফাঁকে অনেকেই হাত-বড়ি দেখছে : আর কিছুক্ষণ বাদেই
শো শুরু !

ডিনার-হলেই সিনেমা শো হবে। রূপোলী পর্দা টাঙানো হয়েছে, প্রজেকশন কমে যন্ত্রপাতি ঠিক করচে কর্মচারি দু'জন।

এক এক করে জমেচে এসে লোক। সুবিধেযত খালি চেয়ারগুলো দখল করচে এক একটি দল। কেউ বা একলাই।

রয়, সানিয়াল, রামস্বামী এক সঙ্গেই ঢুকলেন, বসলেন এক সঙ্গে। একটু পরে এলেন মহাবিষ্ণু সেন, যোগ দিলেন তাঁদের সঙ্গে।

হারি আর জেন গ্র্যাটন এসে বসলেন কোণের একটা টেবিলে।

ইয়াকি সালিম হক একলাই এলেন।

একটু পরে এলেন মিস এনাফী রাও, আর ঠিক তার পেছন পেছন সি. মিটার। ষ্টিমারের পেছনে যেন গাদাবোট। বসলেন দু'জনে কাছাকাছি। সানিয়াল-গুপের নজর এড়ালো না। নিজেদের মধ্যে হেসে নিলেন তিনজনই। মহাবিষ্ণু জানতেন না এই হাসাহাসির ব্যাপার। জিগ্যেস করে জানলেন যখন ব্যাপারটা, তখন তিনিই বা হাসতে ছাড়বেন কেন? হাসলেন।

খানিক পরে এলো কে-জি আর রেজা। দু'জনে গ্র্যাটনদের পাশের টেবিলটা দখল করলেন।

প্রায় সঙ্গে সঙ্গেই ঢুকলেন মিসেস ফোর্ড, জুনিয়ার। সঙ্গে শান্তী ফোর্ড আসেন নি। পোশাক বদলে ফেলেচেন ফোর্ড-বধূ। ঢুকেই দাঁড়ালেন একবার। চোখ বুলিয়ে নিলেন সারা হলটার। কে-জির দিকে নজর পড়তেই এগিয়ে গেলেন সেই দিকে : ছালো।

ছালো, প্রীজ বি সীটেড!

থ্যাংকু!

দিস ইজ মাই টেবিল-পার্টনার মিসেস ফোর্ড, জুনিয়ার; মাই ফ্রেন্ড মি: রেজা।

কে-জি দু'জনের পরিচয় করিয়ে দিলেন।

ক্রমেই লোক জমতে লাগলো।

এলেন মি: এবং মিসেস হারমান আর তাঁদের জার্মান মিউজিসিয়ান দল। করাচী বাচ্চেন দলবল নিয়ে। মি: হারমানের মাঝারি গোছের চেহারা।

বেশি লম্বাও নন। বয়েস চল্লিশের কাছে। সোনালী চুল পাট করে পেছনে ঠেলা। স্ত্রী-টি যেন একটি রাজহংসী। মরাল গ্রীবা। প্রতি পদক্ষেপে অভিজাত্যের চিহ্ন। দীর্ঘাঙ্গিনী। একটি ডাঁটালো রজনীগন্ধা। প্রকান্তে এই পাঁচজনের সামনে হারমান-বধূর বক্ষশোভা বর্ণনায় নিরন্তর থাকাই ভদ্রতা। কৌকড়ানো, সোনালী এক গোছা চুল তরুণীর ঘাড় পর্যন্ত নেমে শেষে হঠাৎ যেন থমকে থামা। ছ'কানে ছ'টি মুক্তো-চুল। গালে ঘষা কুঁজ এবং পাউডার, ঠোঁটে রাঙা লিপস্টিক, চোখের ক্র কালো পেন্সিলে ঘষা। মিসেস হারমানের পাশে মিঃ হারমানকে দেখায় ছোট্ট ভাদ্রের মত। মানায় নি।

তারপর দেখা গেলো একটি ব্যাচ। আলি-পরিবার। সামসুদ্দীন আলি ; বিলিভী নাম স্ত্রী-আলি। আলি ও তাঁর বিলিভী স্ত্রীর ছেলে মেয়ে মিলিয়ে সাতটি অপগণ্ড। বড়টি মেয়ে, রোজি, বয়েস দশ এবং সর্বশেষ ফলটি, একটি ফুটফুটে খোকা, আট-ন' মাসের। মিসেস আলি সাক্ষাৎ জগজ্ঞাননী, বাৎসরিক ফলপ্রসূ, সর্বসহা বহুধরা। শীতের দেশে নাকি সন্তান-জন্ম কম হয়! এ যে কত বড় মিথ্যে-তার প্রমাণ এই আলি দম্পতি।

ইংরেজ আমলে স্ত্রী-আলি এসেছিলো জাহাজের খালাসী হয়ে ভারত থেকে ইংল্যাণ্ডে। সে প্রায় বারো বছর, একযুগের কথা। ইংল্যাণ্ডকে তার ভালো লেগেছিলো, তাই ভুলেছিলো চট্টগ্রামকে। কিন্তু চট করে কি ভোলা যায়, যে মাটিতে নাড়ির টান? স্ত্রী-আলি লণ্ডনের ইষ্টএণ্ডে এক ছঃ পল্লীতে বাসা বাঁধলো, মন বাঁধা দিলো ঐ পাড়ারই এক কুটিওয়ালার মেয়েকে! ক্রমে যা হয়ে থাকে, স্ত্রী-আলি বাঁধা পড়লো সংসারে, বাঁধা পড়লো পুত্র-কন্যার মায়ার বাঁধনে। এবং বাঁধা পড়লো দেনার দায়ে, ঋণের জালে!

স্ত্রী-আলি বহু চেষ্টা করেছিলো নিজের পায়ে দাঁড়াতে, পারেনি। বিলিভী খসড়া জামাইয়ের দায় ঘাড়ে নিতে চায় না। সেখানে বাপের বণন মেয়ের বর খোঁজার দায়িত্ব নেই, তখন মেয়ের বরকে বরণ করবারই বা আগ্রহ থাকবে কেন? কুটিওয়ালা তাই মেয়ের আগ্রহে কাল-আদমিকে মেয়ে দিলো বটে, কিন্তু হাত ভুলে কুটি দিলো না। কিন্তু স্ত্রী-আলি পুরুষ, তার উপর তার টাটগেয়ে গৌ। বললো, জালিং, নো কিয়ার। আই'ল আর্ন ব্রেড কর

হু আও মাই চিলড্রেন । শ্রাম-আলি গড়ানে পাথরের রত এক কাজ থেকে আর এক কাজে ঠোকর খেতে খেতে দিন কাটাতে লাগলো । পেটিকোট লেনের সানডে-হাটে ধূপকাঠি তৈরি করে বিক্রী করলো কিছুদিন । কিছুদিন পোর্টারের কাজ করলো, পুরোন কাগজের ব্যবসাও করলো কয়েকমাস । বড়দিনের সময় বাড়তি পোষ্টম্যানের কাজও নিলো কয়েকবছর । কিন্তু ভাগ্যদোষে কোন কাজেই টিকে থাকতে পারলো না শ্রাম-আলি । এদিকে উর্বরা ডরোথি আলির কোলে বছর বছর ফসল ফলচে : রোজি, জন, এলবার্ট, পামেলা, হেনরি,—আরো, আরো !

এমন দিনে পৃথিবীর রাজনীতি ক্ষেত্রেও পূর্বের কোণটার নতুন ফসল ফললো । ভারত স্বাধীন হলো, পাকিস্তান জন্ম নিলো । সিংহল শৃঙ্খল ভাঙলো, ব্রহ্ম মুক্তি পেলো । স্যাম-আলির মনে পড়লো চট্টগ্রামের কথা । আর না, দেশকে ভুলে দুর্দশার আর শেষ নেই । এবার দেশ । দেশে যেতে হবে । চাঁটগাঁয়েতে জন্ম, যেন চাঁটগাঁয়েতেই মরি !

ডালিং, উইল' হু গো টু চিটাগং ?

সর্বসহা নারী বললো, ইফ নাথিং ইজ রং দেয়ার, দেন হোয়াই নট !

ডরোথি, রোজি-জনদের মুখ চেয়েই কথাটা বললো । পোড়া পেটে এদেশের পোড়া রুটিও যখন জুটলো না, তখন কি দরকার এই পোড়া দেশে থেকে ! আর স্বামীর দেশও তো তারই দেশ । আর সেখানে স্বামীর আত্মীয় স্বজন আছে—যা হোক কিছু ব্যবস্থা হবেই হবে । চলো ডালিং, তাই চলো ।

কিন্তু চলো বললেই তো চলা যায় না, বিশেষ করে অচল যাদের সংসার । দেনা মেটাতে সর্বস্বান্ত হতে হলো । পা বাড়ানোর আগে হাত বাড়াতে হলো জানা-শোনা প্রায় সবার কাছেই । শেষপর্যন্ত, জোগাড় হলো প্যাসেজ ।

গুডবাই ইংল্যান্ড !

আলি-পরিবার পাড়ি দিলো চিটাগং-এর উদ্দেশে ! ডরোথির ছ'চোখ দিয়ে জল গড়িয়ে পড়লো । রোজি জন ইঁ করে চেয়ে রইলো ম্যামির দিকে । ড্যাভি চেয়ে আছে সমুদ্রের শেষ সীমায় ! সাগর-নগর 'বানর'িতে উঠেই হাততালি দিয়ে উঠলো দুই অবুঝ, পামেলা আর হেনরি :

কী বজা! কী বজা!

ডিং—ডং—ডং।

গোয়িং গোয়িং গন্!

হলের আলো নিভে গেলো। শুরু হলো সিনেমা শো : ফরবিডন কারগো, গোয়েন্দা কাহিনী।

সাগর-নগরের নাগরিক জীবন এলোমেলো, ঢিলে, ডেভিল-মে-কেয়ার গোছের। তাছাড়া এই সিনেমা-শোয়ের অশ্রে বখন বাড়তি টিকিট কাটতে হয়নি, তখন ঘড়ির টিক-টিক আর টিটকিরির ভয়ে সময় মিলিয়ে হলে ঢুকতে হবে, তার কি মানে আছে! গেলেই হলো, বসলেই হলো, ভালো না লাগলে বেরিয়ে এলেই হলো। আর যেতেই হবে, তারও তো কোন মানে নেই!

তবে অঙ্ককার হলের দরজা ঠেলে ঢুকলেন মি: কে, এম, শা—সাগর-নগরের সব চেয়ে ছোট্ট নাগরিক, আকৃতিতে। মাত্র চার ফুট উঁচু, অথচ বয়েস চল্লিশের কোঠায়! ডব্রলোকের কাঠামোটা কেন যে প্রমাণ সাইজের নয়, বোঝা গেলো না; হয়তো খেয়ালী ভগবান হাতের কাছে দরকার মত মাল মশলা না পেয়ে, যা পেলেন তাই দিয়ে শেষ করলেন মানুষটিকে; অথচ কাঠামোর মধ্যে ঠেসেঠুসে ভরে দিলেন দরাজ একটি মন। ফল পাড়িয়েচে, ডব্রলোক নীচু দেহ আর উঁচু মন নিয়ে সাগর-নগরের প্রায় সবার সঙ্গেই পাতিয়েচেন আত্মীয়তা। কাজেই হলে ঢুকতেই প্যাসেজের ডান দিক থেকে কে যেন তাঁর হাত ধরে টানলো : কাম হিয়ার, মাই টলম্যান! বা দিক দিয়ে তাঁর হাত ধরে টানলো কেউ : হিয়ার মি: লিলিপুটিয়ান, দিস্ সাইড! পেছন থেকেও তাঁর কোট ধরে টান দিলো একজন : যান এগিয়ে মি: শা ক্রীনের সামনে, নইলে দেখতে পাবেন না। শা রসিক। উত্তর দিলেন : কেন? পেছনেই বসি না, আগনার কোলে?

তা পারেন বসতে মি: শা। এই সিনেমা হলের সীটগুলি আনরিজার্ডড বটে, কিন্তু শা-এর অশ্রে সবার কোন্-ই রিজার্ড করা!

আর কোলেও যে চড়েন নি, তা নয়। প্যারির নাইট-ক্লাবে একাধিক বিশালাকিনীর নরম কোলে তিনি সাধরে স্থান পেয়েচেন। মাঝের কোলে বসে

শিশু যেমন ছুধের বাটিতে চুমুক দেয়, ঠিক তেমনিই স্বর্গাম-দেহী বহু ললনার নয় হাঁটুতে বসে পরম আরামে চুমুক দিয়েচেন তাদের হাতের সূরা পাঞ্জে। মি: শা, তাঁর ছোট্ট দেহটির অন্ত্রে সবার আদরের, বড় মনটির অন্ত্রে সবার প্রিয়। গুণীও। তিনটি বছর প্যারিতে কাটিয়েচেন এমনি নয়। প্যারি ইউনিভার্সিটির ডক্টরেট নিয়ে ফিরেচেন এখন দেশে, বসে থেকে কয়েক মাইল দূরে। শহরের নাম ঠিকানাটা গোপনই থাকুক। সংসারে তো শত্রুর অভাব নেই! প্যারিতে শা-র গোপন প্রেমের গল্প পাঁচ কান হয়ে দেশে বিবি আর বাবালোকের কানে গেলে ব্যাপারটা দাঁড়াতে পারে ঘোরালো।

প্রেমের পথ নাকি ঘোরালো। বিশেষ করে সাদা-কালোয় প্রেম! তাই বোধ হয় মি: লতিফকে পুরো একটি বছর ঘুরতে হলো এমা ব্রাউনের পেছনে। সিনেমা, থিয়েটার, রেইক্রেস্ট আর ট্যান্সিতে সপ্তাহে চার পাউণ্ড থেকে পাঁচ পাউণ্ড গলাতে হয়েছে। তাছাড়া বার্ষিকে প্রজেক্ট, ক্রীটমাস প্রজেক্ট, হলিডে ট্রিপস, ড্রিংক, ড্যান্স, ডিনার—কম খরচের ব্যাপার! সাদা মেয়ে নয় তো, এক একটি শ্বেত হস্তিনী। শ্বেত প্রণয়িনীর নরম আঙুলে আংটি গলাবার আগেই দেশে একটি জমিদারী গলে যাওয়াও বিচিত্র নয়। নেহাৎ মি: লতিফের চাচা লড়াইয়ের বাজারে বিফ্ সাপ্লাই করে কিছু টাকা জমিয়েছিলেন এবং লতিফের সৌভাগ্যক্রমে চাচা-চাচীর ছেলেপুলে না হওয়ায় এবং তাঁদের ক্ষুদ্রের বেশ খানিকটা অংশ লতিফের অন্ত্রে রীতিমত ভিজে আর নরম থাকায়—লতিফ চাচার গোমাংস বিক্রীর টাকা এমার মাংসের অন্ত্রে দু'হাতে খরচ করতে পারলো। তবে লাভের মধ্যে হলো, যে অন্ত্রে বিলেত যাওয়া, সেই বিলিভী বিছা লাভ আর হলো না, হলো এক বিছাধরী লাভ: লগুনের সস্তা পল্লীর এক শপগাল!।

তা হোক। সাদা চামড়া, বাদামী চুল, নীল চোখ, বিলিভী বুলির অনেক মান—সোসাইটি-রূপী ম্যানসনের সিঁড়ি নয়, লিফ্ট! করাচীর এক বিজ্ঞি পাড়ায় লতিফদের ভেরা, এমার যোগ্য জায়গা নয়। বোরখা পরা বিবিদের অদৃষ্ট অবাক দৃষ্টি, নোংরা ছেলে-মেয়েদের বোবা চাহনি, দাড়িওলা বুড়োদের নাসিকা-কুঞ্জন, পাড়ার লকা ছোকরাদের অকালপক

কটাক—সব মিলিয়ে এক অভিনব আবহাওয়ার সৃষ্টি হওয়ারই সম্ভাবনা।
 লতিফ তাই ঠিক করেছে এমাকে নিয়ে উঠবে প্রথমে ভালো একটা
 হোটেলে। তারপর জরুরী লিয়ে নসিবমে যো লিখা ছায়, উ তো
 জরুর হোগা। আভি সোচনেমে কেয়া নাকা ছায়? এমা ব্রাউন কিন্তু
 শাকিস্তানের দিকে পা বাড়াবার আগে পাকা কথা বলে দিয়েচে :
 ল্যাটিক, ইক আই ফাইও ইয়োর কান্টি, ডার্টি এও ড্যামড্, আই মাষ্ট
 বি রিটার্নিং ব্যাক টু ইংল্যান্ড! রাইট?

অর্থাৎ লতিফ-বধূর বর পছন্দ হলেও, স্বশ্রবণর পছন্দ হলে তবেই সংসার
 পাতবেন! নইলে বলবেন, হে ডার্লিং, বিদায়। তবে লতিফের দেশের
 পোশাক বোধকরি মেয়েটির অপছন্দ হয় নি। তাই সিন্ধের সালোয়ার
 পায়জামা প'রে, ওড়না মাথায় দিয়ে বিলিভী-বিবি লতিফের বাহুলয়া হয়ে
 ঢুকলেন সাগর-নগরের সিনেমা হলে।

কিন্তু সবাইয়ের মন কি ছবির দিকে? হয়তো।

তবে চিত্র মিত্রের চিত্র যেন চকল হয়ে উঠলো। টেবিলের উপর মিস
 এনাকী রাও-এর পেলব হাতখানি পড়েছিলো, সি. মিটার অঙ্ককারে কচ্ছপ-
 গতিতে তাঁর হাতখানি সেইদিকে চালনা করলেন। অচিরেই ছোঁয়া লাগলো
 হৃৎকনের। মিস রাও সরিয়ে নিলেন হাতখানা। কিন্তু সি. মিটারের নাছোড়বান্দা
 হাত হতাশ হলো না, হাতড়াতে লাগলো সেই নরম হাতখানা। পাওয়াও
 গেলো, আবার গেলো হারিয়ে। টেবিলের উপর দুই হাতের নুকোচুরি
 চললো! শুরু হলো দুই সাপের খেলা।

হঠাৎ নরম হাতখানা জোরে চিমটি কাটলো শক্ত হাতখানাকে। যন্ত্রণায়
 ছিটকে সরে গেলো শক্ত হাতটা। পরক্ষণেই আচমকা চেপে ধরলো নরম
 হাতকে : এবার ?

ছাড়ো। ঝপ ইট! নারী-কণ্ঠের ফিসফিসিনি ও শাসানির শব্দ এলো
 সি. মিটারের কানে।

সি. মিটার গলা খাটো করে বললেন, কেন ?

নইলে চলে যাবো হল থেকে !

ও, ভুলে গেছি, আমার পাশের মহিলাটিও একটি করবিভন কারগো।

মিটারের রসিকতায় এনাকী হয়তো খুশিই হলেন। শুবু বললেন, ঈয়েস। হাত গুটিয়ে নিলেন সি. মিটার।

মেঘে-খেলোয়াড় চিত্ত মিত্রের জানা আছে, কখন হাত বাড়াতে হয়, কখন গোটাতে হয়। কাজেই বাকি সময়টা চূপচাপ গ্যাট হয়ে বসে ছবি দেখলেন।

এবার এনাকী রাগের মন চঞ্চল হয়ে উঠলো। মিটার রাগ করলো না তো?

সাগর-নগরের সব নাগরিকই সিনেমা হলে ঢোকে নি। অনেকেই এদিক ওদিক ছড়িয়ে আছে, কেউবা নিজের নিজের কেবিনে।

কয়েকজন পাঞ্জাবি ব্যাবসাদার বার-এ বসে ব্রীজ খেলচেন, সামনে আছে মদের বোতল গেলাস।

আরো কয়েকজন নেশা করে বৃন্দ হয়ে পড়ে আছে সোফায়। তাদের পরিচয়ের দরকার নেই।

লাউঞ্জে বসে ম্যাগাজিন উন্টাচ্ছেন ডাঃ এস. চ্যাটার্জী, পুরো নাম শৈলজা চ্যাটার্জী। সিনেমা দেখা তাঁর ধাতে নয় না। তাছাড়া মনের ঘন্ট তাঁর এখনো কাটেনি। বৃষ্টিতে পারচেন না, এখন দেশে ফেরা ঠিক হচ্ছে কিনা। ইণ্ডিয়ায় পোর্ট হেলথ-অফিসারের কাজের জগৎ দরখাস্ত পেশ করে এবং ইন্টারভিউ দিয়ে ছ'মাসের মধ্যেও যখন কোন খবর পেলেন না কিছু, তখন, হাল ছেড়ে রওনা দিয়েছিলেন ইংল্যান্ডে এফ. আর. সি. এস. পড়তে। সেখানে পড়বার খরচ চালাবার জন্তে বহু জায়গায় দরখাস্ত করে ক্যাড্রিকের এক হাসপাতালে চাকরিও পেলেন। মাস দুই চাকরি করবার পর এবং এফ. আর. সি. এস পড়বার তোড়জোড় করবার মুখেই খবর এলো কলকাতা থেকে : ফিরে এসো শীগ্রি. পোর্ট হেলথ অফিসারের কাজ পেয়েচো। কাজেই অনেক ভেবে ঠিক করলেন, পড়া যখন টাকার জন্তেই এবং চাকরিটা যখন মোটা টাকার, তখন পড়া ছেড়ে চাকরি ধরানি বুদ্ধিমানের কাজ। তাই ফিরে চললেন দেশে, কিন্তু মনের দ্বিধা কাটলো না। মাঝ-সমূত্রে দ্বিধার ঢেউয়ে দোলা খাচ্ছেন, রেহাই পাবেন দেশের মাটিতে পা দিয়ে পকেট ভারি হলেই।

ডাঃ এস. কে. প্রামাণিকও বসে আছেন লাউঞ্জে। সৌম্য সহাস বৃদ্ধ।
খর্বকার। থাকেন পুণায়। ভারত সরকারের যেটিওরজিক্যাল ডিপার্টমেন্টের
একজন উচ্চপদস্থ কর্মচারি। ইংল্যাণ্ডে গেছিলেন ছুটিতে তাঁর ছেলেকে দেখতে,
দু'মাস থেকে ফিরছেন আবার পুণায়। ভুল্ললোকের সিনেমায় কোন আসক্তি
নেই, তাই এই লাউঞ্জে।

তাছাড়া লাউঞ্জে বসে রেভারেণ্ড ডি, এফ. হেওয়ার্ড, মিসেস এস, হল্যাণ্ড,
মিসেস এ, ডি, প্যারেলওয়াল্লা, মিঃ এস, ইরানী এবং আরো কয়েকজন। কেউ
বা গল্প করছেন, কেউ বা সোফায় বসে ঢুলছেন।

‘বি’ ডেকে ৮২৩ নং দু’বার্ষ কেবিনের দরজাটা ভেজানো। লোয়ার
বার্ষে শুয়ে মাথার কাছে রিভিং লাইট জালিয়ে একখানা ইংরিজী উপন্যাসে
মন দিয়েছেন শ্রীমতী কিরণময়ী বড়াই। আপার বার্ষের মিসেস প্যারেলওয়াল্লা
লাউঞ্জে বসে গল্প করছেন মিসেস হল্যাণ্ডের সঙ্গে। মিসেস বড়াই অত লক্ষ্য
করেন নি, আজ রাত্রে সিনেমা শো, তাই বইতে বাস্ত। নইলে গিয়ে বসতেন
একবার হলে। ভ্রমহিলার জন্মস্থান ঢাকা, কর্মস্থানও ঢাকা। পাকিস্তানের
ভয়ে আর পাঁচজন হিন্দুর মত হিন্দুস্থানে আশ্রয় নেন নি। স্বামী পাকিস্তানের
সরকারী চাকরে, তিনিও। শিক্ষা বিভাগে কাজ করেন। পাকিস্তান সরকারের
টাকায় শিশু-শিক্ষার ব্যাপারে ইংল্যাণ্ডে থেকে উচ্চশিক্ষা লাভ করে ঢাকা
ফিরছেন। নামবেন করাচীতে। সেখান থেকে হাওয়ায় উড়ে যাবেন ঢাকায়।
শ্রামবর্ণী, বয়েস ত্রিশের কোঠায়, কালো চুলে লাল টকটকে সিন্দূর, কপালে
টিপ, বাঁ হাতে রিটওয়ান, পরনে সাদা শাড়ি। সর্বজাতির সাগর-নগরে এক
ঝলক বাংলা শোভা।

আর একটি বাংলা শোভা কালো করাল মেঘে ঢাকা। মিসেস দত্ত।
‘সি’ ডেকে ২৩৭ নং দু’বার্ষ কেবিনের আপার বার্ষে চুপ করে শুয়ে আছেন।
চোখ বুজে আছেন, ঘুমান নি। তাঁর দু’চোখ দিয়ে জল গড়িয়ে পড়চে, ভিজ
যাচ্ছে মাথার বালিশ। সেই যে সাদাম্পটন ডকে কেবিনে ঢুকেচেন, বাস্! শুধু
বাধকমে বাওয়া ছাড়া একবারও উপরে বসেন নি লাউঞ্জে বা ডেকে।

ভাইনিং হলেও খেতে যান না, স্টুয়ার্ডেস এসেই বাবার দিবে ঘাঘ বাথের সঙ্গে লাগানো ট্রে-তে। বাবার আধ-খাওয়া হয়ে পড়ে থাকে। পোলিশ স্টুয়ার্ডেস অবাক হয়ে ভাড়া ইংরিজীতে জিগোস করে, নো ইটিং? মিসেস দত্ত শুধু বলেন, নো। কিন্তু কারণ জিগোস করা স্টুয়ার্ডেসের অধিকার নেই, তাই আর কিছু না বলে ট্রে নিয়ে চলে যায়।

কিন্তু লোয়ার বাথের মিস ইলিয়টের কাছে ব্যাপারটা কেমন বেখান্না ঠেকে। অথচ জিগোস করতেও বাধে। আবার বিশ্রীও লাগে। একজন প্রায় না খেয়ে সারাক্ষণ বিছানায় পড়ে আছে, ব্যাপার কি? নিজের মনেই ভাবতে থাকে, অথচ কোন কুল-কিনারা করতে পারে না। হোয়াটস্ রং উইথ হার? কিন্তু জিগোস করতেও সাহস হয় না, শি মে বি অফেণ্ড !

কিন্তু সে রাতে মিস ইলিয়ট হঠাৎ কেবিনে ঢুকেই আশ্চর্য হয়ে গেলেন, মিসেস ডাট কান্দছেন! কেবিনের নরম আলোয় চিক-চিক করতে মিসেস ডাটের ভিজ়ে গালের অশ্রু-রেখা।

মিসেস দত্তও বুঝি লজ্জা পেলেন। তাই তাড়াতাড়ি পার্টিসনের দিকে মুখ ফিরিয়ে গেলেন তিনি। আঁচলের কোণ দিয়ে মুছে ফেললেন অশ্রু-চিহ্ন!

মিসেস দত্তের লজ্জায় লজ্জা পেলেন মিস ইলিয়টও। আপনা থেকেই তাঁর মুখ দিয়ে বেরিয়ে এলো: আ'ঘ্যাম সরি মিসেস ডাট—

উপর বার্থ থেকে কোন সাড়া এলো না।

আই ডিডিন্ট মীন—। আই ফাউণ্ড গু ভো ওপেন, অ্যান' আই—

ডোন্ট ওরি প্রীজ। আগার বার্থ থেকে এবার ভিজ়ে গলায় উত্তর দিলেন মিসেস।

মিস ইলিয়ট তবু যেন অপ্রস্তুত। বললেন, আই ফেন্ট সিক ইন গু সিনেমাহল, সো আই—

এবার ফিরে গেলেন মিসেস দত্ত। বুষ্টি-ভেজ্জা পদ্ম-পাপড়ির মতই অশ্রু-ভেজ্জা কাজল আঁখি ছুটি মিস ইলিয়টের নীল-নয়নে রেখে ব্লান হেসে বললেন, ইউ হ্যাভন্ট ভান এনি রং মিস্ ইলিয়ট!

ইলিয়ট এবার যেন আশ্বস্ত হলেন। যদিও এই সাগর-নগরে ভদ্রতার অত কড়াকড়ি নেই, গায়ে পড়ে আলাপে কোন বাধা নেই—তাছাড়া একই কেবিনে

হুজনেই বাস-স্বাস্থ্য, অর্থাৎ কেশচর্চা, বেশ-বদল সব কিছুই যখন পরম্পরের চোখের সামনেই করতে হয়, তখন ভদ্রতার নিয়ম-কাছন মানাও বড় যায় না, আর না মানলে মনেও কিছু করে না কেউ। কাজেই নিজের কেবিনের দরজা ঠেলে হঠাৎ ঢুকতে বা বেরতে দ্বিধা করার কারণ নেই। কিন্তু মিসেস দত্ত আর মিস ইলিয়টের মধ্যে সম্পর্কটা একটু স্বতন্ত্র! মিসেস নিম্পৃহ থাকায় মিল নিঃশব্দপ্রায়। তবে দু' চারটে ভদ্রতার বুলি বাধ্য হয়েই বলতে হয়।

দুই বার্ষিক ভিন-দেশী দুই মহিলা পরস্পর বাক্য-জালে না জড়িয়ে আপন মনে কল্পনার জালই বুনেচেন এই দুটো দিন। এমনতর অবস্থাটা কিন্তু অস্বাভাবিক, অসহ্য। দু' ভাই প্রাচীর গাঁথে আলাদা হলেও, প্রাচীর ডিঙোনা-কথা চালনা বন্ধ বড় থাকে না। আর এক্ষেত্রে একই কেবিনে ঘনিষ্ঠ হয়ে থেকের অ-বাক হয়ে থাকা—একদিন নয়, দু'দিন নয়, সতেরো-আঠারোটা দিন—বাস্তবিকই অবাক হবার মতই ঘটনা।

আজ সুযোগ ছাড়লেন না মিস ইলিয়ট। কথার জের টানলেন :
মে আই ক্লোজ দ্য ডোর ?

ইয়েস, ইক ইউ লাইক ! মিসেস দত্তের নিম্পৃহ উত্তর।

মিস ইলিয়ট কেবিনের দরজা বন্ধ করে চেয়াবে বসে জুতো খুললেন, পা গলিয়ে দিলেন নরম স্নীপারে। টেবিলের উপরে ইলিয়টেরই একখানা আগাখা ফ্রিটির গোয়েন্দা উপস্থাপন পড়েছিলো, তুলে ধরলেন সেখানা :
ডু'উ'লাইক টু রীড দিস বুক ? ভেরি ইন্টারেস্টিং !

আর একবার শ্রান হাসলেন মিসেস দত্ত : নো, থ্যাংকু।

মিস ইলিয়ট বইখানা অগত্যা টেবিলে রেখে গায়ের ব্লাউসের বোতাম খুলতে শুরু করলেন। মিসেস দত্ত ওধারে মুখ ফিরিয়ে শুলেন আবাব।

ইক ইউ ভোল্ট মাইও, উ' আর ফ্রম—? মিস ইলিয়ট জিগ্যেস করলেন।

লন্ডন। মিসেস দত্তের ছোট্ট উত্তর।

কোমরের ইলাস্টিক ব্যান্ড খুলে ইলিয়ট পায়ের তলা দিয়ে গলিয়ে বার করলেন স্কার্টটা। পরনে রইলো সাদা সিকের আঙুর ড্রেস। উপরাংশ প্রায় অনাবৃত। খেয়ত ঘোবন-পদ্ম দু'টি লক্ষ্যায় বুঝি গোলাপী হয়ে তাদের নতমুখ ঢেকে রইলো সাদা ড্রেসের সন্ধ্যাবালে।

ছাড় বীন্ দেয়ার কর হাইয়ার ঠাণ্ডি ?

নো।

নাঃ, এভাবে কথা চালানো ছুড়র। আনউইলিংহর্সকে জল খাওয়ানো ছুড়র ব্যাপার। অপর পক্ষের যখন উৎসাহ নেই, এ পক্ষের তখন নিরুৎসাহ হওয়া ছাড়া উপায় কি ? মিস ইলিয়ট পাশ্চাত্য-অভ্যাসে ঝাড় ঝাঁকিয়ে আলনা থেকে টেনে নিলেন স্লিপিং স্যুট। অভ্যস্ত কৌশলে পরলেন সেটি। সিগ্রেট কেসটি খুলে ধরালেন একটি সিগ্রেট। শেষ সিগ্রেট। হোম-এর সিগ্রেট শেষ হলো। কাল অবশ্য 'বার' থেকে কেনা যাবে বিশ-সিগ্রেটের একটা বাস্তব নাগমাত্র দামে।

বেসিনে লাগোয়া আর্শির সামনে ঝাড়িয়ে মিস ইলিয়ট শিশি থেকে বার করলেন কোল্ডক্রীম। নয়ম গালে ঘষতে লাগলেন ধীরে ধীরে। ঠোঁটের সিগ্রেটটা শেষ না হওয়া পর্যন্ত গাল ঘষতেই লাগলেন ইলিয়ট।

পরে সিগ্রেটের টুকরোটা এ্যাসট্রের মধ্যে ফেলে, বার্ণের সুরু বিছানায় এসে বসলেন এবং একটু পরেই নিজের বরতনু ব্রাংকেটের তলায় চালিয়ে দিয়ে বেড স্ট্রিচটা দিলেন নিভিয়ে।

কেবিন কালো হয়ে গেলো।

উইলি রজার্স এখন ডেল্‌হীতে কি করচে ? কে জানে ! হয়তো ক্লাবে বসে ড্রিংক করচে কিংবা—

ডাম্‌ ইট ! বাজে ভেবে কোন লাভ নেই। মিস ইলিয়ট চোখ বুজলেন।

আপার বার্ণে মিসেস দত্ত কালো অঙ্ককারে চোখ মেলে শুয়ে আছেন। তাঁর ভবিষ্যৎ কি ঐ অঙ্ককারের মতই কালো ?

সকলের সব চিন্তার বোঝা ঘাড়ে নিয়ে সাগর-নগর হেলে ছলে এগিয়ে চলেচে কালো হাওয়া, আর কালো জলের ঠাণ্ডা টেউয়ের বাধা ঠেলে। সার্চ লাইটের তীব্র আলোর দৃষ্টি তার বহু, বহু, বহু দূরে !

আহা, এমনিতর বাড়তি দৃষ্টি থাকতো যদি মাহুঘের !

বোট ডেক। সামনের দিকটায় অফিসারদের কোয়ার্টার। সুপ্রশস্ত কেবিন। সুসজ্জিত। মেঝের মোটা কার্পেট। একটু আগেই ডাইনিং

ক্ৰমে ডিনার শেষ হয়ে গেছে। অফিসার-লাউঞ্জে বসে গল্প জমিয়েচেন অফিসাররা। দেশের গল্প, পোলিশ রাজনীতির আলোচনা, জাহাজ কোম্পানীর কথা, কোম্পানীর মালিকদের আচরণের কাহিনী। এবার পোলাণ্ডে গিয়ে কে কোন অপেরা বা থিয়েটার দেখে এসেচেন, তার আলোচনাও বাদ যাবার কথা নয়।

শিপ-মাস্টার মিরশল গ্লাওয়ারকি সান-ডেক-এ গ্রাভিগেসন ব্রীজে একটা রাউণ্ড দিয়ে, র‍্যাডার ক্রম, চার্ট ক্রম ঘুরে এসে বসেচেন লাউঞ্জে। যোগ দিয়েচেন অফিসারদের গল্পে। চমৎকার অমায়িক ভঙ্গলোক। বয়েস পঞ্চাশের কাছে। দোহারা চেহারা, মুখে হাসি। কাঁধের ব্যাজ আর হাতের স্ট্রাইপ থেকেই যেটুকু বোঝা যায় ভঙ্গলোক এই পুরো জাহাজখানার হর্তাকর্তা, নইলে ক্যাপটেন গ্লাওয়ারকির কথায়-বার্তায়, আচার-ব্যবহারে বোঝা কঠিন, কী অসীম ক্ষমতায় অসীন এই মিষ্টি হাসির শিষ্ট ভঙ্গলোকটি!

এই সাগর-নগর জলে-ভাসা এক টুকরো পোলিস-নগর। পোলিস আইন-কানুন চালু এই চলমান নগরটিতে। পোলিস রাজ্যের মান-সম্মত পতাকার রূপ ধরে পত্‌পত্‌ করে উড়ছে স্ফুটন্ত মাস্তুলের মাথায়। তবে ভিন দেশের বন্দরে এসে নোঙর ফেলে যখন, তখন আর এক মাস্তুলে উড়িয়ে দেওয়া হয় সেই দেশেরই পতাকা। ভঙ্গতা!

এই সাগর-নগরে কেউ অত্যাচার করলে, পোলিস আইনেই তার বিচার হয়। দরকার হলে বন্দী করে রাখবার ক্ষমতাও আছে এই মাঝারি গড়নের মিষ্টি মানুষটির। আর যদি কোন অন্তর্ভক্ষেণে এই সাগর-নগর সাগরের তলায় তলিয়ে যাবার মত দুর্ঘটনায় পড়ে, তখন সেই চরমক্ষেণে এই মানুষটিকেই ধীর-স্থির হয়ে ব্যবস্থা করতে হবে তাঁর নগরের নাগরিকদের বাঁচাবার। তাঁর হুকুমে রেডিওগ্রামে ছড়িয়ে পড়বে দিকে-দিকে দুর্ঘটনার বার্তা, তাঁর হুকুমে জলে নামবে বোটগুলো, তাঁর হুকুমে নগরের মেয়েরা শিশুরাই আগে উঠবে বোটে, তাঁর হুকুমে পুরুষরা পাবে লাইফ-বেল্ট, হুড়তো বা অন্তান্ত জু-রাও। তারপর পরমেশ্বরের ইচ্ছায়, সাগর-নগরের সবার যদি প্রাণ রক্ষার ব্যবস্থা হয়—তবেই ঐ পরম ক্ষমতাবান অথচ পরম অসহায় মানুষটি পারবেন তার ভরাডুবি 'নগর' ছাড়তে। তার আগে নয়।

শিপ-মাষ্টার প্রাণ্ডাকি একদিনেই এই চরম পদে উন্নীত হন নি। ধাপে ধাপে উঠতে হয়েছে তাঁকে। গত পঁচিশ বছরের নানা পরীক্ষা-নিরীক্ষা, বহু অপেক্ষা-উপেক্ষার পর তিনি পেয়েছেন এই ক্ষমতা। তাই পোলাণ্ডের সামান্য এক গ্রাম্য চাবীর ছেলে আজ বিরাট এক জল-চলমান নগর নিয়ে পৃথিবীর সপ্ত-সমুদ্র চষে বেড়াচ্ছেন। গর্বের কথা, কিন্তু অহংকারের কোন কথাই লেখা নেই এই শাস্ত্র স্কন্দর মাহুঘটির মুখে-চোখে।

তাই জাহাজের নাবিক গোষ্ঠীর প্রিয় তিনি এবং সাগর-নগরের প্রতিটি সাগর-নাগর-নাগরীর প্রকার পাত্র তিনি।

স্রার পাত্র সামনে নিয়ে নিশ্চিন্ত হয়ে গল্প করতেন শিপ-মাষ্টার মিঃ প্রাণ্ডাকি। কাছেই বসে আছেন ষ্টাফ ক্যাপটেন জম্বলো ওলসজেওন্সি—সাগর-নগরের কর্মচারীদের মুকুবি। তাঁর পাশে বসে চীফ-অফিসার জর্জ পেজেনী—ম্যানেজার। একটু দূরে বসে চীফ-ইঞ্জিনিয়ার জন গ্র্যাটকোন্সি—ইঞ্জিন ঘরের দায়িত্ব এঁরই উপর। চীফ পাসার এণ্ড মিস্ট্রলো পাশেই বসে আছেন—সাগর-নগরের কোষাধ্যক্ষ। একটি বড় সোফায় গা-মেলে বসেছেন সার্জেন ডাঃ ফেলিকান মাইকোলন্সি—সারা সাগর-নগরের স্বাস্থ্যরক্ষক। চীফ-ষ্টুয়ার্ড চার্লস জিয়লস-ও রয়েছে এই বৈঠকে।

সাগর-নগরের উচ্চপদস্থ কর্মচারি এঁরা। কাঁধে এঁদের গুরুভার! কাঁধের ফিতে, বকের রিবন, হাতের স্ট্রাইপ সাস্ক্য দেয় এঁদের গুরুদায়িত্বের। কিন্তু সবাই কৈফিয়ৎ দাবি করবার অধিকার নিয়েও সবাই সঙ্গে হাসি-গল্পে যোগ দিয়েছেন সর্বাধিকারী মিঃ প্রাণ্ডাকি—ডেক আর ইঞ্জিনঘরের প্রায় দেড়শো ক্রু-র ভাগ্যবিধাতা, সাগর-নগরের হাজারখানেক নাগরিকের ভরসাস্থল!

নাবিক গোষ্ঠীদের মধ্যে কাজের পালা যাদের সাক্ষ হয়েছে, তারা এক সঙ্গে খেতে বসেছে কিচেনে ডাইনিং টেবিলে। একটানা লম্বা টেবিল, তার দুধারে বেক পাতা। পাশাপাশি বসে গেছে সবাই। বসেছে ইঞ্জিন-ঘরের সবাই, অন্ত দল তাদের ভার নিয়েছে। বসেছে ষ্টুয়ার্ড, ষ্টুয়ার্ডেসরা। বাকি অল্প কয়েকজন, নাগরিকদের জুজুমের অপেক্ষায় আছে। বসেছে র‍্যাডার রুমের, চার্ট রুমের, ওয়ারলেস রুমের, স্ট্রাভিগেসন ব্রীজের কর্মচারীরা। রাজ্যের ডিউটি যাদের, তারা এই এখন কর্মব্যস্ত।

সর্বজাতীয় সাগর-নগরের এই অংশটুকু খাঁটি পোলিস পাড়া। এ পাড়ার গলিতে কাঠের দেওয়ালে পোলিস খবরের কাগজ সাঁটা, নানা রকমের পোলিস ছবি আঁটা, সাগর-নগরের বিজ্ঞপ্তি লটকানো। এ পাড়ার কথা বোঝা যায়, লেখা পড়া ছুঁকর। টকটকে লাল চেহারার লোকগুলি আর টুকটুকে গোলাপী রংয়ের মেয়েগুলি অবসর সময়ে নিজেদের নিয়েই মশগুল, নিজেদের হাসি-কান্নার বেড়া দিয়েই ঘেরা।

নাগর-নগরের নাগরিকদের সঙ্গে এদের প্রাণের যোগ নেই, আছে কর্তব্যের যোগ। প্রতিবারে রাজা-বদলে রাজী বদল; কাজেই আলাপের রাজা থাকে সীমাবদ্ধ। উপরন্তু অস্তুরায়—ভাষা। মাটির রাজ্যে মাটির লোকেরা বদলায় না, বদলায় সিংহাসনের রাজা, বদলায় তাঁর অমুচরেরা। সাগর-নগরের নিয়ম কিন্তু উল্টো! এ নগরের নাগরিকরা বদলায়, নগরের হর্তাকর্তা শিপ মাষ্টার বদলায় না, বদলায় না তাঁর অমুচরেরা।

গভীর রাজ্যে সাগর-নগরের ঘরে ঘরে নিভলো বাতি। শুধু রাত-জাগা যারা, তাদের ঘরেই জ্বলচে আলো। আর জ্বলচে আলো সাগর-নগরের অলিতে-গলিতে, সিঁড়িতে, বার-এ, ডেকে, লাউঞ্জে—যেখানে না হলে নয়। শাওয়ারাজি ধরে সাদা রংয়ের ‘বাতরি’ জাহাজখানা ভেসে চলে হেলেতুলে কালো জলে। একটানা শব্দ হয় ঝপ্ ঝপ্ ঝপ্ ঝপ্। যেন হীরে মুক্তোর গহনা পরে খিড়কির বড় পুকুরে সাঁঝের বেলায় সাঁতার কাটচে জমিদারের রূপসী মেয়ে! তার খোঁপায় রূপোর ফুল আর ‘বাতরি’র সার্চ লাইটে কোনই তফাৎ নেই।

গা ধুয়ে গুনগুন করে গান গাইতে গাইতে খিড়কির দরজা পার হয়ে যায় মেয়ে। দরদালানে ঢুকতে গিয়েই হঠাৎ দেখে—ও মা, ছিঃ, উনি যেন কখন এসে চুপটি করে দাঁড়িয়ে আছেন!—তাড়াতাড়ি ভিজে কাপড় টেনেটুনে ঠিক করে নেয়, মাথায় টানে কাপড়। ঢাকা পড়ে পাটি-খোঁপার রূপোর ফুল। লজ্জা-রাঙা মেয়ে হঠাৎ সরে পড়ে হুড়ুং করে পাশের ঘরে। মুচকে হাসে নতুন জামাই।

মুচকে হাসে স্বর্ষি ঠাকুর সার্চ লাইটের লজ্জা দেখে। নীল সাগরের শেষ সীমানায় আলোর খেলা দেখতে পেয়েই চক্কু মোদে কলের আলো। কলের

আলো প্রণাম জানায় কালের আলোর পায়ে। হয়তো বলে মনে মনে :
তোমার এবার পালা শুক, আমার বিদায় বেলা গো।

দিনের কাজের শুরু তখন।

প্রতি কেবিনেই 'নক' করে যায় ষ্টুয়ার্ড এবং ষ্টুয়ার্ভেস। হাতে তাদের
চায়ের ট্রে। বেড-টি-এর পর্ব তখন। যেসব কেবিন খোলা পায় না—বাধ্য
হয়েই কিরে যায়। যেসব কেবিন খোলা থাকে, ঢুকে এসে চা দিয়ে যায়,
বার্থে সাঁটা ট্রে-র উপরে। ঘাড় উঁচিয়ে খেলেই হলো।

এই চা-পানটুকুই হওয়া দায়। ঘুম ভেঙে ঘাড় উঁচু করার আলিঙ্গি
কি সহজে যায়! ষ্টুয়ার্ডের আসা যাওয়ার শব্দ আসে কানে, তবু, চা-পানের,
ছাই, তাগিদ থাকে না। তখন গায়ের কবল জড়িয়ে আরো পাশ ফিরে
শোয় অনেকেই।

থাক না শুয়ে। না খায়, না থাক! ঘণ্টা খানেক পরেই আবার শুরু হয়
কাপ সরানো। কেবিনে আসে ষ্টুয়ার্ডরা। দেখে, কাপ ভরা চা তেমনি
আছে, জুড়িয়ে ঠাণ্ডা জল হয়েছে। তাই বেসিনে সে চা ঢেলে ফেলে নিয়ে
যায় ফের চায়ের বাটি। মনে মনে হয়তো হাসে, যাবার মুখে হয়তো কাশে,
তবু হয় ঘুম ভাঙে না সাহেবদের!

দিনের প্রথম চায়ের পর্ব এমনিতরই বার্থ যায়! কিন্তু অর্থ যাদের পরমার্থ,
বার্থ তারা করবে কেন জাযা পাওয়া চায়ের পর্ব? আর বেড-টিয়েতে
অভ্যাসীরা সত্যিই যেন চাঁদ হাতে পায়। কাজেই চায়ের কাপ বার্থে এলেই,
ঘুমের ঘোর ঠেলে ফেলেই ঘাড় উঁচিয়ে টো-টো করে চুমুক মারে চায়ের
কাপে। চায়ের লেভেল শেষ ধাপেতে নামিয়ে এনেই ধপাস করে ঘাড়টা
আবার নামিয়ে রাখে বালিশের 'পর'। কবলটা জড়িয়ে আবার আরামে চলে
নাকড়াক। ঘুম যখন ভাঙে ফের, ব্রেকফাস্টের সময় তখন।

নিউইয়র্কের সালিম হকের বেলা বারোটা তক গভীর রাত। কাজেই
বেড-টি খাওয়া কোনদিনই হয় না তাঁর। মক্কোর রামস্বামী চায়ের কাপের
শব্দ শুনে চোখের পাতা খোলেন বটে, কিন্তু চায়ের পাতার জলীয়-রস পানের
জন্তে তাঁর পক্ষে চোখের ভারি পাতা দুটো খুলে রাখা সত্যিই বড় কষ্টকর। তাই

প্রথম দিনের ভোরে নেহাৎ সখ করেই দিখেছিলেন চায়ের কাপে চুমুক, এবং এরপর প্রতিদিনই ভরা-কাপ ভরাই থাকতে লাগলো।

ঐ কেবিনেই কে-জি—ভদ্রলোক যেমন ভারি, তেমনি ভারি ঘুমটা তাঁর— কাজেই চায়ের গরম গন্ধ তাঁর নরম নাকের মধ্যে ঢুকেও পরম আরাম-ঘুমের কোন ব্যাধাতই ঘটতে পারে না।

আর মহাবিষ্ণু সেন? তিনি ডাক্তার। ইয়ার-নোজ-থ্রোটের ডাক্তার; ভবু পেটের ব্যারামে মহাসাবধানী। তাঁর মতে খালি পেটে চা খাওয়া আর বিষ খাওয়া একই কথা। কাজেই চা তাঁর মুখের কাছে প্রতি প্রত্যুষে এসেও বিমূখ হয়ে ফিরে যায়।

ভবু ষ্টুয়ার্ড প্রতিদিন ভোর না হতেই চায়ের কাপ এগিয়ে রাখে মুখের সামনে। ঘুরে এসে ভরা কাপ বেসিনে ঢেলে খালি কাপ সব নিয়ে যায়। কর্তব্য! এখানে চা-চিনির হিসেব নেই। কাজেই, মুখ ঝামটার কারণ নেই। আমার প্রাণ্য নাই বা খেলায়! ঢেলে দিলাম, ফেলে দিলাম—তা বলে কি জবাবদিহি দিতে হবে? এ নগরে নগন্ত নয় কেউই, গণ্যমান্ত সবাই। ষ্টুয়ার্ডদের এ ইঙ্গিত দেওয়া আছে, তাই ভুলেও মস্তব্য করে না কেউ, শুধু কর্তব্যই করে।

মিঃ এবং মিসেস গ্র্যাটন কিন্তু বেড-টিয়ে অভ্যস্ত। কাজেই দরজায় ‘নক’ করলেই হারি গ্র্যাটন দরজা খোলেন, চায়ের কাপ নিজেই নেন, টেবিলে রেখে ডেকে দেন জেন গ্র্যাটনকে : ডার্লিং টি! ডার্লিংটি হাই তুলে, আলিস্তি ভেঙে ওঠেন এবং বহুদিনের অভ্যাসমত পরস্পরকে চুমু খেয়ে তবেই তাঁরা চুমুক দেন চায়ের কাপে।

রেজার কোন নেশা নেই। কাজেই প্রথম দিনেই ষ্টুয়ার্ডকে বলে দিয়েচে, নো টি প্লীজ!

তবে মিঃ এস আলি তার বিলিভী মেম এবং মো আশলা ছেলে-মেয়েরা, কেউ প্রাণ্য ছাড়ে না তাদের। বিশেষ করে আলি-গিরী মত হচ্ছে : লর্ড বা মিচ্চেন, ছ’হাত দিয়ে গ্রহণ করাই উচিত। তবে আসল কথা, একটু পরেই ছেলে-মেয়েরা ডেভল্-লাইক শুরু করবে চীৎকার। কাজেই পেটে কিছু পড়লে তবেই জের টানা যায় ব্রেকফাস্ট ডক।

টুয়ার্ডের আনা চা মিসেস প্যারেলওয়াল ও বড়াই-গিন্নী দু'জনেই নির্বিবাদেই শেষ করেন। মেয়েরা বড় হিসেবী। সংসারে কোন জিনিসই ফেলা বা নষ্ট করা পছন্দ করেন না মোটেই। তাই, তাঁদের কাছে চা নষ্ট করার চাইতে ঘুম নষ্ট করাই শ্রেয় !

তবে মিঃ লতিফের কাছে বেড-টিটা উপলক্ষ্য মাত্র। গত রাত্রে একটা পর্ষন্ত সে লোয়ার বার্থে শপগাল'-প্রিয়া এমা ব্রাউনের কাছেই ছিলো। সন্ধ্যা বার্থটা দু'জনের পক্ষে প্রশস্ত নয় একটুও। তবুও। এমাকে ঘুমতে দেখনি, জ্বালাতন করে খেয়েচে। শেষে, এমা যখন পা দিয়ে ঠেলে 'লতিফের দেহের অর্ধেকটা ঝুলিয়ে দিলো বার্থ থেকে, বেশ জোর গলায় বললো এমা, নো-মোর—তখন বাধ্য হয়েই তাকে মই বেয়ে উঠতে হলো নিজের আপার বার্থে। ভোরে দরজায় নকিং হতেই প্রায় লাফিয়ে নামলো লতিফ। দরজাটা সামান্য ফাঁক করে চায়ের কাপ দু'টো নিয়ে দরজা দিলো বন্ধ করে। এমার ঘুম ভাঙাবার স্বযোগ পেয়ে খুশিই হলো লতিফ। নিজের কাপটা শেষ করে আর একটা কাপ ধরলো এমার মুখে। খেটে-খাওয়া এমার কিন্তু ভালোই লাগলো এমনতর হাত-তোলানি খাওয়া। খুশিই হলো। অমনি খুশি করার স্বযোগ নিতে ছাড়লো না ঐ রূপের পাগল লতিফ। ফট করে কম্বলটা তুলেই চট করে ঢুকে পড়লো আবার এমার বার্থে। স্কাণ্ড ল্যাটিফ, ভোন্ট বি সিলি ! প্লীজ গেট আউট !—এমা আগন্তিকি করে। কিন্তু নাছোড়বান্দা লতিফ ততক্ষণে এমা ব্রাউনের নরম বৃকে মাথা ঘষতে থাকে। লতিফের কাণ্ড দেখে হেসে ফেলে এমা : ও, ইউ নটি !

পার্শ্বের অফিসের সামনে নোটিশ বোর্ডে নতুন বিজ্ঞপ্তি দেখা গেলো : ব্রেকফাস্টের পর প্রমেনেড ডেকে প্যারেড হবে, সকলেরই উপস্থিতি প্রার্থনীয়। অর্থাৎ সাগর-নগর যদি দুর্ভাগ্যক্রমে অতল সাগরে ডুবে যায়—তবে, নাগরিকরা যাতে রক্ষা পায় তারই ব্যবস্থা। সেজ্ঞে কী ভাবে লাইফ বোট পরতে হবে এবং লাইফ বোট জলে নামালে প্রাণের ভয়ে ঠেলাঠেলি বা ধাক্কাধাক্কি না করে কীভাবে ধীর-স্থিরভাবে সেই বোটে উঠতে হবে—ওধু তাই নয়, আগে মেয়েরা, তারপর ছোটরা এবং সবর শেষে যদি জায়গা থাকে তো পুরুষরা উঠবে—তারই নির্দেশ এবং হাতে-কলমে প্রদর্শনের ব্যবস্থা !

হাতে কারোর কাজ নেই। তাছাড়া আত্মরক্ষার মত কাজ অতি বড় অকেজোর কাছেও বিশেষ দরকারি এবং বিজ্ঞপ্তিতে যেন বৈচিত্র্যের স্বাদ পাওয়া যাবে বলেই মনে হচ্ছে—অতএব বেশির ভাগ যাত্রীই উপস্থিত হলো প্রমেনেড ডেকে। ছেলে-বুড়ো সবাই প্রায় লাইন করে দাঁড়ালো। লাইফ বেন্ট বা ক্লোটিং বেন্ট দেওয়া হলো সবাইকে। চিফ অফিসার জর্জ পেজেনী নিজেকে একটি বেন্ট বুক এঁটে দেখালেন তার পরিধান পদ্ধতি। যারা ভুল করলো পরতে কিংবা কাঁধের বেন্ট কোমরে এঁটে বসলো, তাদের সাহায্য করলেন অফিসার। তাছাড়া, জাহাজ ডুবি হলে যাত্রীদের কর্তব্যের বিষয়েও ভাঙা-ভাঙা আধো-আধো ইংরিজীতে একটি সারগর্ভ ছোট্ট বক্তৃতাও দিয়ে দিলেন তিনি। তারপর জাহাজের জুরা বোটগুলি খুলে দড়ি টিলে দিয়ে সেগুলিকে খানিকপথ নীচেয় নামিয়ে আবার যথাস্থানে রেখে দিলো। বোটগুলি ঠিক আছে কিনা, তাও পরীক্ষা করে দেখলো তারা। দেখাই দরকার। জাহাজের ছিদ্র দেখে ভয় পেয়ে সহিদ্র বোটে উঠে প্রাণ হারানোর কোন মানে হয় না। সত্যি, সাগর-নগরের এইসব নাগরিকদের নিজেদের কতই না ছিদ্র, তবু পরের ছিদ্র নিয়ে কতই না আলোচনা—কিন্তু সাগরের এই তরলীতে একটুখানি ছিদ্রও কত মারাত্মক। রাষ্ট্র-তরলীতে বহু ছিদ্র থাকার সত্ত্বেও চালু রাখা হয়তো সম্ভবপর, কিন্তু এই সাগর-তরলী সামান্য ছিদ্রেই হয় ভরাডুবি।

সাপ্লু-সঙ্কনের মতই নিখুঁত 'বাতরি' বুক ফুলিয়ে সব বাধা কাটিয়ে এগিয়ে চললো, তাই রক্ষে! তাই আত্মরক্ষার শেষ ব্যবস্থার জন্তে কাউকেই মাথা ঘামাতে হলো না। বরং 'বাতরি'র সচরিত্রের উপর বিশ্বাস রেখে, নির্বিঘ্নে পাড়ি দেবার সব ভার তার মাথায় চাপিয়ে যাত্রীরা লাইফ বেন্ট খুলে রেখে হাক্কা মনে, হাসি মুখে নেমে এলো ডেক থেকে। তাই তো সংসদ্র এত কাম্য!

সানিয়ারল আর কে-জি আত্মরক্ষার রিহার্সাল দিয়ে এক সঙ্গেই সিঁড়ি দিয়ে নামছিলেন। হু'জনেরই ভরা সংসার, কাজেই ভরাডুবি হবার কথা ভাবতেও পারেন না। তাই গেঁছলেন প্রমেনেড ডেকের প্যারেডে।

ঝড়ো হাওয়া। কে-জি পাইপ ধরাবার চেষ্টায় পাঁচ সাতটা দেশলাই কাটি

নষ্ট করে শেষে বিরক্ত হয়ে সিঁড়ির আড়ালে গিয়ে পাইপ ধরাতে গিয়ে দেখেন
সি. মিটার একলা একমনে সমুদ্রের দিকে চেয়ে সিগ্রেট টানছেন।

হালো !

হালো !

আপনি এখানে ? প্যারেডে যান নি ?

নির্বিকার চিন্তে চিন্তা মিত্র উত্তর দিলেন, যাওয়া দরকার মনে করি
নি।

সানিয়ার টিগ্ননী কাটলেন, গুর তো আর সংসার নেই, কাজেই বাঁচা-মরার
ভাবনাও নেই।

কে-জি বললেন, আসলে মিটার আমাদের নেভির লোক, কাজেই এসব
ব্যাপারে পাশ করা, পোক্ত !—পাইপটা এবার একটা কাঠিতেই ধরাতে পেরে
খুশি হয়ে বললেন, তা এখানে একলা ?

মিটার বললেন, ঢেউ দেখছি। ভাবছি, প্রেম-সাগরের ঢেউয়ের কাছে
এই নীল-সাগরের ঢেউ কিছু নয়, তুচ্ছ। গৌফের ডগা দুটো চুমড়ে নিয়ে
ফ্রেঞ্চকাট দাড়িতে হাত বুলিয়ে যেন নিজের মনেই বললেন, কত প্রেম
সাগরেই না সাঁতার কাটলাম ! ঢেউয়ের ধাক্কা খেয়েছি বটে, তবে কোথাও
নাকানি-চোবানি খাইনি। কাজেই সাগরের এই ঢেউকে আমার ভয় নেই।

সানিয়ার বললেন, খুব ভরসা তো ?

ভরসা আমার, ঐ এনাকী রাও ! এ জাহাজে উনিই আমার লাইফ বেন্ট !
দরকার হলে, ওকে বুকে বেঁধেই জলে ঝাঁপ দেবো।

কে-জি হাসলেন, বাস্তবে না হোক, কাব্যের দিক দিয়ে অপূর্ব।

সানিয়ার জিগ্যেস করলেন, তা 'রাই'টি কোথায় ?

আপনারা কোথায় ছিলেন বললেন ? মিটার পান্টা প্রদ্র করলেন।

এমেনেড ডেকে, প্যারেডে। সানিয়ার বললেন।

হ্যাঁ, হ্যাঁ। ডোববার ভয়ে বুকে লাইফ বেন্ট বাঁধবার মহড়া দিচ্ছিলেন
—এই তো ? মিটার গৌফের ফাঁকে হাসলেন, আমিও প্রেম সাগরে
ডোববার ভয়ে আমার লাইফ বেন্টটিকে বুকে বাঁধবার তোড়জোড় করছিলাম।
এই তো ছিলেন এতক্ষণ, হয়তো একটু ঘুরে আসতে গেলেন।

তা ছেড়ে দিলেন যে ! কে-জি বললেন।

সিগ্রেটের শেষ টান টেনে মিটার বললেন, জোড় বাঁধতে গেলে জোর করতে নেই। আপনারা এসব বুঝবেন না।

কেন ?

আপনারা পুরুত ভেঁকে জোড় বেঁধে প্রেমের জোয়ারে গা ভাসান ; আর আমার এক্ষেত্রে জোরসে প্রেম করে তবেই জোড় বাঁধা। পদ্ধতি দু'টির পার্থক্য আছে।

সানিয়ার বললেন, আপনি তো কাল রাইকে একলা ফেলে রেখে দিবি। বার-এ এসে আমাদের সঙ্গে গল্প জমালেন। রাই বোধহয় রাগই করেছিলেন। অথচ রাতে দেখলাম একসঙ্গে সিনেমা হলে ঢুকলেন ! আবার এখন সুনচি, তাকে লাইফ বেন্ট করে বৃকে বাঁধবার তোড়জোড় করছিলেন ! ব্যাপার কি ? রাইয়ের রাগ ইঠাৎ বিরাগের পথে না গিয়ে অহুরাগের দিকে ঢলে পড়লো যে ?

জেনে রাখুন, ছু-মস্তরে নয়, স্ত-মস্তরে। বলিনি, 'ভালো-ভালো' বলা-মস্তরের কথা। শুধু তবে, একটা গল্প বলি—

বলুন।

কাছেই ডেক-রেলিংএ তিনজনে ঘন হয়ে হেলান দিয়ে দাঁড়ালেন। পিঠে মিঠে রোদ্দুর এসে পড়লো।

সি. মিটার সানিয়ারের কাছ থেকে একটা সিগ্রেট চেয়ে নিয়ে ধরালেন। কে-জি আরো খানিকটা টোবাকো ভরলেন পাইপে। আজকেই জাহাজে সস্তায় কেনা ভালো টোবাকো। যখন তখন পাইপ টানায় আর বিবেকের মানা নেই।

সি. মিটার শুরু করলেন, জানেন মেয়েদের রূপসী বলা হয় কেন ? রূপ-উপোসী, তাই। রূপের প্রশংসা কানে গেলেই, ব্যস্। শুধু, জাতকের গল্প বলি একটা : অশাত-মস্ত্র জাতকের গল্প—

বারানসীতে এক ব্রাহ্মণ দম্পতির একটি ছেলে ছিলো। বাপ মায়ের ইচ্ছে ছেলেটি অগ্নিদেবের পূজা করে সাধু সন্ন্যাসীর ব্রত নিক কিন্তু ছেলেটির ইচ্ছে সংসার-ব্রত পালন করা। ছেলের যখন ইচ্ছে, তখন বাধ্য হয়েই তাকে চকশিলায় আচার্যদেব অর্থাৎ পূর্ব জন্মের বোধিসত্ত্বের কাছে পাঠানো হলো উপযুক্ত শিক্ষাভ্যেের জন্তে। বেশ কয়েক বছর পর

যুবক সব শাস্ত্রে পণ্ডিত হয়ে আচার্যদেবের আশ্রম থেকে ফিরে এসে
প্রণাম করলো বাপ-মায়ের শ্রীচরণে। মা শুধোলেন, ই্যা বাবা, আচার্য-
দেবের কাছ থেকে সব শাস্ত্র শিখেচো তো ?

ই্যা মা। শিখেচি।

আচার্যদেব তোমাকে অশাত যন্ত্র শিখিয়েচেন তো ?

অশাত যন্ত্র ? যুবক বললো, না তো !

তবে তো বাবা তোমার সংসার-শিক্ষা সম্পূর্ণ হয়নি। তুমি যাও,
আচার্যদেবকে আমার নাম করে বলো, তিনি যেন—

আচ্ছা মা, তাই হবে।

যুবক ফিরে গেলো আচার্যদেবের আশ্রমে। গিয়ে শুনলো, আচার্যদেব
কিছুক্ষণ আগে তাঁর একশ বিশ বছরের বৃদ্ধা মাকে নিয়ে বনের দিকে
রওনা হয়েছেন। কারণ, অর্থৰ বৃদ্ধা মাকে নিজে হাতে সেবা-যত্ন করে
অবস্থা শ্রম আর সময় নষ্ট করায় প্রতিবেশীদের অনেকেই আচার্যদেবকে
দিকার দিচ্ছিলেন; তাই তিনি ঠিক করেছেন বনে কুটির তৈরি করে
সেখানেই মাকে আমরণ সেবা করবেন একমনে।

ছেলেটি খবর পেয়ে ছুটলো সেই বনে। সেখানে আচার্যদেবের দেখা পেয়ে
খুলে বললো সব কথা।

আচার্যদেব প্রথমে আশ্চর্য হলেন : অশাত যন্ত্র ? মনে মনে ভাবলেন,
অশাত মানে তো, অমঙ্গল ! একটু ভাবতেই জানী বৃদ্ধ বুঝতে পারলেন
যুবকের মায়ের ইঙ্গিত ! তখনি বললেন, ই্যা বৎস ! হাতে-কলমে এই
শিক্ষাটি দেবার কথা আমার মনেই হয়নি। যাক্ ভালোই হলো। আ-
থেকে তুমি আমার এই অতি বৃদ্ধা মাকে নিজহাতে সেবা-যত্ন করবে
এবং মুখে বলতে থাকবে, দেবি, অরাগ্রহ হয়েও আপনার কী অপক্লপ
দেহ কান্তি। যৌবনে না জানি কী অসামান্য রূপসী ছিলেন আপনি !

শুনে যুবক তো অবাক : বলেন কি আপনি ?

ই্যা বৎস ! আচার্যদেব বললেন, আমি কাছেই অল্প একটি কুটিরে
থাকবো এবং তুমি প্রতিদিনের ঘটনা আমাকে জানাবে।

অতএব যুবক হাতে সেবা এবং মুখে লোলচর্মাবৃত্তা বৃদ্ধার রূপ কীর্তন

ভুল করলো এবং প্রতিদিন আচার্যদেবকে সব ঘটনার কথা বলতে লাগলো।
আচার্যদেবও তাকে সেইমত নির্দেশ দিতে লাগলেন।

অল্প কিছুদিন পরেই একদিন বৃদ্ধা বললেন, হে প্রিয়দর্শী যুবক, তুমি
যে রোজই আমার রূপের প্রশংসা করো—তুমি কি সত্যিই আমাকে
ভালোবাসো? আমার প্রেমে পড়েচো?

যুবক গুরুর পূর্ব নির্দেশমত বললো, ইয়া দেবি! তবে আচার্যদেবকে
আমার বড় ভয়।

বৃদ্ধা বললেন, বেশ তো, তাকে তোমার পথ থেকে সরায়।

যুবক জিগ্যেস করলেন, কি করে?

বৃদ্ধা বললেন, কেন, হত্যা করো তাকে।

হত্যা! ও কাজ আমার ঘারা সম্ভবপর নয় দেবি।

বেশ। আমাদের প্রেমের মান রাখবার জন্যে এই সামান্য কাজটুকু
আমিই না হয় করবো। সে যখন রাত্রে ঘুমোবে, তুমি আমার হাত ধরে সেখানে
নিয়ে যেয়ো এবং আমার হাতে একটি ধারালো কুঠার দিয়ে। তুলে!

যুবক নির্দেশমত আচার্যদেবকে খবরটা দিলে তিনি তাঁর মায়ের
আয়ুষ্কাল গণনা করে বললেন, আগামী পরশু দেখছি মায়ের মৃত্যুদিন।
তুমি ঐদিন রাত্রে তাঁকে আমার এই ঘরে আমার বিছানার কাছে এনে
তার হাতে কুঠার তুলে দিয়ে। তোমার কোন ভয় নেই।

যথা আজ্ঞা শ্রবু। যুবক বিদায় নিলো।

দু'দিন পরে সেই ভীষণ রাত্রে বৃদ্ধা-প্রেমিকা যুবকের কাঁধে ভর
দিয়ে কোন রকমে ঘরের মধ্যে এসে পুত্রের বিছানার কাছে দাঁড়িয়ে
চেয়ে নিলেন কুঠার। ঘোলাটে চোখে দেখলেন, পুত্র চাদর মুড়ি দিয়ে
ঘুসুচ্ছে। প্রেম পাগলিমী কুঠার হানলেন, শব্দ হলো ঠকাং। পুত্র নয়,
একখণ্ড কাঠ চাদরে ঢাকা! বৃদ্ধা বুঝলেন চক্রান্ত। লজ্জায় আত্মহত্যা করে
মরে বাঁচলেন তিনি!

লানিয়াল রক্ত নিঃখাসে শুনছিলেন, বললেন, তারপর?

আচার্যদেব বললেন, তোমার শিক্ষা সমাপ্ত বৎস!

যুবক, গুরুর পদধূলি নিয়ে ঘরে ফিরে এলো। মাকে বললো, তোমার

ইচ্ছাই পূর্ণ হোক। বিষয় সঙ্গারের বাসনা আর আমার নেই। নারী জাতির উপর আস্থা হারিয়েচি আমি।

কে-জির মুখে চোখে ততক্ষণে ছুটে উঠেচে অস্থিরতার ভাব। কপাল কুঞ্চিত, নাক বিক্ষারিত, পাইপে ঘন ঘন টান দিচ্ছেন। মিটারের গল্প খামতেই বললেন, অসম্ভব! শ্রেফ গাঁজা গল্প। জাতকের এ গল্প যা-তা। মরবিড়!

মিটার হাসলেন, আপনি হয়তো পতিব্রতা জীর স্বামী হিসাবে এটেটে করছেন। কিন্তু নারী, রূপের প্রশংসায় পাগল হলে কতদূর নেমে যেতে পারে, এ গল্পটি তারই একটি উদাহরণ। তা বলে জাতকের গল্প যা-তা নয়। আচ্ছা মি: ঘোষ, আপনাকে জাতকেরই আর একটা গল্প বলি, ঐ নারী চরিত্রেরই। গল্পটি আপনার ক্ষত হৃদয়ে মলমের কান্ন করবে।

বলুন, বলুন। সানিয়াল বললেন, আমিও বড় মর্মাহত!

তখন তবে— শুরু করছিলেন মিটার।

খাক, খাক। পরে। কে-জি বললেন, ঐ আসছেন, সরে পড়ি। সানিয়াল, ফলো মি।

দেখা গেলো, করিডর দিয়ে এগিয়ে আসছেন ক্রীম রংয়ের শাড়ি-পর্যায় রূপ-উপোসী রূপবতী মিস এনাকী রাও।

কে-জি আর সানিয়াল সরে পড়লেন।

এ-ডেকে ভীড় জমেচে।

ব্রেকফাস্টের পালা শেষ। পেট সবারই ভর্তি। কাজেই খেলা বা পড়ার পাট নিয়ে সবাই বাস্তু।

লাউঞ্জ তাই বই-পত্রিকা খুলে বসেছেন প্রোটের দল। তরুণ-তরুণীরা গল্পে মজবুল। তাসাডেরা 'বার'-এ মদের গ্রাস সামনে রেখে ইতিমধ্যেই তাস পিটেতে শুরু করেছে। সারা দিনরাত তাস পিটেও তাদের আশ মিটেচে না ঘেন।

তরুণতরু যারা, তাদের হট্টগোল ডেকে। শীতের মিঠে রোদে শুরু করেছে খেলা। আর সী-গালগুলো নীল আকাশে ডানা মেলে জাহাজখানার সঙ্গে শুরু করছে ক্র্যাটারেস। সাগর-নগরে ব্রেকফাস্ট সারা হওয়া মানে ওদের ব্রেকফাস্টের শুরু। পাতে ফেলা ফল-মূল, কুটি-বিছুট-কেক ইত্যাদি ফেলে

দেওয়া হয় সাগরের জলে। নী-পালগুলো তাই দেখে জ্বালায় মতো
 ঝুপঝাপ নেমে পড়ে সাগরের ঢেউয়ের বুকে : মহানন্দে শুরু করে
 ভোজনপর্ব। ঢেউয়ের তালে-তালে তারা ওঠে আর নামে, নামে আর
 ওঠে। দূর থেকে দেখায় যেন নীল জলে রাশি রাশি খেত-পদ্ম। খাওয়া
 শেষ করেই আবার ডানা মেলে উড়তে থাকে, যেন খেত-পদ্মরা পাঁপড়ি
 মেলে উড়ে গেলো আকাশের পানে। হাওয়ায় ভর দিয়ে আবার তারা
 উড়ে আসে জাহাজের কাছাকাছি। চক্রাকারে ঘুরতে থাকে জাহাজের
 মাথায়। যেন বলতে থাকে : কই, কই, খাবার কই? আরো দাও,
 আরো দাও।

সাগর-নগরে ওরা যেন এক ঝাঁক পুষ্পবৃষ্টি। ধরা-ছোঁয়া দেয় না, ধরার
 ছোঁয়াচ বাঁচিয়ে চলে। হাঙ্কা পাখায় আর হাঙ্কা মনে তারা ওড়ে আর
 ঘোরে। রাত্রে ওরা কোথায় থাকে, কোথায় ঘুমোয়—কে জানে! কোথায়
 ওদের দেশ ?

বাইয়ের ডেকে বড় হাওয়া। পিংপং খেলবার কোন উপায় নেই।
 পিংপংয়ের টেবিলটা তাই খালি। তাই সাফল্ বোর্ড, ডেক-টেনিস খেলচে
 অনেকেই!

আর অনেকেই কি করবে তাই ভাবচে। ডেক চেয়ারে শুয়ে কেউ
 ঘুমুচ্ছে, কেউ বা বই পড়চে। বই পড়চে কি? এক লাইন হয়তো দশবার
 পড়চে, তবু মানে বুঝে না ঠিক। পড়ার দিকে মন থাকলে তো।

কর্মব্যস্ত জীবন থেকে ফাঁক আর ফাঁকি—একদিন ভালো, দু’দিন ভালো,
 তিন দিনের দিন বিরক্তিকর! কাজপাগলা মানুষগুলো তাই হাতের কাছে
 কাজ না পেয়ে, এই দু’ দিনেই যেন অকেজো হয়ে গেচে, মর্চে পড়ে গেচে।
 প্রথম পরিচয় পর্ব হয়েছে শেষ। চেনা হয়ে গেচে সাগর-নগরের অলি-গলি।
 ঘন্টা ধরে খাওয়া আর যেন ভালো লাগে না। লাউঞ্জে গা এলিয়ে বসে অসীম
 ভাবনার হাওয়ায় মনের ঘূড়িকে আর কতক্ষণ ওড়ানো যায়? নীল সমুদ্রও
 যেন পুরোন হয়ে গেচে, নীল আকাশে সে সৌন্দর্য কই? সাগর-নগরের
 নাগর-নাগরীরা রেলিং ধরে চেয়ে থাকে বটে সমুদ্রের দিকে, আকাশের
 দিকে—কিন্তু সে সব বিষয়ে বেশি আর আলোচনা করে না। প্রশংসা করেছে

তার পঞ্চমুখে—প্রথম দিকে। আর কত করা যায়? সৌন্দর্য যেখানে সীমাহীন, সেইখানেই তার মৃত্যু। কনে-বৌ লজ্জায় ঘোমটা টানে মুখে—তাই সে স্বন্দর! রোমাঞ্চকর। রোজ শাড়ি-বদলানো ফিটকাট মেয়ে গটমট করে অফিসে এসে আমার পাশে বসে কাজ করে বটে, তবু কত আর তাকে দেখা যায়? তাই ফাইলে মন দিতে মন খারাপ হয় না।

যে কারণে ইঞ্জের কাছে নন্দন-কানন স্বাভাবিক, কোন নৃপতির কাছে ধনরত্ন নামকাওয়াস্তে, বাদশার কাছে হারেয়ের সেরা সুন্দরীও নিশ্চয়, ঠিক সেই কারণেই সাগর-নগরের পারিপাট্য, স্বাচ্ছন্দ্য, প্রচুর খাদ্য, আর ক্রটিহীন ব্যবস্থাও যেন ম্লান! তার চারদিকের নীল শোভাও যেন অনর্থক।

ধরিজীর ধুলো-কাদা-মাখা গ্রামের, সহরের, নগরের সেই হুঃখ কোথায়, দৈন্ত কোথায়, ভয় কোথায়, ভাবনা কোথায়? কোথায় সেই ব্যস্ততা, শঠতা, আশা, হতাশা? সেই ঘেসকালে উঠে এক কাপ চা খাওয়া, খবরের কাগজের হেড লাইনেব খবরটুকু পড়ে তাই নিয়ে সারাদিনটা জাবর কাটা, বাজারের খলিটা হাতে নিয়ে ছুটে যাওয়া বাজারে, বাজারে দরকরা, ফাউ নেওয়া, ওজনে একটু বেশি পাওয়া—সেই একটু লাভ করার বিরাট আনন্দ এই সাগর-নগরে নেই। এখানে নেই সেই অফিস যাবার পালা। ন'টা বাজতেই মগ-মগ জল মাথায় ঢেলে, হাম-হাম করে ছড়িয়ে খেয়ে, গিল্লীর সাজা পানটা নিয়ে, মাথায় সার্টটা গলাতে গলাতে গলি দিয়ে ছুটে অফিস যাওয়া—সে কোথায় এই আরাম-নগরে? এখানে বড়বাবুর তাড়া কই? পাঁচটা বাজার মজা কই। হকি-ফুটবল খেলা কই? হেরে যাবার হুঃখ কই? জেতবারই বা হৈ-হৈ কই? কোথায় সে সব এই নগরে?

এখানে উকিলের জেরা নেই, মিথ্যা কোন সাক্ষী নেই, মামলার রাগ নেই—কী নিয়ে বাঁচবে লোকে? এখানে ডাক্তারের খরচ নেই, মুদিখানার দেনা নেই, গয়লার বাকি নেই—কী নিয়ে ভাববে লোকে? এখানে ছেলে-মেয়ের হুটু মি নেই, গিল্লীর মুখ ভার নেই, পাড়া-পড়শির গাল নেই—কী নিয়ে থাকবে লোকে?

সাগর-নগরে লোকেরা তাই বোকার মত এদিক-ওদিক ঘুরে বেড়ায়, খেলে বেড়ায়, গল্প করে, আর ভাবে, আর কি করা যায়? এই স্থলের নগরেও মনে

তাদের মুখ নেই। হৃৎকর সাগরে যেন নাকানি-চোবানি খাওয়া! নোংরা
মাছির পা জড়ানো গুড়ের কিংবা রসের ভাঁড়ে।

ড্যাভি ক্যাম্! লেটন্ প্রে।

মিঃ মুঞ্জেশ্বরের কিশোরী মেয়ে ইভা তার বাবার হাত ধরে টানলো।

মুঞ্জেশ্বর হাসলেন, মী?

ইয়া!

ইভা ডোমিনো খেলনার কাঠের টুকরোগুলো ছড়িয়ে ফেললো সামনের
টেবিলে : গ্ৰাও, ক্যাম্ অন্।

অগত্যা মুঞ্জেশ্বরকে শুরু করতে হলো খেলা। মিসেস মুঞ্জেশ্বর সামনেই
একটা সোফায় বসে পুণ্ডার বুনছিলেন, স্বামীর দিকে এক ঝলক চেয়ে মুখ
টিপে হাসলেন! ভাবটা : যাক্, একটা কাজ জুটলো তবু তোমার!

মিঃ মুঞ্জেশ্বর আমেরিকায় ইণ্ডিয়ান এম্বাসিতে কাজ করেন। ভারত
স্বাধীন হবার পর থেকেই তিনি সপরিবারে আমেরিকায় আছেন। সেখানে
ভারত প্রতিনিধির দপ্তরের অন্ততম প্রধান কর্মচারী। সেই যে গেছলেন,
আর ফিরছেন এতদিন বাদে। ফিরছেন ছুটিতে। ফেরবার পথে ইংল্যাণ্ড ছুঁয়ে
ফিরছেন, তাই তাঁরাও নিয়েছেন এই সাগর-নগরে আশ্রয়।

প্রথম যাবার দিন আজোও মনে পড়ে তাঁদের। মিঃ মুঞ্জেশ্বর অবশ্য
দিল্লীতে লেখালেখি আর ধরাধরি করেছিলেন এবং পেছনে ব্যাকিংও ছিলো
তাঁর—কাজেই এম্বাসিতে কাজটা হয়ে গেলো অতি সহজেই। তবে কি করে
হলো, সে খবরে দরকার কি?

এম্বাসিতে চাকরির খবরটা পাওয়া গেলো বিকেলে। সে রাতে দারুণ
উত্তেজনা ঘুম হলো না মিঃ মুঞ্জেশ্বরের, মিসেসেরও। ভবিষ্যৎ পরিকল্পনা করতে
করতে কখন যে পুর্বের আকাশ ফ্যাকাশে হয়ে গেছলো, দু'জনের কারোরই
তা খেয়াল ছিলো না। এই বিরাট ওলোট-পালটে আনন্দে উত্তেজনা
উপচে পড়বার বয়স ছিলো না শুধু ইভার। ছ' বছরের ইভার কাছে
ইণ্ডিয়া আমেরিকা তখন দু'টি নাম ছাড়া আর কিছু নয়।

অবশ্য যাবার সময় এয়ার পোর্টে প্যান আমেরিকান এয়ারওয়েজের বিরাট

ঝকঝকে ডানা মেলা প্লেনখানা দেখে আশ্চর্য হয়ে গেছলো ইভা। মিঃ মুঞ্জেশ্বরের কোট টেনে জিগোস করেছিলেন, উ কোন চিড়িয়া হায পিতাজী ?

আশ্চর্য হয়েছিলেন মিসেস মুঞ্জেশ্বরও : এতগুলো লোক আর মালপত্র নিয়ে হাওয়াই জাহাজ যে উড়বে, যদি মাঝ রাস্তায় পড়ে যায়, তবে ? সবাই যদি মরি তো ক্ষতি নেই ! কিন্তু যদি ইভা, যদি ইভার বাবা—উঃ, কী ভীষণ, ভাবাও যায় না। সব গজাজী কী কৃপা !

মিঃ মুঞ্জেশ্বরও যে এবিষয়ে কিছু ভাবেন নি, তা নয়। তিনি ভাবছিলেন, ঐ সাইটিফিক ডেভলপমেন্ট অফ্‌ দিস্‌ মডার্ন এজ ইজ রিয়েলি ওয়াণ্ডারফুল !

সেদিন ইভার মুখে ছিলো আধ-আধ হিন্দী বুলি, পরনে ফুল-আঁকা রঙিন ফ্রক, মাথায় হুঁবিহুনি, পায়ে গোলাপী মোজা আর লাল জুতো।

মিসেস মুঞ্জেশ্বর পরেছিলেন সিল্কের ছাপা শাড়ি, পায়ে স্ট্রাওল, হাতে রুলি-চুড়ি, হাতঘড়ি ইত্যাদি, আর ছিলো মাথায় একরাশ কালো চুলের এলো থোপা !

মিঃ মুঞ্জেশ্বরের সেদিনের পোষাকের সঙ্গে আজকের পোষাকের খুব বেশি পার্থক্য নেই। সার্টের কলার আর হাতের কাফের ষ্টাইলটা বটে অল্পরকম, কোট-প্যান্টের ছাঁট-কাট অবস্থা উন্নততর, নইলে তাঁকে এত ফিটফাট দেখাবে কেন ? বৃট-ক্রীমে জুতো ঝকঝকে, চুল চকচকে হেয়ার ক্রীমে। চুলগুলি কাঁচায় পাকায় বেশ মানিয়েচে। মুখখানি চাঁচাছোলা। আজকাল সকাল-সন্ধ্যা হুঁবার করে শেভিং করেন।

আমেরিকান সভ্যতার ছোঁয়াচ লেগেচে মিসেস মুঞ্জেশ্বরেরও। তাঁর পুলগভার বোনা আঙুলগুলির নখে লাগচে নেল পলিশ। আঙুলগুলি সভাই ‘লেডিজ ফিংগারস’। (চাপার কলি-র সঙ্গে তুলনা করে ওঁর মার্কিনি নেশাটা নষ্ট করে মনে কষ্ট দিতে চাইনে)। হাতে সেই রুলি-চুড়ি নেই, শুধু বা হাতে চমংকার একটি রিটওয়াচ। থোপা হয়তো বেথান্না লেগেছিলো সেখানে, তাই ববড্‌ করে চুল ছাঁটা এবং ব্রীচ করা, ফ্যাকাশে ! যথারীতি টোটে লিপস্টিক, গালে রুজ, বক্ষ যুগলও যেন উন্নততর। কারণ কি ?

নতমুখী বিয়ের কনের পক্ষেও বয়েসকালে সংসারের চাপে পড়ে মুখরা

হওয়া স্বাভাবিক। কিন্তু নারীর নতমুখী যৌবন-ঘট শত চেষ্টাতেও ব্যয়সের হাত এড়িয়ে আর সোজা-মুখ-হয়ে দাঁড়াতে পারে না, এ তো অতি স্বাভাবিক। তবু যে সব ছলে-বলে-কৌশলে নতমুখীকেও উদ্ধর্মুখী করা হয়, তা নিতান্তই মেয়েলী ব্যাপার, একান্তই গোপনীয়। অতএব অলম অতি বিস্তারণ। বরং মিসেস মুঞ্জেশ্বরের শ্রীচরণের বর্ণনা করা বাক! পায়ে তাঁর দামি হাইহিল জুতো, কিন্তু জুতোর অভ্রায়ে তাঁর হু' পায়ের গোড়ালিই ফুটি-কাটা। কী লজ্জা!

ইভা। ভারত থেকে গেলো একটি গোলাপ কুঁড়ি, ফিরচে সেটি সন্ধ্যা-ফোটা ক্যালিফোর্নিয়ান পপি হয়ে। সবই শ্রাম খুড়োর মাহাত্ম্য। তাই ইভার আধো-আধো হিন্দী জিবেষ 'ম্যারিকান-ইংরিজী ভাষা ঠাসা। কথায় সেণ্ট পার্সেন্ট ইয়াকি একসেন্ট! পরিবেশ আর গভর্ণেসের পাকে পড়ে এই পরিণতি!

কাজ আর খেলা তো এক নয়। কাজেই, কাজের মাহুষ মিঃ মুঞ্জেশ্বর ভোমিনো খেলার পদে পদে ভুল করতে লাগলেন, ভুল জায়গায় কাঠের ঘুঁটি লাগলেন বসাতে।

আ ড্যাভি, ডোন্ বি সিলী! ইভা বিরক্ত হলো।

তাড়াতাড়ি শুধরে নিলেন মিঃ মুঞ্জেশ্বর: রিয়েলি সরি!

মিসেস মুঞ্জেশ্বর মিষ্টানের দিকে কটাক্ষ হেনে হেসে বললেন, এ গুড ফ' নাথিং ফেলা!

কাল বেলা বারোটা থেকে আজ বেলা বারোটা পর্যন্ত—চব্বিশ ঘণ্টায় 'বাতরি' কত মাইল নীল সমুদ্রে সাঁতার কেটেচে, তা নিয়ে বাজি ফেলেচে অনেকেই। অনেকেই লটারির টিকিট কিনেচে এক শিলিং দামের। অবশ্য ক্যাপটেন বোর্ডে একটা মোটামুটি অংক জানিয়ে দিয়েচেন, ৪৪০ মাইল থেকে ৪৮০ মাইলের মধ্যেই হবে সঠিক উত্তরটা।

লাঞ্চের পরে বোর্ডেই পাওয়া গেলো গত চব্বিশ ঘণ্টায় 'বাতরি'র দৌড় কতখানি। ৪৫২ মাইল। মানে, ঘণ্টায় ১২ মাইলের কিছু বেশি! ছি, ছি! মোটর গাড়িরা সুনলে ভাববে কি? স্কুটারগুলো সুনলে হাসবে। ট্রেনগুলো সুনলে হিস-হিস করবে। প্লেনগুলো জানলে তাদের জানায়

ঝাপটায় তোমাকে ডুবিয়ে দেবে। হে জলযান, এই চলমান জগতে তোমার ডুবে মরাই ভালো।

৪৫০ মাইলে ধীরে বাজি ধরেছিলেন, সব টাকাটা তাঁদের মধ্যেই ভাগ হয়ে গেলো। আনন্দের ফোয়ারা ছুটলো তাঁদের মাঝে। তাঁদের অনেকেই এসে চুকলেন বার-এ। মদের মাসে উঠলো বৃদবৃদ।

কিন্তু বাজি-জ্বতা রেজা তাঁর আনন্দকে ধোঁয়া করে দিলেন। ছড়িয়ে দিলেন তাঁর আনন্দ বন্ধু-বান্ধবের মাঝে; হাওদায় ভরে উঠলো সে আনন্দ। স্পীড লটারিতে রেজা তাঁর প্রাপ্য প্রাইজ চার শিলিং ন' পেন্স পার্শারের কাছ থেকে এনে সোজা গেলেন বার-এ। কিনলেন তিন বাস সিগ্রেট। পকেটে ছিল সুইজারল্যান্ডে কেনা একটা সিগ্রেট-লাইটার, দেশে তাঁর সিগ্রেট-ফোকা বড়দার জন্যে। বার করলেন সেটা। তারপর একহাতে সিগ্রেটের বাস আর অন্য হাতে সেই সিগ্রেট-লাইটার নিয়ে প্রমেনেড ডেক আর এ-ডেক চষে বেড়াতে লাগলেন :

এই যে মি: সানিয়াল, একটা সিগ্রেট হবে?

হতে পারে!

এই নিন!

ভচ্ করে সিগ্রেট-লাইটার তাঁর নাকের সামনে জালিয়ে সিগ্রেটটা ধরিয়ে দিয়ে নিজেই বললেন, থ্যাংকু!

রেজা এবার সামনে পেলেন ডা: সেনকে : সিগ্রেট?

হঠাৎ? কি ব্যাপার?

নো কোন্সেন প্রীজ!

অ' রাইট!

ভচ্। থ্যাংকু।

মি: গ্র্যাটন আসছিলেন, রেজা সিগ্রেটের বাস খুললেন:

উইল' উ?

আ! অ'কোর্স! থ্যাংকু!

ইংরেজ সন্তান। আগে-ভাগেই 'থাংকস্' জানিয়ে দিলেন

ভচ্। থ্যাংকু।

এই যে কে-জিদা।

কে-জি আর তাঁর দুই টেবিল-সঙ্গিনী সিনিয়ার ও জুনিয়ার ফোর্ড মিঠে
রোদ্দুয়ে ডেক-চেয়ারে বসে গল্প করছিলেন।

মে আই ? রেজা হাতুড়ী ফোর্ডকে সিগ্রেট অফার করলেন।

থ্যাংকু, মাই লান।

থ্যাংকু ! ডচ্।

উইল উ ম্যা'ম ? ফোর্ড বধূকে।

আ ! থ্যাংকু ! সেই সঙ্গে মিষ্টি হাসি।

ডচ্ ! থ্যাংকু !

কে-জিদা, আপনারও একটা চলুক ?

দেখচো তো ভাই, কাঠের কঙ্কে হাতেই আছে।

তবু একটা ?

ব্যাপার কি ? হঠাৎ সিগ্রেট-দানের পুণ্যলাভের ইচ্ছে কেন ?

রেজা হাসলেন, কিছু নয়। স্পীড লটারিতে বরাত ফিরলো, তাই সরাৎ
করে কিনে ফেললাম সিগ্রেট। আসলে সিগ্রেট লাইটারটা পরখ করে দেখার
ইচ্ছে !

বটে ! বটে !

আর আনন্দটাকেও ধোঁয়া করে দিচ্ছি কেমন ! ঠিক যেন কালিপুজোয়
বাজি পুড়িয়ে আনন্দ করা !...প্রীজ ছাব ওয়ান।

বেশ, দাও।

থ্যাংকু ! ডচ্ ! কী রকম, ভালো লাইটার, না ?

নট লাইক ইয়োর ওয়ার্ম হার্ট !

আ, কে-জিদা, প্রীজ ডোন ফ্লাট !...এই যে মি: রামস্বামী। উইল
উ...

রেজা এগিয়ে গেলেন রামস্বামীর দিকে।

অর্থাৎ সাগর-নগরে হৃদয়-জয়ের অভিযানে ঘুরতে লাগলেন রেজা !

কিন্তু ধাকা খেলেন মি: হকের কাছে।

নিউ-ইয়র্ক সালিম হুক তখন বেশ সোমরসহ ! কস করে নিজের দামি
সিগ্রেটকেস বার করে বোতাম টিপে খড়াং করে খুলে মেলে ধরলেন
সিগ্রেট। বেশ দামি সিগ্রেট।

হোয়াই, আই আব মাই ওন সিগ্রেট। আনটু দে ওড ? কাম অন, টেই ওয়ান !

নো, আই ভোন শ্বোক। রেজা জবাব দিলেন।

দেন, হোয়াই ইউ অফার ?

এবার বিগড়ে গেলেন রেজা : ছাট্‌স মাই স্মিট উইল। এবং রেগে গেলে রেজা দেশী-ইংরিজী বলতে শুরু করেন : ইফ ইউ ভোন লাইক, ভোন টেক। হু কেয়ারস্ ! আই অফার, মাই উইশ !—বলেই শিস দিতে দিতে একটু সরে গিয়ে নিজের মনেই বললেন, এ ডলার ডেভিল !

গত সন্ধ্যায় সিনেমা হয়ে গেছে, আজ তাই নাচের ব্যবস্থা। ডিনারের পর রাত্রি ন'টায় শুরু হলো বল-ডান্স।

ডাইনিং হলের মাঝপানের আটখানা টেবিল আর বক্তৃতাখানা চেয়ারের বন্টু খুলে সরিয়ে জায়গা করা হয়েছে। প্রজেক্টার রুমের গা ঘেঁষে বেসেছে বাজনার দল। এক কোণে কিচেনের উইণ্ডো খুলে ড্রিংক-সার্ভের ব্যবস্থা। সারা হলটায় আলো ঝলমল।

কালকের মত আজকে হলে অত ভিড় নেই। যারা নাচ জানেন, তাঁরাই এসেছেন আর এসেছেন কৌতূহলী দর্শকবৃন্দ। তাঁদের সংখ্যা খুব বেশি নয়। ইয়োরোপে যাবার পথে জাহাজে বল-ডান্সের হলে ভিড় হওয়া স্বাভাবিক। কারণ, ছায়াছবিতে বল-ডান্স দেখা আর ছ'হাত দূরে রক্ত-মাংসের শরীরের বলডান্স দেখার মধ্যে রীতিমত পার্থক্য আছে, অস্ত্রত প্রাচ্য-চোখে। কিন্তু ইয়োরোপ ঘুরে, সেখানকার বাসিন্দাদের বেলেলাপনা দেখার পর প্রাচ্য-যাত্রীদের কাছেও বিস্ময় বলডান্সে আর কোন মজা বা মাদকতা নেই। ব্র্যাণ্ডির কাছে যেন টেমসের জল।

তবু এসেছেন অনেকেই একটু সময় কাটাতে, একটু বৈচিত্র্যের আশায়, খানিকটা আড্ডার লোভে ; আর সেই সঙ্গে ছ'এক পেগ।……

বাজনার মিষ্টি নরম সুর সারা হলটায়। শুরু হয়েছে সুরাপাত্তের টুংটাং। 'বেল-বয়'রা অর্ডার মত বোতল-গেলাস নিয়ে টেবিলে টেবিলে ঘুরছে। কিন্তু তখনও শুরু হয়নি নাচ।

প্রথম দিনের নাচ। কাজেই নাচিয়েদের মন নাচতে চাইলেও পা

বাঁড়াতে লজ্জা, হয়তো বা দ্বিধা। তাছাড়া অস্থির সাগর-নগর হেলচে আর
 দুলচে। অনভ্যস্ত পায়ে এক-এক সময় সোজা হয়ে দাঁড়ানোও শক্ত। এ
 অবস্থায় নাচ!

যাত্রীদের এই প্রথম দিনের দ্বিধা-লজ্জার কথা বাদকদলের কাছে অজানা
 নয়। তাই তারা খালি ফ্লোর থাকা সত্ত্বেও আপনমনে বাজিয়ে যাচ্ছে।
 শ্রীকৃষ্ণ যেমন রাধার জন্যে বাঁশি বাজাতেন, সাপুড়ে যেমন সাপের জন্যে বাঁশি
 বাজায়, এরাও তেমনি বাজায় বৃদ্ধি যাত্রীদের নাচাবার জন্যে। বেশ জানে, তাল-
 মান জানা পা কোন দ্বিধা-লজ্জার বাধা মানে না। পরামর্শ করে শেষপর্যন্ত
 এক জোড়া সাহস করে নাচতে থাকে ফ্লোরে।

মিঃ আর মিসেস গ্র্যাটনই প্রথমে নামলেন ফ্লোরে। জাহাজের টাল
 সামলাতে সামলাতে তালে তালে নাচতে লাগলেন তাঁরা। তাঁদের
 নাচতে দেখে, সাহস পেয়ে অনেকেরই পা উঠলো নেচে।

সালিম হক আমেরিকার সাতঘাটের জল খাওয়া ছেলে। জার্মান
 মিউজিসিয়ান দলের মিঃ এবং মিসেস হারমান এক টেবিলে বসে ড্রিংক
 করছিলেন। সালিম হক মিসেস হারমানের কাছে গিয়ে সবিনয়ে নিজের
 হাতখানা এগিয়ে দিলেন। এক্ষেত্রে নৃত্যাভিলাষীকে প্রত্যাখ্যান করা
 অভদ্রতা। মিষ্টারের দিকে একবার চেয়ে মৃদু হেসে উঠে দাঁড়ালেন মরাল-
 গ্রীবা রাজহংসী। সালিম তাঁকে নিয়ে ফ্লোরে এসে শুরু করলেন
 নাচ।

এনাকী রাওকে এক গেলাস বীয়ার দিয়ে, সি. মিটার এতক্ষণ হুইস্কি
 আর সোডা নিয়ে বসেছিলেন। শেষ চুমুক দিয়ে চিত্ত মিত্র মিস রাওকে
 বললেন, নাচবেন?

আমি নাচতে জানি নাকি?

মিটার জানতেন, এই ধরনেরই একটা উত্তর দেবেন এনাকী। কাজেই
 বললেন, বহ্নন দেবি, আমি একটু নেচে আর নাচিয়ে আসি। পা-টা কেমন
 তাল ঠুকচে।—বলেই এগিয়ে গেলেন কাছেই মিস ইলিয়টের টেবিলে।
 উঠতে হলো ইলিয়টকে। এনাকী বেশ গভীর হয়ে দেখতে লাগলেন
 ছুঁঅনের নাচ। মিটার পাকা নাচিয়ে।

পার্ট'নাটকে নাচাতেও জানে। মিটারের বা হাত দিয়ে ইলিয়টের তান

হাতখানি ধরা। ইলিয়টের বাঁ হাতখানি মিটারের কাঁধে অলস হয়ে পড়ে আছে এবং তাঁর সৰু কোমরটি জড়িয়ে ধরে আছে মিটারের ডান হাতখানা। একটু বেশি কাছাকাছি বলে মনে হচ্ছে যেন? অন্তত, এনাক্সী রাগয়ের তাই মনে হচ্ছে।

আহা, এমন নাচ না নাচলেই নয়। মিটারের যত বাড়াবাড়ি!

মিটার কিন্তু দিবা নাচতে লাগলেন। এক একবার আড়চোখে দেখে নিলেন এনাক্সীকে। এনাক্সী একদৃষ্টে চেয়ে আছে তাঁর দিকে। এই ধরনের একটা দৃষ্টিই মিটার আশা করছিলেন। মেয়েদের অম্মরাগ বাড়তে হলে একটু রাগাতে হয়। আর মেয়েদের রাগাবার একমাত্র উপায়, অন্য মেয়ের দিকে একটু অম্মরাগ দেখানো। মনের মাহুষ অন্য মেয়েমাহুষের দিকে নজর দেয়, সেটা কোন মেয়েই স্বনজরে দেখে না। চিন্তা মিত্র এসব বেশ জানেন! আর জানেন বলেই নিশ্চিন্ত হয়ে নাছেন ইলিয়টের সঙ্গে ঘুরে-ঘুরে।

বেশ নাচে, না? স্প্যানিশ মেয়ে ও ইংরেজ-বধু জুনিয়র ফোর্ড বললেন কে-জিকে।

কে-জি একমনে নাচ দেখছিলেন, বললেন, হঁ!

শান্তী ফোর্ড হয়তো বুঝলেন বৌমার মনের বাসনা।

তাই হাতের সিগ্রেটের ছাইটা ঝেড়ে মিষ্টি হেসে বললেন, তা যাওনা, তোমরাও নাচোগে।

উইল'উ মিষ্টার গন্স?

কে-জি হেসে ফেললেন, থ্যাংকু ভেরি মাচ। বীয়ারের গেলাসটা টেবিলের উপর ঘোরাতে ঘোরাতে বললেন, তোমার সঙ্গে নাচতে পারলে আমি খুবই খুশি হতাম মিসেস ফোর্ড। কিন্তু দুর্ভাগ্য আমার, এ নাচ আমি জানিনে। কাজেই নাচতে গেলে তোমার পা মাড়িয়ে দেবার সম্ভাবনাই বেশি।

বলো কি? ইণ্ডিয়ান কেউ নাচে না?

নাচে বৈ কি? কে-জি হাসলেন, যীশাস্ ক্রাইষ্ট জন্মাবার আগে থাকতে ইণ্ডিয়ানরা নাচে, আজো তারা নাচে, হয়তো ভবিষ্যতেও নাচবে। তবে এমন ধরনের নাচ ইণ্ডিয়ানদের মধ্যে চলিত সেই।

ও, আই'ম সরি!

উইল'উ ম্যাডাম! হাতখানা বাড়িয়ে জুনিয়র মিসেস ফোর্ডের দিকে এগিয়ে এলেন মিঃ হারমান।

থ্যাংকু।

হারমান আর ফোর্ড এগিয়ে গেলেন ফ্লোরের দিকে।

কে-জি তাঁদের দিকে চেয়ে বীয়ারের গেলাসটা মুখে তুললেন। হয়তো ভাবলেন, বীরভোগ্যা বহুধরা! কথাটা সত্যিই।

প্রথম দিনের ফ্লোর, তাই নাচিয়ের সংখ্যা কম, তবে জমেচে বেশ। মাঝে মাঝে জাহাজের দোলানি সামলাতে না পেরে ঢলে পড়চে এ-ওর গায়ে, হেসে উঠচে দু'পক্ষই।

সবাই হেসে উঠলো, যখন নাচের ফ্লোরে দেখা গেলো সাগর-নগরের সবচেয়ে ছোট্ট মানুষটি কে. এম. শা আর বিরাট মোটা, ঢেঁড়া প্রায়-বৃদ্ধা মহিলা মিসেস এস. হল্যাওকে। সবাই হাততালি দিয়ে উঠলো, কেউবা মদের গেলাস তুলে তাঁদের শুভেচ্ছা জানালো। তা দেখবার মত। না, নাচটা নয়, দেখবার মত তাদের রাজযোটক মিলনটা। শা-র নাকটা মিসেসের পেট পর্যন্ত আর মাথাটা তাঁর বুক পর্যন্ত। মিসেসের ষোটা কোমর জড়াতে হলে অন্তত একখানি দেড়-গজি হাত চাই। কাজেই শা তাঁর ছোট্ট হাতখানি উঁচু করে রেখেচেন মিসেসের কোমরের খাজে।

দু'জনে মতলব করেই নেমেচেন ফ্লোরে। ইচ্ছেটা, মজা করা, লোক হাসানো। তাই নিজেরা খুব গভীর হমেই নাচেন। যারা লোক হাসান, তাঁরা নিজেরা হাসেন না।

দূরে একটা টেবিলে মিঃ এবং মিসেস ধীলন। লীলা ধীলনের বয়েস বেশি নয়, তিরিশের এপারে। নৃত্যশিল্পী তিনি। স্বামী বলবন্ত ধীলন ইংল্যান্ডে ইঞ্জিনিয়ারিং বই-পত্র নিয়ে ডুবে থাকতেন, আর ওঁর স্ত্রী লীলা ধীলন নানা প্রতিষ্ঠানের আগন্তুণে নৃত্য করে বেড়াতেন। ইণ্ডিয়ান স্টুডেন্টসদের মধ্যে তবলচি, হারমনিয়ম বাদক, বাঁশি বাজিয়ে আর এশাজি চারজনও জুটে গেছেলো। কিন্তু আশ্চর্য, নৃত্যপরায়ণা স্ত্রী স্বামীর বিচ্ছা-সাধনায় কোনরূপ বিরোধটালেন না। কারণ, বলবন্ত ধীলন শুধু ধীর, শান্তই নয়, হৃদয়খানি তাঁর উদার মহৎ এবং আর একটি কারণ হচ্ছে, লীলা ধীলনের পায়ে

ঘুড়ুর কুমুদু বোল বাইরের কোন হলে শোনা যেতো, বলবন্তের পড়বার ঘরে নয়। সে নাচ দেখে ইংরেজরা যখন হাততালি দিতো, বলবন্ত তখন তাঁর ঘরে গালে হাত রেখে ইঞ্জিনিয়ারিং ফরম্বলা করতেন মুখস্থ।

শোনা যায় বিশ্বামিত্র নাকি একদা মেনকার ঐ ঘুড়ুর বোল-এই তাঁর যোগ সাধনায় সব তালগোল পাকিয়ে ফেলেছিলেন। তার কারণ দু'টি : ঘুড়ুর তাঁর কানের কাছে এসে বাজিয়েছিলেন মেনকা এবং তাঁর ঘরগী ছিলেন না স্বর্ণ-মহিলাটি। এক্ষেত্রে ঘুড়ুর বাইরে বাজতে থাকায় এবং নর্তকীটি ঘরের ঘরগী হওয়ায় বলবন্ত ধীলন নিশ্চিন্ত হয়েই নিজের তপস্রায় মন দিতে পারতেন।

তা লীলা ধীলনের কাঠামোটি সত্যিই নাচের উপযোগী। তাঁর প্রতি পদক্ষেপটি ঘেন ছন্দ-বদ্ধ। স্বগঠিত দীর্ঘ পদ-যুগল, ক্ষীণ-কটি, যথোচিত মাংসল নিতম্ব, উন্নত বক্ষ, লীলায়িত বাহ্যুগল—কিন্তু হে ঈশ্বর, এ কী করচো তুমি? কোন মুখের ছাঁচ তুমি এমন দেহখানির জন্তে ব্যবহার করলে? ভুলেছিলে নাকি লাবণ্যের ঘামতেলের তুলি বুলিয়ে দিতে? তাই, লীলা ধীলনের মুখে লাবণ্য নেই। আছে শুধু সাদা, কালো, লাল রংয়ের পুরু প্রলেপ—স্বরূপ ঢাকবার উপকরণ। উপরন্তু খোঁপাটাকে বর্মী কায়দায় নাথার চাঁদির উপর তুলে দেওয়ায় সব মিলিয়ে তাঁর স্বরূপ এক অপরূপ অবস্থায় দাঁড়িয়েছে। তবু লীলা ধীলনকে দেখলে কিছুক্ষণ দেখতে ইচ্ছে করে।

লীলা ধীলন কিন্তু একদৃষ্টে বল-ডান্স দেখছিলেন। এই নাচের সঙ্গে তাঁর নাচের কোন মিল নেই। হর-পার্বতী বা রাধা-কৃষ্ণের নাচের সময় পুরুষের সঙ্গে নাচতে হয় বটে, তবে এমনতর পুরুষের কাছে ধরা দিয়ে, তার হাত ধরে নাচা—বিলেত-ফেরত লীলা ধীলনের কাছেও ঘেন মনে হলো,—খোৎ!

তাঁর পাশে গম্ভীর হয়ে বসে আছেন বলবন্ত ধীলন। একটি পুরুষ-সিংহ। দৈর্ঘ্যে, প্রস্থে, দৃঢ়তায়, গাম্ভীৰ্যে—মনোহর। তিনি ভাবচেন, ইন্ডিয়ায় তাঁর ডিপার্টমেন্টের সব মেশিনগুলো আর লাইন-শাফটে না চালিয়ে ইংল্যান্ডের মতো সেলফ-ইউনিট মোটরে চালাবেন। তাতে কোন মোটর ব্রেকডাউন হলে সব মেশিনই একসঙ্গে থেমে থাকবে না, তাছাড়া জায়গাও অনেক কম লাগবে! মিঃ আর মিসেস ধীলন বৃষ্টি স্বাধীন ভারতের শিল্প আর কৃষ্টির প্রতিনিধি।

রামস্বামী, সানিয়াল, ডাঃ রয় আর রেজা একটা টেবিল দখল করে জমার্ট হয়ে বসে চোখ দিয়ে নাচ গিলচেন আর গলা দিয়ে ঢোক গিলচেন। নিজেদের ইচ্ছে মত পানীয় বেছে নিয়েচেন তাঁরা। রামস্বামী জীন, সানিয়াল বীঘার, রয় হুইস্কি আর আর রেজা শুধু সোডা! মাংসের ভোজে রেজা যেন আলোচাল আর কাঁচকলা সেক্স নিয়ে বসেচেন।

পার্টিনার বদলে-বদলে নাচ চললো বারোটা পর্যন্ত। দর্শকদের মধ্যে অনেকেই শুতে গেলো ঘরে। সুরাপায়ীদের কয়েকজন টেবিলে মাথা গুঁজে পড়ে রইলো, আর সবাই টলতে-টলতে, হাতড়াতে-হাতড়াতে ঢুকলো ঘে-ঘার কেবিনে। নাচিয়েরা হ্যাণ্ডশেক করে, শুভরাত্রি জানিয়ে বিদায় নিলেন একে-একে।

৭০৬ নং কেবিনটা তখনো খোলা। ডাঃ সেন আপার বার্ধের মাচায় উঠচেন। কে-জি তাঁর স্লিপিং স্ফাটটা গায়ে গলাচ্ছেন, রামস্বামী নেশায় গুম হয়ে বসে আছেন চেয়ারে। সালিম হকের দেখা নেই। হয়তো ডান্সিং হলের টেবিলে মাথা গুঁজে পড়ে আছেন, কিংবা—কিংবা নয়, সত্যিই সালিম হক ফাঁকা লাউজে বসে মিস ই. রীডের সঙ্গে গভীর আলাপে মগ্ন। মিস রীড ইচ্ছে করেই নাচেননি প্রথম রাতে। প্রথম রাতের হালচালটা দেখে নিলেন, এর পরের রাতে ইচ্ছে আছে নাচবার। সালিমের সঙ্গে এই জাহাজেই আলাপ। নিয়মিত ড্রিংক ঘুম দিয়ে তবে আলাপ জমাতে পেরেচেন সালিম। আজও খাইয়েচেন প্রায় চার পেগ হুইস্কি।

মিস রীড বম্বের এক ইংলিশ স্কুলের ফ্রেক-টিচার। জাতে ইংরেজ, কিন্তু অনেক ফরাসীদের চাইতেও ভাল ফ্রেক জানেন এবং ফরাসীদের মত মদ গিলতেও ওস্তাদ। তাঁর শিক্ষাকালে ও বিছোটা প্যারি থেকেই শেখা। বয়েস ত্রিশের উপরে, কিন্তু সাজ-সজ্জার কৌশলে যেন পঁচিশের মধ্যেই বয়েসটা বন্দী। অনেক দেখা। অনেক শেখা মেয়ে—তাই প্রেম নেহাতই খেলা, তা প্রমাণ করেচেন বহুবার। পুরুষের ছোঁয়া তাঁর শুভ্র নরম চামড়ায় ঠেকে থরকে থাকে, অন্তরে গিয়ে রং ধরাতে পারে না।

চার পেগের জন্তে আর বেশিক্ষণ বসা যায় না। তাই মিস রীড বললেন, এবার উঠি, ঘুম পেলেই চলে যাবে।

এর মধ্যেই ? হকের স্বরে কক্ষ মিনতি।

কাল আবার দেখা হবে। শু'বাই'।

নিভাস্থই উঠবে ? তার হাতখানা চেপে ধরলেন হক।

হ্যাঁ, আর না। হাতখানা ছাড়িয়ে নিয়ে উঠে দাঁড়ালেন মিস।

বেশ, তবে তাই হোক। উইশ ইয়োর হ্যাপি ড্রিম !

মিস রীড গট্-গট্ করে চলে গেলেন নীচের নিজের কেবিনে। সালিম হক বিষম্বদনে সিগ্রেট ধরালেন একটা। দু'টান টেনেই অ্যাশট্রে-তে সিগ্রেটটা মুচড়ে ভেঙে রেখে এলিয়ে পড়লেন সোফার গায়ে।

আবার সমুদ্রে সকাল হলো। লাল সূর্য নীল সমুদ্রের তলা থেকে মাথা চাড়া দিয়ে উঠে। সাগর-নগরের নীচের তলার মানুষগুলোও এক-এক করে উপরের ডেকে এসে জমচে। বেড-টি-র পালা হয়েছে শেষ। একটু পরেই ব্রেকফাস্টের শুরু।

সূর্য উঠলো লাল সমুদ্রের কোলে।

ডাঃ চ্যাটার্জি রেলিং ধরে দাঁড়িয়ে ভাবছিলেন, গর্ভবতী সমুদ্র বুঝি এইমাত্র জন্ম দিলে সূর্যকে। রক্তশাবে তাই সমুদ্র লাল।

দূর-দিগন্তে পাতালা কুয়াশা। ধোঁয়াটে আশা-আকাংখা নিয়ে মায়ের কোল ছেড়ে বাড়তে লাগলো, এগোতো লাগলো গোলাপী সূর্য !

শ্রাম-আলির উর্বরা স্ত্রী ডরোথি আলি ডেক চেয়ারে বসে একমনে চেয়ে ছিলেন সূর্যের দিকে। হেনরি এতক্ষণ মায়ের কোলেই ছিলো, এইমাত্র নেমে খেলা শুরু করেছে বল নিয়ে। রোজি, জন, এলবার্ট, পামেলা—বাপের কাছে লাউজে।

এনাকী রাও এসে দাঁড়ালেন ডেকের নির্জন কোণটিতে। একটু পরেই সেখানে দেখা গেলো সি. মিটারকে।

এই যে এখানে ?

হঁ।

আমি সারা জাহাজ খুঁজে বেড়াচ্ছি !

কেন ?

কেন ? গৌফটা মুচড়ে মিটার বললেন হেসে, জানো না কেন ? মিস্ রাও,

ঐ ভাষণে স্বৰ্ঘ। একটু আগে ছিলো সমুদ্রের গর্ভে, পরে সমুদ্রের কোলে,
এখন ঐ আকাশের বুকে। ঐ আকাশ ছাড়া ওর আর যেমন গতি নেই, আমিও
তেমনি দিশেহারা তোমার ঐ হৃদয়-আকাশ ছাড়া!

একটু বাড়াবাড়ি হচ্ছে না কি? এনাক্কী কটাক্ষ হানলেন।

মিটার এনাক্কীর স্বগঠিত বক্ষ লক্ষ্য করেই বোধহয় বললেন, মোটেই না।

দূরের কুয়াশা সরে গেছে।

তবু আকাশের পূর্ব-দক্ষিণ কোণে, দুই নীলে যেখানে মেশামেশি, দেখা
গেলো সেখানে কালো খানিকটা দাগ।

দুই মিসেস ফোর্ড ডাইনিং রুম থেকে বেরিয়ে এসে একদৃষ্টে চেয়েছিলেন
ঐ কালো দাগের দিকে :

ঐ-ঐ জেব্রলতার! ফোর্ড-বৌ শান্তভীকে আঙুল দিয়ে দেখালেন।

ইজ ইট! বৃষ্কার মুখ উজ্জ্বল হয়ে উঠলো। সিগ্রেটে একটা টান দিয়ে
বললেন, মাই উইলি ইজ দিয়ার!

ইয়েস ম্যামী! তবে বৌটি মুখে বললেন না, মাই উইলি ইজ দেয়ার!

হাঙ্গার হোক শান্তভী তো!

কে-জি পাশ দিয়ে যাচ্ছিলেন পাইপ দাঁতে চেপে, গুঁদের দেখে থামলেন :

কী দেখচো গো তোমরা অমন হাঁ করে?

জেব্রলতার! ঐ যে! মাই ল্যান্ড! ফোর্ড-বধূর মুখে এক গাল হাসি।

কে-জি ঠাট্টা করে বললেন, তোমার ল্যান্ড এখন ইংল্যান্ড!

ঠিক বলেচো সানি! বৃষ্কার মুখে মুহু হাসি।

আরো স্পষ্ট হতে লাগলো কালো দাগটা। ক্রমে বড় হতে লাগলো,
কালো হতে লাগলো, দেখা গেলো কালো উঁচু পাহাড় একটা। চোখে
পড়লো সাগর-নগরের যাত্রীদের। অনেকেই রেলিংয়ের ধারে এসে
ভিড় করলো।

জেব্রলটার। জেব্রলটার।

আজ তিন দিন বাদে মাটির মুখ দেখলো মাহুঘরা। মাটির মাহুঘরা।
মাটির মতো উর্বর, মাটির রসে রসিক, আবার মাটির মধ্যেই মিশে-বাওয়া
মাহুঘরা আবার মাটি দেখতে পেলো। আনন্দে হৈ-হৈ করে উঠলো

সবাই। করবে না? তিনদিন মাটি দেখতে পারনি, শুধু জল দেখেচে। শুধু জল, জল, জল—দেখে দেখে চিত্ত বৃদ্ধি হয়েছে বিকল!

জলে-ভাসা সাগর-নগরে মাটি নেই।

আরো স্পষ্ট হলো জিভ্রলটার। বেলা তখন বারোটা।

ঐ তো দেখা যাচ্ছে বিরাট পাহাড়, খাড়া হয়ে আছে। ইংরেজের প্রহরী। বন্দুক-কামান সাজিয়ে বসে আছে স্পেনের ঘাটের ধারে। স্পেনের খানিকটা জমি ঘিরে নিয়েচে পাহারার জগ্গে। স্পেনের ঘেরা ঘাটে ইংরেজ এক হাতে ছিপ, অন্য হাতে লাঠি নিয়ে বসে। শত্রু দেখলে লাঠি দেখায়, আর কুমারী দেখলে টোপ্ ফেলে। উইলিই তার প্রমাণ।

দেখা যাচ্ছে সবুজ গাছ। সবুজ ঘাস। নীল চোখে, বাদামী চোখে, কালো চোখে আকুল হয়ে চেয়ে আছে সবুজ কূলের দিকে। খেলনার মত দেখা যাচ্ছে বাড়িগুলো। আর তাদের পায়ের কাছে রেখে খাড়া হয়ে সগর্বে দাঁড়িয়ে আছে বিরাট পাহাড়ী প্রহরী।

ভাইনিং হলে আজ সবাই ঘেন চকল। খাওয়ার দিকে মন নেই। আর ঘটা-খানেক বাদেই সাগর-নগর মাটির-নগরের গা ঘেঁষে গিয়ে দাঁড়াবে। সাগর-নগরের যাত্রীরা মাটিতে পা ফেলে বাঁচবে।

সবাই প্রায় দল পাকাচ্ছে।

চিঠি লেখা শেষ হয়েছে, খান আঁটিচে অনেক।

পার্শ্বারের অফিসের সামনে ভিড়। জেভ্রলটারের ডাক টিকিট চাই। খামে সোঁটে ডাকে দেবে। তটে যাবার ব্যবস্থাও হবে ওখান থেকেই। ছাড়পত্র ওখানেই পাবে।

জিভ্রলটার জঙ্গী বন্দর।

কাজেই তার গা ঘেঁষে দাঁড়ানো যার-তার কর্ম নয়। হয়তো তাই সাগর-নগর 'বাতরি' শত হস্তেন দূরে নাব্ব দরিয়ায় নোঙর ফেলে দাঁড়ালো। যাত্রীদের বৃদ্ধি মনে মনে বললো, বাও, তোমরা বাও, দেখে এসো, আমি এখানে দাঁড়াই।

বড় একখানা স্টীমলক এসে দাঁড়িয়েচে সাগর-নগরের গায়ে। হয়তো

বুঝিয়ে বলতে এসেচে : হে বিরাট, স্বাগতম্ ! আমাদের বন্দরের হয়ে তোমাৰে বন্দনা জানাতে এসেচি ; বলতে এসেচি, আমাদের বন্দর তোমার বন্ধু চায়, কিন্তু বন্ধুত্বের আলিঙ্গনের কোন উপায় নেই। কারণ মাঝখানের এই জলটুকু তোমার কাছে হাঁটুজলের সমান—তোমার অগম্য। তাই আমার এই দৃতিমালি !

‘বাতরি’ হয়তো তাই ‘সিটি’ মেরে হেসে বললো, ঠিক আছি। আমি এখানেই বেশ থাকবো। তুমি বরং আমার এই নাগরিকদের, মাটির মানুষদের তোমার মাটির নগর দেখিয়ে আনো। লোকগুলো ক’দিন জল দেখে-দেখে হাঁকিয়ে গেচে।

নিশ্চয়ই, নিশ্চয়ই ! গ্যাভলি ! ঈমলকণ্ড সিটি মারলো, কই, এসো গো তোমরা !

সাগর-নগরের নাগরিকরা বাইরের সিঁড়ি বেয়ে নীচে নামতে লাগলো ঈমলকণ্ডে। তাদের পাশপোর্ট জমা রইলো পার্শ্ব অফিসে।

তবে বেশ কয়েকজন তাঁদের পাশপোর্ট কোটের পকেটে বা ভ্যানিটি ব্যাগের মধ্যেই ভরে নামলেন। তাঁদের অনেকের সঙ্গেই আমাদের পরিচয় নেই, (সহরে ক’জনের সঙ্গেই বা পরিচয় থাকে !) তবে সাদাম্পটন থেকে জিভ্রলটার যাবার যাত্রীদের নামের তালিকার কুপায় নামগুলো জানা শক্ত নয় : মিঃ এল্‌সওয়ার্থ, মিঃ গ্রোভ, মিঃ হেক্সটল, সপরিবারে মিঃ জে. টি. উইলস, মিঃ ও মিসেস গোমেজ, মিঃ গোল্ডউইন, মিসেস ওয়েব আর তাঁর দুই ছেলে এবং আরো প্রায় জন পনেরো এবং আমাদের পরিচিত শান্তুড়ী-বৌ ফোর্ড।

এঁরা নামলেন ‘বাতরি’কে বিদায় দিয়ে।

আর বেড়াতে নামলেন ‘বাতরি’র প্রায় অর্ধেক লোক : সানিয়াল, রয়, চ্যাটার্জি, চিত্ত মিত্র, এনাকী রাও, কে-জি, কে. এম. শা, হারমান দম্পতি, ধীলন দম্পতি—কত নাম করবো !

আবার নামলেনও না অনেকে। তাঁদের অনেকেই বৃদ্ধ বা বৃদ্ধা—উপর নীচ করার সামর্থ্য বা উৎসাহ আর নেই ; কিংবা ঝাঁপটা আগেই দেখেচেন জিভ্রলটার এবং তাঁদের মতে হুঁবার দেখবার কিছু নেই সেখানে। আর নামলেন না কাচ্চা-বাচ্চা মা-বাপেরা : যেমন আলি-দম্পতি। ঝারা অস্থস্থ,

তঁরাও নামলেন না। আর মন ঝাঁদের ভারাক্রান্ত, দেহও তাঁদের ভারিই থাকে—তঁরাও ‘বাতরি’তে থাকাই ঠিক করলেন।

মাঝারি আকারের লঞ্চটার জেব্রলটার দর্শনার্থীরা ঠাসাঠেসি করে বসেচেন কে-জিও বসেছিলেন সানিয়াল, রামস্বামী, ডাঃ সেন, রয়, ও রেজার সঙ্গে। গল্পে মগ্নগুল ছিলেন সবাই। এমন সময় কে-জি দেখলেন, ফোর্ড-বৌ ডাকচেন তাঁকে।

কে-জি বললেন হেসে, ওহে বসো তোমরা, ফোর্ড-বধু ডাকচেন কেন, শুনে আসি।

সঙ্গে সঙ্গে সবাইয়ের চোখ পড়লো ফোর্ড-বধুর দিকে। ঠোটকাটা সানিয়াল বললেন, নিশ্চয়ই, নিশ্চয়ই। স্মর করে বললেন, যাও হে কালাচাঁদ, চাঁদবদনীর বড় সাধ, বলবেন তাঁর অপরাধ—

কি অপরাধ? কে-জি জিগ্যেস করলেন।

বারে, তিনি তোমায়ে ছেড়ে চললেন আজ আয়ান ঘোষের ঘরে! অপরাধ নয়?

শুনে সবাই হো-হো করে হেসে উঠলেন।

কে-জি উঠলেন। কারোর হাত, কারোর পা বাঁচিয়ে, একে টপকে, ওকে সরিয়ে কোন মতে গিয়ে দাঁড়ালেন ফোর্ড বধু আর শান্তুড়ীর সামনে। ফোর্ড-বধু একটু সরে জায়গা দিলেন বসতে।

উই আর সরি টু লীভ ইউ সানি। কে-জির হাতখানার উপর নিজের হাত রেখে ফোর্ড-শান্তুড়ী বললেন কথাটা। আহা মাতৃশ্বের স্নেহ যেন গলে পড়ছিলো বৃদ্ধার কথাগুলির মাধ্যমে। সামান্য তো ছ-তিন দিনের আলাপ। একসঙ্গে খাওয়া, মাঝে-মাঝে একসঙ্গে জাহাজের মধ্যে ঘোরাঘুরি। অথচ কখন যেন মায়া-মমতা, স্নেহ-ভালবাসার অদৃশ্য বাঁধনে বাঁধা পড়ে গেছেন বৃদ্ধা। এমনিতরো বাঁধা পড়ে যায় অনেকেই। যেন বহুধৈব কুটম্বকম্।

তাই তো প্রায় দেখা যায়, যে ছই দেশের কাগজ আর নেতারা গলাবাজি করে গালাগালি করচে, সেই ছই দেশেরই প্রেমিক-প্রেমিকা হয়তো কোন পার্কে আড়ালে কোন বেষ্ট্রে আলিঙ্গন অবস্থায় গভীর ভাবে বিভোর কিংবা সে ছই দেশের ছই বন্ধু সামনে কফি বা মদের পেয়ালা নিয়ে সরস গল্পে

মজল। এঁদের প্রাণের নীতির কাছে রাজনৈতিক পররাষ্ট্রনীতি অচল, আর পক্ষপাতের দ্বৈত আসরে বোমা একমুখ বোমানান।

হু' ইউ লাইক তু গিভ্ ইয়োর আড্রেস? ফোর্ড-বধু ভ্যানিটি ব্যাগ থেকে তাঁর ছোট্ট নোট-বই আর পেন্সিল এগিয়ে ধরলেন কে-জির দিকে।

উইথ প্লেজার। কে-জি নোটবইতে ঠিকানাটা লিখে দিয়ে নিজের ডায়েরি বইখানা বার করলেন : তোমাদের ঠিকানাও দাও!

জিভ্রলটার আর ইংল্যান্ডের দুটো ঠিকানাই লেখা হয়ে গেলে, ফোর্ড-বধু বললেন, চিঠি দিয়েও কিন্তু।

ফোর্ড-শাওড়ী মুচকে হেসে বললেন, এ বুড়িকেও যেন ভুলো না।

ষ্টীমলঞ্চ ততক্ষণে জিভ্রলটারে তীরে এসে ঠেকেচে।

যাত্রীরা সবাই উঠে দাঁড়ালো। মাত্র হু' ঘণ্টার চেঞ্জ।

সাগর-নগর থেকে মাটির নগরে গিয়ে মাটির মানুষের সঙ্গে মোলাকাত করবার এই এক সুবর্ণ সুযোগ। সবাই চঞ্চল।

সিঁড়ি লাগানো হলো। ভেসে আসা সবাই একে একে মাটিতে পা দিলো। কে-জি বিদায় নিলেন ফোর্ড মহিলাদের কাছে। তাঁরা এখন কিছুক্ষণ আটক থাকবেন কাষ্টম্‌সের বেড়ার মধ্যে। তাদের সঙ্গে থাকতে গেলে বেড়ানো হবে না তাঁর।

গু'বাই সানি। - বৃদ্ধা কে-জির সঙ্গে হাওশেক করলেন। ফোর্ড-বধুও।

এমন সময় বৃদ্ধা তীরের দিকে আঙুল দেখিয়ে বললেন, আ, দেয়ার্স উইলি।

ফোর্ড-বধুও তাকে দেখে রুমাল নেড়ে বললেন, ইয়েস, দেয়ার হি ইজ।

কে-জির হাত ধরে টানলেন ভদ্রমহিলা, এসো আমাদের সঙ্গে, আলাপ করিয়ে দেবো ঠর সঙ্গে!

কে-জি দেখলেন, তীরে দাঁড়িয়ে এক ইংরেজ তরুণ। পরনে জঙ্গী-পোষাক, কোমরবন্ধে পিন্ডল। হয়তো, ডিউটির ফাঁকে ছুটি নিয়ে এসেচে মা-বৌকে রিসিভ করতে। পান্চাত্যে স্ত্রী মুখ্য, মা গৌণ। কাজেই সিঁড়ি বেয়ে তীরে নেমে ফোর্ড-স্ত্রী প্রায় ঝাঁপিয়ে পড়লেন স্বামীর বুকে। বোঝা গেলো, নিবিড়

আলিঙ্গন আর চুম্বনের ঘনিষ্ঠতার মাঝে জঙ্গী পোষাকের উচু পেতলের বোতাম আর চামড়ার বেট হয়তো ততটা অসহনীয় নয়, বতটা অসহ্য বিরহ-বেদনা। কাজেই নিবিড়ই প্রথম সাক্ষাতের পালা শেষ হল, গুজ্জ বৃদ্ধা মায়ের কাছে এসে তাঁর মুখ চুম্বন করলো।

কে-জি কাছেই দাঁড়িয়ে ধরার প্রেম ও ভক্তির ধারা দেখছিলেন, এমন সময় ফোর্ড-বধু তাঁর স্বামীকে কে-জির কাছে নিয়ে এলেন : আমাদের বন্ধু মিঃ গস্ !

বৃদ্ধা হেসে ছেলেকে বললেন, মাই ইণ্ডিয়ান সান্ !

কে-জি উইলির সঙ্গে ছাওশেক করে বললেন, সো নাইস টু মিট ইউ !

আর দেয়ি করা চলে না। সানিয়ালরা অনেকটা এগিয়ে গেছেন। তাঁদের সঙ্গে নেওয়া দরকার। বিশেষ করে চিত্ত মিত্রও ঐ দলে আছেন ; বলেছেন, এর আগে নাকি সেরটা তাঁর দেখা আছে বার দুই। কাছেই তাঁর সঙ্গে নিলে অল্প সময়ে বেশি দ্রষ্টব্য দেখা যেতে পারে।

ফোর্ড পরিবারের কাছে বিদায় নিয়ে কে-জি দ্রুত পায়ে এগিয়ে গিয়ে সানিয়ালদের দল ধরলেন।

সানিয়াল হেসে বললেন, কি হলো ওখানে ?

কিছু না, কে-জিও হাসলেন : দুধে আমে এক হয়ে গেলো, আঁটি নিজের ঘাঁটিতে ছিটকে এসে পড়লো।

চিত্ত মিত্র শুনে বললেন, ঐ আঁটি আবার আঠার মতো লেগে থাকে অনেক সময়। তবে কি জানেন, ওসব ট্যাকটিকস্ জানা চাই।...চলুন, বাঁ দিকের পথটা ধরি।

সামনেই ব্লক টাওয়ার। একটু এগোলেই ছাঁটো পথ গেচে ডাইনে-বাঁয়ে ছাঁদারে। ডাইনের পথটা সহরের অলিগলিতে গিয়ে মিশেচে ; বাঁ দিকের পথটা গেচে স্পেন-জিব্রলটরের সীমানায়।

আহাজের যাজ্ঞীদের বড় দলটা সহরে যাবার ডান দিকের পথ ধরলেন ; আর সি. মিটারের নির্দেশে সানিয়ালরা বৈকলেন বাঁ দিকে। বিরাট পাহাড়টার নীচে দিয়ে খানিকটা যেতে দেখা গেলো পাহাড়ের গায়ে-গায়ে অনেকগুলো ফাঁক জানলার মতো।

সি. মিটার বললেন, ঐ যে দেখছেন ফোকরগুলো, ওগুলির ভেতরে কামান বসানো, তাক করে আছে সমুদ্রের দিকে। চব্বিশ ঘণ্টা দূরবীন হাতে পাহারা দিচ্ছে গ্রহরী। শত্রু জাহাজের নিশানা পেলেই কমাণ্ডারের নির্দেশে কামানগুলো গর্জন করে ওঠে। এই জিভ্রলটারে ইংরেজ সদা-সর্বদা তটস্থ। হবে না? ইংল্যান্ড যদি পেট হয়, তবে জিভ্রলটার ইংল্যান্ডের কণ্ঠনালি। বাইরে থেকে মাল আনিয়ে গেলবার জন্যে এইটাই তো গলা কিংবা গলি।

একথা অনেকেরই জানা। আজ চান্দ্র দেখতে পেয়ে চারদিকে চোখ ঘুরিয়ে দেখে নিলেন সবাই।

আর একটু এগুলেই এয়ারপোর্ট। ফাঁকা জায়গাটুকুতে মিনিটে-মিনিটে ডানা-মেলা উড়ো জাহাজের আসা-যাওয়া, ধানের ক্ষেতে যেন পাখির মেলা।

সি. মিটার হেসে বললেন, দেখেচেন তো নীল আকাশ আর নীল জলের উপর নীলচন্দ্র ইংরেজের কী প্রখর দৃষ্টি।

আর একটু হাঁটতেই পাওয়া গেলো স্পেন-জিভ্রলটার বর্ডার। একটি লোহার গেট তার এপারে দু'জন ছ' ফুট লম্বা ইংরেজ পুলিশ আর ওপারে দু'জন সাধারণ মাপের স্পেন-গ্রহরী। মাঝখানে বেড়া রেখে চারজনই গুলি করচে আর কোন লরী এলে তার 'পাশ' দেখে থলে দিচ্ছে গেট।

সানিয়ালদের দল যেতেই ইংরেজ ছ'ফুটি দু'জন এগিয়ে এলো, দিতে লাগলো কয়েকজনের প্রশ্নের উত্তর। অবশ্য, সি. মিটার জানাতে তুললেন না, তাঁর কাছে কিছুই অজানা নয়।

ইংরেজ পুলিশ আলাপ করিয়ে দিলো স্পেন-পুলিশদের সঙ্গে এবং করমর্দনের পরে দলের দু'তিনজন গ্রুপ ফটো তুলতে চাইলে, আশ্চর্য, আপত্তি করলো না গ্রহরী চারজন। এমন কি, গলার কলার আর মাথার টুপি ঠিক করে নিয়ে তারাও দাঁড়ালো ক্যামেরার সামনে।

অর্ধাং বোঝা গেলো, জায়গাটা আপাতত মারাত্মক নয়, তাই হরিহর আত্মা হওয়ায় বাধা নেই। পুলিশদের পলিশড্ আচরণে সবাই তাই মুগ্ধ হলেন।

সি. মিটার বললেন; এবার যাওয়া থাক সহরের দিকে।

তথাস্তু ।

সবাই আবার ক্লক টাওয়ারের দ্বার দিয়ে সহরের যাবার পথ ধরলেন । জিব্রলটারের কড়া এবং চড়া রোদ্দুরে প্রায় সবাই ক্লান্ত হয়ে পড়েছিলেন, এবার সহরের গলির মধ্যে ছায়ায় এসে যেন হাঁক ছেড়ে বাঁচলেন ।

মেন স্ট্রীট ধরে এগিয়ে তাঁরা শ্রিন্স এডওয়ার্ড রোডে এসে পড়লেন ; সেখান থেকে ইয়োরোপা রোডে । পাহাড়ের গা কেটে কেটে রাস্তা । সরু । লোকের ভিড় । সারি সারি দোকান, জিনিসে ঠালাঠাসি । ঘন ঘন রেট্রুয়েন্ট আর কফিখানা । এখানে নতুন লোক দেখলে পথ-চলতি মেয়ে-পুরুষেরা হাঁ করে দেখে না, কারণ রোজই প্রায় তারা সাগর থেকে ফেরা লোক দেখতে পায় এই সহরে । বরং চঞ্চল হয়ে ওঠে দোকানীরা, দোকানের দরজায় এসে দাঁড়ায় ; বিদেশীকে ডাকে, বলে, এসো, কিছু কিনে নিয়ে যাও, জিব্রলটারের স্বেডেনিয়ার ।

জিব্রলটারের জীবনযাত্রা টনকো নয়, ঢিলেঢালা । পুরুষদের পোষাকে তেমন পারিপাট্য নেই, মেয়েগুলি পটের বিবি সাজে না । তবু তারা অপূর্ব লাভণ্যময়ী । কালো দুটি নয়নমণি, কালো কোঁকড়া চুল, মোমের মত দেহের গড়ন, অলিভ গায়েব রং ।

সাগর-নগরের নাগরিকদের ঢেউ এসে ঢুকেচে জিব্রলটারের মাটির নগরে পথে-ঘাটে । তাই রাস্তা চলা দায় । যেন জোয়ারের জল । আর কয়েক ঘণ্টা পরেই ভাঁটা পড়বে । ঢেউ ফিরে যাবে সাগর-নগরের তীরে ।

জিব্রলটারের মেন স্ট্রীটে তাই যতো না অচেনা মুখ, তার চাইতে চেনা মুখের ছড়াছড়ি বেশি । ঐ তো মিঃ আর মিসেস হ্যারি গ্র্যাটন, ঐ যে কিরন্সবী বড়াই । লতিফ আর তার শপগাল বৌ এমা ব্রাউন ঢুকলো একটা দোকানে । রেভারেণ্ড হেওয়ার্ড একলাই ঘুরচেন । মিঃ মুন্সেংখর সপরিবারে দোকানের শো-উইণ্ডো দেখতে দেখতে চলচেন । আর, আর, ঐ যে এনাক্সী রাও, সঙ্গে তাঁর কেবিন-মেট মিসেস হল্যাণ্ড ।

গুডবাই । চললাম । হঠাৎ সি. মিটার দল থেকে ছিটকে ছুটে গেলেন এনাক্সী রাওয়ের কাছে ।

তাঁর কাণ্ড দেখে হেসে উঠলেন দলের সবাই : চিয়ায়ো ।

মিটার এনা রাওয়ের পেছনে গিয়ে, আস্তে করে টেনে ধরলেন তাঁর

কাঁধে ঝোলানো ভ্যানিটি ব্যাগের ঝুপটা। চমকে থমকে দাঁড়ালেন এনাঙ্কী।

মিটার বললেন ইশারায়, এসো আমার সঙ্গে।

আর অহুমতির অপেক্ষা না করেই তাঁকে প্রায় ঠেলে ঢুকিয়ে দিলেন পাশের রেট্রোরটায়। নিষেধও ঢুকলেন।

মিসেস হল্যাও জানতেও পারলেন না, তাঁর পেছনে কী ঘটে গেলো। ভদ্রমহিলা আপন খেয়ালে কিছুটা এগিয়ে, হঠাৎ তাঁর খেয়াল হলো সঙ্গে মিস রাও নেই! এদিক-ওদিক চাইতে লাগলেন তিনি : মাই গ্যাড্, হোয়ার ইজ শি ?

শি আর হি তখন হুঁকাপ কফি আর হুঁটো স্মুগুইচের অর্ডার দিয়ে পাশাপাশি বসে হি-হি করে হাসছেন।

আর মিসেস হল্যাওর অবস্থা দেখে সানিয়ারাও দূরে হো-হো করে হেসে উঠলেন।

ডাঃ সেন বললেন, দাড়ি আর সাড়ি একটু বাড়াবাড়ি করলে না ?

সানিয়ার হাসলেন, আরে মশয়, একেই বলে বীরভোগ্যা বসুন্ধরা।

কে-জি পাইপে ধোঁয়া ছেড়ে বললেন, এ যেন. স্পেন থেকে জিব্রলটারকে আলাদা করে নিলো ইংরেজ !

রাইট, রাইট কে-জিদা। রেজার খুব পছন্দ হলো কথাটা।

জঙ্গী-সহর জিব্রলটার তার হেড অফিস ইংল্যান্ডকে শিল্প-বিজ্ঞানের দিক থেকে এগিয়ে যেতে পারেনি। আর ঘাণ্যার কথাও নয়; তবে সময়ের দিক থেকে গ্রীনউইচ টাইমকে টেকা মেরে পুরো একটি ঘন্টা এগিয়ে আছে।

জিব্রলটারে নামবার সময় যাত্রীদল তাদের ঘড়ি এক ঘন্টা এগিয়ে রেখেছিলেন এবং সেই ঘড়িমত তাঁরা স্ট্রিমলকে উঠে বসলেন।

নাও গো সাগর-নগর, তোমাদের লোকদের পৌছে দিয়ে গেলাম। স্ট্রিমলক 'বাতরি'র গা ঘেঁষে এসে বললো যেন।

সাগর-নগর তার নাগরিকদের গুনে গোঁথে নিয়ে হয়তা বললো, ধন্যবাদ। খানিকবাদে নড়ে উঠলো সাগর-নগর।

আবার যাত্রা শুরু। আকাশের সূর্য তখন পশ্চিমে হেলানো।

মিসেস দত্ত 'বাতরি' থেকে নামেন নি। যাননি জিওলটারে।

যিনি এখন সাত হাত জলে পড়েছেন, যার পায়ের তলা থেকে মাটি সরে গেচে, তাঁর পক্ষে সাগর-নগরই যোগ্য স্থান, মাটির নগরে কার ভরসায় বাবেন ?

তবু যেতে হবে মাটির সহরে। আর কয়েকটা দিন পরেই পা দিতে হবে ভারতের মাটিতে, ফিরে যেতে হবে বাংলা দেশে, হাওড়ায় নেমে ট্যাক্সি ভাড়া করে উঠতে হবে দর্জিপাড়ার গলির মধ্যে হলদে দোতলা বাড়িটায়। হাওড়ার ষ্টেশনে কতজন আসবে ফুলের মালা নিয়ে, ফুলের তোড়া নিয়ে তাদের বিদেশ-প্রত্যাগত আত্মীয়-বন্ধুদের সাদরে বরণ করে নিতে। আর মিসেস দত্তের জন্যে ? হয় তো আসবে কেউ, শুকনো মুখে, ব্যথিত হৃদয়ে—হাত ধরে তাকে কামরা থেকে নামাবার জন্যেই বৃষ্টি। তাঁর বুকে তো মালা ঝুলবে না, বুকখানা জালা করবে, জ্বলবে ! ওঃ, ভাবাও যায় না।

মিসেস দত্ত সন্ধ্যার অন্ধকারে একখানা ডেক চেয়ারে বসে আপন মনেই ভাবছিলেন। এই সাগর-নগর তো একদিন ছাড়তেই হবে ! সেই ছেড়ে যাওয়ার প্রথম পদক্ষেপ হিসেবেই আজ প্রথম এই বাইরে আসা।

প্রায় সবাই জিওলটারে বেড়াতে গেচে, সাগর-নগর প্রায় জনশূন্য। সেই জন্যেই তিনি কেবিনের বাইরে এসে বসেছিলেন, চেয়েছিলেন নীল সমুদ্রের দিকে। কিন্তু কখন যে আবার সাগর-নগর ভরে গেচে, তার অলিতে-গলিতে, বার-এ, লাউঞ্জে দেখা দিয়েচে চাকলা—তা তিনি বুঝতেই পারেন নি। এমন কি, তাঁর ক্রমমেট মিস ইলিয়টও যে কখন তাঁর পাশে এসে দাঁড়িয়ে আছেন, তাও খেয়াল করেন নি।

মিস ইলিয়ট পাশের ডেক-চেয়ারখানা টেনে বসবার উপক্রম করতেই ফিরে তাকালেন মিসেস দত্ত। ভদ্রতা হিসাবে য্নান হাসলেন একবার।

মিস ইলিয়ট খুশিতে ডগমগ হয়ে উঠলেন, আ'ম সো গ্যাভ, গ্যাট, য়ু আ' হিয়া !

মিসেস দত্ত বললেন, থ্যাংকু !

মিস ইলিয়ট কথাবার্তার সূত্র ছাড়লেন না :

চমৎকার সন্ধ্যা। না ?

হ'।

জিভ্রলটার টাউনটি ভারি চমৎকার। নীট এণ্ড ক্লীন!

আই সি।

আপনি গেলে পারতেন।

ইচ্ছা হলো না।

এবার মিস ইলিয়ট আসল কথায় এলেন : আপনার শরীর কি
অস্থির ?

না।

তবে ?—আচ্ছা থাক্।

এবার ভেঙে পড়লেন মিসেস দস্ত। ভাঙা হৃদয়টুকু গুমরে গুম্ হয়েছিলো, এক দরদী সঙ্গিনীর সহানুভূতির ছোঁয়াচ লেগে খান-খান্ হয়ে গেলো যেন। বাজ-পড়া মানুষ নাকি এমনই আড়ষ্ট হয়ে থাকে, আর মানুষের ছোঁয়া পেলেনই নেতিয়ে পড়ে।

মিসেস দস্তর দু'গাল বেয়ে চোখের জল গড়িয়ে পড়ছিলো। ক্রমাল দিয়ে তা মুছে নিয়ে বললেন, মিস ইলিয়ট, যু আর সো কাইণ্ড টু মি—আমি বলবো আমার ট্রাঙ্কেডি। হয় তো তাতে বুকখানা আমার হাঙ্কা হতে পারে।

মিস ইলিয়ট বললেন, যদি মনে ব্যথা পান তো থাক্।

এবারও ম্লান হাসলেন মিসেস দস্ত : ব্যথা ? চরম ব্যথা যা পাবার তা পাওয়া হয়ে গেছে মিস ইলিয়ট, আর ব্যথার ভয় করিনে। আমি বলবো—

মিসেস দস্ত গালে হাত রেখে বলতে লাগলেন, মাস্তুর সাতদিন আগে আমি এই পথে গেছলাম তোমাদের দেশে বহু আশা-ভরসা বৃকে নিয়ে। কিন্তু ভয়ে-ভাবনায় দুলছিলাম সেই জাহাজখানার মতই। সে ভয়-ভাবনার সমাধি দিয়ে এসেছি ইংল্যান্ডের মাটিতে।

তার মানে ?

স্বামীকে ইংল্যান্ডের মাটিতে রেখে ফিরে যাচ্ছি নিজের দেশে। ওখানেই তাঁর মাটি কেনা ছিলো, ওখানের মাটির কোলেই তিনি শান্তি পেলেন। তাঁর অশান্ত মন তোমাদের দেশে একটু শান্তি একটু স্থখের জন্তে ছোট্টাছুটি করেছে, আমরা তাঁকে স্থখ-শান্তি কিছুই দিতে পারিনি। প্রথম জীবনে ইংল্যান্ডে পড়তে এসে সাত বছর কাটিয়ে গেছলেন, আমার শান্ত্যঙ্গীর কাছে

ওনেচি। তাঁর বেহিসেবি খচর ভোগাতে বিধবা শান্ত্রীকে ছ'খানা বাড়িই বেচতে হয়েছিলো। তারপর পয়সা অভাব হওয়ায় ফিরে আসেন তিনি ভারতে এবং তাঁর রাশ টেনে ধরবার ভার পড়ে আমারই ওপর। কিন্তু পারলাম কই ?

মিসেস দত্ত দীর্ঘনিশ্বাস ফেলে চুপ করলেন।

মিস ইলিয়টও চুপ করে রইলেন।

মিসেস দত্ত একটু পরেই শুরু করলেন আবার : নতুনের মোহে পড়ে কয়েকটা বছর তিনি শাস্ত-শিষ্ট হয়েই আর পাঁচজনের মত সংসার ধর্ম করলেন। কখনো চাকরি করলেন, কখনো ব্যবসা। কিন্তু কিছুতেই কিছু হলো না। ইংল্যাণ্ডে বিত্তা শিক্ষা করতে গিয়ে যে অর্থ তিনি নষ্ট করেছিলেন, ইংল্যাণ্ডের শেখা বিত্তায় তার একাংশও তিনি ঘরে আনতে পারলেন না ; অথচ আমাদের সংসারে এলো আর একটি পোষ্য, আমাদের খোকন। অবশ্য কয়েক মাস পরেই তার জ্ঞে স্থান ছেড়ে দিয়ে পুরোন পোষ্য আমার শান্ত্রী পরলোক গমন করলেন। লক্ষ্য করেছিলাম, আমার প্রতি স্বামীর মোহ ক্রমে কেটে আসছিলো বটে, তবে খোকনের মায়ায় বাঁধা পড়েছিলেন মাত্র কয়েকটা বছরের জ্ঞে। কিন্তু প্রায়ই বলতেন, এখানে থেকে আমার কিছুই হবে না। এখানে মাহুষের কদর মাহুষ বোঝে না। আমি আবার ইংল্যাণ্ডে যাবো। তারপর একবার—একবার আমি খোকনকে নিয়ে কয়েকদিনের জ্ঞে বাপের বাড়ি গেছি, হঠাৎ সেখানে চিঠি পেলাম, বসে থেকে তিনি লিখছেন, ভাগ্য অশেষণে আবার ইংল্যাণ্ডে যাচ্ছি। ক্ষমা করো।

আশ্চর্য তো! মিস ইলিয়ট বলে ফেললেন।

এ সংসারে কিছুই আশ্চর্যের নয় মিস ইলিয়ট। মিসেস দত্ত বললেন, নইলে আমার এই ইংল্যাণ্ডে যাওয়া-আসা কী কম আশ্চর্যের? হ্যাঁ, যা বলছিলাম : স্বামী ইংল্যাণ্ডে পৌছে মাঝে মাঝে চিঠি দিতেন এবং কালেভদ্রে কিছু টাকা পাঠাতেন। কিন্তু বছরখানেক পরে চিঠি বা টাকা দুই বন্ধ হয়ে গেলো। বুঝলাম, আবার তাঁর পুরোন রোগ নতুন করে দেখা দিয়েছে। আর আমার ধারণাও সত্যি—সে খবর ইংল্যাণ্ড থেকে ফিরে আসা কয়েকজনের কাছ থেকে কানায়ুঝো জানাও গেলো। তাঁকে নাকি অনেকেই বার-এ বা নাইট ক্লাবে দেখেচেন এবং কোন বান্ধবী সহ।

ইজ ইট? আ, রিয়েলি ভেরি সরি! মিস ইলিয়ট বললেন।

আপনারা এ ক্ষেত্রে কি করতেন মিস ইলিয়েট ? সহজ গলায় প্রশ্ন করলেন মিসেস দস্ত ।

জাচারালি ডিভোর্স স্মাট ফাইল করতাম ।

ডিম্বার, এইখানেই তোমাদের সঙ্গে আমাদের ভাঙাত । আর একবার জ্ঞান হাঙ্গলেন মিসেস দস্ত : তোমরা এ ক্ষেত্রে যখন উকিল ব্যারিষ্টারের বাড়ি যাও, আমরা তখন ‘শক’ খেয়েও স্বামীর সখকে মেনে নিয়ে চকল মনকে খাবড়ে খুবড়ে ঠাণ্ডা করি । পতি আমাদের দেশে পরম গুরু, তোমাদের মত ক্রেও নয় । অতএব প্রতিদিন ঈশ্বরের কাছে প্রার্থনা করতে লাগলাম, ভগবান, আমার স্বামীকে ক্ষমতি দাও । কিন্তু ঈশ্বরের মতি-গতি বোঝা ভার । হঠাৎ একদিন টেলিগ্রাম এলো মিডলসেক্স হসপিটাল থেকে । হাউস সার্জেন টেলিগ্রাম করচেন : কাম্ শার্প । মিঃ ডাট ওয়াণ্টস ইউ । কণ্ডিসান আলামিং ।

মিঃ ডাট ওয়াণ্টস মি ! রোগশয্যায় স্বামী আমাকে স্মরণ করেচেন । মধুলোভী বান্ধবীদের আর হয়তো দেখা নেই । বিপদে আমাকেই তিনি আশা করেচেন । কিন্তু কেন যাবো ? না, যাবো না । অভিমান দেখা দিলো । কিন্তু আশ্চর্য, ক্ষণেক পরেই সে অভিমান দূরে সরিয়ে দিয়ে দেখা দিলো জীৱ কৰ্তব্য, ভালবাসা । আমার চোখ দুটো সজল হয়ে উঠলো । আমি টেলিগ্রাম হাতে করে ছুটলাম আমার আত্মীয়স্বজনের বাড়ি-বাড়ি । তাঁরা সাহায্য করলেন ; সবাই পরামর্শ করে ব্যবস্থা করে দিলেন ইংল্যাণ্ডগামী প্রথম জাহাজেই । মনে অসীম সাহস দেখা দিলো । অসীম সাহসে পাড়ি দিলাম আমার পরম প্রিয়জনের কাতর আছানো ।

পৌছুলাম ইংল্যাণ্ডে । স্টেশন থেকে নেমে সোজা গেলাম হসপিটালে । কী ভাবে যে গেলাম, কেমন করে গেলাম—আজ তা ভাবতেও পারিনে । সামনেই দেখতে পেলাম একটি নার্সকে । বললাম তাকে আমার আগমনের কারণ । নার্সটি আমাকে ওয়েটিংরুমে নিয়ে গিয়ে বসালো, এবং একটু পরেই একজন ম্যাট্রন এসে আমাকে ডেকে নিয়ে গেলো একটি ছোট ঘরে । দেখলাম, ঘরে শুয়ে আছে সর্বাঙ্গ ঢাকা একটি দেহ । ম্যাট্রন মুখের ঢাকাটা খুলে দিয়ে গভীর হয়ে বললেন, মিঃ ডাট পাস্ড এণ্ডয়ে ওনলি হাফ এন আওয়ার এগো । আ’ম সো সরি ফর ইউ মিসেস ডাট ।

দেখলাম, যেন ঘুমিয়ে আছেন । আশ্চর্য, আমি কেঁদে উঠলাম না । শুধু

মনে হলো, কোথায় আমার দেহি হলো। সামান্য আধঘণ্টা দেহি ! এত হাজার মাইল ছুটে এলাম, অথচ হে ভগবান, তুমি মাত্র আধঘণ্টা দেহি সহিতে পারলে না !

মিস ইলিয়ট দেখলেন, মিসেস দত্ত কুমালে চোখ মুছছেন। যে অশ্রুজল সহসা রুদ্ধ হয়ে গেছেলো, আজ ক'টা দিন পরে তা যেন বাধ ভেঙে অব্যাহার ধারায় গড়িয়ে পড়চে !

মাই গ্যাড ! মিস ইলিয়ট ভাববেন : হাউ সারপ্রাইজিং ! এই মহিলা ইংল্যাণ্ডে স্বামীকে হারিয়ে ইতিমধ্যে ফিরে যাচ্ছেন ; আর আমি যাচ্ছি ইংল্যাণ্ড থেকে ভাবী-স্বামীর কাছে ! আসচে মাসে ডেলহীতে উইলির সঙ্গে তাঁর বিয়ে।

কুমালে চোখের জল মুছে মিসেস দত্ত বললেন, মিস ইলিয়ট, এখন আমি কী ভাবছি জানেন ?

কি ?

আমি যখন আসি, খোকন জিগ্যাস করেছিলো, তুমি কোথায় যাচ্ছে মা ? বলেছিলাম তোমার বাবাকে আনতে যাচ্ছি। এখন সে জিগ্যাস করলে কি বলবো তা ভেবে পাচ্চিনে। ছেলে এতদিন পিতৃহীন ছিলো, আর সে পিতৃহারা হলো। তাই না ?

মিস ইলিয়ট চুপ করে রইলেন। কী উত্তর দেবেন !

মাগর-নগর 'বাতরি' এখন ভূমধ্যসাগরের জল কেটে চলেচে। উত্তর মাগরের উত্তরে হাওয়া এখন অনেকটা কম। তাই মাগর-নগরের অনেকেই সম্ভার পরও খানিকটা সময় বাইরে ডেকে চেয়ারেই কাটাচ্ছে।

'বাতরি'র মূল পুর্বের দিকে। তার বাঁ দিকে শেতাবদের দেশ ইয়োরোপ, ডাইনে কৃষ্ণাবদের অরণ্যভূমি আফ্রিকা। অনেকেই ভেবেছিলো রাত পোহালে দিবা দুধারের সাদা কালো তীর দেখতে দেখতে যাওয়া যাবে। কিন্তু ম্যাপের সৰ্ব ভূমধ্যসাগরটার সঙ্গে বাস্তব ভূমধ্যসাগরের ফারাকটা যে অনেক, সেটা বোঝা গেলো পরদিন সকালে।

দেখা গেলো, চারধারেই শুধু জল, আর জল। স্থল চিহ্ন কোথাও নেই। বিরাট অতলান্তিক বা প্রশান্ত মহাসাগরের সঙ্গে এই এক ফালি ভূমধ্যসাগরের কোন তফাৎ নেই। ইনিও বুঝি অসীম, অতল।

মাটির নগরে যদি বাঙালিপাড়া থাকে, সাহেবিপাড়া থাকে, তবে সাগর-নগরেই বা থাকবে না কেন ? যদি মাহুঘের সমাজে উচু-নীচু দুই শ্রেণী থাকে তবে সাগর-নগরেই বা থাকবে না কেন ? সাগর-নগরেও দুটি শ্রেণী আছে : টুরিস্ট ক্লাস আর ফার্স্ট ক্লাস ।

তবে টুরিস্ট ক্লাসে যেমন হৈ-হৈ, ফার্স্ট ক্লাসে তেমন কই ? সবাই মুখ বুজে বই পড়েন, না হয় মুখ গুঁজে পড়ে থাকেন । অথবা ডেক-চেয়ারে বসে সমুদ্রের ঢেউ গোনেন । অবশ্য একসঙ্গে আঠারো দিন একই জায়গায় কাটাতে হলে সাগরে আঠার মত লেগে না থাকলেও অন্তত কথাবার্তা তো বলতে হয় । তাই তাঁরা আলাপ পরিচয় করেন, নেহাৎ ভদ্রতার খাতিরে । চেপে চেপে কথা বলেন, মেপে মেপে হাসেন ।

তবে ফার্স্ট ক্লাসে আরামটা আরোও বেশি । বিছানার গদিটা আরো পুঙ্ক, আরো নরম । চাদর, ঝালর আরো ভালো । ঘরের আঁশিটা আরো বড় । বেসিনটা আরো দামি । তোয়ালেটাও বেশ বড় । আলোটাও খুব বাহারি । তাছাড়া বেডরুমের সঙ্গে বাথরুম । অনেক সুবিধে ।

এবং খাওয়ার পরিমাণটা বেশি না হোক (বেশি দিলেও খেতে পারেন না ওঁরা) রকমটা কিন্তু বেশি । তার চাইতেও বেশি টেবিল সাজাবার ভড়ং । দামি টেবিল ক্লথ । দামি ক্রকারি, দামি ছুরি কাঁটা চামচ । ফার্স্ট ক্লাসের দামি লোকেদের জুড়ে দামি ফার্স্ট ক্লাস সব জিনিস ।

ওঁরা বেশি পয়সা দিয়েছেন বেশি আরাম পাবেন বলে ; কিংবা বেশি মাথা ধরে বলে । বিশেষ করে লোকের হৈ-হৈ গোলমাল অনেকেই সহ্য করতে পারেন না । বেশি ঘেঁষাঘেঁষি, মেশামেশি অনেকেই পছন্দ করেন না । ওঁরা সীমার মাঝে অসীম হয়ে বাজান আপন স্বর ।

তাই ফার্স্ট ক্লাসের অবস্থাটা কলকাতার থিয়েটার রোডের মতন । অনেকটা জায়গা নিয়ে গেট বন্ধ করে, দারোয়ান বসিয়ে নিজেরা ভিতরে বসে আছেন ফুলের বাগান সাজিয়ে । কারোর সঙ্গে আলাপ নেই, পাশের বাড়ির সঙ্গেও নয় । কিন্তু যাও গড়পাড়ায় বা দক্ষিণপাড়ায়, দেখবে সন্ধ্যার পরে সব বসে গেছে খালি গায়ে লুঙ্গিটা হাঁটু পর্যন্ত তুলে । আড্ডা জমিয়েচে । সব খুড়ো-ভাইপো, দাদা-ভাই, মামা-ভায়ে পাতানো । যেন এক একটা পুরো পরিবার ।

ফার্স্ট ক্লাসে আছেন স্বামী জ্ঞানানন্দ । মাদ্রাজী ভক্তলোক । বিবেকানন্দ সোসাইটির একজন হর্তাকর্তা । টেনে টেনে বাংলা বলেন । পরনে গেরুয়া বসন । সৌম্য শান্ত চেহারা ।

প্রোচা মিসেস হোর যাচ্ছেন করাচী । ভক্তমহিলা নাকি শ্রায় সামুয়েল হোরের নিকট-আত্মীয়া । চোখে একটু কম দেখেন, তবে দূর-দৃষ্টি খুবই । ইংল্যান্ডের একজন অন্ধেরা সমাজ সেবিকা ।

তাছাড়া কনষ্টান্স ডাচেস অব ওয়েস্টমিনিষ্টারও এই সাগর-নগরকে ক'দিন দখল করে গেছেন । অপূর্ব স্নানরী, স্থির যৌবনা । জিতলটারে নেমে গেছেন তিনি ।

কর্ণেল গ্র্যান্ট-স্মিট এবং তাঁর স্ত্রী, মি: জে. টি. উইলস এবং তাঁর স্ত্রী-পুত্র কন্যারা, মিসেস এম. স্মিথ এবং তাঁর কন্যা, মি: এবং মিসেস আর. এল. রালফ এবং এক বাঙালী পরিবারও আছেন মি: এন, চৌধুরী এণ্ড হিজ ফ্যামেলি ।

ওঁর দূরে থাকেন, ছোঁয়াচ বাঁচিয়ে চলেন । ওঁদের সঠিক পরিচয় পাওয়া শক্ত ।

টুরিস্ট ক্লাসে লাউজে বসে মিষ্টার ও মিসেস গ্র্যাটন এবং ডা: মহাবিশ্ব সেন গল্প করছিলেন ।

কথায় কথায় প্রকাশ পেলো, ইংরেজ দম্পতি নাকি বস্বে পর্যন্ত গিয়ে আবার এই জাহাজেই দেশে ফিরবেন । শুনে ডা: সেন অবাক হলেন, সেকি ! ইণ্ডিয়া দেখবেন না ?

স্বামী স্ত্রী দু'জনেই এ-ওঁর মুখের দিকে চেয়ে নিলেন একবার এবং মিসেস গ্র্যাটনই ঢোক গিলে বললেন, মানে, ইচ্ছে ছিলো ইণ্ডিয়া দেখবার, কিন্তু শুনেচি—প্রীজ ডোন্ট মাইণ্ড—ইণ্ডিয়ানরা নাকি ব্রিটিশারসুদের এখন তেমন পছন্দ করে না ।—এবং আরো সব তথ্য যা তিনি ষ্টকওয়াইভস ক্লাবে তাঁর ভারত-বিদেষিনি বাঙ্কবী মিসেস স্ত্রামসনের কাছে শুনেছিলেন, সবই চেপে গেলেন ।

ডা: সেন বললেন, আপনারা ভুল খবর পেয়েছেন । ব্রিটিশ শাসন ব্যবস্থার বিরুদ্ধে আমাদের বিক্ষোভ ছিলো, ব্রিটিশ জনসাধারণের বিরুদ্ধে নয় । মি: এটলির চেষ্টায় আমরা স্বাধীনতা পেয়েচি, তাঁকে আমরা প্রদা করি । লর্ড মাউন্টব্যাটেন আমাদের কাছে প্রিয়পাত্র । লর্ড পেথিক লরেন্সকে আমরা

ভারতবর্ষ হিসেবেই জানি। তাছাড়া আমি নিজে ইংল্যাণ্ডে বহু লোকের সঙ্গে মিশেছি এবং বুঝেছি তাঁরা অনেকেই আমাদের স্বাধীনতা আন্দোলনকে সমর্থনই করেছেন। মিসেস গ্র্যাটন, আপনি বিশ্বাস করবেন কি, শাসক-মণ্ডলী আর জনসাধারণ দুটি আলাদা জাতের!

মিসেস বললেন, ও, উই আর সো সরি! উই গ্যাব বীন রংলি ইনকর্মড্।

মি: গ্র্যাটন বললেন, আমরা শুনেছি, ইণ্ডিয়ান এখনো বাঘ-সাপের উপদ্রব আছে, ক্যানিবলস আছে, তোমরা নাকি পুতুল পুজো করো, তোমাদের লর্ড কৃষ্ণা—নাকি—

আ, ডিয়ার, প্রীজ স্টপ। মিসেস লজ্জা পেয়ে মুখর স্বামীকে মুক হবার অহরোধ জানালেন।

কিন্তু ডা: সেন ব্যাপারটা সব বুঝলেন। বুঝলেন, কোন ‘ভারত-হিতৈষী’ তাঁদের ভুল খবর দিয়েছেন, তাঁদের ভয় পাইয়ে দিয়েছেন।

বললেন, ইফ ইউ ডোন্ট মাইণ্ড, যিনি আপনাদের এই সব বলছেন, আমার মনে হয় তিনি ইণ্ডিয়ান আসেননি, কিংবা তিনি নিজেই ইণ্ডিয়ান বিষয়ে সঠিক খবর রাখেন না। আমার উচিত, অ্যাক্স গ্যান ইণ্ডিয়ান আপনাদেরকে সঠিক বিবরণ দেওয়া।

মি: এবং মিসেস গ্র্যাটন প্রায় একবাক্যে বললেন, ও, উই উইল বি সো গ্ল্যাড টু হিয়ার এবাউট ইণ্ডিয়া!

ডা: সেন বললেন, ইণ্ডিয়ান বনজঙ্গল আছে। বাঘ সাপ সেখানেই থাকে, সহর বাজারে থাকে না। বিরাট দেশ আমাদের। বহু বড় বড় সহর, পাকা পথ-ঘাট অনেক। বম্বে, ক্যালকাটা, ডেলহী, ম্যাড্রাসকে তোমাদের ইয়োরোপের বহু সহরের সঙ্গেই তুলনা করা যেতে পারে। ক্যালকাটার এক প্রান্ত থেকে অপর প্রান্ত যেতে বাসে প্রায় দুটি ঘণ্টা সময় লাগে—এত বড় সহর! ইণ্ডিয়ান ইস্ট থেকে ওয়েস্ট বা নর্থ থেকে সাউথে যেতে ট্রেনে প্রায় দু’দিন দু’রাত হয় কাটাতে।

রিয়েলি!

ইয়েস! তাছাড়া দেশটার চমৎকার হিল-বিউটি, সী-সাইডস্, ক্যানালস্, হিষ্টরিক্যাল মন্ডেমেন্টস্, ওয়াল্ড-ফেমাস্ ট্যাক্স মহাল, অজাণ্টা, এলোরা অনেক কিছুই দেখবার আছে। তাছাড়া আমাদের দেশে যে নোংরাপি আছে, তা

সবই আপনাদের ব্রিটিশ আমলেরই তৈরি। আমাদের উন্নতির দিকে, শিকার দিকে তাঁরা দেখেননি, তাঁদের লক্ষ্য ছিলো আমাদের শাসন করা ও শোষণ করা! আর ক্যানিবলসের কথা বললেন, আই লাইক টু ইনকর্ম ইউ—মালুম খোকো বস্ত্রজাতি আফ্রিকায় আছে, ইণ্ডিয়ায় নয়।

ও, উই আর সো সরি! সত্যিই বোধ করি লজ্জা পেলেন তাঁরা।

ডাঃ সেনের ততক্ষণে আবেগ এসে গেছে মনে। বললেন, হ্যাঁ, আমরা পুতুল পূজো করি। আপনারাও তো লর্ড যীশাসের মূর্তি পূজো করেন, কীর্তিমান পুরুষদের ঠ্যাচুতে মালা দান করেন। আসল কথা কি জানেন? কাল্পনিক কিছু ভেবে নেওয়ার চাইতে বাস্তব কিছু চোখের সামনে রেখে তারই মাধ্যমে ঈশ্বরের প্রার্থনা করা আরো সহজ, আরো সোজা। আমাদের স্বামী বিবেকানন্দের একটি ঘটনা বলি: ইণ্ডিয়ায়ই এক রাজা তাঁকে বলেছিলেন, পুতুল পূজো করার কোন মানে হয় না। স্বামিজী ঘরে রাজার বাপের ছবিটা দেখিয়ে বললেন, ঐ ছবিটা কাউকে নামাতে বলুন। রাজার আদেশে ছবিটা নামানো হলো। স্বামিজী বললেন, ঐ ছবিটার উপরে খুতু ফেলুন। শুনে রাজা গেলেন চমকে: আমার বাবার ছবি, আমি কি করে পারি? তখন স্বামিজী বললেন, কেন? ওটা তো নেহাতই একটা ছবি। ওর মধ্যে তো আপনার বাবা নেই। ব্যাপারটা বুঝতে পেরে রাজা স্বামিজীর কাছে ক্ষমা ভিক্ষা করলেন, বুঝলেন নিজের ভুল। আশাকরি আপনারাও বুঝেচেন।

ইট ইজ সো ইন্টারেস্টিং!

ডাঃ সেন বললেন, এই স্বামিজীই পরে আমেরিকায় গিয়ে হিন্দুধর্ম প্রচার করেছিলেন এবং তোমাদের দেশেরই একটি মেয়ে সিন্ধার নিবেদিতা আমাদের দেশে আজ প্রাচীনত্বের স্মরণীয়, প্রদেয়।

ডাঃ সেন আরো বলতে লাগলেন, আর লর্ড কৃষ্ণের কথা যা মি: গ্র্যাটন বলতে থাকলেন তা আমি জানি। দেখুন, ওসবের অনেক আধ্যাত্মিক মানে আছে। সব রূপক ব্যাপার। আর, আপনাদের ডার্জিন মেরীও তো লর্ড যীশাসকে জয় দিয়েছিলেন। এরও এক্সপ্রানেশন আছে হয়তো। আসল কথাটা হচ্ছে, সব ধর্মেরই নিজস্ব মতবাদ আছে, লক্ষ্য আছে, ব্যাখ্যা আছে। তা নিয়ে না বুঝে সমালোচনা করা মূর্থতা। জানেন না বোধহয়, আমাদের

ঐ বামিজীর মন্ত্রণক শ্রীশ্রীরামকৃষ্ণ হিন্দু হুয়েও ক্রীষ্টান ধর্ম ও ইসলাম ধর্মের সাধনা করেছিলেন এবং প্রচার করেচেন যীশু, আল্লা, রাম সবই এক। যে কোন পথেই মোক্ষ-লাভ করা যায়।

আচ্চর্ষ! মিসেস গ্র্যাটন বললেন, আপনাদের হিন্দু ধর্মের উদারতা লক্ষ্য করবার বিষয়।

আর আপনি অতি শক্ত ব্যাপারটা অতি সহজ করে আমাদের বুঝিয়ে দেওয়ায় আমরা সত্যিই কৃতজ্ঞ। ইজন্ট ইট্ ডিয়ার? বললেন মিটার।

অ' কোর্স'। ডাঃ সেন আমাদের দিব্যজ্ঞান দিলেন।

ডাঃ সেন বললেন, আপনাদের ভ্রান্ত ধারণা আশাকরি আমি দূর করতে পেরেচি।

নিশ্চয়ই নিশ্চয়ই। দুঃখনেই বললেন, ইতিয়া দেখবার প্রোগ্রাম আমরা রিজেক্ট করে কী ভুলই করেচি।

মিঃ গ্র্যাটনের এ মন্তব্য এবার কিন্তু আশ্চর্যকরই।

মিসেস গ্র্যাটন মনে মনে ঠিক করলেন, হোম-এ ফিরে গিয়ে ক্লাবে সবার সামনে মিসেস শ্রামসনকে বেশ দু'কথা শুনিয়ে দেবেন। এখন ইতিয়ার বম্বে-টুকু দেখেই সাধ মেটাতে হবে।

লাউঞ্জ থেকে ডাইনিং রুমে যাবার করিডরে সি. মিটারের সঙ্গে স্নানিয়ালের দেখা হুয়ে গেলো।

এই যে মিটার সাহেব! জিব্রালটারে আপনার রাইটিকে তো দেগলাম ভাগিয়ে নিয়ে রেস্টুরেন্টে চুকলেন, তারপর?

তারপর আর কি? চিত্ত মিত্র তাঁর ফ্রেঞ্চকাট দাড়িতে হাত বুলিয়ে বললেন, কিছু গাঁটগছা গেলো কেক কফি, জিব্রালটারের স্নুভোনির ইত্যাদি! হেসে বললেন, অর্থাৎ মন্দিরে প্রবেশ-দক্ষিণা আগাম দিয়ে রাখলাম!

বটে। বটে। পারের কড়ি তড়িঘড়ি দিলেন তবে? খুব হিসেবি লোক তো!

মিটার বললেন, এসব ব্যাপারেই বেহিসেবি হওয়া মানেই বেহাত করা। বলি, বেড়ালের ইছুর ধরা দেখেচেন?

তা দেখেচি বৈকি?

এও ঠিক বেড়ালের ইঁদুর ধরার ব্যাপার ! মারবার আগে খেলাতে হয়, এখন খেলাচ্ছি !

সানিয়ার বললেন, কিন্তু এটা ভালো হচ্ছে কি ?

তার মানে ? মিটার বললেন, বেড়াল ইঁদুর দেখলে লোভ সামলাতে পারে, না, ইঁদুর গর্তে থাকলে বেড়াল তাকে ধরতে পারে ? চলুন, বার-এ গিয়ে বসিগে ।

চলুন ।

হুঁজনে বার-এ গিয়ে হুঁগেলাস বীয়ার নিয়ে বসলেন । একচুমুক খেয়ে মিটার কুমাল দিয়ে গৌঁফটা মুছে বললেন, দেখুন স্ত্রীর, কোনটি মরবার জন্তে ঝুঁক করে আছে, তা আমরা এক নজরেই বুঝতে পারি । শুধু একটু কথার খেলায় খোলস তাদের আলগা হয়ে যায় । এনাফী রাওটি বৃহুহু । এখন আমি সরে গেলেও, ও সরে আসবে, আমার কাছে । ওর হাব-ভাব, ভাষা ভঙ্গী সেই রকমই ইঙ্গিত দিয়েচে । তবে এও বলে রাখি মিঃ সানিয়ার, সব মেয়েই এনাফী রাও নয়, এবং তাদের আমরা শ্রদ্ধা করি, তাঁদের কাছ থেকে আমরা সরেই থাকি ।

শুনে স্থখী হলাম মিঃ মিটার ! সানিয়ার হাসলেন ।

এমন সময় সেখানে দেখা দিলেন পাইপ-ফৌকা কে-জি : এখানে বসে কি হচ্ছে হুঁজনের ?

সানিয়ার বললেন, বেড়ালের ইঁদুর ধরার গল্প হচ্ছে । বহুন । এক গেলাস হবে নাকি ?

ধোঁয়া ছেড়ে কে-জি বললেন, আপত্তি নেই ।

সি. মিটার বললেন কে-জিকে, সেদিন আপনি জাতকের গল্পটা শুনে বড় মর্মাহত হয়েছিলেন । বলেছিলেন, মরবিড এবং আমি প্রতিশ্রুত ছিলাম, আপনার ক্ষত হৃদয়ে মলম লাগাবার । মনে আছে ?

কে-জি বললেন, আছে । আপনার কথা রাখবার জন্তে আগেই ধস্তাবাদ জানাচ্ছি ।

সানিয়ার বললেন গেলাসে একটা চুমুক দিয়ে : মিঃ মিটার আসলে প্রমাণ করতে চান, তিনি নারীর শ্রদ্ধা করতেও যেমন পেছপা নন, তেমনি নারীকে শ্রদ্ধা করতেও জানেন !

মিটার গেলাসে আর এক চুম্বক দিয়ে কুমালে গৌণ মুছে বললেন, ঠিক বলেচেন। শুধুন, এই গল্পটাও জাতকেরই। পর্নিক জাতকের গল্প—

এমন সময় কে-জির বীষারের গেলাস টেবিলে আসতেই তিনি তাতে একটা লম্বা চুম্বক দিয়ে বললেন, হ্যাঁ বলুন। আমার ক্ষত হৃদয়ে মলমটুকু লাগান।

মিটার শুরু করলেন, পর্নিক নামে এক বণিকের রূপবতী নামে এক কন্যা ছিলো। কন্যাটি বিবাহযোগ্য হলে বণিক তার অন্য সৎপাত্রের চেষ্টা করতে লাগলেন। কিন্তু হঠাৎ তাঁর মনে হলো, আমার কন্যা যুবতী, সুন্দরী, কিন্তু সে যে সূচরিত্রা, তা কী করে জানা যায়? যদি আমার কন্যা অসচ্চরিত্রা হয় এবং তাকে আমি পাত্রস্থ করি, তবে আমি মহাপাতক হবো, সন্দেহ নেই।

সানিয়াল হেসে বললেন, আচ্ছা বাবা তো?

কাজেই—মিটার বলতে লাগলেন, বণিক একদিন তাঁর কন্যা রূপবতীকে বললেন, আমাকে বিশেষ কাজে কাছেই একটি সহরে যেতে হবে, অথচ আমার শরীর বড় দুর্বল। তবে তুমি যদি আমার সঙ্গে যাও, তবে ভরসা পাই। কন্যাটি রাজি হলো এবং পর্নিক কন্যাকে নিয়ে রওনা হলেন। ক্রমে তাঁরা একটি গভীর বনে পৌঁছলেন। সেখানে একটি ঝরণার ধারে এসে বণিক বললেন, জায়গাটি নিজ্ঞান এবং মনোরম, এসো এখানে বিশ্রাম করি। বণিক সবুজ ঘাসের উপর নিজের দেহ এলিয়ে দিয়ে কন্যাকে তাঁর পাশে বসিয়ে বললেন, দেখো রূপবতী, তোমাকে আজ একটি কথা বলতে চাই—

বলুন পিতা—

তুমি বুদ্ধিমতী। তুমি নিশ্চয়ই দেখেচো, ফুল তার রূপ গন্ধ সবাইকে বিতরণ করে, কোন বিচার করে না।

রূপবতী পিতার কথা শুনে বিস্মিত হয়ে বললো, সে তো সবাই জানে কিন্তু একথা কেন পিতা?

বণিক বললেন, রূপবতী, আমি-তোমার অসামান্য রূপে মুগ্ধ! তোমাকে আজ—

বণিক রূপবতীর হাত ধরতে গেলেন, কিন্তু রূপবতী এক ঝটকায় হাত ছাড়িয়ে নিয়ে উঠে দৌড়ে পালাতে গিয়েও পারলো না। ভয়ে বিষয়ে তার শরীর কাঁপছিলো; সে কাছেই একটা জায়গায় বসে পড়লো। তার দু'চোখ দিয়ে অশ্রুধারা গড়িয়ে পড়লো।

বণিক তার কাছে এসে বললেন, দেখ রূপবতী, এই নির্জন গহন অরণ্যে কিছুই প্রকাশ হবার সম্ভাবনা নেই—

তখন রূপবতী তার জলে-ভেজা পদ্মের পাপড়ির মত দুটি সম্মল চোখ মেলে বললো, পিতা, এ যে স্বপ্নাতীত! জল থেকে আগুনের উৎপত্তির মতই অসম্ভব। আপনি কাস্ত হোন।—বলেই রূপবতী তার পিতার পায়ে লুটিয়ে পড়লো।

বণিক তখন সন্নেহে তাকে তুলে ধরে বললেন, কস্তে রূপবতী, আমার সন্নেহ আজ দূর হলো। তোমার চরিত্র পরীক্ষা করবার জন্তেই আমার এই আয়োজন। তোমার চরিত্রবল দেখে আমি প্রীত হয়েছি। চলো বাড়ি যাই।

বণিক ফিরে এসে পরম উৎসাহে সংপাত্র দেখে ধূমধাম করে কন্যার বিবাহ দিলেন।—কী, কেমন গল্প?

কে-জি আর সানিয়াল, দুজনেই গল্প শুনে শুনে স্বপ্নাবিষ্ট হয়ে গেছিলেন যেন। জায় একযোগে বলে উঠলেন, চমৎকার!

মিটার বললেন, অর্থাৎ এই কথাই বোঝা গেলো, নারীমাত্রেই নরকের দ্বার নয়।

কে-জি বললেন, আমারও তাই মত।

সানিয়াল ঠোটকাটা। বললেন, ভূতের মুখে আজ রামনাম শুনে অত্যন্ত সুখী হলাম।

মিটার হাসলেন, আমিও আপনাদের সুখী করতে পেরে অত্যন্ত খুশি।

এমন সময় দৌড়তে দৌড়তে সেখানে এসে উপস্থিত হলেন রেজা: কী হচ্ছে এখানে?

সানিয়াল বললেন, দেখতেই তো পাচ্চো, আপাতত রসম!

কিন্তু নীরস কিছু দেখতে চান ? রেজা প্রশ্ন করলেন ।

কী রকম ? কে-জি কৌতূহলী হলেন ।

আমরা জাহাজের ইঞ্জিনরুম দেখতে যাচ্ছি । আমি, ডাঃ সেন, মিঃ রায়,
চ্যাটার্জি এবং একটি জার্মান ছেলে হের এন্টেল !

সানিয়ার বললেন, এই এন্টেল মাটিটিকে আবার জড়ালে কী করে ?
জড়িয়ে গেলো ।

মিটার বললেন, তা তো যাবেই । জার্মান-জন যন্ত্র দেখতে চঞ্চল হবে,
এতে আর আশ্চর্যের কি ?

রেজা বললেন, পার্শ্ব অফিসে সবাই জড়ো হয়েছে, আমি আপনাদের
ডাকতে এলাম ।

সানিয়ার সোফায় দেহটা আরো খানিকটা এলিয়ে দিয়ে বললেন, কিন্তু
ইঞ্জিন দেখে কী হবে ? জাহাজটা চলচে, এটাই তো বড় কথা । কী করে
চলচে, তা দেখে লাভটা কি ? বরং ওর চাইতে আর এক গেলাস করে
হোক । কী বলুন ?

কিন্তু কে-জি বললেন, অত ব্যালাস শীট খতিয়ে দেখতে গেলে এ জগতে
অনেক কিছুই অদেখা থেকে যায় । তার চাইতে চলুন বরং দেখে আসা
যাক—বিশেষ করে চান্স যখন পাওয়া গেছে ।

রেজা বললেন, ঠিক বলেছেন কে-জিদা ; আমরা পার্শ্ব অফিসে গিয়ে
সবাই বলতে, ওরা রাজী হয়েছে । বললে, যারা-যারা যাবেন, পার্শ্ব
অফিসের সামনে গিয়ে জড়ো হতে ।

মিটার বললেন, চলুন যাওয়া যাক । দেখবার জিনিস ।

তবে তাই হোক । সানিয়ার সোজা হয়ে বসলেন ।

গেলাস শেষ করে সবাই চললেন রেজার সঙ্গে পার্শ্ব অফিসের
সামনে ।

চিক পার্শ্ব মিঃ এণ্ড মিরসলোর অহুরোধে চিক টুয়ান্ড মিঃ চার্লস
জিমলকস্ সাগর-নগরের দর্শনার্থীদের নিয়ে চললেন ষ্টাক-কোয়ার্টারের ভেতর
ফার্স্ট ক্লাসের দিকে । কার্পেট পাতা সুরু প্যাসেজ দিয়ে এলেন সবাই ফার্স্ট
ক্লাসের প্রমেনেড ডেকে । সেখান থেকে এন্ট্রান্স হল-এ । এসে দাঁড়ালেন

এলিভেটরের সামনে। জিগোস করলেন, আধো-আধো ভাঙা ইংরেজীতে, আপনারা নিশ্চয়ই নীচেই ইঞ্জিন রুম আর উপরে নেভিগেশন ব্রীজ দুই-ই দেখতে চান।

হ্যাঁ, হ্যাঁ, নিশ্চয়ই। সবাই একমত হলেন।

অর্থাৎ নগরের শুধু বতী, কারখানা যেমন দেখা দরকার তেমন উপরগুলাদের দপ্তরখানা, মানে, যেখান থেকে কর্তারা কলকাটি নাড়েন, সেটাও তো দেখা দরকার।

চিফ ষ্টুয়ার্ড বললেন, তবে আগে এই লিফটে নীচেই ইঞ্জিনঘরে যাওয়া যাক।

অতএব লিফটে দু'তিন বারে সবাই গিয়ে নামলেন একেবারে ডি-ডেকে। এই ডেকেই হুইমিং পুল, জিমনেসিয়াম, খান বারো-চোদ্দ মোটর রাখবার গ্যারেজ, যাত্রীদের মালপত্র রাখবার গুদাম এবং সব চাইতে কম দামের টিকিটের যাত্রীদের কেবিন। যাদের অর্থ নেই, তাদের পক্ষে পৃথিবীর আলো হাওয়া অনর্থক। এই কম দামি যাত্রীদের অনেকেই সকালে সেই যে ব্রেকফাস্ট খেতে এ-ডেকে গঠেন, আর নামেন রাত্রে ভিনারের পর নাচ বা সিনেমা দেখে। সারাদিনটা আগাছার মতই অন্যের প্রাণ্য আলো হাওয়াটুকু বুক ভরে নেন—বৈচে থাকার পাথেয়।

ডি-ডেক থেকে একটা লোহার সিঁড়ি নেমে গেচে আরো নীচে—ইঞ্জিনঘরে। সাততলা জাহাজের এটি শেষ তলা। বিরাট দুটো ইঞ্জিন রুদ্ধ-গর্জন করচে সারাক্ষণ—ঝকঝক, ঝক-ঝক! গম্ গম্ করচে লোহার বিরাট ঘরখানা। কারোর কোন কথা শোনা যায় না, শুধু একটানা যান্ত্রিক যন্ত্রণার আর্তনাদ! বিজ্ঞানের বাঁচায় ভরা লৌহ দানবের দীর্ঘবাস! লৌহ দানবের রুদ্ধ চাকুলো সারা ঘরখানা কাঁপচে—যেন ভূমিকম্প!

দৈত্যের মত দুটো ইঞ্জিন দু'খানা বিরাট মোটা আর লম্বা সাক্টকে ক্রমাগত ঘোরাচ্ছে—প্রপেলার! জল কেটে পনেরো হাজার টনের জাহাজটাকে এগিয়ে নিয়ে চলচে জাহাজের কর্তার ইচ্ছানুযায়ী। দাসানুদাস। আর খালসীদের হাতের ক্রীড়নক ঐ দুই বিরাট লৌহ দানব!

ঘরে অস্বাভাবিক গরম। খালি গায়ে এরা অনবরত তদারক করচে ইঞ্জিন দুটোকে। হাতে অয়েল-ক্যান, রেক, হাতুড়ি জু-ডাইভার। কোথাও

কিছু চিলে হবার উপায় নেই, চিলেমি চাল অচল। সিংহকে নিয়ে খেলাতে গেলে চোখ-কান খোলা রাখাই দস্তুর।

আগে খালাসীদের কয়লা ঠেলতে হতো বয়লারে। কারণ বাষ্পের সাহায্যে চলতো জাহাজ। সমুদ্রের বুকে সে সব জাহাজ আজকাল হাস্তাম্পদ! তারা মাল বয়, যাত্রী বইবার অভিজাত্য তারা হারিয়েচে। ষ্টিম শিপ বা 'এস-এস' কথাটা এখন জাহাজী সমাজে ছ্যা-ছ্যা-র মতই। এখন অভিজাতদের পদবী 'এম-ভি'—মোটর ভেসেল।

সাগর-নগর 'বাতরি'ও মোটর ভেসেল—'এম-ভি!' শুধু তাই নয়, লাক্সারি লাইনার। খেতকায়। নীল সাগরে ভেসে ভেসে যায় যখন, মনে হয়, সরোবরে রাজহংস!

চিফ-ইঞ্জিনিয়ার জন গ্র্যাটকোন্সি সাগর-নগরের নাগরিকদের সব ঘুরিয়ে দেখালেন। দেখালেন কোথায়, কীভাবে শিপ-মাষ্টারের দপ্তর থেকে টেলিফোনে আসে জাহাজকে আঙ-পিছু করবার বা গতি কম-বেশি করবার নির্দেশ।

তারপর হেসে বললেন, আশা করি আপনারা মোটায়ুট একটা আইডিয়া পেলেন এবং এখন এই নরককুণ্ড ছেড়ে উপরে গেলে খোলা হাওয়ায় স্বস্তির নিশ্বাস ছেড়ে বাঁচবেন।

সত্যিই তাই। যদিও ভেক্টিলেটারে বাহিরের হাওয়া ভিতরে আসছিলো, তবু যেন সে হাওয়াও গরম, অসহ্য, অস্বস্তিকর।

চিফ ইঞ্জিনিয়ারের কাছে বিদায় নিয়ে দর্শকরা চিফ টুয়ার্ডের সঙ্গে লোহার সিঁড়ি দিয়ে ডি-ডেকে উঠলেন এবং সেখান থেকে লিফটে বোট ডেকে। লিফটের মুখেই দাঁড়িয়েছিলেন হাসিমুখে শিপমাষ্টার মিরশল গ্লাওয়ারকি। সবাইকে সাদর সন্ধ্যাণ জানিয়ে তিনি নিয়ে গেলেন ওয়াবলেন্স রুমে। রেডিও অফিসাররা সেখানে কর্মব্যস্ত। ছ'জনের কানে হেডফোন। একজন চার্ট দেখতে ব্যস্ত। সাগর-নগরের প্রাণপাখী যদি থাকে ইঞ্জিনরুমের খাঁচায়, তবে এইখানেই তার কর্ণ আর জিহ্বা! দূর-দূরান্তের কথা শুনতে হলে আর নিশ্চয়ের বিপদে 'ওগো বাঁচাও' বলে আর্তনাদ করতে হলে এই ঘরখানাই একমাত্র আশা, ভরসা, সঞ্চল।

তবে চোখ ছুটি ডান সান-ডেকে নেভিগেশন ব্রীজে। এইখানেই নানা-

রকমের মিটার। যাতে জলের তলায় কিছু লেগে হৌচট না খায়, সে জন্যে ফিট করা আছে ফ্যাদোমিটার—জলের গভীরতা মাপবার যন্ত্র। তা ছাড়া রয়েছে রেডিও-কম্পাস, র‍্যাডার-ইণ্ডিকেটার এবং অটোমেটিক গাইরো পাইলট—‘দিক’ বেঁধে দিলে চোখ বুজে যাবার ব্যবস্থা! তবু ষ্টয়ারিং হুইলের কাছে দাঁড়িয়ে আছে নেভিগেটর। দৃষ্টি তার ‘বাতরি’র নাকের দিকে। শুধু নাক সোজা গেলেই তো হয় না, অনেক সময় নাক-ঘুরিয়েও যাওয়ার দরকার হয়।

অফিসারদের কোয়ার্টারের সামনেই র‍্যাডার-রুম আর চার্ট রুম এবং তার সামনেই নেভিগেশন ব্রীজটা। লম্বা বারান্দা। দাঁড়ালেই অসীম সমুদ্র চোখের সামনে সসীম হয়ে দেখা দেয়। হু হু করে বাতাস বইতে থাকে, তাই চারিদিকটা কাঁচ দিয়ে ঘেরা। জাহাজের সর্বোচ্চ ডেক, যন্ত্রিষ্ক!

ব্রীজ থেকে ফেরবার পথে, সবাই যখন ষ্টোরের পাশ দিয়ে যাচ্ছিলেন, চীফ ষ্টুয়ার্ড হেসে বললেন, এই জাহাজখানার ইঞ্জিন দুটো গ্যালন-গ্যালন ডিজেল অয়েল খায়, এবং তাদের দুজনকে খাওয়াবার আর তদারক করবার ভার ঐ চীফ ইঞ্জিনিয়ারের উপর। কিন্তু আপনাদের দেখাশোনা করবার সৌভাগ্য আমি পাওয়ায় আই’ম্ এক্সট্রিমলি গ্লাদ। আস্থন, এক এক করে দেখাই আমার ডিপার্ত্‌মেন্ট্‌!

ভদ্রলোক সামনেই একটা কেবিন খুলতেই, সবাই প্রায় আংকে উঠলেন : কসাইখানা। গরু, ভেড়া, পাঠা, শুয়োরের ছালছাড়ানো দেহগুলো টেবিলের উপর সাজানো। কসাই মাংস কেটে কুচোচ্ছে।

দিস্ ইজ ব্‌চাঙ্গ শপ্‌।

বুঝেচি বাপু, বন্ধ করো দরজা এখন। সবার চোখে মুখে ঐ ধরনের ভাব ভদ্রলোক বুঝতে পেরে দরজাটা টেনে দিলেন।

পাশের দরজা ঠেলে খুলে বললেন, বেকারী। এখানে রোজ ব্রেড, বিকিত্‌কেক এভসেত্‌রা তৈরি হয়।

দেখা গেলো যেসিনে তৈরি হচ্ছে সব। সারা ঘরখানা যেন সাদা ময়দার পাউডার মেখে বসে আছে।

চীফ ষ্টুয়ার্ড বললেন, এবার লম্বী।

আর একটা দরজা ঠেলা দিতেই দেখা গেলো, পোলিশ রজকিনীরা মেসিনে চাদর, ওয়াড়, টেবিল ক্লথ, জাপকিন ইত্যাদি কাছে, ইজি করচে।

তার পাশের ঘরটা প্রেস। প্রিন্টিং মেসিন চলচে। ছাপার কাজ হচ্ছে।

চীফ ষ্টুয়ার্ড বললেন, প্রত্যেক দিনের মেজ ছাপাবার ব্যবস্থা। ভদ্রলোক আরো বলতে লাগলেন, অল সর্ভস্-অব সিসি-রিকোয়ার্মেণ্টস আ' হিয়ার ইন দিস্ শিপ্। কাগজ, পেন্সিল, পিন থেকে শুরু করে চীনা মাটির বাসন, বেড শীট, পিলো-কেস, জাপকিন, এ্যাপরন, ট্রে-ক্লথ, টেবিল-ক্লথ, হোয়াইট কোট আরো অনেক জিনিস।

মিঃ মুঞ্জেশ্বর জিগোস করলেন, হোয়াট এবাউট ড্রিংকিং ওয়াটার ?

আ! চীফ ষ্টুয়ার্ড বললেন, ভেরি ইস্টাব্লিশিং কোয়েশ্চেন স্মার। দেয়ার ইজ ওয়াটার এ্যান্ড ওয়াটার এভরিহোয়ার, বাত্ নো ড্রিংকিং ওয়াটার! পোর্ট থেকে ড্রিংকিং ওয়াটার, ওয়াশিং ওয়াটার, সব বোঝাই করে নিতে হয়। শুধু তাই নয়, প্রত্যেক পোর্ট থেকে ফুড এ্যান্ড গ্রেসও জোগাড় করতে হয়। অবশ্য এজন্তে সব পোর্টে স্ত্রিভেদার, মানে, কন্ট্রাকটর্স আছে।

ভদ্রলোক তারপর পরম উৎসাহে হিসেব দিতে শুরু করলেন, আপাতত এই শিপে আছে বহু ফ্রেশ ফ্রুট্‌স্, ভেজিটেবল্‌স্, প্রায় পঞ্চাশ হাজার এগস্, দেড়শো গ্যালন ভিনিগার, দশ হাজার পাউন্ড স্মাগার, দেড় হাজার পাউন্ড টি, ন' হাজার পাউন্ড কনডেনসড্ মিল্ক, বিশ হাজার পাউন্ড ফ্রাওয়ার, দু'শ পাউন্ড সালাদ্ অয়েল, আঠারো হাজার পাউন্ড ফিশ।

একটা বিরাট ঘরে নিয়ে গিয়ে দেখালেন, সব ধরে ধরে সাজানো। মাছ ডিম, ভেজিটেবিল-এর জন্তে রেফ্রিজারেটারের ব্যবস্থা!

সাগর-নগরের খাণ্ড-ভাণ্ডার দেখে নাগরিকরা মনে হলো আশ্চর্য হলেন। হয়তো মনে মনে ভাবলেন, যাক, না খেয়ে মরবার ভয় নেই! উপরন্তু সাগর-নগরের কর্তৃপক্ষরা নাগরিকদের জামাই-আদরের ব্যবস্থা করেই রেখেছেন।

এইখানেই বোধহয় সাগর-নগরের সঙ্গে মাটির নগরের তফাৎ।

কে-জি নিরামিষাণী।

অবশ্য 'বাতরি'তে নিরামিষ খাণ্ডের অভাব নেই! ব্রেড-বাটার-চীজ-

কেক-কফি-টি তো আছেই, তাছাড়া ওরিয়েন্টাল ডিশেরও ব্যবস্থা আছে।
 যথা : মাড়াস কারি, ভেজিটেবল কারি, ডাল, ভাত ; আসপারাগাস ও
 স্পিনাক-এর মিক্সড ভেজিটেবল ; পটেটো চিপ্‌স, বয়েন্ড বা ক্রাইড পটেটো
 (সোজা বাংলায় যার নাম আলু ভাতে বা আলু ভাজা !) তাছাড়া টমেটো
 বা লেটুস সলাড এবং ম্যাংগো বা ওরচেষ্টার সস্ ! স্থাপ তো আছেই।

মাছ-মাংস ভোজীদের জন্তেও ভালোই ব্যবস্থা : গ্রীন সালমন, টার্টের
 সস, রোস্ট চীকেন উইথ বিলবেরিজ, রোস্ট বীফ—ইংলিশ ষ্টাইল।

কিন্তু মুসলিম হচ্ছে এই, খাওয়ার নামগুলি গালভরা হলেও প্রাণভরা নয়
 মোটেই—অস্বস্ত বঙ্গ-পুঙ্খবদের রনালো জিহ্বায়। তাছাড়া ডাইনিং টেবিলের
 ক্রোমিয়াম প্লেটেড কাঁটা চামচ, দামি চায়না বাসন, ধোপ-দুর্গু টেবিল ক্লথ,
 ক্রাপকিন, ফ্লাওয়ারভাসে টাটকা ফুল ইত্যাদি চোখে দেখবার জিনিস, চেখে
 দেখবার নয়। অথচ শুকতো, চচ্চড়ি, মুড়িঘণ্ট, মাছের কালিয়া, চিংড়ির
 মালাইকারি, বা মশলায় মশগুল মাংসখণ্ড ভরা বাটি সামনে ধরলে বসবার
 আসনের নক্সা নিয়ে কেউই মাথা ঘামায় না। প্রাচ্যে খাওয়াটা মুখা, বসটা
 গোণ ; পাশ্চাত্যে বসটাই ভদ্রতা, খাওয়াটা—বিশেষ করে গপগপিয়ে খাওয়াটা
 অভদ্রতা।

কে-জি প্রাচ্যের লোক। তাছাড়া হিসেবি। মনে মনে ভাবলেন হয়তো,
 খাওয়ার খরচটা যখন আগে-ভাগেই দেওয়া আছে, তখন খাওয়ার কষ্টটা ভোগ
 করি কেন? নিরামিষের ব্যবস্থা আছে ঠিকই, তা বলে জলো আর সেদ্ধ
 তরকারি আর কাঁহাতক খাওয়া যায়! কাজেই একদিন তাঁর টেবিলের সোনালী
 চুলের ওয়েটার দ্বারা পাসাংসানাসাত্‌কসকে নিজের মুখ আর পেট দেখিয়ে
 এবং হাতের বড়ো আঙুল নেড়ে ইশারায় বললেন, বাপুহে, খাওয়াচ্চো তো
 বটে, খাচ্চিও, কিন্তু মুখে রুচে না, পেটও ভরচে না।

দ্বারা ভালো করে বুঝলো না, কি বলচেন কে-জি। তবে এটুকু বুঝলো,
 ভদ্রলোক খাওয়ার ব্যাপারে সন্তুষ্ট হতে পারছেন না। কাজেই তাঁকে ইশারায়
 ডেকে নিয়ে গেলো জাহাজের কিচেন রুমে!

সাগর-নগরের কিচেন রুমই বটে! যেন যজ্ঞিবাড়ি। প্রায় জন পঞ্চাশ
 কুক গ্যাস আর ইলেক্ট্রিক ঠোঙে রান্নায় ব্যস্ত। কিচেন-মেসিনারী রয়েছে
 হরেক রকম। কোনটায় খোসা ছাড়ানো হচ্ছে, কোনটায় মেশানো

হচ্ছে, কোনটায় স্নাইস করা হচ্ছে, কোনটায় হচ্ছে রস নিংড়ানো। তা ছাড়া
বিরাট ষ্টীম-কুক-এ লেদু হচ্ছে ভাত, তরকারি, মাংস।

‘বাতরি’ ভারতীয় বন্দরে নোঙর বাঁধে। বহু ভারতীয় এই জাহাজের
যাত্রী। কাজেই ভারতীয় মেহু বা ইণ্ডিয়ান ভিশের ব্যবস্থা রাখা ছাড়া
উপায় নেই। এবং সেজন্তে আছে একজন ইণ্ডিয়ান কুক।

ইণ্ডিয়ান কুকটি টাটগেয়ে মুসলমান। কৃষ্ণকায়। আর সব কুকগুলি
যথারীতি লোহিত বর্ণের। যেন লাল গোলাপের বাগানে চিকন কালো
ভোমরাটি! দলা কে-জিকে নিয়ে দাঁড় করালো ইণ্ডিয়ান কুকটির সামনে এবং
পোলিশ ভাষায় কী যেন বললো তাকে। খাস্ত সম্বন্ধে কে-জি তাঁর প্রস্তাব
জানাতেই কুকটি একগাল হেসে বিস্তৃত টাটগাঁইয়া ভাষায় যা বললো, কে-জির
কাছে মনে হলো যেন তা প্রায় পোলিশ ভাষার মতই দুর্বোধ্য। তবু
হাজার হোক দেশের ভাষা তো—কাজেই হাবে-ভাবে-ভাষায় এবং তার
হাত নাড়ায় বুঝতে পারলেন, কুকটি যথাসাধ্য চেষ্টা করবে তাঁর মনের
মত এবং মুখের মত তরকারি রাঁধতে!

আরো যা বললো কুকটি, তা সর্ববোধ্য বাংলা ভাষায় দাঁড়ায়: আরে
মশয়, ত্যাশের জন্ত আমার মনটা ঐ আগুনের মতই পোড়ে। কিন্তু এই
প্যাটের জ্বালাতেই কালাপানিতে ভাইসা বেড়াচ্ছি আজ বিশটা বছর,
আর আপনাগোর প্যাটের দিকে নজর রাখুম না? আপনি কন কি?

দলা চুপ করে দাঁড়িয়ে তার অভূত কথা শুনছিলো, কুকটি তাকে পোলিশ-
ভাষায় কী যেন বলতেই চলে গেলো সে। হয়তো বললো, তুমি এখন যাও
বাপধম, আমি একটু ত্যাশের লোকের লগে দুইটা কথা কই।

বয়েন সাহেব, বয়েন। কুক তার টুলটা এগিয়ে দিলো। এপ্রনের পকেট
থেকে রুমাল বার করে হাতটা মুছতে মুছতে বললো, ত্যাশ আমার টাটগা
সহর খ্যাহে পাঁচ কোশ দূর কর্ণফুলি নদীর ধারে। নাম আমার ইউনুফ
আলি। বাপে একদিন মার দিছিল, সেই রাগে কলকাতায় আইস্তা জাহাজের
খালাসী হইয়া গেছলাম গিয়া ইংলণ্ডে। শেষে কিনা সেখানেই কাজকর্ম কইরা
খাতাম আর বেড়াতাম—ঐ ইষ্টএণ্ডের পাড়ায়। সেখানে এক মাসী আমাকে
পাইয়া বসলো। তা শেষতক সাদি করলাম তাকেই! এখন সায়েব,
আপনাগোর আশীর্বাদে আমার দুই ব্যাটা আর পাঁচ বেটি। বড়জন

ইঞ্জিনিয়ার হইছে। মটর গাড়ি চাপা অফিস করে। বাড়িও একভা কিনছি। কিন্তু রাষ্ট্রের নোকরি আর ছাড়ি নাই। এই জাহাজ কোম্পানী মাইনা দেয় ভালো, এরা লোকও ভালো। তাই এই কোম্পানীতেই আজ কাজ করতেছি প্রায় দশ বৎসর। ঐ ইংলণ্ড থেকে ইঞ্জিনা পর্যন্তই আমার কাম। আপনাদের জন্তেই আমার নোকরি। আর আপনি একটা কথা বললেন, আর আমি তা করব না! আজ ডিনারেই স্পেশাল আইটেম পাইবেনই পাইবেন।

কে-জি বললেন, অশেষ ধন্যবাদ। বোঝেন তো, বাঙালীর জীব, একটু ঝাল-মুন না হলে যেন মনে হয় কিছুই হলোনা। আর যতই দেশের দিকে যান, ততই ঝাল-টকের জন্তে জীবটা যেন সড়সড় করচে।

ইউসুফ যেন লুফে নিলো কথাটা : তা তো হবেই সায়েব। বাঙালীর জীব আমি চিনি। তাইতো আমার মেম-মাগকে বাঙলা রান্না করন শিখাইছি। এ সব জাতির খাবার আবার আমাদের মুখে রোচে নাকি? আচ্ছা সাহেব, সেলাম। আপনার লগে দুটো পেরানের কথা কতি পারা ভারি আনন্দ পালাম।

কে-জিকে ইউসুফ কিচেনের দরজা পর্যন্ত এগিয়ে দিলো। গরম ভ্যাপসা বিরাট রান্না-বজ্জানা থেকে ঠাণ্ডা হাওয়ায় বেরিয়ে এসে কে-জি নিঃশ্বাস ছেড়ে বাচলেন!

এ-ডেকের এক কোণে জড়ো হয়েছেন ডাঃ রায়, মিঃ চ্যাটার্জি, ডাঃ প্রামাণিক, রামস্বামী আর রেজা। আর সেই জার্মানটি। হের এইটেল। উইলহেলম এইটেল।

বয়েস বেশি নয়। ছোকরা। তবে জার্মান চেহারা! বয়েস থেকে শরীরটা প্রায় দশ বছর এগিয়ে আছে। মুখ দেখে মনে হয়, বছর চব্বিশ বয়েস হবে, কিন্তু দেখায় যেন চৌত্রিশ। তার উপর হু'গালে কটা দাড়ি, একমাথা সোনালী চুল, টকটকে পুরু ঠোঁট দু'খানা। হাতের মোটা কব্জী, আঙুলগুলো কদলীপ্রায় ফুলো-ফুলো। হাত নয়তো বাঘের খাবা। পেশীবহুল। বুকখানা পাথরের মত চ্যাটালো। সত্যিকারের পুরুষসিংহ। কিন্তু কথাবার্তাঘ, আচরণে মৃদু মৃদু ভাব : যেন নারকেলের মধ্যে নরম শাঁস আর ফোঁপরা।

ছেলেটির নীল চোখে জিজ্ঞাসু-দৃষ্টি। জিজ্ঞাসু নিয়েই চলেচে সে ভারতের দিকে। তার হাতে একখানি বই : হাউ টু প্র্যাকটিশ যোগ। জার্মানীর গোপেনজেন সহর থেকে চলেচে দক্ষিণেশ্বরে যোগদা আশ্রমের অভিমুখে। ইচ্ছা, যোগ শিক্ষা।

হাতের বইখানা দেখিয়ে বললো, বইটোতে 'ইয়োগা' বিষয়ে পড়েছি। এখন ইচ্ছে হাতে কলমে শিক্ষা নেওয়া। শিক্ষকের নির্দেশ ছাড়া এসব শেখা বড় শক্ত। এতগুলো কেরসপপেডস করে বড় আশা নিয়ে চলেছি 'ইয়োগা' শিখবো বলে!

ডাঃ প্রামানিক বয়োবৃদ্ধ। জিগ্যেস করলেন, তুমি যে একলা বেরিয়ে পড়েচো, বাড়িতে তোমার কে আছেন? তাঁরা ছেড়ে দিলেন?

এইটেল হাসলো, বাড়িতে শুধু মা আছেন এখন। বাবা বছর খানেক হলো মারা গেছেন। এক বোন ছিলো, সেও বিয়ে করে তার হাজুব্যাণ্ডের কাছে মিউনিকে আছে।

মিঃ চ্যাটার্জি জিগ্যেস করলেন, কতদিনের প্রোগ্রাম নিয়ে যাচ্ছে?

এইটেল বললো, সব নির্ভর করচে মায়ের উপর। মা বোধহয় শীগগির আবার বিয়ে করবেন। তা যদি করেন, তবে আর আমার ফেরবার দরকার কি? ইণ্ডিয়াতেই থেকে বাবার ইচ্ছে। অবশ্য ইণ্ডিয়া-গভর্নমেন্ট যদি ভিসা এক্সটেণ্ড করতে রাজী হন।

আর যদি তিনি বিয়ে না করেন? রামস্বামীর প্রশ্ন!

তা হলে আমাকে ফিরে যেতেই হবে। আমি ছাড়া মাকে দেখবে কে? আমার কর্তব্য তাঁকে দেখা।

সে তো বটেই! ডাঃ প্রামানিক ভিটো দিলেন।

রেজা ফট করে ছেলেকান্নানী প্রশ্ন করে বললেন, তোমার কি ইচ্ছে? মার আবার বিয়ে করা উচিত, না, অসুচিত?

ডাঃ প্রামানিক তাড়াতাড়ি বাংলায় রেজাকে বললেন, এ প্রশ্ন করাটা কি ঠিক হলো?

কিন্তু এইটেল বললো, দেখো, আমার ইচ্ছের উপর কিছুই নির্ভর করে না। আর, মা'র উচিত-অসুচিত বিচার করবার আমার কোন অধিকারই নেই। তাঁর যদি মনে হয়, তাঁর জীবনের সঙ্গী দরকার, তবে তাই তাঁর করা

দয়কার। এই যে আমার ইচ্ছা 'ইয়োগা' শেখা, আমার সে ইচ্ছায় কি তিনি বাধা দিয়েছেন!

রাইট। রাইট। রামস্বামী বললেন।

ডাঃ প্রামানিক বললেন, তুমি এই ব্যয়েসে যোগাভ্যাস করবার চেষ্টা করচো জেনে ভারি খুশি হলাম। তোমাদের দেশ যন্ত্রের সাধনা করে, আমাদের দেশ মন্ত্রের।

এই কথার উত্তরে এইটেল যা বললো, তা কেউই আশা করেননি : দেখুন স্যার, কোন দেশ বা জাত শুধু যন্ত্র বা শুধু মন্ত্রের সাধনা করলে সর্বাঙ্গীন উন্নতির পথে কখনোই এগুতে পারবে না, অন্তত আমার তাই বিশ্বাস। যন্ত্র মানুষকে পশুতে পরিণত করে, আর মন্ত্র নষ্ট করে মানুষের আত্মবিশ্বাস। আজকের মানুষকে চলতে হবে একহাতে ধর্ম আর অন্য হাতে কর্মকে নিয়ে। নইলে শান্তি নেই, স্বস্তি নেই—নয় কি?

ঠিক, ঠিক! ডাঃ প্রামানিক মাথা নেড়ে সায় দিলেন, সত্যি হের এইটেল, জার্মানীর যন্ত্র-সাধনা আর ইণ্ডিয়ার মন্ত্র-সাধনা যদি একসঙ্গে মিলিত হতে পারে, তবেই হয়তো মানুষের দুঃখ-দুর্দশা দূর হবে। তোমার মধ্যে এই দুই সাধনার মিলন দেখে সত্যিই আমি বিস্মিত, আনন্দিত! তোমার আশা পূর্ণ হোক, এই আমাদের আন্তরিক ইচ্ছা।

এইটেল বললো, আশা পূর্ণ হবে কিনা জানিনে। সম্পূর্ণ অসহায়, নিঃস্ব হয়ে চলেচি ভারতে। ভরসা—ভালো কাজে বাধা যেমন আছে, বন্ধুও আছে অনেক। জাহাজের একবছরের রিটার্ন টিকিট কাটা আছে, আর আছে আমার একটা দামি ক্যামেরা, বাইনোকুলার, আর প্রজেক্টর একটা। ঐগুলি বিক্রি করে আশাকরি ইণ্ডিয়ায় খরচ চালাতে পারবো কিছুদিন। আশ্রমেও হয়তো কোন ব্যবস্থা হতে পারে। নয়তো, রিটার্ন টিকিট তো রইলোই!

এইটেলের ব্যবস্থার কথা শুনে যুগপৎ সবাই মুগ্ধ হলেন। ভাবলেন, এমন না হলে, তেমন কিছু সত্যিই পাওয়া যায় না। টাকার জোরটা কিছু নয়, মনের জোরটাই বড়।

বোঝা গেলো, এইটেলের যোগসাধনা ইতিমধ্যেই শুরু হয়ে গেছে।

একটি জার্মান যুবক প্রথম যৌবনের রঙীন নেশা কাটিয়ে, কাম-কামনার

মোহ ভাগ করে নতুন কিছু পাবার আশায় যোগাভ্যাস শেখবার জন্যে ভেসে চলেচে যে জাহাজে ইণ্ডিয়ান, সেই জাহাজেরই বোট-ডেকের আড়ালে দুই ইণ্ডিয়ান নর ও নারী নিজেদের মধ্যে যোগাযোগের ব্যবস্থা করে নিয়েচেন, নিছক দেহের তাগিদেই।

বাপারটা চোখে পড়লো রামস্বামী। সে সন্ধ্যায় ডাইনিং হলে সিনেমা হচ্ছিল। রামস্বামী খানিকক্ষণ পরে হল থেকে উঠে বেরিয়ে এলেন। মাথাটা খেন ধরেচে মনে হলো। বার-এ গিয়ে এক পেগ হুইস্কি আর সোডা খেয়ে ভাবলেন, ফাঁকা হাওয়ায় একটু দাঁড়ালে মাথাটা হয়তো হাঙ্কা হতে পারে। অবশ্য, হাঙ্কা পায়ে তিনি যাননি উপরের বোট-ডেকে, তবে অন্তমনস্কভাবেই যাক্ষিলেন রেলি-এ বাঁধা লাইফ-বোটগুলোর পাশ দিয়ে। এমন সময় কানে এলো একটা বোটের আড়ালে ফুস-ফুস গুঞ্জ-গুঞ্জ আওয়াজ।

থমকে দাঁড়ালেন রামস্বামী। তাড়াতাড়ি নসরে গেলেন পাশের বোটের আড়ালে। প্রায় সবাই সিনেমা হলে। ডেক ফাঁকা। ফিকে অন্ধকার। নিস্তব্ধ। সান-ডেকের একটা বিজলী বাতি দূরে জ্বলচে বটে, তবে তাতে অন্ধকার বাড়চে বৈ, কমচে না।

রামস্বামী প্রথমে ঠিক বুঝতে পারেননি। তবে কান পেতে একটু শুনতেই বুঝলেন, বাপারটা বেশ রসালো :

মেয়েলি গলায় মুক্তি পাবার আবেদন।

পুরুষের গলায় আরো থাকবার নিবেদন।

এবং সেই সঙ্গে খস-খস শব্দ, উঁ-মঁ। অস্ফুট-ধ্বনি আর মাঝে মাঝে চুষনের চমকপ্রদ আওয়াজ।

মাই ডার্লিং !

নাও, লেটস্ গো ! সামবডি মে কাম দিস সাইড ।—মেয়েলি গলা।

ও নো, এভরিবডি ইজ নাও বিজি উইথ সিনেমা ! এনাদার কিস প্লীজ !

—পুরুষের গলা।

চুষনের শব্দ : আর ইউ নট্ ইয়েট স্টিসফাইড্ ?

ও, এ বেগার ইজ নেভার স্টিসফাইড্ !

নো, আই কান্ট ষ্টে এনি মোর ।

ব্রাউজের বোতাম আঁটতে আঁটতে বোটের আড়াল থেকে প্রায় ছিটকে

বেরিয়ে এলো একটি মেয়ে। শাড়িটা তখনো ঠিকঠাক করতে পারেন নি।
চুলের খানিকটা এলোমেলো।

রামস্বামী আড়াল থেকে দেখলেন, এনাকী রাও !

এনাকী একবার এদিক-ওদিক দেখেই হরিণীর মত তরতর করে নেমে
গেলেন এ-ডেকে। সোজা বাথরুমে গিয়ে দরজাটা বন্ধ করে দিলেন তিনি।

রামস্বামীর বুঝতে বাকি রইলো না, বোটের অন্তরাল থেকে এবার কোন
নায়কটি বেরবেন। রামস্বামী আড়াল থেকে বেরিয়ে এসে দাঁড়ালেন তাঁর
বেকুবাব পথে, ফাঁকটার সামনে। একটা সিগ্রেট বার করে ধরিয়ে একটান
দেবার মুখেই বেরিয়ে এলেন সি. মিটার !

হালো !

আচমকা সম্ভাষণে প্রথমটা চমকে গেছিলেন সি. মিটার। তবে রামস্বামীকে
দেখে গোঁফ চুমড়ে একগাল তৃপ্তির হাসি হেসে বললেন, হালো ! ইউ
আর হিয়ার !

রামস্বামী সিগ্রেটে আর একটা টান দিয়ে বললেন, আই ওয়াঞ্জ অন্।
ডিউটি।

কি রকম ?

তোমাদের কুঞ্জদ্বার পাহারা দিচ্ছিলাম।

বটে, বটে। সো লেট্‌স গো টু বার ! মিটার রামস্বামীর হাত ধরে
টানলেন : আজ আমি কল্পতরু। চলো।

কিন্তু রামস্বামী দাঁড়ালেন। বললেন, তার আগে তোমার ড্রেসটা ঠিক
করে নাও। প্যান্টের বেন্টটা আঁটতেই ভুলে গেচো যে !

আই সি ! হেসে কোমরের বেন্টটা বেঁধে নিয়ে, সার্ট সোয়েটারটা টেনে-
টুনে ঠিক করে বললেন, চলো, লেট মি হ্যাভ এনাদার গুড টাইম উইথ ইউ !
ততক্ষণ, দাঁও তো একটা সিগ্রেট। গলাটা শুকিয়ে কাঠ হয়ে গেচে।

এসব নিয়ে সাগর-নগরে বৃথা রাগ অভিমান করা। শ্রমের খেলায় এঁরা
কেউই কটিখোকা বা খুকি নন। নিজেদের ভালো-মন্দের জ্ঞান সবারই
আছে। আর কেউ কারোর তোয়াক্কা করে না, ধারণ ধারে না। দু'দিনের
সমাজ, দু'দিন পরে ভেঙে যাবে। আর কারো সঙ্গে কারোর দেখা হবে

কিনা সঙ্গেহ। মাটির নগরে গিয়ে সবাই ছড়িয়ে যাবে যে যার তালে। কাজেই এই সাগর-নগরে যে যার চালে চলচে চলুক, শুধু দেখে যাও, কিছু বলতে গেলে তুমিই হবে হান্তাস্পদ।

অবশ্য প্রকাশ্যে যদি অশোভন কিছু ঘটে, যদি অস্ত্রের স্বার্থে কিছু আঘাত লাগে, যদি বিরক্তির কোন কারণ ঘটে—তবে আপত্তি করবার অধিকার আছে বৈকি সর্বদা এবং সর্বথা। এ নিয়ে মতদ্বৈধ নেই।

দিন যত এগিয়ে যাচ্ছে, পরস্পরের বন্ধুত্ব হচ্ছে গাঢ়, ঘনিষ্ঠতা ক্রমে বাড়ছেই। ঝাঁরা ‘আপনি’ বলে শুরু করেছিলেন কথা, তাঁরা এখন ‘তুমি’ বলে কথা বলছেন, পদবির আগে ‘মিষ্টার’ লাগিয়ে কথা বলাও আর দরকার করে না। মাটির-নগরের ঠিকানা নিচ্ছে পরস্পরে টুকে : এই যাত্রার আনন্দময়-স্মৃতিটুকু নিয়ে পরে তো জাবর কাটতে হবে!

‘বাতরি’ জল কেটে এগিয়ে চলেচে পোর্ট সৈয়দের দিকে। বাইরের হিমেল হাওয়া ক্রমে হচ্ছে উষ্ণ। ক্যাবিনে, লাউঞ্জে, ডেকে বন্ধু-বান্ধবীদের হৃদয়েও দেখা দিচ্ছে ভাবের তাপ! পরিচয়ের আদান-প্রদানের আর বাকি নেই। ছোট ছোট দল উঠেচে গড়ে। কোথাও চলেচে মন-দেওয়া-নেওয়া; কোথাও বা মন-খোলা হাসি-ঠাট্টা।

তাই তো দেখা যাচ্ছে এইটেলের সঙ্গে মি: চ্যাটার্জিকে গল্প করতে, ডাঃ প্রামাণিকের সঙ্গে রেভারেণ্ড হেওয়ার্ডের, মহাবিশ্ব সেন জমেচেন মি: এবং মিসেস গ্র্যাটনদের সঙ্গে। রেজা, কে-জি আর সানিয়ার যেন হরিহর আত্মা। মিসেস প্যারেলওয়ালার সঙ্গে মিসেস হল্যাণ্ডের খুব ভাব। শুধু ভাব নয়, নীচু গলায় রীতিমত আলোচনা চলচে এনাক্সী রাওয়ের বেহায়াপনা নিয়ে।

মিসেস হল্যাণ্ডের কমমেট হচ্ছেন এনাক্সী রাও। ভোর না হতেই কেবিনের সামনে মিটারের আগা এনাক্সীর আশায় এবং অনেকরাগ্রে এনাক্সীর কেবিনে ফেরা—অবশ্যই আলোচনার বিষয়। তাছাড়া ডেকে, লাউঞ্জে, সর্বক্ষণ ছুটির আঠার মত লেগে থাকা—চোখে লাগে বৈকি।

অবশ্য, সম্প্রতি মিসেস প্যারেলওয়ালারও তাঁর বান্ধবীর সঙ্গে নীচু গলায় আলোচনা করবার বিষয়বস্তু পেয়েছেন। বিষয়বস্তুটি হচ্ছেন কিরগয়ী বড়াই।

তিনি আজকাল একটি পাকিস্তানী ছেলের সঙ্গে ঘোরাফেরা করছেন। ছেলেটির নাম রাফিক। ইংল্যান্ডে ইঞ্জিনিয়ারিং পড়তে গেছলো। পড়েচে এবং প্রেমও পড়েচে কয়েকবার তবে প্রেমপাত্রীকে লতিকের মত সালোয়ার-পায়জামা পরিয়ে দেশে নিয়ে যাচ্ছে না। দেশে তার ভাবি-বিবি ঠিক হয়েই আছে। বিলেত থেকে লায়েক হয়ে ফিরচে। ফিরলেই সাদি আর সরকারি চাকরি। শুধু তাই নয়, ভাবি-বিবির বাবা পাকিস্তান গভর্নমেন্টের কন্ট্রাক্টর। অতএব পয়সাওয়ালা লোক। বিবির সঙ্গে একখানা বাড়ি পাবারও আশা আছে রাফিকের।

এসবাবস্থায় একটি বিদেশিনী শ্বেতহস্তিনীকে নিয়ে দেশে যাওয়া মানে নিজের পায়ে কুড়ুল মারা। কাজেই জাহাজে উঠবার আগে রাফিক তার শেষ প্রণয়িনী মিস গ্রান্সির হাত ধরে রফা করে এসেচে : ডালিং, তোমার মুখখানা আমার বুকের পটে এঁকে নিয়ে চললাম। আমাদের প্রেমের জের হিসেবে দেশ থেকে পাঠাবো পাকিস্তানী প্রেজেন্টস্ আর প্রেমের চিঠি প্রত্যেক উইকে !

গ্রান্সি অবশ্য ছলছল চোখে বলেছিলো, তা ছাড়া আর উপায় কি ডালিং ! তবে রাফিককে বিদায় দেবার সময় মনে মনে ফিক ফিক করে হেসে হিসেব করেছিলো, পার্টিং-কিক-এর আগে রাফ্লি প্রায় স'দেড়েক পাউণ্ড দুয়ে নেওয়া গেচে। যথা লাভ !

কিরন্ময়ী বড়াই রাফিকের সঙ্গে সামান্য মেলা-মেশা করছিলেন, তার একটু কারণ ছিলো। কথায় কথায় প্রকাশ করেছিলো রাফিক, যে, করাচীর কাষ্টমস্-এ রাফিকের নাকি এক চাচা উচ্চপদস্থ কর্মচারি। কাজেই কাষ্টমস্-এর কাঁটা তারের বেড়ার কাঁটা সরিয়ে দিয়ে অতি সহজেই ডিঙোবার ব্যবস্থা করতে পারেন ভদ্রলোক। এ হেন চাচা-ভাগ্যবান ভাইপোর সঙ্গে স্বার্থের খাতিরে যদি দুটো হেসে হেসে কথাই বলা যায়—তাতে কী এমন ক্ষতি !

তবে ই্যা, ড্যান্সিং-এর প্রোগ্রামের রাজে অনেকেই হল-এ কিরন্ময়ী বড়াইকে রাফিকের পাশে বসে বীয়ারের গেলাসে চুমুক দিতে দেখেচেন। সেটা নেহাৎই রাফিকের অহুরোধে, তাকে তোয়াজ করবার জন্তে মন রাখার অভিনয় মাত্র। আর রাফিক তো বলেইচে, বীয়ারে কোন দোষ নেই।

নেশা হবারও ভয় নেই। মাত্র টু-পারসেন্ট এলকহল। অথচ শরীরটা টনটনে হয়; আর নাকি লিভার ফাংসন ভাল হয়!

মিসেস বড়াইয়ের সত্যিই লিভারের গোলমাল আছে!

তবে রীতিমত ঘনিষ্ঠতার লক্ষণ এখানে-ওখানে দেখা যাচ্ছে একটু লক্ষ্য করলেই।

বাহাতুরে বুড়ো জন লেগেচেন রাজহংসী মিসেস হারমানের পেছনে। ভদ্রলোক জিভ্রলটার থেকে উঠেচেন। সেখানে তিনি ব্যবসা করেন, যাচ্ছেন করাচীতে। ইংরেজের ভক্ত দেশ, দেখা যাক, সেখানে কিছু সুবিধে হতে পারে কিনা।

বুড়ো পোর্ট থেকে উঠেই বোধকরি বার-এ গিয়ে বসেচেন আর হরদম মদ গিলেচেন। এমন সত্য্য ভালো মদের সুযোগ ছাড়া বোকামি। হইস্কি, রাম, জীন, পোর্ট, বীয়ার সব রকম চাখচেন; এবং এই কমিউনিষ্ট জাহাজে পোলিশ ভোদকা পাওয়া যায় দেখে তাও গিলেচেন এ পর্যন্ত প্রায় তিন বোতল।

কড়া মাল এই ভোদকা। দেখতে জলের মতন। কিন্তু মনে হয়, তরল আগুন যেন যাচ্ছে কণ্ঠনালি দিয়ে পেটের মধ্যে। ফাঁকে ফাঁকে সোডাওয়াটার সিপ্ করতে হয়, নেশাটা তাতে জমে ভালো।

বুড়ো শুধু নাচের আসরে গিয়ে বসে।

কারণ সেখানে তখন ওয়াইন সার্ভ করা হয়; আর তাছাড়া রকমারি উইমেনের বাহারও দেখবার মত!

রাজহংসীকে চোখে ধ'রে গেলো জন-এর। তা, যাবারই কথা। কাজেই তাঁর টেবিলেই বরাবর বসতে লাগলেন জন। কথায় আছে, ইফ ইউ লভ এ গার্ল, ইউ মাস্ট লভ হার ডগ অলসো! কাজেই রাজহংসীর হাজব্যাণ্ডের সঙ্গেও ছোটো জড়ানে মিষ্টি কথাও বলতে হয়। আর ছুজনের ড্রিংকের সব ধরচা বহন করতে লাগলেন বুড়ো প্রেমিক জন! তবে দেওয়া-নেওয়ার যুগে একতরফা কিছু করা বিধেয় নয়; তাই মিঃ হারম্যান যখন অল্প কোন মেয়ের সঙ্গে নাচতে যান তখন জন রাজহংসীর নরম এবং পরম স্তম্ভ যোমের মত হাতখানায় তাঁর ফেনিল ওঠ ঠেকিয়ে দিতে ছাড়েন না।

রাজহংসী হাসেন, বোঝেন হয়তো, বুড়োর দোড় ঐ পর্যন্ত । বাহুল্যতা
 বেয়ে মুখে বা আর কোথাও এতবার সাহস হবে না বুড়ো শালিকের—অবশ্য
 যদি না রাজহংসী ক্রুপা করেন । আর, কবরের ভাবি মড়াকেই বা ক্রুপা করে
 লাভটা কি ? তিনি ‘তু’ করলে কুকুরের অভাব ? তবে হ্যাঁ, শুধু হাতখানা
 বুড়োর হাতে তুলে দিলে যদি ড্রিংক বাবদ কিছু হাতানো যায়, আর
 তাতে তিনি বা তাঁর হাজ্রাব্যাণ্ড যখন কিছু মনে করেন না—তখন এই মজার
 খেলায় ক্ষতি কি ?

ওঁদের খেলা সানিয়ালের দৃষ্টি এড়াবার কথা নয় । বরং ড্যান্সিং হলে,
 তিনিই তাঁর দলকে দেখালেন মজার কাণ্ড !

সানিয়াল বললেন, জানো ঐ বুড়োটা কম নির্লজ্জ ! সেদিন বাথরুমের
 দরজাটা ভিতর থেকে না বন্ধ করেই বুড়ো একেবারে উদ্যম হয়ে স্নান
 করচে । আমি দরজা খুলে ঢুকতে গিয়েই লজ্জায় মরি ! তা বুড়োর লজ্জা
 আছে ! বলচে, কাম অন, কাম অন—ডোন্ বি শাই ! আ মর
 ব্যাটা !

কে-জি শুনে বললেন, যুরোপে একসঙ্গে নগ্ন স্নানে দোষ নেই, কাজেই
 লজ্জার কথা বুড়োর মাথায় আসেনি ।

রেজা বললেন, আসল কথা, বুড়ো নেশার ঘোঁকে ছিলো । হেসে বললেন,
 যান নি, ভালোই করেচেন ।

আর একটি দৃষ্টি আকর্ষণ করবার মত প্রণয়-ঘটনা ঘটচে গ্যাংগুলি ও
 এলিসের মধ্যে । গ্যাংগুলির বিশুদ্ধ বাংলা গল্পোপাখ্যায় ও ইংরেজিতে
 গান্ধুলী । কিন্তু এলিসের কাছে গ্যাংগুলি ।

এতদিন এস. গ্যাংগুলির কোন খবর পাওয়া যায়নি । কারণ, ডেকে ইনি
 এতদিন অস্থগত ছিলেন । আর, তার কারণ হচ্ছে, ভদ্রলোকের অস্থগততা ।
 সাউদাম্পটনে ‘বাতরি’তে ঐটার পরদিনই সী-সিকনেসে পড়েছিলেন
 এবং তার পরেই ঐঠা ঠাণ্ডা লেগে ইনফ্লুয়েঞ্জা হওয়ায় সাগর-নগরের
 হাসপাতালে ছিলেন শয্যাশায়ী । অবশ্য, ছিলেন ভালোই ! নার্সের
 নিয়মিত সেবা, ডাক্তারের তীক্ষ্ণ পর্যবেক্ষণ এবং সেই মত ওষুধ সেবন করে
 দ্রুত উন্নতির পথেই এগিয়ে চলছিলেন । তাছাড়া মাটির বহু হতভাগ্য
 দেশের নগরে-নগরে যেমন ডেজাল খাণ্ডের প্রকাশ্য প্রচার আছে—সে রকম

কিছুর কথা এই সাগর-নগরের কর্তৃপক্ষরা স্বপ্নেও ভাবতে পারেন না বলে রোগীরা বিস্তৃত ওষুধ পথ্য এবং পানীয় পেয়ে থাকেন। সে কারণে যখন সাগর-নগরের হাসপাতাল থেকে ছাড়ান পেলেন গ্যাংগুলি, তখন দেখা গেলো, তাঁর ওজন গেচে বেড়ে, আর গাল দুটিতে বেগুনে আভা দিয়েচে দেখা।

এই জাহাজে এর টিকেট কাটা থাকলেও, আসতে পারতেন কিনা সম্ভেদ এবং সে ক্ষেত্রে এলিসের সঙ্গে দেখাও হতো না নিশ্চয়ই এবং তাঁদের এই প্রেমোপাখ্যান লেখবার সৌভাগ্যও হতো না আমাদের। ভূতলোক গুয়াটারলু রেল স্টেশনে এসে দেখেন মাত্র কয়েক মিনিট আগে বোট-ট্রেনটি ছেড়ে গেচে। ট্যাক্সি থেকে ব্যাগ পত্র নামিয়ে বোকার মত কিছুক্ষণ দাঁড়িয়ে রইলেন স্টেশনে। শেষে স্টেশনে জাহাজের কর্তৃপক্ষকে ব্যাপারটা জানানোই তাঁরা তাঁদের নিজেদের কার-এ সোজা তাঁকে পাঠিয়ে দিলেন সাউদাম্পটন ডকে।

এস. গ্যাংগুলি ডকে পৌঁছলেন যখন, তখনও অন্যান্য যাত্রীরা পাশপোর্ট অফিসের সামনে লাইন করে দাঁড়িয়ে!

এইখানেই দেখা হয়ে গেলো মিস এলিস ক্যাম্পবেল-এর সঙ্গে এস. গ্যাংগুলির। লাইনে গ্যাংগুলির সামনেই দাঁড়িয়েছিলেন মিস ক্যাম্পবেল। বেচারির স্মার্টকেশটা ছিলো যেমন বড়, তেমনি ভারি। একলা মেয়ের পক্ষে সেটা ক্যারি করা একটু শক্ত। অথচ, ওটি কেন যে লাগেঞ্জের সঙ্গে না দিয়ে নিজের কাছে রেখেচেন, বোঝা শক্ত। গ্যাংগুলি মেয়েটির অসুবিধে দেখে নিজেই অফার করলেন, ইফ ইউ ডোন্ট মাইণ্ড, আই মে হেল্প ইউ! এবং সেই থেকে ঐ এলিসস্মার্ট স্মার্টকেশ গ্যাংগুলি সানন্দেই তাঁর কেবিনে পর্যন্ত বয়ে এনেচেন। অতএব, ঐ উপকারের প্রতিদান নিশ্চয়ই আশা করতে পারেন গ্যাংগুলি এবং তাঁর আশা পূর্ণও হলো।

হাসপাতালে থাকাকালীন, মিস এলিস নিয়মিত তাঁকে ভিজিট করতে লাগলেন এবং পাশে বসে গল্প জমালেন। মেয়েটি একটু বেশিই মোটা এবং বেশি রকম গল্পে। কাজেই হাসপাতালের পালা শেষ হলেও গ্যাংগুলির সঙ্গে এলিসের গল্পের জের চলতেই লাগলো। ডাইনিংরুমে, লাউঞ্জে, বার-এ ডেকে সর্বত্রই দুটিতে জোড় বেঁধে হাসি আর গল্পে মসগুল হয়ে রইলেন!

অতএব, ঐ দুজনের মজলিসী ভাব, সাগর-নগরের অনেককেই ভ বয়ে তুললো ! আর, তাঁদের দুজনের হাব-ভাবে বেশ বোকা গেলো, তাঁরা মজে আছেন এবং মজায় আছেন ।

এই সব মজা-দলের মাঝে বিরহিণী মিসেস দত্ত কিন্তু বড়ই বেমানান । তিনি আজকাল মাঝে-মাঝে বেরুচ্ছেন বটে বাইরে, তবে ডেক চেয়ারে বসে উদাস হয়ে থাকেন সমুদ্রের দিকে চেয়ে ! অবশ্য, মিস ইলিয়ট কখনো কখনো তাঁর পাশে এসে বসেন, গল্প-গল্প করেন । সেই সময়টুকু মন্দ কাটে না মিসেস দত্তের ।

‘বাতরি’তে আবার চাকলা দেখা দিয়েছে ।

শুরু হয়েছে দল বাঁধা । আবার মাটির সহরে যাবার সুযোগ সামনে । সমানে পাঁচটা দিন জলে ভেসে ভেসে, অবশেষে দেখা গেছে মিশরের উপকূল ।

‘বাতরি’ তার বাঁয়ে স্পেন, ফ্রান্স, ইতালি রেখে, ডাইনে মরক্কো, আলজেরিয়া, টিউনেসিয়া, লিবিয়া ছাড়িয়ে, সিসিলি, মান্টা, ক্রেট-এর আশপাশ দিয়ে এসে পৌছেয়েছে ইজিপ্টের দরিয়ায় । ইজিপ্টের উপকূল আলেকজান্দ্রিয়া বন্দরে ‘বাতরি’র নোঙর ফেলবার কথা নেই, তাই এগিয়ে চলেচে পোর্ট সৈয়দের দিকে ।

যারা ইজিপ্টে বেড়াতে যাবেন তাঁরা নিজেদের নাম, কেবিন নম্বর জানিয়ে দিয়েচেন পার্শার অফিসে, জমা দিয়েচেন পাশপোর্ট । জাহাজ কোম্পানীর সঙ্গে ঠিক করা আছে ইজিপ্টেরই এক ট্রাভেল এজেন্সীর সঙ্গে : মেমফিস টুরিং এজেন্সী ।

পোর্টসৈয়দে জাহাজ নোঙর করলেই, এঁদের লোক এসে ওঠে জাহাজে, ছোটো পার্শার অফিসে, জেনে নেয় কারা কারা নামবেন মিশর দর্শনে । তারপর তাঁদের ডেকে-ডুকে নিয়ে, কুড়িয়ে-বাড়িয়ে কটি ‘তীর্থযাত্রী’ হলো গুনে গৌথে মিশরী-পাণ্ডা ‘দিস ওয়ে স্মার, জাট ওয়ে ম্যাম’ করতে করতে সবাইকে নিয়ে ওঠে স্টিমলকে ।

এই যাত্রায় বেশি লোক পা বাড়ায় না । টাকার অংকটা বাধা দেয় । ছ’ পাউণ্ড, প্রায় আটাত্তর টাকা খরচ করবার আগে অনেকেই মাথা চুলকে

ভাবতে থাকেন। তবে বঁাদের সখ আছে কিংবা ভাবেন, এ স্বযোগ তো আর পাবো না—তীরাই ছ' পাউণ্ডের ট্রাভলার্স চেক কেটে জমা দেন পার্শার অফিসে।

তবে হ্যাঁ, এ টাকা খরচ করলে আরামে নতুন দেশ ভ্রমণের সুখটুকু পাওয়া যায় ধোলো আনা। টুরিং কোম্পানীর প্রতিনিধিও ভাব দেখান যেন ইঞ্জিন্টের রাজ-অতিথি এসেছেন। তাছাড়া প্রায় এক রাজের প্রোগ্রাম : খাওয়া, থাকা, বেড়ানো, গাড়ি ভাড়া, উটে চড়া, সব ঐ টাকার মধ্যে।

সাগর-নগর ধীরে ধীরে পোর্ট সৈয়দের এলাকায় যখন ঢুকলো, তখন বেলা প্রায় একটা। আজ এক ঘণ্টা আগে লাঞ্চ সারা হয়ে গেছে সবাইয়ের। সবাই প্রায় ঝুঁকে এসে দাঁড়িয়ে-ডেকের রেলিংয়ে। সাগর-নগর হেলে গেছে নাকি ?

এই বন্দর থেকেই স্নেহজ্বালের শুরু। এই খালের সৃষ্টি-কর্তা ফরাসী ইঞ্জিনিয়ার ফার্দিনান্দ দ্য লেশেপ্‌স-এর বিরাট স্মৃতিমূর্তি দাঁড় করানো বন্দরের মুখেই। হয়তো তাঁর আত্মা এই মূর্তিকেই আশ্রয় করে দিবারাত্র গণনা করচে পশ্চিম থেকে ক'খানা জাহাজ গেলো পূবে আর পূব থেকেই বা এলো ক'খানা? পূব-পশ্চিমের সর্টকাট এই স্নেহজ্ব ক্যানেল। এই ক্যানেলেরই জন্ম হওয়ায় ঐ ওধারের উত্তমাশা আজ হয়েছে কানা! মানুষের আশা-ভরসা অবিরত বয়ে চলেচে ঐ স্নেহজ্ব ক্যানেলের একফালি সরু স্রোতের জল ধারায়! পূব-পশ্চিমের ছাও-শেক করবার স্থায়ী ব্যবস্থা করে দিয়েছেন ঐ ফরাসী ইঞ্জিনিয়ার। বিশ্বের নমস্ত্র ব্যক্তি।

পার্শার অফিস তাদের নোটিশ বোর্ডে জানিয়ে দিয়েছে, নিজের নিজের ঘড়ি একঘণ্টা করে এগিয়ে নিতে। ক্রমেই এগিয়ে চলেচি পূবের দিকে, সূর্যমামার জন্মভূমির দিকে—কাজেই সময়-রাজার সম্মানে ঘড়ির কাঁটা এগিয়ে নেওয়া—এ আর এমন কথা কি ?

অতি সঙ্গর্পণে সাগর-নগর এসে দাঁড়ালো মাটির নগরের খানিক তফাতে। একটু দূরে থাকাই ভালো হয়তো, বেশি ঘনিষ্ঠতা ভাল নয়। আত্মীয়তা দূর থেকেই জমে, কাছে এলেই কমে।

মিশরবাদী এবং বাজীর মিশরী-পাণ্ডার সঙ্গে ষ্টিমলঞ্চে নামলেন।

সাগর-নগরের প্রায় ছ'শো যাত্রীর মধ্যে মাত্র চল্লিশ-পঞ্চাশ জন। অবশ্য তাঁদের মধ্যে জন হুড়ি, 'বাতরী'-কে একেবারে গুডবাই জানিয়েই নামলেন। তাঁদের টিকিট ঐ পর্যন্তই। তাঁদের যাত্রা হলো শেষ।

দর্শনার্থীদের মধ্যে নামলেন মিঃ এবং মিসেস গ্র্যাটন, কে-জি, ডাঃ মহাবিক্রম সেন, সানিওয়াল, বৈটে কে. এম. শা, রামস্বামী; ফার্স্ট ক্লাস থেকে স্বামী জ্ঞানানন্দ, মিসেস টি. ডবলিউ. হোর এবং আরো অনেকেই।

ক্যানেল কোম্পানীর অফিসের পাশ দিয়ে টিমলকথানা ভটভট করে এসে থামলো ডাঙায়। যাত্রীরা নামলেন। আর ততক্ষণে ডাঙার ডিঙি নৌকায় চড়ে মিশরী-ব্যবসাদাররা তাদের সওদা নিয়ে ভিড়েচে গিয়ে সাগর-নগরের লোহার দেওয়ালের গায়ে। নীচে থেকে ছুঁড়ে দিয়েচে দড়ি জাহাজের ডেকে রেলিংয়ের সঙ্গে। তাতে থলি বেঁধে তার মধ্যে মাল ভরে পাঠিয়ে দিচ্ছে প্রায় চারতলা উঁচু প্যাসেঞ্জার ডেকে। ভাবটা: মাল দেখে দাম দাও।

বিশ্বাস করেই ছেড়ে দিচ্ছে জিনিস। জানে তারা, যারা এই জাহাজের যাত্রী, যারা এত পয়সা খরচ করে যাতায়াত করচে, তারা সামান্য কয়েক টাকার জিনিস নিয়ে কেবিনে গিয়ে দরজা 'লক' করে বসে থাকবে না। তাছাড়া জাহাজে আর পাঁচজনও তো আছেন।

ইয়েস স্মার, টেক স্মার, ভেরি গুড স্মার! নীচের ডিঙি থেকে ব্যবসায়ীদের সরব আবেদন।

চামড়ার নক্সা করা ব্যাগ, জুতো, মনিব্যাগ, মিশরের হাতের কাঁজ করা বহু রকমের জিনিস দড়ি বেয়ে উপরে উঠচে আর নামচে। দামে বনলে কেবিনে ঢুকচে।

এ তো ইংল্যান্ড নয়, মিশর। শো-কেস নয়, ডিঙি নৌকো। এখানে দামদস্তুর চলে। এক পাউণ্ডে প্রায় সাতানকই পিয়ান্ডার সেই হিসেবে পাউণ্ড-শিলিংএ দাম হাঁকচে ব্যবসাদার। আর তার অর্ধেক দাম বলচে সাগর-নগরের নাগরিকরা। হয়তো পেয়েও যাচ্ছে জিনিসটা সেই দামে। ভাবচে, খুব জিতলাম। ব্যবসাদারও মুখে বলচে বটে, লস স্মার। অলরাইট, টেক স্মার।—আর মনে মনে ভাবচে হয়তো, বাক গছানো গেচে ভালো দরেই!

পোর্ট সৈয়দের কাউন্স-এর বেড়া পার হবার জন্তে যারা থেকে গেলেন, তাঁদের বাদ দিয়ে দর্শনার্থীরা প্রায় জন পচিশেক। ছ'খানা বড় ট্যান্ডি চেপে তাঁরা গাইডের সঙ্গে চললেন রাজধানী কার্ঘ্যরোর দিকে।

সরু স্তম্ভেজ ক্যানেলের ধার দিয়ে দিয়ে পীচ ঢালা রাস্তা। একটানা সোজা পথ। সান বাধানো স্তম্ভেজ খাল আর পীচ ঢালা পথটা যেন কম্পাটিন দিয়ে চলেচে। পথের দুধারে গাছের সারি।

ইসমালিয়া পর্যন্ত স্তম্ভেজের পাড় দিয়ে দৌড়ে, পথটা বেকে গেলো ডাইনে—কাইরোর দিকে। হ হ করে চলতে লাগলো পর-পর মোটরের দল। ইঞ্জিনের মক্ভূমি দিয়ে উঠের সারি—ক্যারাভান চলে মন্থর গতিতে। আর ইঞ্জিনের পীচ পথ বেয়ে বায়ু-গতিতে চলে আমেরিকান মোটর গাড়ি—সারি সারি। সে যুগ আর এ যুগের যান সমান সম্মানে বিরাজমান এই মিশরে

পথের দুপাশে দেখা গেলো এলোমেলো মাটির বাড়ি, চায়ের চালা ঘর, চায়ীর আস্তানা, মিশরের দারিদ্র্য। প্রাক্তন রক্ত-শোষা রাজা ফারকের চর্চিত ছিবড়ে!

পোর্ট সৈয়দ থেকে কার্ঘ্যরোর পথ একটুখানি নয়। হাওয়াই গাড়িতেই পাকা পাঁচ-ছ'ঘণ্টা লেগে যায়। অবশ্য মাঝে একটা রেইক্রেটে মিনিট পনেরো দাঁড় করানো হয় হাত-পাগুলো একটু মেলবার জন্তে, কোমরটা একটু টানটান করবার জন্তে। তাছাড়া জলতেটা, বাথরুম পাওয়া, চায়ের জন্তে চি'-চি' করা—অনেক কিছুই আছে। তাই মাঝে একবার ইনটারভ্যালের ব্যবস্থা।

সন্ধ্যার বেশ খানিকটা পরেই গাড়িগুলো বিদেশী যাত্রীদের নিয়ে ঢুকলো কার্ঘ্যরো সহরে। বিরাট সহর। বেশ চওড়া রাস্তা। পরিষ্কার পথ ঘাট। সর্বত্র আলো ঝলমল। আর সব চাইতে আশ্চর্য, বহু বিরাট অট্টালিকা। দশ থেকে পনেরো তলা বাড়ি যেন আগাছার মতই সর্বত্র।

নীল নদের ধারে বিরাট হোটেল—গুইজিরা প্যালেস হোটেল। সত্যিই প্যালেস হোটেল : চোদ্দ তলা বিরাট প্রাসাদ। গেটে জরিির লাল পোষাক পরা দারোয়ান। সদর দরজা থেকে ভেতর তক লম্বা পাতা লাল কার্পেট।

ট্যাক্সিগুলো এসে দাঁড়ালো হোটেলের সামনে। নামলেন সাগর-নগরের নাগরিকরা। রিসেপসনিস্ট ছুটে এসে সাধর অভ্যর্থনা করে তাঁদের নিয়ে গেলেন ডেভরে।

টুরিং কোম্পানী আগে থেকেই হোটলে সব ব্যবস্থা করে রেখেছিলেন। কাজেই কেউ কোনো রকম মাথা না ঘামিয়ে ছোট-ছোট দলে লিক্টে চড়ে উপস্থিত হলেন নিজেদের কামরায়। হোটলে বয়রা সব ব্যবস্থা করে দিলো। এ ঘেন, সারাদিনের কাজ সেয়ে নিজের ঘরে ফেরা।

এক-এক ঘরে দু'জন করে থাকবার ব্যবস্থা। পুরু গদিমোড়া ডবল বেড। ড্রেসিং টেবিল। হট-এণ্ড-কোল্ড ওয়াটারের ব্যবস্থা। দরজা-জানলায় ভেলভেটের পর্দা। পাশে টিপয়ে টেলিফোন।

পায়ে হাঁটলে ক্লান্ত হওয়া স্বাভাবিক। তবে দেড়শো মাইল একটানা মোটরে এলেও শরীরটা যে চাড়া থাকবে তার কোন মানে নেই।

ঝড়ের মত এগুতে গেলে যাত্রা-শেষে শরীরটা আর ঝরঝরে থাকে না—ঝড়ঝড়ে হয়ে যায়। কাজেই ঘরে ঢুকে অনেকেই প্রথমে যা করলেন—ধড়াচুড়ো নিয়েই পরম এবং পরম আরামের বিছানায় দেহটাকে দিলেন এলিয়ে। আ-আ-আঃ।

কিন্তু চলার পথে বেশিক্ষণ শুয়ে থাকা দৃষ্টিকটু, বিবেকবিরুদ্ধ ব্যাপার। কাজেই এক সময়ে সবাই প্রায় গা-ঝাড়া দিয়ে উঠে পড়েন। বেসিনে গিয়ে মুখ হাত ধুয়ে নেন, চুলটা আঁচড়ে নেন, মেয়েরা ঘষে নেন গালে একটু পাউডার।

মিঃ এবং মিসেস গ্র্যাটন স্বভাবতই একটি ঘর পেয়েছেন। স্বামী জ্ঞানানন্দ আর রামস্বামী দুকেছেন একঘরে। কে-জি আর সানিয়াল একটা ঘর ঠিক করে নিয়েছেন। ডাঃ সেন আর কে. এম শা আর এক ঘরে। এমনিতির অত্যাশ্চর্য ঘরে আরও অনেকেই।

ডাইনিং রুমে টেবিল সাজানো হয়েছে।

সাগর-নগরের লোক হজম হয়েছে কখন! মিশরের ডিনারের জন্তে সকলেরই উদর উদ্গ্রীব। বোঝা গেলো হোটেলওয়ালারও এবিষয়ে উদাসীন নয়। শুধু তাই নয়, টেবিলের খাদ্যসজ্জার দেখে এও বোঝা গেলো—এরা ডানহস্তের ব্যাপারে রীতিমত উদার, অতিথি-পরায়ণ।

হ্যাপ, রুটি, মাখন, চীজ এবং সেই সঙ্গে মিশরের বিশেষত্ব—পোলাও, কাবাব, স্যালাড, দই। তাছাড়া আঙুর, আপেল, কফি, চা। সবাই যেন রাক্সের মত শুরু করলেন খাওয়া। পূর্বদেশীয় জীবগুলো রসালো হয়ে উঠলো। মাসের পর মাস সেক্ষেত্রে, এখন মসলার স্বাদ পেয়ে মনে হলো যেন রক্তের স্বাদ পেয়েচে পোবা বাঘের বাচ্চা। পশ্চিমী জীবগুলোকে কাঁটা-চামচের সাহায্যে নেড়ে চেড়ে সাবধানে খেতে হলো : দিস মে বি হট, জাট মে বি স্পাইসি। অসাবধানে কিছু খেলেই, দুহু-খাওয়া শিশুর মুখে ঝাল খাওয়ার দুঃস্বাদ ঘটবার সমূহ সম্ভাবনা।

রক্তের জোর যাদের কম, ডাইনিংরুম থেকে তাঁরা আবার সোজা গেলেন বেডরুমে। তাঁদের মধ্যে, রাত্রে কায়রোর অচেনা পথে ঘুরপাক খাওয়ায় লাভ নেই। ‘শয়নে পদ্মনাভ’-ই বুদ্ধিমানের কাজ। তাঁদের দলে গিঃ এবং মিসেস গ্র্যাটন, মিসেস হোর, স্বামী জ্ঞানানন্দ এবং পঞ্চাশোর্ধ্বের আরো কয়েকজন।

তবে যারা এখনও যৌবন-চঞ্চল, বাধাকে অবাধে ঠেলে চলেন, জীবন যাত্রায় সবে শুরু—তাঁরা ডাইনিং হল থেকে বেরিয়ে সদর গেট দিয়ে পড়লেন কায়রোর আলো ঝলমল শান বাঁধানো পথে।

ডাঃ সেন, কে-জি, শা, সানিয়াল, রামস্বামী শুরু করলেন হাঁটা। লক্ষ্যহীন চলা। যে দিকে হোক গেলেই হয়। একটু দূরেই নীল নদের পুল। গেলেন সবাই সেই দিকেই। নীল নদ রাত্রে ভয়ে যেন কালো হয়ে আছে। দুই তীরে নৌকাগুলো নিয়ম, লক্ষগুলো নিশ্চল। তীরে মুখ গুঁজে পড়ে আছে সব।

কায়রোর রাজপথ কিন্তু তখনো গমগমে। ট্রাম, বাস, ট্যাক্সিগুলো ব্যস্ত। কাক্ষেখানা সরগরম। সিনেমার মাইকে বাজচে গান। দোকানে চলেচে কেনা-বেচা। এ পথে-সে পথে লোক আর লোক। আলখাল্লা পরা ফেজ মাথায় সেকলে লোক, সার্ট-প্যাণ্ট-কোট পরা একলে লোক। বোরখা পরা সেকলে নারী, বোখরা ছাড়া ঘাঘরা পরা একলে মেয়ে। সৌন্দর্যের চলন্ত স্বাক্ষর। নীল নদের নীল নয়না।

বিদেশীরা এলোমেলো হেঁটে চলেচেন। তা বলে মিশরীরা তাঁদের দিকে ইঁ করে চেয়ে নেই। থাকবার কথা নয়। পূর্ব-পশ্চিমে চলাচল করেন ধারা, এ অঞ্চলে তাঁদের আসা-রাওয়া আছেই। কায়রোর ফুটপাথে তাঁদের পায়েয় ধুলো পড়চে আজ থেকে নয়, বহুদিন থেকেই।

কে-জি বললেন, আচ্ছা, একটা সিনেমায় গেলেন হতো না ?

সানিয়ার দাঁত খিঁচিয়ে উঠলেন, কেন, একদিন অস্তর জাহাজে সিনেমা দেখে আশ্ মিটেচে না ?

রামস্বামী বললেন, বরং কোন নাইট ক্লাব বা কাবারে-তে যাওয়া থাক। শুনেচি, এখানের নাচ নাকি দেখবার।

বঁটে শা বললেন, সেই ভালো।

সেন, সানিয়ার ছ'জনেই বললেন, মন্দ না প্রস্তাবটা।

প্রস্তাব পাশ হয়ে গেলো। কিন্তু কোথায় নাইট ক্লাব ? কোথায় কাবারে ? কথায় আছে, যাদুশী ভাবনার্থশ, সিদ্ধির্ভবতি তাদুশী ! আর এ তো রাতের নরকে যাবার বাসনা ! গাইড মিলবে না !

মিলে গেলো। ছ'জন মিশরী তরুণকে হাতের নাগালে পেয়ে রামস্বামী ইংরিজীতে জিগ্যাস করলেন গন্তব্যস্থানের কথা ; এবং দেখা গেলো, তরুণ ছ'জন ইংরিজী জানেন এবং বোঝেন। উপরন্তু এসব লাইনে ওয়াকিবহালও বটে।

বললেন তাঁরা, যাবে তো, কিন্তু বিদেশীদের পক্ষে ওসব স্থান খুব নিরাপদ নয়।

বঁটে শা বুক ফুলিয়ে বললেন, সেই জগ্গেই তো যাওয়া। মরদ আমরা, মরণকেও ভয় করিনে।

শফরি ফরফরায়তে। অতএব বাঁটকুল শা-ই তো শৌর্ধ দেখাবেন ! সবাই হেসে উঠলেন।

তরুণদ্বয় বললেন, বেশ, চলো তবে। কাছেই আছে একটা নাইট ক্লাব। তবে সাবধান করে দিই, বেশি ড্রিংক ক'রো না তোমরা, বেশি টাকাও বার ক'রো না। ওখানকার মেয়েদের আমল দিয়ো না বেশি। তোমাদের দেখলেই তারা আলাপ করতে আসবে, ড্রিংক দিতে বলবে। কিন্তু ব'লো পয়সা বেশি নাই। হেসে বললেন, মেয়েগুলো এক-একটা মদের পিপে ! আরো বললেন, এসব আগে থেকেই শিখিয়ে রাখচি ; কারণ, ওখানে সাবধান করা শক্ত, বুঝতে পারলে রাগ করবে !

কে-জি তাঁর পাইপে একটি দ্বিধাজড়িত টান টেনে বললেন, তবু যেতে হবে ?

শা বললেন, হবে, হবে, নিশ্চয়ই হবে। অগুণ্টাকে দেখতে হবে।

সানিয়ার রসিকতা করলেন, পদে পদে ছোট ছোট নিষেধের ডোরে, ভালো ছেলে করে আর রাখিয়ে না ধরে !

ডাঃ সেন বললেন, অতএব দাঁও সবে লম্বীছাড়া করে !

তবে তাই হোক। কে-জি ধোঁয়া ছেড়ে বললেন।

ইভাকুয়েশন ব্রীজের কাছে কোবানা অঞ্চলে আলোর মালা পরা 'সফিয়া-হেলমি'—নাইট-ক্লাব! মাদাম সফিয়া হেলমি এই নৃত্যশালার মালিকা। কায়রোর এই নাট-মন্দিরের বিশেষত্ব পেটের নাচ বা পৈটিক নৃত্য !

টিকিট কেটে ভিতরে ঢুকলেন সবাই। হুঙ্ হুঙ্ বৃকে, ভুঙ্-কোঁচকানো চোখে। মাঝারি সাইজের হল। নরম সবুজ আলোয় ছায়া-ছায়া, মায়া-মদির ভাব। আনাচে-কানাচে মুহু মুহুর স্বরের মুচ্ছনা! সারা ঘরখানা ঘেন স্বপ্নানু। হলের এককোণে ছোট্ট একটা রঙ্গমঞ্চ।

আর দেওয়ালের ধারে ধারে কেবিনের সারি। সেখানে আধ-অন্ধকারে গেলাসে ফেনিল স্বরা নিয়ে টেবিলে মুখোমুখি বসে আছে প্রেমিক-প্রেমিকা। প্রেমিক-প্রেমিকা বলা ভুল : কামিনী আর কামুক, নারী আর পুরুষ এসে জড়ো হয়েচে ক্ষণিক উত্তেজনার লোভে, ক্ষণিক আনন্দের আশায়! এযুগে পরম আনন্দের জন্তে মন্দির-মসজিদ-গির্জায় আর যায় না কেউ সহজে। তাই চরম আনন্দের জন্তে এই বার-বণিতার নাইট ক্লাব : সভ্যতার অভিশাপ !

বিদেশীদের ছোট্ট দল দখল করলো রঙ্গমঞ্চের সামনের আসন ক'টি। তাঁদের সঙ্গে বসলেন মিশরী তরুণ দু'জন !

রামস্বামী বললেন, ড্রিংকের অর্ডার দেওয়া যাক। কী বলো? মিশরীদের জিগোস করলেন, ইজিপ্টের স্পেশালিটি কি ?

মিশরকুমারদের একজন বললেন, ক্র-জ-তলেমি, সাদা রংয়ের ওয়াইন ; লাল রংয়ের ওয়াইন সাতু-গিয়ানাক্লিস কিংবা নেফারতিতি। ক্লস মারিয়াং বা ক্লস মাতামিরও ভালো, তবে কড়া !

স্বরা-পরিচিতি শুনে কে-জি বললেন, আমার জন্যে কিন্তু বিস্তৃত বীয়ার। কারণ, এঁসব ক্ষেত্রে নিজেকে নিজের আয়ত্তে না রাখার মানে রীতিমত বিপজ্জনক দায়িত্ব ঘাড়ে নেওয়া !

শা বললেন, কাওয়ার্ড!

কে-জি বললেন, স্বীকার করচি।

রামস্বামী মিশরকুমারদের বললেন, তোমাদের যেটা ইচ্ছে বলে দাও।

তাই বলচি। মিশরী একটি মেয়েকে ইশারা করতেই এগিয়ে এলো।
তাকে কী যেন বলায় দ্রুত করে নিয়ে এলো সুরা-ভরা বোতল, গেলাস,
চাবি, স্ট্রাগাড ইত্যাদি। কে-জির জন্যে বীঘার।

মাছ দেখে যেমন মাছি আসে, মদ দেখেই ছ' তিনজন মেয়ে এলো কাছে।
মুখে রংয়ের প্রলেপ, দেহে যৌবনের আমন্ত্রণ।

মে উই হাত দি প্রেজার অব ইয়োর কোম্পানী?

ইংরিজী জানে মেয়েগুলি। আর জানে, অহুমতির অপেক্ষা না করেই
পুরুষদের গা ঘেঁষে বসতে হয়। তবু ভালো, কোলে উঠে বসেনি তারা।
কারণ, তেমন আচরণেরও ছ'চারটি নমুনা ঘরের এখানে-ওখানে ছড়ানো।
তবে, বিদেশীদের সঙ্গে প্রথমেই অতটা ঘনিষ্ঠতা করা হয়তো নিয়মবিরুদ্ধ।

সামনে কেউ বসে থাকলে, তাকে কিছু না দিয়ে মুখে তোলা ঘাস না
সহজে। কাজেই বাড়তি গেলাস চেয়ে নিয়ে তাতেও ঢালতে হলো কিছুটা
ফেনিল পানীয়। অবশ্য মদের পিপের পক্ষে ঐ পরিমাণটুকু বারি-বিন্দু মাত্র।
তা হোক। দিয়েও কিস্তি, না করো বস্তি!

কিছু পেলো কিছু দিতে হয়। মেয়েরা তাদের হোস্টদের পিঠে হাত বুলিয়ে
দিলো: তোমরা ইণ্ডিয়ান?

হঁ!

শা বললেন, আমি পাকিস্তানী।

গুড। ইণ্ডিয়ান, পাকিস্তানী গুড! উই লাইক দেম।

অর্থাৎ পিঠে হাত বোলাবার পর মাথায় হাত বোলাবার চেষ্টা!

গেলাস ততক্ষণে খালি হয়ে গেছে। একটি মেয়ে রামস্বামীর হাঁটুর
উপরে হাত রেখে বললো, আর এক রাউণ্ড হবে না?

রামস্বামী পূর্ব-শিক্ষানুষ্ঠানী পকেট দেখিয়ে বললেন, নো মনি!

মেয়েটি বললো হেসে: ও, ইউ স্পীক লাই!

রামস্বামীও হেসে বললেন, নো লাই, সাক্ষা ছায়!

হোয়াট ?

কে-জি বীয়ারের গেলাস খালি করে গভীর হয়ে পাইপ টানছিলেন। হেসে বাংলায় বললেন, এবার কেটে পড়ো খুকীরা, আর কেন ?

হোয়াট ? এবার আর একটি মেয়ে গ্রন্থ করলো।

উত্তর দিলেন মিশরকুমারদের একজন তাঁদের ভাষায়। দেখা গেলো, চেয়ার ছেড়ে উঠে দাঁড়ালো তারা। তবে যাবার সময় একটি ফাজিল মেয়ে শা-র চুলের মধ্যে আঙুল ঢুকিয়ে তাঁর মাথাটাকে ঝাঁকিয়ে দিয়ে বললো : মাই লিট্‌ল জেন্টলম্যান !

একটু পরেই মকের পর্দা উঠলো।

শুরু হলো নৃত্য। অর্ধনগ্ন নর্তকীদের লীলায়িত ভঙ্গীমা। সারা দেহে শুধু কায়নার ইশারা।

রূপসী—তবু যেন পুরুষ-উপোসী তারা ; এমনি ভাব, এমনি চোখের ভাষা। নরম মাংসের টেউ খেলানো দেহটাকে ক্ষণে-ক্ষণে এলিয়ে মেলিয়ে ধরচে পুরুষ-দর্শকদের কামাতুর চোখের সামনে। কখনো বা আত্মসমর্পনের ইঙ্গিত ! বহুলতার আর দেহলতার সে কী আকুলতা ! সেই সঙ্গে শুভ্র নগ্ন উদরের উদ্‌গম চাকলা : এই নৃত্যালয়ের বৈশিষ্ট্য !

ঢের হয়েছে ! এবার চলো যাওয়া যাক। কে-জি প্রস্তাব করলেন।

ডাঃ সেন বললেন, তা গেলো মন্দ হয় না। অনেক রাত হলো।

কিন্তু শা, সানিয়াল, দেখা গেলো, অনিচ্ছুক : থাকো না আরো থানিকক্ষণ !

রামস্বামী বললেন, কেন, বাড়িতে কি তোমাদের বৌ ভাত নিয়ে বসে আছে ?

কে-জি কিছু বললেন না। তিনি ভাবছিলেন, মাতৃজাতির ঐ ধরনের প্রকাশ্য দেহ-প্রদর্শনী আর যেন বসে দেখা যায় না ! ঐ নর্তকীদের স্বগঠিত বক্ষঃস্থল, অনাবৃত নাভিদেশ, গুরু উরুদ্বয় দেখে মনে হচ্ছে, গুণ্ডলি পুরুষের ভোগের নৈবেদ্য ছাড়া কিছু নয়। কিন্তু ঐ নাভিদেশই শিশুর গর্ভাশ্রয়, ঐ বক্ষঃস্থল শিশুর স্তন্য-নিবৃত্তি, ঐ গুরু উরুর উপরেই শিশুর নিদ্রা ও বিশ্রাম—কিন্তু এসব দেখে সেন্সর ভাবতেই ভুলে যাচ্ছেন। দূর ! এ নৃত্য, নারীত্বের অপমান !

উঠে দাঁড়ালেন কে-জি। দেখাদেখি উঠে দাঁড়ালেন ডাঃ সেন।

অগত্যা আর সবাইকেও উঠতে হলো। এ দল বালির বাঁধের মতই পড়া। সাময়িক উদ্দেশ্য নিয়ে এক সঙ্গে হওয়া—অন্তরের যোগাযোগের বাঁধুনি এখানে নেই। তাই বালির একাংশ খুলে এলে, ভেঙে গেলে, হড়মুড় করে সবটাই ধ্বসে পড়ে। দল ভেঙে গেলো।

নাইট ক্লাব থেকে বেরিয়ে আসছিলো দল। আধ-অন্ধকার করিডরে একটি জোয়ান মিশরী এসে দাঁড়ালো। সামনে ছিলেন রামস্বামী। তাঁর কানের কাছে মুখ নিয়ে মূঢ় হেসে বললো, এনিথিং মোর ইউ ওয়ান্ট স্মার ? হোয়াট ?

গুড গার্লস! লাভলি গার্লস!

পাশেই শা ছিলেন। রামখোকার সখ কম নয়, শুনতে পেয়েই জিগোস করলেন, হাও মাচ ?

পেছনে কে-জি হয়তো আঁচ করলেন ব্যাপারটা। তাড়াতাড়ি এগিয়ে এসে বললেন, আবার এখানে দাঁড়ালে কেন ? নাও, লেটস গো!—বলেই প্রায় ঠেলে দিলেন সবাইকে।

মিশরী একপাশে সরে সেলাম করে দাঁড়ালো।

সবাই বেরিয়ে এলেন ফুটপাথে। মিশরী তরুণ দু'জন কে-জিকে বললেন, খুব ভালো করেচেন। নইলে সব খুঁয়ে আসতে হতো।

কায়রোর রাজপথ তখন প্রায় নির্জন, নিস্তব্ধ। মিশরী দু'জন একটা ট্যাক্সি ডেকে দলটাকে উঠিয়ে দিয়ে, সবাইয়ের সঙ্গে ছাও শেক করে বিদায় নিলেন।

ট্যাক্সিতে শা বললেন, ঘোষ একটা বেরসিক।

কে-জি তাঁর পাইপে টোবাকো ভরতে ভরতে বললেন, তা রসিক-নাগর থেকে গেলেই তো পারতে! কিন্তু ঐ রস-নাগরের হাঁটুজলই যে তোমার পক্ষে ডুবজল, সে খেয়ালে আছে ?

সবাই হো হো হেসে উঠলেন।

পরদিন ভোর বেলায় কায়রো কুয়াশায় ভর্তি। দু'হাত দূরের মাহুষ দেখা যায় না।

টুরিং কোম্পানীর লোক এসে ব্রেকফাস্ট খাইয়ে সবাইকে ট্যান্ডি বোঝাই করলো।

তবু ভালো, বেলা বাড়তেই ঘন কুয়াশা ফিকে হয়ে এলো। ট্যান্ডিতেই পিরামিড পর্বত ঘাওয়া যেতো। তবে প্রোগ্রামে উটে-ওঠার ব্যবস্থা ছিলো। কাজেই গতি এখানে কাম্য নয়, কাম্য বৈচিত্র্যের। তাই সবাই হাসিমুখে ট্যান্ডির নরম গদি ছেড়ে উটের কুঁজের উপর লাফিয়ে উঠলেন উটগুলাদের সাহায্যে। সাজানো-গোছানো-ঘণ্টা-বাঁধা উটগুলো, হাঁটু মুড়ে বসেছিলো। মালেকের হাতে নাকে-বাঁধা দড়ির টান পেয়ে উঠে দাঁড়ালো অতি সন্তর্পনেই। পিঠে তাদের কাঁচা-সোয়ার উঠেচে, তা বোধহয় সোয়ারির আচার ব্যবহারেই বুঝে ফেলেচে উটগুলো, তাই এই সাবধানতা। মিশরের প্রাচীন সভ্যতার গুরাও তো দাবীদার! ভদ্রতা ওদেরও অজানা নয়!

যাত্রীদের দোলানি খাইয়ে খাইয়ে উটগুলো গিজাতে পিরামিডের গোড়ায় এসে দাঁড়ালো। এই সেই পিরামিড! এতদিন যা ছবিতে বা ছায়াছবিতে দেখেচেন সবাই, আজ সেই পরম বস্তুটি বাস্তবাকারে চোখের সামনে দাঁড়িয়ে। আকাশের উদ্দেশে পৃথিবীর প্রাচীনতম নৈবধ্য! রাজঐশ্বর্য সহ মিশররাজের পারলৌকিক রাজ্যভবন! বিশ্বের বিশ্বয়!

উটে চড়ে, উট থেকে নেমে ফটো তুললেন সবাই। আহা, এই পরমক্ষণকে আলোছায়ায় বন্দী করাই বুদ্ধিমানের কাজ।

পাথরের পর পাথর সাজানো বিরাট পিরামিড। শাস্ত, গভীর, উর্ধ্বমুখী।

একধারে হুড়ঙ্গ গলিপথ। মাথা উচু করে যাবার উপায় নেই। সেটাই হয়তো স্বাভাবিক। রাজ-সমাধিতে মাথা উচু রাখা অশ্রায়, দৃষ্টিকটু। হুড়ঙ্গ পথটি অন্ধকার, সরু, অশস্তিকর। কিছুটা গিয়েই ফিরে এলেন সবাই। যদিও গাইড মোমবাতি জালিয়ে পথ দেখাচ্ছিলো, তবু মনে হলো তাঁদের, বুঝি মৃত্যুর ছায়ার অদূরেই। পাখিব ভদ্রলোকেরা তাই পৃথিবীর আলো-হাওয়াতে ফিরে আসাই যুক্তিসঙ্গত মনে করলেন।

একটু দূরেই নর-সিংহের প্রস্তর মূর্তি : স্ফিনক্স। মহাকালের ঝড়-ঝাপটা অগ্রাহ্য করে আজও থাবার উপর ভর করে বসে আছে। বুঝি দেখচে : পৃথিবীর কাণ্ডজ্ঞানহীন লোকগুলোর পশুপ্রবৃত্তি, তাদের পাশবিক ব্যবহার। নর-পশুটি নিজের বুঝি বিশ্বিত!

নাও, ভার্স, লেট্‌স্‌ গো টু মিউজিয়াম। গাইডের নির্দেশমত এবার সবাই ট্যান্ডিতে।

ইজিপ্সিয়ান মিউজিয়াম। মিদান এল্‌ তহ্‌রির।

সেকালীন মিশরীয় সভ্যতার বাস্তব-চিহ্নগুলি সযত্নে সংরক্ষিত। টুটানখামেনের রত্নরাজি, পোষাক-পরিচ্ছদ, খাট-আলমারি, বসন-বাসন, শাসনযন্ত্র, তরবারি, তীর-ধনুক—হরেক রকমের দ্রব্য। শুধু সোনা আর সোনা। টিনের পাতের মতই যেখানে-সেখানে ব্যবহৃত।

মমি। ছ' চার হাজার বছর বয়সের পুরোন মৃতদেহকে কী অপূর্ব কৌশলে মহাকালের নাগালের বাইরে রাখা হয়েছে! বৈজ্ঞানিক প্রহেলিকা।

সত্যিই জাদুঘর। একালের দর্শকরা যেন কোন জাদুমন্ত্রে চলে গেছেন সেকালের সোনার যুগে—টুটানখামেন, ক্লিওপেট্রার যুগে! কারোর মুখে যেন কথা নেই, চলা-ফেরায় চাকল্য নেই। শুধু দেখা—দেখে যাওয়া। চোখ ভরে দেখে যাওয়া, মন ভরে নিষে যাওয়া। সবাই যেন আপন-আপন সংগ্রহ মনের স্মৃতি-ভাণ্ডারে ভরে নিতে ব্যস্ত।

চমক ভাঙলো গাইডের ডাকে : নাও, টু বাজার প্রীজ, হারি আপ।

সবাই বুঝি মাটিতে ধপাস করে পড়লেন।

বাজারে! কেনা-বেচা। হৈ-হল্লা। যেখানে শুধু—প্রীজ কাম, প্রীজ সী, প্রীজ টেক, ভেরি গুড্‌, ভেরি চীপ।

এমনিই চলতো কি সেকালের মিশরের বাজারে? হয়তো। কেনা-বেচা, লেন-দেন, দর-দাম কি মানুষের সমাজে আজকের আবিষ্কার! হাজার-হাজার বছরের প্রাচীন প্রথা। তবে সেই পুরোন ব্যবসা-বৃক্ষ আজ বহু-পল্লবিত, বহু শাখায়-শাখায় সুবিস্তৃত।

মাস্কি-বাজার কায়রোর সেরা বাজার। কাছাকাছি আরব দেশের বহু বাজারের তুলনায় গণ্যমান্য পণ্যস্থল। বাজারের সরু সরু পথের দুধারে দোকানের সারি। দোকানে-দোকানে মিশরে-প্রস্তুত হাজারো রকমের দ্রব্যসম্ভার : কার্পেট, চামড়ার জিনিস, সিল্ক, চীনামাটির বাসন, রঙীন-পাথর, পোষাক-পরিচ্ছদ, খেলনা, আরো কত কি!

খান-খালিল বাজারে কাক-খানাই বেশি। রেটুরেটের ছড়াছড়ি। টার্কিশ কফি আর পার্শিয়ান চা চেখে দেখবার স্বযোগ এখানেই। সৌখারিয়ে-র বাজারে টার্কিশ-ডিলাইট আশ্বাদন করবার জন্তেও অনেক ভোজন বিলাসীদের ভিড়।

স্ক-এন্ নাহাস্, স্ক-এন্-সগ্-হা-র বাজার যথাক্রমে লোহা, তামা, পিতলওলা এবং স্বর্ণশিল্পীদের হাতুড়ির আওয়াজে সরগরম। ঘুরিয়ে-বাজারে বিশ্বখ্যাত ইজিপ্সিয়ান কটন আর খান কাপড়ের বিরাট আড়ত।

সাগর-নগরের কয়েকজন নাগরিক ঘুরে-ফিরে দেখলেন যতটা পারলেন এবং নিজেদের মনিব্যাগের ভার কমিয়ে হাতের বা কাঁধের ব্যাগ করলেন ভারি। মিশর-বাজারের লক্ষ্মী এই সব বিদেশীরা। এদের পদধ্বনিতেই মিশরের ব্যবসা মহলে জেগে ওঠে সাড়া; বাজারে বাজারে দেখা দেয় চাকল্য।

মিশরের গা ঘোঁষে বয়ে চলেচে স্বেজ খাল। কাজেই বিদেশী জাহাজকে ছুঁয়ে যেতে হয়ই এই দেশটাকে। আর যাবার সময় দু'হাতে ছড়িয়ে দিয়ে যায় বৈদেশিক মুদ্রা, পরিবর্তে ঘরে নিয়ে যায় মিশরের স্মৃতি চিহ্ন—সুভোনির।

গাইড জানানো, এইবার বিদায় বেলা। দুপুরে হোটেলে লাঞ্চ খেয়ে উঠতে হবে ট্যাক্সিতে। তারপর কায়রো-স্বেজ পথ ধরে সোজা স্বেজ সহরে। 'বাতরি' ততকণে স্বেজখাল বেয়ে এসে পড়বে স্বেজ সহরের মুখে। তবে জাহাজ নোঙর করে না স্বেজ বন্দরে; অতি ধীরে ধীরে এগুতে থাকে। লঞ্চে করে উঠতে হয় চলতি জাহাজের ঝোলানো সিঁড়ি বেয়ে জাহাজের খোলের মধ্যে। অতএব—

এসব যে যাত্রীদের অজানা ছিলো, তা নয়। তবু কায়রোর বিচিত্র স্মরণ সহর দেখতে দেখতে কারোরই প্রাণ যাবার কথা মনে ছিলো না। তাছাড়া সঞ্চে যখন গাইড আছে, তখন যাবার তাড়া দেবার ভার তারই উপর থাক না কেন? আসলে ঘুম ভাঙাবার লোক থাকলে আরাম করেই ঘুমোনো যায়।

গাইড বললো, একটু তাড়াতাড়ি না করলে জাহাজ মিস্ করবার সম্ভাবনা।

জাহাজ মিস্! সবাই যেন হুঁসিয়ায় হলো। এই জাহাজ মিস্ আর ট্রেন মিস্ করার মধ্যে যে অনেক পার্থক্য!

কায়েরো-সুয়েজ পথটা কর্কশ, কঠোর, শুকনো। রক্ত মরুভূমির বুকে-চেরা কালো পীচের পথ! পথ আর পথ। দু'ধারে ধু-ধু করচে বালি আর পাথর, আগুনের হুকা-হাওয়া—মরু প্রান্তরের হাহাকার! বুঝি বিদেশীদের বিদায় দেওয়ার দীর্ঘশ্বাস!

হ হ করে চলেচে ট্যাক্সিগুলো। মার্কিনী হাওয়া-গাড়ি। যান্ত্রিক সভ্যতার অহমিকার অভিযান। উটের একদিনের পথ এক ঘণ্টায় পাড়ি দিচ্ছে। পৌছতে হবে সাগর পারে। ঠিক সময়েই পারবে তা!

যাত্রীদের মুখে কথা নেই। লাঞ্চার পর ভরা পেট আর ভারি মন নিয়ে তাঁরা ট্যাক্সিতে উঠেচেন। গদি হেলিয়ে বসে আছেন কেউ, কেউ বা এলিয়ে পড়েচেন ঘুমের ছোঁয়ায়। ধু-ধু করা মরুপথও যে দেখবার সে ধারণা থাকলেও, উৎসাহ নেই আর!

সুয়েজ বন্দর এসে গেলো।

ছোট্ট সहर। সুয়েজখালের পূর্ব মুখের গ্রহরী। খালের নামেই এত নাম। কিংবা এই সहरটুকুর নামেই খালের নাম! সে তর্কের প্রয়োজন নেই। স্বনামখ্যাত দু'জনই! নেমে জানা গেলো, 'বাতরী' এখনো আসেনি। ক্যানেল অফিস আরো জানালো, আসতে দেরি হবে। খালের মুখে জাহাজের ভিড়। ট্রাফিক্ জ্যাম্! এ তো কায়েরোর রাজপথ নয়, যে কান ঘেঁষে ওভারটেক করে বৌ করে বেরিয়ে যাবে! পর পর লাইন ধরে যেতে হবে। একটির পর একটি জাহাজ।

দলের সবাই হৈ-হৈ করে উঠলেন, এ কী রকম? আগে জানলে আমরা আরো কিছু সময় কায়েরোতে কাটিয়ে আসতে পারতাম!

গাইড বললো, আমরাই বা জানবো কেমন করে? এখনও জানি নে ঠিক কখন আসবে জাহাজ। আপনাদের এখন জাহাজে সেফ-ডেলিভারি দিতে পারলেই আমাদের ছুটি। অর্থাৎ আপনাদের সঙ্গে আমাদেরও এখন দুর্ভোগ ভুগতে হবে।

যাক। তবু ভালো। সবাকে ফেলে লোকটা পালাবে না। দুর্ভোগ

ভোগবার ভাগীদার পাওয়া গেলো। দেখে সবাই শাস্ত হলেন। একবার চেয়ে দেখলেন স্বয়েজখালের বিরাট চওড়া মুখের দিকে : নাঃ, 'বাতরি'র দেখা নেই।

জায়গাটি বড় মনোরম! জলের ধারটা শান বাঁধানো। তাতে ছায়া-ছায়া লাগতে নীল জলের ঢেউ। ধার দিয়ে বরাবর ঘাসের আন্তরণ। তারই উপর মাথা দূরত্বে ঝাড়িয়ে আছে পাম গাছের সারি। তার পাশে পাতা পীচের পালিশ পথ। পথের ওপাশে পাকা বাড়ি আর বাড়ি : ডাকঘর, অফিস, দোকান, গুদাম ইত্যাদি।

কাছেই সিনাই হোটেল।

গাইড বললো; আপনারা ইচ্ছে করলে ঐ হোটেলের লাউঞ্জে গিয়ে বিশ্রাম করতে পারেন। এজন্ডে কোন চার্জ দিতে হবে না, আমি ব্যবস্থা করে এসেছি। তবে রাজ্যে যদি থাকতে হয়, তবে ডিনার চার্জ লাগবে।

সত্যিই তো, বাড়তি একবেলা এতগুলো লোকের খাওয়াবার খরচ তো কম নয়! জাহাজ যদি ভিড়ে আটকে যায়, তাতে টুরিং কোম্পানীর কী দোষ! তবু তো থাকবার ভালো ব্যবস্থাই করেচেন ভদ্রলোক। অগত্যা প্রস্তাব মেনে নিলেন সবাই।

খবর পাওয়া গেলো, 'বাতরি' রাত বারোটার আগে পৌঁছবে না।

কাছেই ফাঁক বুকে সানিয়াল, ডাঃ সেন, কে-জি, শা এবং আরো আট-দশজন চললেন মাইলখানেক দূরে স্বয়েজ শহর দেখতে। ফার্স্ট ক্লাসের যাত্রী স্বামী জ্ঞানানন্দ, মিসেস হোর তাছাড়া মিঃ আর মিসেস গ্র্যাটন এবং আরো কয়েকজন হোটেলের লাউঞ্জে বসে থাকাই স্থির করলেন। হয়তো ভাবলেন, কী জানি, যদি জাহাজ চলে যায়!

স্বয়েজ শহরটা ছোট্ট। তবে দু'তিনটে সিনেমা আছে, বাজার আছে, ছোট-বড় বাড়ি আছে, চওড়া সরু রাস্তা আছে—অর্থাৎ শহরে হতে হলে যা-যা থাকা দরকার—সবই আছে। ইয়া, মোটর গাড়িও আছে। তাছাড়া আছে জগৎজোড়া নাম। সেটা কম কথা নয়। এই স্বয়েজ শহরের চাইতে কত তো বড় বড় সহর আছে এই দুনিয়ায়—কিন্তু এমন এক ফোটা শহরের বিশ্বব্যাপী নাম আছে কারোর? স্বয়েজ খালের 'খালিক' এই শহরটা।

শহরের কোট-পাট আর আলখাল্লা পরা লোকগুলোর ভারি অহংকার ঐ এক ফালি খালের জন্তে !

শহর দেখে এবং কেক-বিস্কুট, কফি-কলা দিয়ে ডিনার সেরে সন্ধ্যার পরে ফিরলেন সবাই। ষাক, জাহাজ মিস্ করলেন না তাঁরা। লাউঞ্জে বসে হাত-পা নেড়ে শুরু করলেন গল্প। লাউঞ্জে-বসা আর সবায়ের নমো-নমো ডিনার সারা হয়ে গেছে হোটেলের। তাঁরা আঁতাতা হলেন শহর-ঘোরা বক্তাদের। এই তো নিয়ম : নো রিস্ক নো গেন্। যারা কপাল ঠুঁকে বেরিয়ে গেছিলেন, তাঁরা তাল ঠুঁকে শুরু করলেন গল্প।

কে-জির সঙ্গে মিসেস হোরের গল্প হচ্ছেলো। হোটেলের বয়কে দিয়ে দু'কাপ কফিও আনানো হয়েছে !

কথায়-কথায় মিসেস হোর বললেন, আপনার সঙ্গে, মি: গস্, আলাপ হয়ে ভারি আনন্দিত হলাম।

কে-জি বললেন, আমিও !

মিসেস হোর বললেন, আমি ইণ্ডিয়ানদের অত্যন্ত শ্রদ্ধা করি। অমন ইনটেলিজেন্ট পিপল হোল্ড'ওয়াল্ড্ আর আছে কিনা সন্দেহ।

কে-জি বললেন হেসে, থ্যাংক্ মিসেস—

হোর ! মিসেস বললেন, আমার নাম মিসেস টি. ডবলিউ. হোর। আমি স্ট্রার স্ট্রামুয়েল হোর-এর রেলটিভ।

কে-জি বললেন, স্ট্রার স্ট্রামুয়েল হোর-এর নাম ইণ্ডিয়ান অত্যন্ত সুপরিচিত। আপনার সঙ্গে পরিচিত হয়ে আমি গৌরব বোধ করছি।

ও, নো নো ! মিসেস হোর তাড়াতাড়ি বললেন, আমি এমন কিছু নই মি: গস্। আমি সাধারণ মহিলা মাত্র। যাচ্ছি দেলহী আমার বান্ধবীর আমন্ত্রণে। সেখান থেকে ইচ্ছে আছে লর্ড কৃষ্ণার বার্থ প্লেস এবং কুরুক্ষেত্র। ব্যাটলফিল্ড দেখবার।

একটি বনেদী নীলরক্তের ইংরেজ মহিলার মুখে কৃষ্ণ ও কুরুক্ষেত্রের কথা শুনে কে-জি যুগপৎ বিস্মিত ও পুলকিত হলেন : আপনি বলেন কি মিসেস হোর ! আর ইউ রিয়েলি ইণ্টারেস্টেড্ ইন আওয়ার লর্ড কৃষ্ণ এণ্ড কুরুক্ষেত্র ?

মিসেস হোর বললেন, ইয়েস মাই ফ্রেন্ড, আই অ্যাম !

এমর সময়ে সেখানে ডাঃ সেন আসতেই কে-জি বললেন, ওহে, তোমাদের মকেল দু'জনকে এই টেবিলে ডাকো না ?

কাদের কথা বলচো ?

ঐ যে বসে আছেন মিঃ এবং মিসেস গ্র্যাটন, বই পড়ছেন। আমাদের দেশ আর ধর্মের বিষয়ে তাঁদের যে ধারণার কথা বলছিলে সেদিন, এই ইংরেজ মহিলার মুখে অন্তরকম শুনলে ধারণাটা বদলে যেতে পারে।—কে-জি পরিচয় করিয়ে দিলেন : মিসেস টি. ডবলিউ হোর, ডাঃ এম. বি সেন—মহাবিশ্ব সেন।

বিশ্ব ! এনাদার নেম অব লর্ড কৃষ্ণ ! ইজন্ট ইট ?

রাইট ইউ আর !

ডাঃ সেন বললেন, জাস্ট এ মিনিট, মিসেস হোর। আমার পরিচিত ঐ ইংলিশ কাপ্ল মিঃ অ্যাণ্ড মিসেস গ্র্যাটনকে এখানে ডেকে আনি ! আই থিংক ইউ উইল বি গ্যাড টু মীট্ দেম্ !

ডাঃ সেন গ্যাটন-দম্পতিকে ডেকে এনে পাশের ছু'টো চেয়ার টেনে বসালেন। কে-জি তাঁদের আলাপ করিয়ে দিলেন মিসেস হোরের সঙ্গে। অর্ডার হলো আরো তিন কাপ কফির।

ডাঃ সেন বললেন গ্র্যাটন-দম্পতিকে : মিসেস হোর হিন্দু রিলিজিয়ানের বিষয়ে অনেক কিছুই জানেন এবং ইণ্ডিয়ান গিয়ে—

মিসেস হোর তাড়াতাড়ি বললেন, ও নো, আমি হিণ্ডু রিলিজিয়ানের বিষয়ে তেমন কিছুই জানিনে। তবে চেষ্টা করছি জানবার। আমার ঘোলা বছর বয়েস যখন তখন থেকেই ডেলি 'গীটা' পাঠ করছি, অবশ্য ইংলিশ ভাষানে !

কে-জি জিগোস করলেন, ডেলি পড়ছেন ?

ইয়েস। আজ মর্নিং এও পড়েছি। আমার বয়েস এখন ওভার ফিফটি, কিন্তু মনে পড়ে না, একদিনও গীটা-পাঠ বাদ দিয়েছি।

মিসেস গ্র্যাটন বললেন, রিয়েলি ভেরি ইন্টারেস্টিং !

মিসেস হোর বললেন মিসেস গ্র্যাটনকে : তার কারণ হচ্ছে, ঐ ছোট্ট বইখানি পড়ে আমি অসীম তৃপ্তি পাই। আমার পাঁচটি ছেলে মেয়ের মধ্যে এখন মাত্র একটি ছেলে বেঁচে আছে। শীঘ্রই তার অভ্যর্থনায় হবার চান্স

আছে। স্বামীকেও হারিয়েচি বেশ কয়েকবছর আগে—কিন্তু ঐ ছোট্ট বইখানি গীটা-র উপদেশ মনে গেঁথে থাকায় শোকে মূশড়ে পড়িনি কোনদিন।

মিসেস গ্র্যাটন আশ্চর্য হয়ে জিগোস করলেন, কী এমন আছে ঐ গীটার জানতে পারি কি ?

তুনে মিসেস হোর মুহূ হাসলেন। সে কি এখনই, এতটুকু সময়ে বলা যায় মিসেস গ্র্যাটন ! আমি তো সারা জীবন ধরে পড়লাম, পড়চি—তবু যেন প্রতিবারেই নতুন হয়ে, নতুন ভাবে ভেসে ওঠে আমার মনে। গীটা-র যত রকম ইংলিশ ভাষনে এক্সপ্ল্যানেশন আমি পেয়েচি, তা কিনেচি আর পড়েচি। ইণ্ডিয়াতে গিয়ে আরো কোন ভাষনে পেলেন কিনবো হচ্ছে আছে।

মিসেস গ্র্যাটন বললেন, সত্যিই মিসেস হোর, ইউ আর রাইট। আমি এক লাফেই স্বর্গে উঠতে চেয়েছিলাম। আমি বসে গিয়ে গীটা কিনে পড়বার চেষ্টা করবো।

মিসেস হোর বললেন, ইয়েস, গ্যাটস রাইট মিসেস গ্র্যাটন। পড়ে দেখবেন অপূর্ব মাদুখ, অপূর্ব রস, অপূর্ব ভাব, অপূর্ব ভাষা। পড়তে পড়তে নিজেকে ভুলে যেতে হয়। এই ওয়ার্ল্ডকে ভুলে যেতে হয়। আমাকে নেবাররা বলতো, তুমি যে এত শোক পেলে, তবু ভেঙে পড়োনি তো ? তেমনি খাচ্চো, দাচ্চো, হাসচো, বেড়াচ্চো ? আমি তাদের আমার ছোট্ট গীটাখানি বার করে দেখিয়ে বলতাম, সবই এই বইখানির কৃতিত্ব। তারা বুঝতে পারতো কিনা কে জানে, আমার মুখের দিকে হাঁ করে চেয়ে থাকত্বো ! মিসেস গ্র্যাটন, আপনি গীটা পড়বার চেষ্টা করবেন জেনে ভারি খুশি হলাম। পড়বেন, দেখবেন এই ওয়ার্ল্ডের কোনরকম ট্রাবলসই আপনাকে দমিয়ে দিতে পারবে না। মনে পাবেন ডিভাইন পীস—শাষ্টি।

খ্যাংকু মিসেস হোর ! মিসেস গ্র্যাটন বললেন।

মিঃ গ্র্যাটন এতক্ষণ গালে হাত দিয়ে সব শুনছিলেন। হয়তো ভাবছিলেন, গিগ্লি ‘হিগু’ হয়ে যাবেন না তো ! লগুনে রামকৃষ্ণ-মিশনে ছ’চারজন গেকুয়া-পরা ইংলিস লেডিজও তিনি দেখেননি যে তাও নয়।

ডাঃ সেন ভাবছিলেন, যাক, নিজেকে জাত-বহিনের মুখ থেকে গীতার কথা শোনার ভালোই হলো।

আর কে-জি ভাবছিলেন, ছি, ছি, একজন বিদেশী মহিলা গীতা এমন করে পড়ছেন আর পড়ছেন; অথচ নিজে তিনি একবারও পুরো গীতখানি পড়েননি এতটা ব্যয়েসেও। নাঃ, এবার কলকাতায় গিয়ে অন্তত গীতার বাংলা অনুবাদটা পড়ে বোঝবার চেষ্টা করবেন। ভাবটা : ‘হে ভারত, ভাঙারে তব বিবিধ রতন; তা সব (অবোধ আমি) অবহেলা করি, পর-ধন-লোভে-মস্ত করিহু ভ্রমণ পরদেশে, ভিক্ষাবৃত্তি কৃষ্ণে আচরি’!

নাঃ, ‘বাতরি’র দেখা নেই!

সাগর-নগর কি সাগর সীতরে এসে শেষকালে খালে ডুবে মরলো! নাকি, অকূলে গেলো ভেসে? জনকয়েক নাগরিকদের কথা ভুলে গেলো নাকি সাগর-নগর!

রাত্রের নিস্তব্ধতা নেমে এসেচে। নেমে এসেচে হাঙ্কা অঁধার। সারা আকাশে চুমকি-তারা। বাতাসে শীতের আমেজ।

রাত্রি দশটা, এগারোটা, বারোটা—একটা বাজালো। গাইড মাঝে মাঝে ফোনে খবর নিচ্ছে কোম্পানীর অফিসে : না, এখনো দেরি আছে! বোধহয় কাল সকালের দিকে ‘বাতরি’ আসবে স্নেহেজ খালের এমুখে। উপায় কি? প্রতীক্ষায় থাকা ছাড়া উপায় নেই। এ তো মাটির নগর নয়, যে, নাগরিকরা পায়ে হেঁটে পৌঁছুবে সেখানে। সাগর-নগরের সবই উন্টো। এক্ষেত্রে সাগর-নগর এগিয়ে আসবে, ভেসে আসবে নাগরিকদের কাছে, তবেই তো! এখানে পৌঁছুবার ভার সাগর-নগরের, নাগরিকদের নয়।

তাই হোটেলের লাউঞ্জের সোফায়, চেয়ারে নাগরিকের দল এলিয়ে-মেলিয়ে, কেউবা গুড়িগুড়ি মেরে বসে আছেন। কেউ চুলচেন, কেউ বই পড়ছেন, কেউ বা নীচু গলায় শুরু করেছেন গল্প। এমনি করেই বোধকরি সাগর-নগর থেকে বিচ্ছিন্ন দলটিকে সহরের এই হোটেলে রাত কাটাতে হবে।

তবু কেউ-কেউ বাইরে এসে ঘুরতে লাগলেন। হৃদয়ের চাঞ্চল্য তাঁদের পায়ে এসে ঠেকচে যেন। ছ’পা তাই অশান্ত।

স্বামী জ্ঞানানন্দ, কে-জি, রামস্বামী সানিয়াল লাউঞ্জ থেকে বাইরে এলেন

বেরিয়ে। ডিলে পায়ে হাঁটতে হাঁটতে গেলেন স্নেহ খালটার দিকে। ফিকে আঁধারে স্নেহ খালের নীলজল কালচে হয়ে গেছে। পারের সারি সারি গাছগুলো চূপ করে দাঁড়িয়ে আছে। গ্রহরী।

আর যা দৃশ্য চোখে পড়লো তা অভূতপূর্ব! এই গভীর রাত্রে এই খালের ধারে না এলে সত্যিই তা অদেখাই থেকে যেতো। এক এক করে জাহাজ বেরুচ্ছে খাল থেকে—কোনটা মালের জাহাজ, কোনটা তেলের জাহাজ, কোনটা বা যাত্রী জাহাজ। তাদের সার্চ লাইটের অতি উজ্জ্বল আলোয় তৈরি হচ্ছে একটি বিরাট লম্বা রূপোলী ফালি পথ। আর সেই আলোর পথ বেয়ে উড়ে চলেচে অসংখ্য সী-গাল পাখি। হয়তো ভেবেচে দিনের আলো। আহা, যেন সাদা সিঙ্কের শাড়ির গায়ে সাদা জরির ফুল। অথবা পাখিগুলি বুঝি পথ দেখিয়ে নিয়ে যাচ্ছে জাহাজটাকে : এসো, এসো, এই পথে। জলপথের শোভাযাত্রায় রথের আগে রশি ধরার দল।

চোখ ভরে দেখতে লাগলেন সবাই। একটার পর একটা, একই দৃশ্য! তবু বিচित्र। খালের ধারে ঘাসের উপর বসে পড়লেন সবাই : সত্যিই, কী অপূর্ব দৃশ্য! রাত্রের অন্ধকার নাকি পৈশাচিকদেরই রাজত্ব! না, না। কত স্বর্গীয় দৃশ্য বুঝি এমনি করেই নিজা-ঢাকা চোখের আড়ালে অদৃশ্য হয়ে যায়, কে জানে!

স্নেহখালে স্নেহ উঠলো।

কাল্চে খাল, লাল হলো। পরে নীল হলো আবার। খবর এলো, ‘বাতরি’ এবার এসে গেছে অনেক কাছে। ক্ষণে-ক্ষণের প্রতীক্ষার শেষকণ দিলো দেখা। হাসি দেখা দিলো সাগর-নাগরিকদের মুখে। তাদের ‘নগর’ আর দূরে নয়!

সবাই প্রস্তুত। লঞ্চ এসে ঠেকলো তীরে। উঠলেন সবাই। ভট্‌ভট্‌ করে লঞ্চ চললো খালের বিশাল চওড়া মুখে মাঝ-দরিয়ায়।

ঐ যে! ঐ যে তেলের জাহাজখানার পরেই। সাদা রংয়ের। ঐ তো চোঙ-এ চিহ্ন! ‘বাতরি’র প্রতীক! ‘বাতরি’ তো নয়, যেন খেতপদ্ম ভেসে আসচে!

ক্রমেই কাছে এলো ‘বাতরি’। দূরের এতটুকু খেতপদ্ম কাছে এসে

বিরাট উঁচু লোহনগরী হয়ে গেলো। হইসল দিলো লঞ্চ : ওগো, এই
ষে আমরা!

হইসলে উত্তর দিলো 'বাতরি' : দেখেচি, এসো তোমরা।

স্পীড আরো কমিয়ে দিলো 'বাতরি'। তার গা বেয়ে ঝুলচে লোহার
সিঁড়ি। লঞ্চ গিয়ে ডিড়লো সিঁড়ির শেষে। বেঁধে ফেললো নিজেকে ঐ
লোহার সিঁড়ির সঙ্গে।

নাও প্লীজ গেট আপ ওয়ান-বাই-ওয়ান। শুড'বাই।

গাইডের সঙ্গে হাও-শেক সেরে চলমান জাহাজের লোহার সিঁড়ি বেয়ে
সবাই উঠতে লাগলেন একের পর এক।

বাঁধন খুলে দিয়ে হইসল দিলো লঞ্চ : উঠেচে সবাই। যাও। শুডবাই,
বাতরি।

সাগর-নগর তার নাগরিকদের নিজের কোলে টেনে নিয়ে স্পীড দিলো
বাড়িয়ে। মাটির সহর পড়ে রইলো পেছনে।

রেজা, আলি, ডাঃ রয়, চ্যাটার্জি, মিটার অনেকেই এসে জড়ো হলেন
মিশরের তীর্থ-ফেরত যাত্রীদের কাছে : কী রকম আটকে গেছিলেন সব ?

কেন ? কী হয়েছিলো ? এত দেরি হলো যে ! মিশর-ফেরতাদের প্রশ্ন।

আর কী ? ট্রাফিক জামড। তা, কী করলেন সব ?

সুয়েজ শহর ঘুরে বেড়ালাম।

বেশ, বেশ।

তারপর সব খবর ভালো তো ? অর্থাৎ সাগর-নগরের কোন নতুন
খবর আছে নাকি ? বিদেশ থেকে ঘুরে এসে বাড়ির খবর, পাড়ার খবর
নেওয়াই তো নিয়ম !

রেজা বললেন, কে-জিদ্দা, সে এক মজার ব্যাপার। কাল রাত্রে ঘটনা।

ঘটনাটা সবিস্তারে বলবার আগেই সেখানে এসে জমলেন সানিয়াল আর
ডাঃ সেন।

কী ব্যাপার ?

রেজা হাসতে লাগলেন : উ, এখনো ভাবতে গেলে হাসি পায়। আমাদের
কেবিনে লোয়ার বার্থে মিঃ পরকাশ নামে এক ভ্রমলোক থাকেন। দেখেচেন

বোধহয়, মোটা মত, বেঁটে মত ভদ্রলোক, মাথায় টাক। স্কটল্যান্ডে গেছিলেন
যেন কী করতে।

হ্যা, তারপর ?

রেজা বললেন, ভদ্রলোকের মাথায় টাক আর বেশ টকেটিড, তাই আমরা
মানে আর তিনজন ক্রমমেট ওঁর নাম রেখেছি, টোকিও !

গুড্ ! সানিয়াল পিঠ চাপড়ে দিলেন রেজার।

কাল রাত্রে ড্যান্সিং হল থেকে ফিরে কেবিনে আসবার সময় দেখে এলাম,
টোকিও একটি লম্বা ভদ্রলোকের সঙ্গে এক টেবিলে বসে খুব মদ গিলছেন।
আমি দাঁতটা ব্রাশ করে সবে শুতে যাবো, এমন সময় টোকিও কেবিনের
দরজা খড়ম্ করে খুলে হস্তদস্ত হয়ে ঢুকেই দরজা দিলেন বন্ধ করে। দিয়েই
দরজায় পিঠ দিয়ে দাঁড়ালেন। উস্কা-খুস্কা চুল। চোখ দুটো লাল। ঠেলে
বেরিয়ে আসচে যেন। আর—আর—রেজা হাসতে লাগলেন আবার।

রেজাকে ঠেলা দিলেন কে-জি : আরে বলো না ছাই—

দেখলাম টোকিওর গলায় ক্লুচে মেয়েদের ব্রাশায়ার, না, বডিস—ঐ যে
কী ছাই বলে—

বলো কী ! ডাঃ সেন বললেন।

সানিয়াল উন্মুগ্ন হলেন, কোন লট-ঘট ঘটনা ?

কে-জি বললেন, হতে পারে। তা বলে—

শুনই আগে ব্যাপারটা !

বলো, বলো, পেট আমাদের ফুলচে।

রেজা বললেন, আমি তো তাঁকে টেনে এনে বিছানায় বসলাম। আমাদের
একজন দরজা দিলে^১ লক করে !

হোয়াটস্ ম্যাটার গিঃ পরকাশ ? জিগ্যোস করলাম। আমার ক্রমমেট
নাইয়ার তাঁর গলা থেকে ব্রাশায়ারটা খুলে নিয়ে জিগ্যোস করলো, গলায় এটা
পরেচেন কেন ?

ঐ মেয়েলী বস্তুটি দেখে টোকিও প্রায় সাপ দেখার মত আঁতকে উঠলেন,
আঁ, ওটা নিশ্চয়ই ঐ কেবিনের মেয়েটির ! কী হবে ! সর্বনাশ !

আহা-হা। ব্যাপারটা কি বলুন না ?

টোকিও বললেন, আস্তে, আস্তে। চুপ। শুনতে পাবে কেউ !

মেয়েটি এই কেবিন জানে ?

তা জানে না বোধহয় । টোকিও হিন্দি ইংরিজি মিশিয়ে বলতে শুরু করলেন, কেয়া তাজব কী বাত্ ! রিয়েলি অ'ফুল । মানে, আজ একটু ভোজ্য বোধহয় বেশি হয়ে গেছলো । তাই দেওয়াল ধরে ধরে নিজের এই কেবিন ভেবে একটা কেবিনে ঢুকে দেখি প্রথম অন্ধকার । কোণের ডিম্ আলোটা জ্বলচে শুধু । ভাবলাম, আপলোগ আভিতক নাহি আয়া—কিয়া, নিদ্ গিয়া । আমি আমার মাফলারটা টেবিলে রেখে জুতো মোজা খুলবো বলে লোয়ার বার্শে বসতে গিয়ে দেখি কে যেন শুয়ে, ক'র ঘাড়ে গিয়ে বসেচি ! সেও আমার চাপে ধড়মড় করে উঠে বসেচে : হ ইজ্ চাট্ ! দেখি, একটি তরুণী । মাই গ্যাড্ । আমার নেশা গেলো চট্কে ! তাড়াতাড়ি হাতের কাছে মাফলারটা নিতে গিয়ে এখন দেখচি, তার ত্রাশায়ার কাঁধে ফেলেই ছুট্ দিয়েচি !

বললাম আমরা, তা এমন হলো কেমন করে ?

টোকিও বললেন, এখন বুঝ্চি, এই সি-ডেকে না নেমে ডি-ডেকে এই ধরনের একটা কেবিনে ঢুকে পড়েছিলাম ! নেশার ঝোঁকে বুঝতে পারিনি অতটা ! লেकिन, আভি কেয়া হোগা !

বললাম আমরা, কেয়া আবার হোগা ? নিদ্ ঘাইয়ে !

নাইয়ার বললেন, ভয় নেই । আমি খুব ভোরে বেরিয়ে এই ত্রাশায়ারটা কাগজে মুড়ে লাউজের টেবিলে রেখে আসবো । যার জিনিস, সে নিয়ে যাবে ।

না, না, তাতে লোক জানাজানি হবে । হৈ চৈ পড়বে । টোকিও বললেন, ওর চাইতে 'সী'তে ফেলে দেওয়াই ভালো ।

বেশ, তাই করা যাবে ।

রেজা বললো, আজ ভোরে সেই ত্রাশায়ারের সলিল সমাধি হয়েছে ।

হিসেবি কে-জি বললেন, কিন্তু মাফলারটা ?

হয়তো মেয়েটা তার স্ট্রাটকেসে পুরেচে । মাফলারটা নাকি দামি ।

ডাঃ সেন বললেন, খুব মজার ব্যাপার তো ?

সানিয়াল জিগোস করলেন, আর কি খবর বলো ? শাড়ি-দাড়ির খবর কি ?

রিপোর্টার রেজা হেসে বললেন, তাঁরা যথারীতি গলি-ঘুঁজি আর আনাচে-কানাচে ঘুরছেন !

জন ?

তিনিও নিয়মিত রাজহংসীর হাতে খাচ্ছেন চুহু আর বার-এ খাচ্ছেন হুয়া ।
বড়াই-রাফিক ?

ফিকে ! ফিকে করে হাসলো রেজা ।

আর, আর, হ্যা—মনে পড়লো সানিয়ালের : এলিস এবং ড্যাংগুলি ?

তারা এখনো খেলায় মত্ত ।

বেশ ! বেশ ! লীলে-খেলা সব ঠিক মতই চলচে তবে ! সানিয়াল
রেজার পিঠ আবার চাপড়ে বললেন, ব্রাদার, ইণ্ডিয়ায় গিয়ে আমি তোমাকে
স্পাই-বিভাগের হেড বানিয়ে দেবো ।

রেজা বললেন, সেজ্ঞে এখনই হেড-এক দেখা দিলো নাকি ? স্টারিডন দেবো ?

এমন সময় রামস্বামী এসে উপস্থিত সেখানে ।

বললেন, ন্যাও লিশ্ন । আমাদের কেবিনের নিউইয়র্ক-হকের কাণ্ড
শোনো ।

কী ?

আমরা তিনজনই পোর্টসৈয়দে নেমে যাওয়ায় খালি কেবিন পেয়ে হক
নাকি মিস রীডকে কেবিনে নিয়ে গেছলো ।

বলো কি ? কে-জি বললেন ।

অত্নায় । খুব অত্নায় । ডাঃ সেন বললেন, কার কাছে শুনলে তুমি ?

সানিয়াল ফোড়ন কাটলেন, বাহবা, বাহবা ।

রামস্বামী বললেন, চ্যাটার্জি আমায় ডেকে বললে । সে নিজে চোখে
দেখেচে আমাদের কেবিন থেকে মিস রীডকে বেরিয়ে যেতে, পরন্তু রাজ্জে ।
সিনেমা হচ্ছিলো তখন ।

তা, হককে চ্যাটার্জি বললো না কিছু ?

রামস্বামী বললেন, আমিও বললাম চ্যাটার্জিকে । চ্যাটার্জি বললে, আমি
কী বলবো বলো ? হয়তো বলতো, আমার কেবিনে আমি নিয়ে গেছি,
তোমার তাতে কি ?

ঠিক, ঠিক । সানিয়াল মাথা নাড়লেন ।

ডাঃ সেন বললেন, হেড টুয়ার্ডকে এ বিষয়ে কমপ্লেন করা দরকার ।

কিস্ত সাক্ষী আছে ? প্রমাণ আছে ? রেজা বললেন ।

কেন, চ্যাটার্জি সাক্ষী দেবে ? ডাঃ সেন বললেন।

কিন্তু তার কথাই যে সত্যি তার প্রমাণ কি ? মিথ্যে করেও তো লাগাতে পারে ? কে-জি বললেন পাইপে টান দিয়ে : কিছুই হবে না। মাঝখান থেকে নিজেদের কেলেঙ্কারি বাইরে প্রচার হবে। চ্যাটার্জি যদি হাতে-নাতে ধরতে পারতো, তবে একটা উপায় হতো যা হোক।

মন্স্কোর রামস্বামী বললেন, নিউইয়র্ক আর কত ভালো হবে !

সানিয়াল হেসে বললেন, ছ্যা, ছ্যা !

‘বাতরি’ এখন রেড-সী বা লোহিত সাগরের নীল জল কেটে চলেচে পুন্ড্রের দিকে।

আবহাওয়া গেচে বদলে।

ইয়োরোপের হিমেল হাওয়া তার শেষ সীমা পর্যন্ত এসে সাগর-নগরকে ‘সী-অফ’ করে বিদায় নিয়েচে। এসিয়ার গরম হাওয়া জানালো স্বাগতম ! উষ্ণ অভ্যর্থনা !

সাগর-নগরের হাল-চালও গেলো বদলে।

নাগরিকরা গরম জামা-কাপড় খুলে পুরলো স্মার্টকেসে। পরলো স্মৃতির পোষাক।

সন্ধ্যাবেলায় ডেক চেয়ারগুলো আর সহজে খালি হয় না। রাত্রে সিনেমা দেখানো শুরু হলো খোলা ডেকে। কেবিনের বিছানাগুলো অনেক রাত পর্যন্ত খালিই থাকে পড়ে।

কে কোথায় থাকে, কার সঙ্গে থাকে, কে জানে ! কে কার খোঁজ রাখে ! রাখে, যার রাখবার দরকার। সারা দুপুরটা কেউ প্রায় গরম ডেকে পা দেয়নি। হয় কেবিনে, না হয় লাউঞ্জে সময় কাটিয়েচে। বার-এও যথারীতি ভিড় ! উত্তরে সৌদী আরব, দক্ষিণে আফ্রিকা—আকাশে বাতাসে গরম বালির হুঙ্কার : সূর্যের রাজত্ব। কে যাবে সখ করে ভাজা-পোড়া ডেকে ? এতদিন শীতে দুপুরে ছিলো ডেক ভর্তি, রাত্রে ছিলো ফাঁকা ! এখন গরমে, উন্টে গেচে কুটন !

সন্ধ্যায় শ্রাম আলি, তার বিলিভী বিবি ডরোথী আর তাদের ছেলেমেয়ের গাল প্রায় গোটা পাঁচেক ডেক চেয়ার দখল করে আছে। জন, এলবার্ট,

পামেলা, হেনরি আর কুচোরা ডেকচেয়ারগুলো একবার এদিকে টানচে, একবার ওদিকে। মেজাজ তাদের হয়েছে খিটখিটে। জল, জল, জল, দেখে দেখে চিন্তা 'সব' হয়েছে বিকল। বাচ্চাদের তাই আর ভালো লাগচে না।

মিস মুন্ডেশ্বর, মিসেস মুন্ডেশ্বর পাশাপাশি ছ'খানা ডেক-চেয়ারে শুয়ে। মিষ্টারের ঠোটে সিগ্রেট, মিসেসের হাতে উল আর কাঁটা। পুলগভারটা শেষ হতে আর দেয় নেই। দু'তিন দিনের মধ্যেই শেষ হবে। ইভা কাছে নেই। সে লাউঞ্জে বসে মিসেস ডাট বা দস্তের সঙ্গে ডোমিনো খেলায় মস্ত।

দুঃখ শোক মাহুঘের জীবনে আসে, তবে বাঁচোয়া, স্থায়ী আসন পেতে বসে না। জীবনে বড় ভিড়। ঘটনার পর ঘটনা ঘটবে বলে ঘটনারা 'কিউ' করে দাঁড়িয়ে অপেক্ষা করতে থাকে। কোন একটা কিছুকে নিয়ে নাচবার বা নাচাবার সময় নেই, উপায় নেই। তা সে দুঃখেরই হোক, স্নেহেরই হোক। মিসেস দস্তের যে ক্ষতি, যে দুঃখ—তা সহজে ভোলবার নয়। তা বলে, সেই দুঃখটুকু আঁকড়ে ধরে হা-হতাশ আর কতদিন করা যায়! তাই তিনি কান্না বন্ধ রেখে, বন্ধ ঘর থেকে এসেছেন বাইরে। মৌনতা ভঙ্গ করে মিস ইলিয়টের সঙ্গে শুরু করেছেন গল্প। আর ক'দিন হলো ইভার পাল্লায় পড়ে শুরু করেছেন ডোমিনো খেলা। মিসেস দস্ত হয়েছে ইভার আঁটি! কাজেই বোনঝিটির আদ্যার তাঁকে শুনতেই হচ্ছে।

মিস ইলিয়ট তাঁর আগাথা ক্রিস্টির ক্রাইম নভেলখানার প্রায় শেষ কয়েক পাতায় এসে পড়েছেন। কাজেই নিজের কেবিনের বাথেরই শায়িতা! খুনী কে এখনো ঠিক ধরা যাচ্ছে না। আর গোয়েন্দা যে পৰ্যন্ত না ধরতে পারছে, সে পৰ্যন্ত মুখে বই ধরে রাখা ছাড়া আর উপায় কি? মিস ইলিয়ট নিরুপায়!

অবশ্য বই পড়তে উইলহেলম এইটেল-ও। লাউঞ্জে একটি সোফায় বসেচে সে। হাতে 'ইয়োগা' শেখবার বইখানা। ইণ্ডিয়ান ঘাবার আগে বইখানা আর একবার ভালো করে পড়ে নেওয়া দরকার।

উপরে বোট ডেকে লতিফ আর তার শপ-গার্ল বোঁ এমা ব্রাউন একটা অঙ্ককার কোণে ঘনিষ্ঠতম হয়ে রেলিং ধরে দাঁড়িয়ে। এমার পরণে স্কাট। এই গরমে ঐ সর্বাঙ্গ মোড়া সালোয়ার-পায়জামা আর মাথায় ওড়না ব্যবহার করা যায় নাকি? ড্যাম ইট। অবশ্য, লতিফ কোন আপত্তি করেনি। আর

করলেই হলো ! এ তো আর বেশি বিবি নয় ! ধান্ বিলিভী । বেশি কিছু বললে করাচীতে নেমেই আবার রিটার্ন টিকিট কেটে বসবে হোম-এ যাবার জন্তে !

মিষ্টান্ন খীলন একটি ডেক চেয়ারে ঘূমে অচেতন । আর তাঁর নাচিয়ে জীটি ডেকের আর এক কোণে মিসেস হারমান, মানে, রাজহংসীর সঙ্গে পাশ্চাত্য সঙ্গীত ও ভারতীয় নৃত্যকলা নিয়ে গভীর আলোচনায় মগ্ন । অবশ্য, পাশ্চাত্য বাস্তবের তালে ভারতীয় নৃত্য চালু করা যায় কিনা—সে রকম কোন অসম্ভব আলোচনা চলচে না নিশ্চয়ই ।

মিসেস কিরণমী বড়াই করাচীর কাষ্টম হাউসের বেড়া অনায়াসে পার হবার আশায় রাফিককে খোশামত করা আপাতত বন্ধ রেখে, ডেকের ব্লান আলোতেই একটা বাংলা উপন্যাস খুলে বসেচেন । উপন্যাসখানা কে-জির লেখা : ‘ভাঙাগড়া’ ! রেজা তাঁর কে-জিদার কাছ থেকে চেয়ে নিয়েছিলেন পড়তে । লাউঞ্জে বসে রেজাকে বাংলা বই পড়তে দেখে, মিসেস বড়াই নিজেই গিয়ে আলাপ করে বইখানা বায়না দিয়ে রেখেছিলেন, রেজার পড়া হয়ে গেলেই বইখানা ঘেন তিনি পান । পড়ার পর রেজা মিসেস বড়াইকে খুঁজে বার করেই বইখানা দিয়েছিলেন । শুধু তাই নয়, একদিন মিসেস বড়াইয়ের সঙ্গে তাঁর কে-জিদার আলাপও করিয়ে দিলেন ।

মিসেস বড়াই কে-জিকে বললেন, আপনি ? আপনার নাম শুনেচি, বই পড়লাম । এমনভাবে এখানে দেখা হবে, ভাবতেও পারিনি ।

কে-জি হেসে বললেন, আর্থ ইজ রাউণ্ড । দেখা হবে না, কেন ভেবে নিয়েছিলেন, বুঝলাম না ।

মিসেস বড়াই বললেন, তা বটে ।

সালিম হক আর মিস রীড যথারীতি বার-এ বসে । সামনের টেবিলে হুইস্কি, সোডা । হক আজকাল ঘনঘন নেকটাই বদলাচ্ছেন । তাঁর ক্রমমেটরা, মানে রামস্বামী, ডাঃ সেন, কে-জি, কেউই অবশ্য তাঁকে খালি কেবিনে তাঁর এবং মিস রীড-এর ব্যাপার নিয়ে জেরা করেননি । তবে তিনজনই সেই থেকে হকের সঙ্গে আর কথাও বলেননি । একই ঘরে, হক সেই থেকে একঘরে । বাট হু কেমাস ! রাত দু’টোয় কেবিনে শুতে এসে পরদিন বেলা

বারোটায় ঘুম থেকে উঠে বাকি সময়টা বাইরে কোন বান্ধবীর সঙ্গে কাটালে
কমমেটের সঙ্গে নাই বা থাকলো সম্পর্ক ! একটা বান্ধবীর সঙ্গে দশটা বন্ধুরও
তুলনা হয় না ।

গ্যাংগুলি আর এলিস আপাতত বেশ উচ্চস্বরে বিচরণ করছেন । দু'জনে
পাশাপাশি দুটি ডেক চেয়ারে শুয়ে কালো আকাশের দিকে চেয়ে আছেন ।
না, তারা গুনছেন না তাঁরা । রবীন্দ্রনাথের বহু কবিতা গ্যাংগুলির মুখস্থ ।
এলিসের হাতে হাত রেখে তারই একটি আবৃত্তি করলেন :

'আমরা দুজনা স্বর্গ-খেলনা

গড়িব না ধরনীতে

মৃগ ললিত অঙ্গলিত গীতে ।

পঞ্চশরের বেদনা মাধুরী দিয়ে

বাসর রাত্রি রচিব না মোরা প্রিয়ে ।

ভাগ্যের পায়ে দুর্বল-প্রাণে ভিক্ষা না যেন ঘাচি !

কিছু নাই ভয়, জানি নিশ্চয়ই—তুমি আছ, আমি আছি ॥

দুজনের চোখে দেখেছি জগৎ

দৌহারে দেখেছি দৌহে—

মরুপথতাপ দুজনে নিয়েছি সহে ।

ছুটি নি মোহন মরীচিকা-পিছে-পিছে

ভুলাইনি মন সত্যেরে করি মিছে—

এই গৌরবে চলিব এ ভবে যতদিন দৌহে বাঁচি ।

এ বাণী শ্রেয়সী, হোক মহীয়সী—তুমি আছ, আমি আছি ॥'

গ্যাংগুলি, এর মানে বুঝিয়ে দাও । এলিস বললেন ।

ষ্টাঞ্জা বাই ষ্টাঞ্জা গ্যাংগুলি ইংরেজিতে বুঝিয়ে দিলেন এলিসকে ।

এলিস আকাশের দিকে চেয়ে বললেন, হাউ সাবলাইম ! জানো গ্যাংগুলি,
তোমার এই কবিতা আবৃত্তি শুনে আমার ইচ্ছে হচ্ছে বাংলা শিখতে ।

বেশ তো, এবার ইণ্ডিয়ায় গিয়ে শিখো ।

এলিস যেন নিজের মনেই বললেন, দেখি, চেষ্টা করবো । অস্তুত, টেগোরের
কবিতা পড়বার জন্তেই বাংলা শিখতে হবে ।

ওদিকে প্রমেনেড ডেকে স্নীতিমত তর্ক শুরু হয়ে গেছে, যাকে বলে 'হট ডিসকাসন'। ডাঃ প্রামানিকের সঙ্গে কে-জির। ডাঃ প্রামানিকের মতে এখন ইন্ডিয়ায় দরকার আগে খাদ্য, পরে বিদ্যে। আর কে-জি-র মতঃ না, আগে বিদ্যে পরে খাদ্য বলা ভুল হবে; তবে খাদ্য আর বিদ্যে একসঙ্গে দরকার। ডায়াম, ব্যারেজ, ট্রাকটরের সঙ্গে চাই স্থল, কলেজ, ফ্রি-এডুকেশন। কোন জাতিকে উন্নতির পথে এগিয়ে যেতে হলে সামনে চাই জ্ঞানের আলো! অন্ধকার পথে চলা মানে হোঁচট খাওয়া।

ডাঃ প্রামানিক বললেন, খামুন মশায়, যে দেশে বেশির ভাগ লোক একবেলা খেয়ে থাকে, বহুলোক অনাহারে থাকে—তাদের ঘরে দরকার এক মুঠো চাল, আপনার জ্ঞানের আলো নয়। অন্নভাবে তার চোখের আলো নিভে গেলে তার ঘরে তখন জ্ঞানের আলো জ্বলতে থাকলে তা হাস্তকরই মনে হবে।

দু'জনের দুটি দল হয়ে গেছে। ডাঃ রয়, চ্যাটার্জি, রামস্বামী—ডাঃ প্রামানিকের মতে ঘাড় নাড়ছেন, তাল দিচ্ছেন। কে-জির দলে আছেন রেজা, সানিয়াল, ডাঃ সেন আর মিসেস প্যারেলওয়াল। তাঁরাও তাল টুকছেন তাল বুঝে।

কী? সি. মিটার কোথায়? আর, এনাক্ষী রাও? কী জানি! সাগর নগরের অনেক তলা, অনেক ডেক, বহু কেবিন, অগুপ্তি গলি-ঘুঞ্জি, বিস্তর আড়াল-আবডাল। কেউ গা-ঢাকা দিলে খুঁজে বার করা বড় মুশ্কিল।

সাগর-নগরের সুইমিং-পুলেও ভিড়।

এতদিন শীতের দাপটে গরম জামা-কাপড় ছেড়ে কেউই সুইমিং কণ্টিউম পরে জলে নামতে চায়নি। এবার যেন ছড়োছড়ি পড়ে গেলো। গলা জল। ভোববার ভয় নেই, যত খুসি ঝপাংঝপাং করো—সে সুযোগ কেউ ছাড়ে! বুড়োরা তাই কচি খোকা সাজলেন যেন। অবশ্য, ছোটরাও জল-ঝঞ্ঝের আনন্দ থেকে বাদ গেলো না। জলের লেভেল কমিয়ে তাদের জন্তেও জল-ঝঞ্ঝের ব্যবস্থা আছে ঘণ্টাখানেকের জন্তে। তাছাড়া খানিকটা সময় আলাদা করা, অর্থাৎ রিজার্ভড করা—ফর লেডিজ।

একেবারে নীচে ডি-ডেকে হুইমিং-পুলটি লম্বা-চওড়ায় প্রায় চল্লিশ ফুট করে। গভীর অন্তত দশ ফুট। নীচের তলা পর্যন্ত লোহার সিঁড়ি নেমে গেছে। সাদা রং করা। তাতে সমুদ্রের নীল জল, টলটলে জল, দেখলেই গা ভোবাতে ইচ্ছে হয়। ময়লা জল ফেলে জল তোলা হয় পাম্প দিয়ে।

পাশেই জিমনেশিয়াম। ব্যায়ামাগার। বহুবিধ ব্যবস্থা : রোয়িং মেশিন, টেননারি-সাইকেল, মেকানিক্যাল হস—মানে, বসে বসে দাঁড় টানো (হাতের ব্যায়াম), অচল সাইকেল চালাও (পায়ের ব্যায়াম), কাঠের ঘোড়ায় চড়ে ঝাঁকানি ঝাও (শরীরের ব্যায়াম) !

কাল এডেন পৌছবে 'বাতরি'।

সুয়েজ ছাড়বার তিন দিনের দিন। বিকেলে দূরে দেখা গেলো আর একখানা জাহাজ। সাগর-নগরের সঙ্গে আর এক সাগর-নগরের দেখা।

ভোঁ-ও-ও-ও-ও। কী হে, কেমন আছো ?

ভোঁ-ও-ও-ও-ও। ভালো।

ডেকে জড়ো হয়েছে নাগরিকরা। দুই জাহাজেরই। হাত নাড়চে, ক্রমাল নাড়াচে ! যার দূরবীন আছে, চোখে লাগিয়েচে, স্পষ্ট দেখতে চায়। ভুলে গেচে, এ সংসারে অস্পষ্টতাই সুন্দর, মধুর, কাব্যময়। বেশি স্পষ্ট হওয়া মানে, সব কিছুই হারানো।

জাহাজটা কী এমন দেখতে ! জাহাজের লোকগুলো কি অদ্ভুত ! না। তনু সুন্দর। বিচিত্র। দু'দিন একটানা জল দেখবার পর, জলের বুকে ঐ বৈচিত্র্যটুকু কে হারাতে চায় ! বন্দরে, জাহাজঘাটে জাহাজের ভিড়ে ও জাহাজের কোন দাম নেই। সমুদ্রের পথে একা পথিক, দল ছাড়া—তাই প্রত্যা।

রাত্রে অন্ধকারে 'বাতরি' এসে ভিড়লো এডেন বন্দরে। বন্দরে ভিড় নেই। বন্দর থেকে সহর নাকি দূরে। যাত্রী অনেক নামলো। তিন ঘণ্টার ছুটি। যাও, বেড়িয়ে এসো মাটির সহরে। আর ইঁা, ঘড়ির কাঁটা এগিয়ে নাও, আরো এক ঘণ্টা বেশি। পার্শ্বের অফিসের নির্দেশ।

এডেনে কাষ্টম ডিউটির ঝামেলা নেই : খোলা বন্দর। কাজেই জিনিসের দাম কম, তাই খদ্দেরের ভিড় বেশি।

সাগর-নগরের নাগরিকরা ট্যাকে বেঁধে নিয়েচে টাকা, ট্রাভেলার্স চেক। সুবিধা দাম হলে কিনতে হবে ক্যামেরা, দূরবীণ, ইলেকট্রিক সেফটিকরেজার, আরো যা-যা পাওয়া যায়।

সস্তায় কিছু কেনার একটা মাদকতা আছে।

বিদেশী খদ্দেরের আশায় এডেনের দোকানগুলি খোলা। বন্দরের কাছে দোকানগুলোয় ভিড় বেশি। তবে যারা আরো সস্তায় কিনতে চায়, দেখতে চায় সहरটাও—অর্থাৎ একটিলে দুইপাখি মারাই যাদের মতলব, তারা ট্যাক্সিভাড়া করে চলে গেলো সহরে। অল্প সময়, অথচ অল্প দায়ে জিনিস কিনতে হলে ট্যাক্সি ছাড়া উপায় কি?

ঘণ্টা দুয়েক পরেই এক-এক করে ফিরতে লাগলো নাগরিকরা সাগর-নগরে। হাতে থলে, বগলে প্যাকেট, কাঁধে ক্যামেরা, চোখে দূরবীণ আর মুখে হাসি। বিজয়ীর হাসি।

কিন্তু জাহাজ ছাড়চে না কেন?

তিনঘণ্টা তো কখন হয়ে গেছে! সাগর-নগর কি মাটির নগরের প্রেমে পড়ে তার বন্দরেই ধর্ণা দেবে? রাত কাটাবে এডেনের বন্দর-বন্ধনে!

পার্শ্ব অফিসে অনেকেই ধাওয়া করলো : হোয়াটস্ ম্যাটার?

ম্যাটার যাকে বলে গুরুতর। জগৎ সিং নামে এক পাঞ্জাবী ভ্রমলোক আর তাঁর স্ত্রী এখনো এডেন সহর থেকে ফেরেননি জাহাজে! পোর্টে নামবার সময় ঘাঁরা-ঘাঁরা পার্শ্ব অফিসে পাশপোর্ট জমা দিয়ে গেছিলেন, সবাই ফিরে এসেছেন, পাশপোর্ট ফেরত নিয়েছেন—আসেননি কেবল ঐ পাঞ্জাবী দম্পতি। তাঁদের পাশপোর্টখানা এখনো অথরিটির কাছে।

তাঁদের কেবিনও লক্ করা।

গেলেন কোথায় তাঁরা?

পোর্টে লোক গেছে খুঁজতে। কিন্তু 'বাতরি'র এক ট্রুয়ার্ড একটু পরেই এসে খবর দিলো, নো, দে আর নং দেয়ার।

তবে?

তা হলে ?

উপায় ?

একজন ষ্টুয়ার্ড এমন সময় ছুটতে ছুটতে এলো পার্শ্বার অফিসে। অফিসারকে ডেকে নিয়ে গেলো। উপরে বোট-ডেকে। মেঝেয় একটা কার্পেট পেতে একটা স্ত্রী ও একটি পুং বগু গভীর নিদ্রায় মগ্ন। নাক ডাকচে !

অফিসারটি ভদ্রলোককে ঠালা দিয়ে ওঠালেন : হ্যালো স্যার, ইউ আ হিয়ার !

ধড়ধড় করে উঠে বসলেন ভদ্রলোক : কেয়া হুয়া ?

প্রায় সকলেরই সেই প্রশ্ন : কেয়া হুয়া ?

জগৎ সিং চোখ কচলে চীনে ইংরিজি ও ভাঙা হিন্দিতে যা বললেন, তার বাংলা মানে দাঁড়ায়, আমরা পাশপোর্ট জমা দিয়ে বেরুবো, এমন সময় আমার জেনানা বললেন, তার মাথা দরদ করচে। একটু খোলা হাওয়ায় নিদ্ গলে সেরে যাবে হয়তো। তা ভাবলাম, ঠিক আছে। এডেনে নামলে কিছু টাকাও খরচ হয়ে যেতো, যাক্ বেঁচে গেলো। কাজেই ইজিপ্টে কেনা কার্পেটখানা কেবিন থেকে এনে ছড়িয়ে চোখ বুজে খোলা হাওয়ায় শুয়ে থাকতে গিয়ে কখন যেন ঘুমিয়ে পড়েছি।

জগৎ সিংয়ের কথা শুনে সবাই হো-হো হেসে উঠলো। সেই হাসির ধাক্কায় মিসেস সিংয়েরও ঘুম গেলো ভেঙে। তিনি তাড়াতাড়ি উঠে বসে মাথায় শুড়নাখানা টানলেন, ঢাকলেন তাঁর ক্ষীতবক্ষ। আগোছালো পোষাক টেনেটুনে গুছিয়ে নিয়ে উঠে দাঁড়ালেন।

পার্শ্বার ভদ্রলোক ততক্ষণে পাশপোর্টখানা জগৎ সিংয়ের হাতে গুঁজে দিয়ে ছুটলেন ক্যাপ্টেনকে খবর দিতে। কেলেকারি !

এক ভদ্রলোক নীচুগলায় বললেন, এরা সব ইণ্ডিয়ান বাইরে যাব ইণ্ডিয়ান মুখ হাসাতে। ড্যাম, ফুলস্।

জগৎ সিং আর তাঁর স্ত্রী গেছলেন নটিংহামে তাঁদের ছেলে প্রীতম সিংকে দেখতে। আর সেইসঙ্গে তাঁদের বিলিতী বৌমাকেও। অবশ্য বাড়তি আকর্ষণও ছিলো : তাঁদের নবজাত নাতিটিকেও দেখে আসা। আহা, ডল পুতুলের মতো, একমাথা সোনালী চুল। আর, দেশটাও দেখে আসা হলো।

সপরিবারে জগৎ সিংহের এই জগৎ দেখা ঘটলো তাঁর লেড়কার একান্ত ইচ্ছে আর পেড়াপিড়িতেই।

এডেনে একঘণ্টা সময় এগিয়ে দেওয়া হয়েছিলো।

দু'দিন বাদে গালফ অব এডেন পার হবার পর পার্শ্বের ঘরে নোটিশের নির্দেশানুযায়ী 'বাতরি'র যাত্রীরা আরো একঘণ্টা হাতঘড়ির কাঁটা এগিয়ে নিলো।

সময় এগিয়ে চলেচে, মন যেন এগিয়ে যাচ্ছে তারো আগে। ঘরমুখো ঘোড়ার মত ছুটেচে মন। পাকিস্থানী-যাত্রীরা যেন মানসচক্ষে দেখচে দূরে ঐ সমুদ্রের ওপারে করাচী বন্দর। আর হিন্দুস্থানের বাসিন্দারা দেখচে ভারতের বন্দর—বোম্বাই!

ভারত মহাসাগরে পড়লো 'বাতরি'।

বিশাল সমুদ্র। অঁথ জল। থৈ-থৈ করচে ঢেউয়ের পর ঢেউ। চারদিকে নীল, নীল, নীল, জল। মাথার উপর ফিকে নীল আকাশ। পৃথিবীতে আর কোন রং আছে? বুঝি নেই। পৃথিবীতে মাটি আছে? না বুঝি! কী? পৃথিবীতে তিনভাগ জল, একভাগ স্থল—মাটি? কই? কোথায়? কোথায় সেই ধূলো-মাটি, কাদা-মাটি, দেশের মা-টি?

সাগর-নগরে নাগরিকরা যেন মনে মনে অস্থির হয়ে উঠলো। আর ক'দিন পরে যে মাটিতে পা দেবে তারা, সে মাটি প্রাণের মাটি, ধ্যানের মাটি, জ্ঞানের মাটি, অজ্ঞানের মাটি। 'মাতৃগর্ভের অঙ্ককার থেকে ভূমিষ্ঠ হয়ে তারা পেয়েচে ঐ মাটিরই প্রথম স্পর্শ। প্রথম আলো, প্রথম হাওয়া, প্রথম স্বাদ ঐ মাটিতেই। পরে ক্রমে পেয়েচে জ্ঞানের আলো! ঐ মাটির সঙ্গে অল্প মাটির অনেক তফাত। সবার সাধ, ঐ দেশের মাটিই হয় যেন তার শেষের মাটি!

তবে সাগর-নগরের কয়েকটা দিনের মধ্যেও কি কারোর শেষের দিনের পরম এবং চরম বিদায়লগ্নটুকু চিহ্নিত হয়ে থাকে না? থাকে। তখন সেই শেষ হয়ে যাওয়া মাহুঘটির শেষ সম্বল অসাড় দেহখানি আর মাটির স্পর্শ পায় না, হয় তার সলিল-সমাধি। সাগর-নগরের নাগরিকের মর-দেহ সাগরের তলায় নিশ্চিহ্ন হওয়াই তো স্বাভাবিক!

এডেন থেকে যে কয়জন ক'দিনের জন্তে স্থান করে নিয়েছিলো 'বাতরি'র

লোহা এবং কাঠের-নগরে—তাদেরই একজনের বধে পর্যন্ত যাবার সমুদ্র-যাত্রার টিকিট কাটা ছিলো বটে, কিন্তু তার সংসার-যাত্রার টিকিটের মেয়াদ ছিলো না বেশি। লোকটা ব্যবসাদার। নাম রেওয়াচাঁদ মাখিজানি। সিন্ধী। এভাবে তার ব্যবসা, বসেতে বসবাস। দেশের মাটির টান কমেনি তার। তাই মনে আশা নিয়ে বাসার দিকে বাড়িয়েছিলো পা।

কিন্তু রাজ্যে সমুদ্রপথে সগর্জনে ‘বাতরি’ যখন তার কপালের জোরালো আলো জালিয়ে অন্ধকার ঠেলে চলছিলো, সেই সময় রেওয়াচাঁদের শেষকণ্ঠে তার হৃদয়স্থ হলো অচল, চোখের আলো গেলো নিভে। আসল টিকিটের মেয়াদ হলো শেষ, অথচ জাহাজের টিকিটখানা বুক রইলো তেমনি ভাঙ্গা।

‘বাতরি’র বিরাট ইঞ্জিনটা হিস্-হিস্ করে বললো যেন ঈশ্বরকে লক্ষ্য করে : মঁসিয়ে, তোমার ইঞ্জিন ভারি পঙ্কা। সায়েন্টিফিক যুগে একদম অচল !

পরদিন সকালে সারা জাহাজে রেওয়াচাঁদের মৃত্যু-বার্তা রটে গেলো ক্রমে। সবার মনেই বিষাদের ছায়া এলো নেমে, আশংকাও দেখা দিলো। সাগর-নগরের সব ভালো, মৃত্যু ভয়ংকর। মাটি নেই, মা ভাই-বোন, ছেলে-মেয়ে-বৌ কেউ নেই কাছে, কানে রাম-নাম নেই, মুখে গঙ্গাজল নেই, কারোর চোখে অশ্রু নেই ; শুধু সাময়িক অভিবাদন ! কাপ্তেন-বালাসীদের কর্তব্যের ‘অনার !’ তারপর নিঃশব্দে, নিঃশেষে সাগরের অতলতলে তলিয়ে যাওয়া !

রেওয়াচাঁদের পাখি বদেহটাকে শুভ্র বস্ত্রে আপাদমস্তক ঢাকা অবস্থায় রেখে ছ’ধারে দাঁড়ালেন ‘বাতরি’র অফিসাররা। শিপ্-মাষ্টার ঈশ্বরের কাছে করলেন তার আত্মার কল্যাণ কামনা। স্ট্রালুট জানালেন মৃতের আত্মার উদ্দেশে ! তারপর সেই বিষাদ-গম্ভীর পরিবেশের মধ্যে চারজন বাহক পরম যত্নে রেওয়াচাঁদের নখর দেহকে ডালি দিলো সাগরের লোভী ডেউগুলোর কাছে। ভারত মহাসাগরের ডেউ লুফে নিলো, গ্রাস করলো এক ভারতের সন্তানকে। ভারতের মাটিতে না হোক, সমুদ্রে সমাধিস্থ হওয়ায় রেওয়াচাঁদের আত্মা হয়তো তৃপ্তই হলো।

আর সেই মুহূর্তে বিশ্বের এক মাঝারি পল্লীতে রেওয়াচাঁদের স্ত্রী হয়তো তার স্বামীর হাতের চিঠি পেলো : মায় জলদি ঘর যাতি হ’।

বিদায় একদিন নিতেই হবে। সবাইকেই। কিন্তু সেই শেষ বিদায়ের

আগেও বহু বিদায়ের পালা আমাদের সাক্ষর করে হইয়াছে। কিছুদিন আগে সবাই বিলিভী মাটির নগরের কাছে বিদায় নিয়ে সাগর-নগরে নিয়েছিলো আশ্রয়। আবার ক'দিন পরেই সাগর-নগরকে বিদায় দিয়ে অনেকেই ঝাঁপিয়ে পড়বে দেশের মাটির নগরের কোলে।

সাগর-নগরে বিদায়ের পালা শুরু হলো। নগর কর্তৃপক্ষের ব্যবস্থা করলেন ফেয়ারওয়েল ডিনারের।

সে সন্ধ্যায় আহাধের প্রাচুর্য দেখা দিলো টেবিলে-টেবিলে। সেই সঙ্গে ফুলদানিতে ফোটা-ফুলের মেলা। ট্যুয়ার্ডরাও সেজেচে নতুন করে ফিকে রংয়ের নীল পোষাকে। সচিব সুন্দর মেহু-কার্ড দেওয়া হলো সবার সামনে। কনসার্টের দল বসলো এক কোণে। সুস্থ মধুর স্বর আর নানা রঙের সুরার হলো সমন্বয়। সারা ডাইনিং হলটাও যেন সেজেচে। কাগজের রঙীন ফুল, বেলুন আর পতাকার বাহার সর্বত্র। যেন স্বপ্নপুরী। সারা সাগর-নগরে আলো ঝলমল। সাগরের বুকে বৃষ্টি চলন্ত আলোর ডেলা।

শিপ-মাষ্টার মিরশল গ্রাওয়াকি এলেন সাগর-নগরের নাগরিকদের বিদায় সম্ভাষণ জানাতে। উঠে দাঁড়িয়ে ধীর গভীর কণ্ঠে বললেন, আমার সম্মানিত বন্ধুগণ, আজকের সন্ধ্যায় এই বিদায়-ভোজসভায় আপনাদের সম্বন্ধনা জানাবার সুযোগ পেয়ে আমি ধন্য। আশাকরি আপনারা সকলেই এই সমুদ্রযাত্রা উপভোগ করেছেন এবং আপনাদের অনেকের সঙ্গেই আবার আমাদের সাক্ষাৎ হবে—সে বিশ্বাসও আছে। আপনাদের সহযোগিতার জন্তে আমার সঙ্গীদের হয়ে এবং আমার নিজের পক্ষ থেকে জানাচ্ছি আমার আন্তরিক অভিনন্দন। অতঃপর, আস্থন, আমরা আমাদের দক্ষিণ হস্তের কাজে লাগি।

শুরু হলো ভোজন পর্ব।

তারপর সেই নেবার পালা। সচিব মেহু-কার্ডে এর-ওর ঠিকানা লেখালেখি চললো। এই যে ক'দিনের মেলামেশা, হাসি-গল্প, সে কি সাগর-নগর ছাড়বার সঙ্গে সঙ্গেই শেষ হবে? শেষ যাতে না হয়, তারই শেষ চেষ্টা!

রাত্রি ন'টায় ক্যান্সি বন্ধ।

ক্যান্সি ড্রেসের আয়োজন গত দু-তিনদিন থেকেই চলছিলো। দল পাকিয়ে অনেকেই ঠিক করেছেন কে কি সাজবেন। অনেকেই চেনা-জানা

মহিলাদের কাছে আবেদন জানিয়ে রেখেচেন, তাঁদের সঙ্গে ফ্যান্সি বলে যোগ দেবার জন্তে। উৎসাহ দিয়ে সহযোগিতা করবার প্রতিশ্রুতিও দিয়েচেন তাঁরা।

ভিনারের পর ফ্যান্সি বল-এর বিশেষ উৎসাহীরা কেবিনে ঢুকে লেগে গেচেন বিশেষ রকম সাজসজ্জায়।

সুসজ্জিত ডাইনিং হলে শুরু হলো কনসার্ট।

মিসেস জেন গ্র্যাটন সঙ্গে এলেন জিপসি বুড়ি। গলায় পুঁথির মালা। মাথায় রুমাল বাঁধা। হলে ঢুকেই সকলের হাত দেখতে শুরু করলেন। হাততালি পড়লো।

রেজা সঙ্গেচে 'কোবয়'। মাথায় বিরাট টুপি। হাতে লম্বা দড়ি। দড়িটাকে ছড়িয়ে দিলো মেঝের মাঝখানে। আবার হাততালি।

কে-জি এলেন বাঙালী ফুল-বাবু সঙ্গে। আদ্রির পাঞ্জাবি আর কৌচানো ধুতি পরনে! এক হাতে কৌচা, আর এক হাতে ফুল। বারে বারে শুঁকচেন। সঙ্গে তাঁর গ্রাম্য-স্ত্রী! সঙ্গেচেন মিস ইলিগট। কোনরকমে শাড়ি জড়িয়ে একগলা ঘোমটা টেনে এলেন কে-জির পেছনে পেছনে। এবার হৈ-হৈ পড়ে গেলো।

এলেন বঁটে কে. এম. শা। পাক্সা ইংরেজ সাহেব! মাথায় টপ-ছাট। সঙ্গে তাঁর দ্বিগুণ চেড়া রাজহংসী মিসেস হারমান—মি: শার 'মিসেস' রূপে। মিসেস হারমানের হাত ধরে ঝুলচেন শা। দেখবার মত দৃশ্য। হাততালির সঙ্গে শিষ দিয়ে উঠলো অনেকেই।

সি. মিটার আর এনাকীরাও সঙ্গেচেন জেলে-জেলেনি। মিটারের মাথায় এনাকীর শাড়ি জড়িয়ে পাগড়ি বাঁধা, আর এনাকীর হাতে মাছের বুড়ি। আবার হৈ-হৈ।

কিমোনো পরে জাপানী মেয়ে সঙ্গেচেন মিসেস ধীলন। জাপানী ঢংয়ে চুল বাঁধা। হাতে জাপানী ছাতা। চলনে লীলায়িত ভঙ্গী। আবার যথারীতি হাততালি।

সানিয়াল সঙ্গেচেন বিরাট পাগড়ী মাথায় সুলতান। ইয়া গোঁফ। হাতে সিঁকের রঙীন রুমাল।

রামস্বামী সেজেচেন ইণ্ডিয়ান ফকির। হাটু পর্যন্ত কাপড়, গায়ে চাদর।
হাতে মুখে খাউভার, অর্ধাং ছাই। বগলে কবল, হাতে চিমটে।

লতিফ সেজেচেন রেড ইণ্ডিয়ান। মাথায় পালক, হাতে ধনুক। গলায়
পুঁথির মালা। কোমরে চওড়া বেন্ট।

তাছাড়া কিরন্ময়ী বড়াই সেজেচেন গোপিনী। মাথায় কলসী, পরনে
ঘাঘরা। কাবুলিওয়ালা সেজেচেন ভাঃ সেন। এলিস, চীনা মহিলা।
মিঃ মুঞ্জেশ্বর রাজপুত বীর। কোমরে তলোয়ার।

জুত তালে বেজে উঠলো কনসার্ট।

সবাই নাচতে নামলেন ফ্লোরে। জাপানী মেয়ে নাচতে লাগলেন বাঙালী
বাবুর হাত ধরে। গ্রাম্য বৌ নাচতে লাগলেন টপ হাট পরা ইংরেজের সঙ্গে।
জিঁপসি বুড়ি হাত ধরলেন কাবুলিওয়ার। ঢেঙা 'মিসেস শা' ইণ্ডিয়ান
ফকিরকেই নিলেন বেছে। রেড ইণ্ডিয়ান গোপিনীর সঙ্গেই শুরু করলেন নাচ।

নাচ। বিস্কৃতভাষায় থাকে বলে ভালুক নাচ। তাল নেই, বেতলা।
স্বর হলো বেসুরো। বেপরোয়া নাচ। প্রাণ খোলা নাচ। নাচের ব্যাকরণ
এ নাচে অচল। এ নাচ, প্রাণের নাচ, নাচের প্রাণ।

তবু কনসার্ট বাজিয়েরা স্বর ঢালচে আপ্রাণ। বয়রা ঢালচে স্বরা মূহুর্মূহ।

শুধু হৈ-হল্লা, হাসি, আনন্দ। গম গম করচে স্তম্ভিত ডাইনিং হল।
সবার মাথায় কাগজের টুপি, হাতে কাগজের পতাকা। কারোর হাতে বেলুন,
যেন কচি খোকা এবং খুকুর দল। মহাসিঙ্কুর বুকে ভেসে ছেলেরা করে খেলা।

এ খেলায় যোগ দিচ্ছে 'বাতরি'ও! নেচে-নেচে, ভেসে-ভেসে চলচে
সেও।

শুধু একজন, বিবাদিনী একাকিনী এক নারী জাহাজের পেছনের আধ
অঙ্ককার ডেকে রেলিং ধরে দাঁড়িয়ে আছেন উত্তাল কালো সমুদ্রের দিকে
চেয়ে। মিসেস ভাট!

মিসেস ভাট যাননি ফ্যান্সি বল-এ। তাঁর যে ফ্যান্সি ড্রেস হবে, তা
আজীবনের জন্তে, ওদের মতো ছ'টার ঘণ্টার জন্তে নয়। কাজেই অত ভাড়া
কিসের?

এঙেনে অনেকেই সম্ভায় কিনেচে ক্যামেরা, বাইনোকুলার। ডেকে

তাই ছবি তোলার ধুম। কেউ বা চোখে বাইনাফুলার লাগিয়ে দূরের জিনিস কাছে এনে গভীর মনোযোগ দিয়ে দেখতে। যারা বেশি রসিক, অনেক সময় তাদের বাইনাফুলারের চোখ মেয়েদের অলঙ্কার মেয়েদেরই দিকে।

তবে ক্যামেরার চোখ প্রকৃত্তই ঘোরাফেরা করতে এদিক-ওদিক। বললেই হলো, একটা ছবি তুলতে চাই। নিশ্চয়ই!

তবে দাঁড়ান ওখানে, ঐ লাইফ বেন্টায় হেলান দিয়ে।

টিক। থ্যাংকু।

থাংকু। একটা ছবি কিন্তু চাই।

শিয়োর। ঠিকানাটা লিখে দিন আমার নোট বইয়ে।

লেখা হলো ঠিকানা। ক্যামেরার মারফত আলাপ উঠলো জমে।

ক্যামেরা ছবি তোলবার যত্ন নয়, ভাব জমাবার হাতছানি। রেজার হাতে কিন্তু ক্যামেরা নেই, সে ঘুরে বেড়াচ্ছে একবাক্স চকোলেট নিয়ে। চকোলেট-বাক্সের ডালা খোলা। হঠাৎ কে-জির সঙ্গে দেখা।

কি হে, এবার সিগ্রেটের বদলে চকোলেট খাওয়াবে নাকি?

না কে-জিদা। রেজা বললেন, চকোলেটে হাওয়া লাগাচ্ছি।

তার মানে?

রেজা বিষণ্ণবদনে বললেন, ইংল্যাণ্ড থেকে কেনা দামি চকোলেট, ভাইপোদের জন্তে নিয়ে যাবো ভাবছিলাম, তা আর হলো না দেখচি।

কেন, কেন?

আর বলবেন না। এতদিন ঠাণ্ডায় বেশ ছিলো। আজ বাক্স খুলে দেখি গরমে সব গলে গুড় হয়ে যাবার জোগাড়! তাই হাওয়া লাগাচ্ছি!

তুনে হেসে উঠলেন কে-জি: কিন্তু এভাবে চোখের সামনে চকোলেট নিয়ে নাচালে তোমার চকোলেটই যে হাওয়া হয়ে যাবে রেজা ভাই।

ইস! ইয়ার্কি নাকি! রেজা চট করে সরে গেলেন সেখান থেকে।

দেখি, দেখি, একটা ছবি তুলি আপনার। এভাবে চকোলেটের বাক্স হাতে নিয়ে দাঁড়ান। মিসেস বড়াই তাঁর সঙ্গ কেনা ক্যামেরা তাক করে দাঁড়ালেন রেজার সামনে!

বেশ তুলুন! রেজা চকোলেটের খোলা বাক্স সমেত হাত উঁচু করে দাঁড়ালেন।

টিক ।

তা রেজার পোজ্‌টা তোলবার মতই হলো বটে !

এডেন থেকে চারদিনের পথ পাড়ি দিয়ে ‘বাতরি’ এলো করাচী বন্দরে ।
করাচী । ভারতের এক বিচ্ছিন্ন অঙ্গ । প্রতিবেশী, তবে পরদেশী বন্দর ।

সন্ধ্যার অন্ধকারে ‘বাতরি’কে বিদায় দিয়ে অনেকেই নেমে গেলেন তাঁদের
স্বদেশে । অনেক বিদেশীরও যাত্রা হলো শেষ ।

আলি আর ডরোথী নামলেন তাঁদের কাচ্চা-বাচ্চাদের নিয়ে । এবার
স্বদেশে ভাগ্যের সন্ধানে ঘুরবেন তাঁরা । লর্ড তো কিছুই করলেন না, এবার
আল্লা যদি কিছু করেন ।

মিসেস বড়াই রাফিকের সঙ্গ ছাড়লেন না । কাষ্টমস্-এর বেড়াটা অন্তত
রাফিকের সাহায্যে পার হওয়া ছাড়া আর কোন উপায় নেই হয়তো ।

মিঃ এবং মিসেস হারমানের বাচ্চের দলও নামলেন বাচ্চ যন্ত্রের বোঝা
নিয়ে । তাঁদের সঙ্গ নিলেন ‘মদের পিপে’ বৃড়ো জন । মিসেস হারমানের
পেছনের ‘কেউ’ ।

লতিফ তাঁর শপ-গাল’ বৌ এমা ব্রাউনকে সযত্নে হাতে ধরে নামালেন
জাহাজ থেকে । যেন টবে বসানো দামি ফুলের চারা । কিংবা ভেড়া আনলো
পথ দেখিয়ে ব্রিটিশ সিংহীকে । এখন প্রাণে মারা কিংবা জিইয়ে রেখে
খেলানো—সবই এমা সিংহীর খেয়ালের উপর ভরসা ।

তাছাড়া নামলেন বৈটে কে. এম. শা । চিরতরুণ, চিরসবুজ । গিষ্টি
মানুষটি ।

আর নামলেন, সর্বশ্রী (না, না ‘শ্রী’ কথাটা পাকিস্তানের পক্ষে বিশ্রী এবং
অচল) মেসার্স আব্বাস, আবজল, প্রায় গুণ্ডা পাঁচেক মহম্মদ, গুণ্ডা হু’য়েক
খান, গোটা পাঁচেক হসেন, একটি পুরো ডীন পরিবার এবং জালান, উদ্দিন,
হানিফ, করিম প্রভৃতি । প্রায় হু’শো যাত্রী ।

‘বাতরি’র বুকখানা যেন অর্ধেক খালি হয়ে গেলো । তবে হাঙ্কা হলো
যেন । যাদের দায়িত্ব ঝাড়ে নিয়ে এতদিন ভীক এবং ডারি হয়েছিলো, আজ
তাঁদের স্বদেশের মাটিতে নিরাপদে পৌঁছে দিয়ে স্বস্তির নিশ্বাস ফেললো
‘বাতরি’ । এতদিন ভয়ে-ভাবনার প্রায় গলাডুবি হয়ে ছিলো, করাচী বন্দরে

হাঙ্গা হয়ে বুক পৰ্ধন্ত ভেসে উঠলো সে। সাগর-নগর যেন জল থেকে গলা উঁচিয়ে দেখতে লাগলো করাচীর মাটির নগর।

নামলো আরো অনেকেই। করাচী দেখবার উদ্দেশ্য তাঁদের। সন্ধ্যা সাতটা থেকে রাত দশটা পৰ্ধন্ত ঘুরে বেড়াবার সুযোগটুকু অনেকেই ছাড়লেন না। বিশেষ করে দেশের মাটির গন্ধ এই করাচীতে বেশ কিছুটাই আছে।

পার্সার অফিসে পাশপোর্ট জমা রেখে দল বেঁধে বেরলেন ডাঃ সেন, চ্যাটার্জি, রামস্বামী, সানিয়াল, রেজা আর কে-জি। অবশ্য দাড়ি-শাড়িও নামলেন, তবে জোড়ে। গ্যাংগুলি ও এলিসও হাতধরাধরি করে নামলেন। উইলহেলম্ এইটেল একলাই নামলেন, তবে পরে সঙ্গ নিলেন সানিয়ালদের। এইসব প্রাচ্য দেশে পথ পদর্শক হিসাবে এই দলটাই নির্ভরযোগ্য। তা ছাড়া নামলেন মিঃ এবং মিসেস গ্রাটন, ডাঃ রয়, ডাঃ প্রামানিক, এবং আরো অনেকেই।

তবে নামলেন না মিসেস প্যারেলওয়াল। মিস ইলিয়টও নামলেন না। মিসেস ডাট বা দত্তের নামার প্রশ্নই ওঠে না। গিঃ বা মিসেস ধীলন অথবা সকন্তা মিঃ-মিসেস মুঞ্জেশ্বরও স্থির করলেন 'বাতরি'তেই থাকা। সেলিম হক আর মিস রীডও ততক্ষণে বার-এ বসে বীয়ার বা ব্র্যাণ্ডি টানাই শ্রেয় মনে করলেন।

করাচীর কাষ্টমস-এ সার্চ-লাইট জ্বলচে। আলোয়-আলো।

ভিতরে হৈ-হৈ ব্যাপার। সাগর-নগরের নাগরিকরা মাটির নগরে যে দূরবস্তায় পড়েচেন, তা দেখবার মত। বাস্ক, স্ট্রাকেশ সব খোলা, জিনিসপত্র ছড়ানো। দু'হাত দিয়ে তাই জিনিস আগলে ধরে দাঁড়িয়ে আছেন অনেকেই : শা, আলিরা, হারমানদের দল, বড়াই-জায়া, রফিক প্রভৃতি। যেন চোরা কারবারিরা একসঙ্গে ধরা পড়েচে। মুখে তাঁদের দুর্ভাবনা আর হতাশার ছাপ। কাষ্টম অফিসারদের প্রশ্ন আর বাস্ক-হাতড়ানো চলেচে অবিশ্রান্ত ভাবে।

সানিয়ালরা গেটের বাইরে এলেন। ঘোড়ার গাড়ি, অটোরিক্সা, আর বাস রয়েছে দাঁড়িয়ে। একধারে পান-বিড়ি-সিগ্রেটের দোকান, খাবারের

দোকান, চায়ের দোকান। ঘোড়ার গাড়ির কচোয়ানরা ছেঁকে ধরলো তাঁদের : আইয়ে সাব, কাষ্টরাস গাড়ি, আচ্ছা ঘোড়া। কাঁহা জায়েন্নে ?

বাজারমে।

চলিয়ে। পাঁচ রুপেয়া ভাড়া।

ইংল্যান্ডে-ইয়োরোপে দরাদরি করতে হয়নি। জিভ্রালটারেও নয়। ইজিপ্টে দরাদরি থাকলেও, দরকার পড়েনি। অনেকদিন পরে আবার দর কষাকষির পুরোন অভ্যাস চালু করতে হলো।

নাহি, দো রুপেয়া।

কচোয়ান যেমন ঘোড়ার ল্যাজ মলতে জানে, তেমন ডারি সাহেবদেরও ল্যাজ মলতে কম ওস্তাদ নয়। আরে সাব, আপলোগ বিলাতসে আতেই, আউর মোলাই করতে হেঁ ?

রসিক সানিয়াল বললেন, আরে মিঞা, হামলোক সব দেশি সাব জায়। দেখতা না চামড়াকা রং ?

শুনে হেসে ফেললো কচোয়ানরা। আচ্ছা সাব, চার রুপেয়া।

এমন সময় একটা বাস ছাড়তে দেখে সবাই ছুটে গিয়ে বাসখানা ধরলেন। ঝর-ঝর শব্দে বাস চললো।

সরু পথ। ঘিজি সহর। এখানে ওখানে ময়লা ছড়ানো। গাড়ি ঘোড়ার খটখট শব্দ, অটো-রিক্সার ডটডট আওয়াজ, মোটর বাসের প্যাক-প্যাক হর্ণ। তার উপর দোকানে দোকানে রেডিয়োর গান, রাস্তায় হকারের চীংকার, সব মিলিয়ে করাচী সহর সরগরম। সরু ফুটপাথে মূচি নাপিত, তেলে ভাজার দোকান, ভিথিরীর দল। বাড়ি গরুও বিচরণ করচে অবাধে। ফুটপাথে জায়গা নেই, তাই লোক চলচে পথ দিয়ে, পার হচ্চে পথ যেখানে সেখানে।

এ দৃশ্যের সঙ্গে বসে, মাদ্রাজ, কলকাতার পথের দৃশ্যের খুব বেশি অমিল নেই। তবু সত্তা বিলাত-কেরত দেশি সাহেবদের চোখে সবই যেন দৃষ্টিকটু লাগলো। কাষরোও এঁদের হতাশ করেনি, বরং অবাক করে দিয়েছিলো, কিন্তু করাচীতে এসে সবই যেন ধাক্কা খেলেন। সঙ্গে এইটেল কি ভাবচেন কে জানে!

এই তো ধাক্কা খাওয়ার শুরু।

একটা পানের দোকানের সামনে এসে রেজা প্রস্তাব করলেন : পান খাওয়া যাক। অনেকদিন পান খাওয়া হয়নি।

ঠিক, ঠিক। রামস্বামী সমর্থন করলেন।

পান কিনে খেলেন সবাই। এইটেল প্রথমে ইতস্তত করলেও দলে পড়ে খেলেন একটা। তাঁর জীবনযাত্রায় অনেক কিছুই তো বদলাতে হবে। কাজেই শুরু হোক হাতে খড়ি। কে-জিও পাইপ পকেটে রেখে পান চিবোলেন একটা।

আচ্ছা, বিড়ি খেলে কেমন হয়? সানিয়ালের প্রস্তাব।

মন কি? সবাই প্রায় রাজী।

যাকি-ত্র্যাগ ধরালেন সবাই। রেজা ছাড়া। বিস্ময় দেশি ধূমপান।

করাচীর পথে ফিট-ফাট স্মার্টপরা-সাবদের পান চিবোনো এবং বিড়িটানা দেখে লুন্ডি-পায়জামা পরা অনেকেই অবাক হয়েই দেখলো। ভিথিরীরাও ঘরের মানুষ ভেবে সাহস করে হাত পেতে এগিয়ে এলো কাছে।

কাজেই পলাতক হতে হলো সেখান থেকে।

কাজেই স্টেশন, বাজার, সিনেমা বাড়ি ইত্যাদি দেখে অটোরিক্সা গোটা চারেক ভাড়া করলেন তাঁরা। হাত ঘড়িতে সাড়ে নটা। এবার জাহাজ ঘাটায়!

এসব সহর বহু দেখা আছে, আরো বহুদিন দেখতে হবে। কাজেই ছেড়ে যেতে দুঃখ নেই।

‘বাতরি’ ছাড়লো পরদিন ভোরে।

করাচী বন্দরের তখন ঘুম ভেঙেচে। কিন্তু তখনো ‘বাতরি’র ডেকে কাষ্টম অফিসারদের নেশার ঘোর ভাঙেনি। ডেক-চেয়ারে এলিয়ে পড়ে ঘুমুচ্ছেন সব।

রাত্রে জাহাজে ডিউটি দেবার পর, বার-এ গিয়ে মাত্রা-জ্ঞান ভুলে এমনি ‘রসস্থ’ করেচেন নিজেদের, যে, আশ্বস্ত হবার শীগ্রী কোন সম্ভাবনা আছে বলে মনে হলো না। অগত্যা, পাক-সেপাহিরা তাঁদের চ্যাংদোলা করে ডেক থেকে জেটিতে নামালো। জাহাজের মাল নিয়ে যাদের কারবার, তাঁরা যদি লোভবশত নিজেরাই বেগামাল হয়ে বেমালুম ‘মাল’ ব’নে যান তাতে আশ্চর্য হবার আছে বৈকি?

তঁারা যখন ডেক থেকে একে-একে খালাস হলেন, তখন পূব-আকাশ
রাঙা হয়ে উঠেচে। হয়তো লজ্জায়। সূর্য-যাত্রা শুরু হবার প্রায় সঙ্গে সঙ্গেই
'বাতরি' পাড়ি দিলো ভারতের দিকে।

আহাজ্ঞাটা কেমন ফাঁকা হয়ে গেচে। যেন ভাঙা হাট।

আহাজ্ঞের অনেক কেবিনই ফাঁকা, লাউজ্ঞও প্রায় খালি। ডাইনিং হলের
চেয়ার-টেবিলগুলো বেকার। ডেকে চেয়ারগুলোর অনেকেই খালি-কোল নিয়ে
পুড়চে রোদ্ধুরে।

সাগর-নগরের নাগরিকদের মনও যেন ফাঁকা।

হিন্দুস্থানের সঙ্গে পাকিস্থানের সম্ভাব নেই? হয়তো। হিন্দুস্থানের বিরুদ্ধে
পাকিস্থান বিবোধগার করে? হয়তো। হিন্দুস্থানের লোক পাকিস্থানে
নিরাপদ নয়? হয়তো।

কিন্তু সাগর-নগরে দুই রাজ্যের নাগরিকদের তো ভাব ছিলো,
মিল ছিলো! আর ছিলো বলেই বুঝি পাকিস্থানী বন্ধুদের, ভাইদের
চেড়ে হিন্দুস্থানী-হৃদয়ে আত্মীয়-বিচ্ছেদ-বেদনা দিলো দেখা। সাগর-
নগরে খবরের কাগজ নেই, ইস্তাহার নেই, রেডিয়ো নেই—অর্থাৎ
বিবোধগারের উপায় নেই, কান-ভাঙাবার ব্যবস্থা নেই। অতএব শত্রুতা নেই,
ঝগড়া নেই। কাজেই এই কটা দিন দুই দেশের নাগরিকদের হৃদয়ে বিষের
জ্বালা ছিলো না, ছিলো বৈষ্ণব প্রেম।

তবে যারা গত কাল পাকিস্থানের মাটিতে পা দেবেন, কিংবা আগামী
কাল হিন্দুস্থানের মাটিতে দেবেন পা, হাতে পাবেন খবরের কাগজ, কানে
শুনবেন রেডিয়ো-সংবাদ—তাদের মন কি আবার বিষিয়ে উঠবে না? হয়তো
উঠবে। কিন্তু এ-ও ভাববেন তাঁরা—সাগর-নগরে তো আমরা বেশ
মিলেমিশেই ছিলাম!

তাই হয়। এই বেড়ালই বনে গেলে বনবেড়াল হয়। অতএব সাগর-
নগরের নাগরিকরা মাটির নগরে গিয়ে তাঁদের প্রেম-প্রীতি-ভালবাসা সেখানকার
মাটির তলায় যদি চাপা দেন—তাতে অবাক হবার কি আছে?

মাটির-নগর যদি স্বার্থের হাট হয়, তবে সাগর-নগর জনগণের মহাতীর্থ!

কোনরকমে দিনটা কাটিয়ে, রাতে ভিনার সেরে সবাই এলোমেলো ঘুরে বেড়ালেন, লাউকে টিলেঢালা গল্প জুড়লেন, বার-এ বসে হাই তুললেন। পরে ঘে-ঘীর কেবিনে গিয়ে 'লক' করলেন দরজা।

অন্তই শেষ রজনী।

রাত পোহালেই দেখা দেবে ভারতের সীমান্ত রেখা, পশ্চিম ঘাট। সবুজের সমারোহ। সারবন্দী অট্টালিকা। জাহাজ বীধা বন্দর।

মন চঞ্চল হয়ে উঠেচে অনেকেরই।

হ্যাঁ, অনেকেরই।

অনেকের কাছেই এই শেষ রজনী বিশেষ রজনী। আর দেখা হবে কিনা, কে জানে? আবার এমনকি করে হাতে হাত রেখে ঘনিষ্ঠ হয়ে বসে থাকতে পারবে কি? কর্তব্যের টানে কে কোথায় ছিটকে পড়বে, ঠিক আছে নাকি তার?

এনাকী রাও আর সি. মিটার বোট-ডেকে এক আবছা কোণে ঘনিষ্ঠ হয়ে বসে আছেন। মিটারের কাঁধে এনাকী রাওয়ের মাথা হেলানো।

এনাকী?

বলো মিটার!

আর কি আমাদের দেখা হবে না?

কেন হবে না?

আমি যে ভবঘুরে! কোথায় থাকবো ঠিক নেই।

তবু তোমার মনে তো আমি থাকবো?

নিশ্চয়ই থাকবে এনাকী। নিশ্চয়ই, নিশ্চয়ই।

সি. মিটার তাঁর বলিষ্ঠ দু' হাতে এনাকীর দেহলতাকে জড়িয়ে ধরে টেনে নিলেন নিজের কোলের মধ্যে।

এনাকী?

কি?

আমার কথা সত্যিই তোমার মনে থাকবে?

ষতদিন আমি থাকবো এই পৃথিবীতে, ততদিনই তুমি থাকবে আমার মনে। ঐ চাঁদ সাক্ষী।

শুনে আকাশের চাঁদ বৃষ্টি হাসলো ।

সি. মিটারও হাসলেন ।

বললেন, চলো যাই কেবিনে ।

এস. গ্যাংগুলি আর এলিস বসে আছেন আধ-অন্ধকার ফাঁকা লাউজে ।

অন্তই শেষ রজনী । না ? গ্যাংগুলি বললেন ।

হঁ । এলিসের উত্তর ।

শেষ চিহ্ন পাবো না এলিস ? গ্যাংগুলির আশা ।

পাবে । তবে তোমাকে একটা কবিতা শোনাতে হবে ।

কবিতা ?

হ্যাঁ । তোমার গলায় কবিতা আমার ভারি ভালো লাগে ।

তাই নাকি ? বেশ—

‘স্বপনে দৌছে ছিছু কী মোহে ; জাগার বেলা হল—

যাবার আগে শেষ কথাটি বোলো ।

ফিরিয়া চেয়ে এমন কিছু দিয়ে

বেদনা হবে পরম রমণীয়—

আমার মনে রহিবে নিরবধি

বিদায়খনে খনেকতরে যদি—সজল আঁখি তোল ।’

খামলেন গ্যাংগুলি : এবার আমার প্রাপ্য দাঁও ।

এই দাঁও ।

এলিস এঁকে দিলেন চুষন গ্যাংগুলির গালে ।

হেসে গ্যাংগুলি বললেন, এরপর চূপ করে থাকো কাপুরুষতা । স্বীকার

করো তো ?

করি ।

অতএব—

প্রতিদান দিলেন গ্যাংগুলি ।

এলিস বললেন, তার মানে, আমি সেই স্ত্রী হয়েই থাকলাম ।

হ্যাঁ । স্বদে আসলে প্রাপ্য আমার বাড়ুক ।

হাতঘড়ি দেখলেন এলিস : চলো, শুতে যাবে না ?

তোমার ছেড়ে যেতে ইচ্ছে করতে না এলি !

আমারো ।

তবু দুজনেই উঠে দাঁড়ালেন । অনেক রাত হলো ।

কিন্তু উঠে দাঁড়াবার ক্ষমতা নেই হক এবং মিস রীডের । দু'জনেই বার-এর এক কোণের টেবিলে মাথা গুঁজে পড়ে আছেন ।

অন্যই শেষ রজনী ।

তাই সূর্যার শেষ সীমা পার হয়ে অসীমে ডুবে আছেন । সামনের গেলাস দুটোই নিশেষিত !

বার-বয় অবস্থা দেখে ষ্টুয়ার্ড আর ষ্টুয়ার্ডেসকে খবর দিয়েচে ।

হ্যালো স্যার !

হ্যালো মাদাম !

উ ?

‘বার’ বন্ধ হয়ে গেছে । অনেক রাত হয়েছে । কেবিনে যান !

নো ।

নেভার !

প্লীজ ! প্লীজ !

গেট্‌ আউট ।

অগত্যা ষ্টুয়ার্ড ধরে তুললেন হককে, মিস রীডকে ষ্টুয়ার্ডেস ।

অ রাইট ! হক ঢিলে পায়ে উঠে দাঁড়ালেন । সুরেলা গলায় বললেন, জিল, লেট্‌স্‌ গো টুগাাদার—টু ইয়োর কেবিন, অর টু মাই কেবিন ?

কিন্তু বেরসিক ষ্টুয়ার্ড এবং ষ্টুয়ার্ডেসটি তাঁদের ধরে ধরে নিয়ে গিয়ে ঢুকিয়ে দিলো যার যার কেবিনে !

মস্কোর রামস্বামী জেগে বই পড়ছিলেন । নিউইয়র্ক হকের কাণ্ড দেখে মূচকে হেসে আবার বইয়ে মন দিলেন । হক খড়াগ করে নিজের বার্থে বসলেন ঘাড় ঝুলিয়ে : ড্যাম-স্কুল-গোয়াইন !

ষ্টুয়ার্ড ততক্ষণ দরজা টেনে দিয়ে বাইরে চলে গেছে ।

মিস রীডের কেবিন খালি ।

করাচীতে নেমে গেচেন মিসেস এচ্ ষ্টাকার্ড—তঁার কেবিনের সজিনী ।
ষ্টুয়ার্ডেস মিস রীডকে খালি কেবিনে ঢুকিয়ে দিয়ে বাইরে থেকে দরজা
দিলো টেনে ।

আ, টু-উ হট্ !

পাখাটা ফুল-ফোসে' চালিয়ে দিলেন মিস রীড । উপরের ডেকে বার-এ
চমৎকার হাওয়া ছিলো । এ ঘেন গোড়াউন ।

ড্যাম্ দিস্ ট্রপিক্যাল ক্লাইমেট !

ঠাণ্ডা দেশের মেয়ের মেজাজ গেলো গরম হয়ে । রঙীন মেজাজটা গেঁজে
যাবার জোগাড় ! রাগে গজগজ করতে লাগলেন মিস রীড । জুতো জোড়া
খুলে টান মেরে ছুঁড়ে ফেললেন । খুলে ফেললেন নাইলনের স্কিন-কলার
মোজা । পট্ পট্ করে বোতাম খুললেন ব্লাউজের । বেন্ট খুলে নামিয়ে
দিলেন পরণের নেভি-ব্লু স্কার্ট । আঙুর-ড্রেস, প্যাণ্টি বা ব্রুমার, ব্রাসায়ার—
সব, সব একে একে দেহত্যাগ করলো মিস রীডের ।

মুক্তি ! ঘেন বন্ধন থেকে মুক্তি পেলেন মিস রীড । বেসিনে লাগানো
আশির সামনে দাঁড়িয়ে ঢুলু ঢুলু চোখে নিজের দিকে চেয়ে বললেন, নাউ
মাই স্কাইট ব্লি, মাই ইয়ং লাভলি গাল—হাউ ডি ইউ ফিল্ ?

তবে নিশ্চয়ই ভালো 'ফিল্' করছিলেন না ।

তাই হাত দু'খানা নিজের মুখের উপর চেপে ধরলেন একবার । পরে গিয়ে
বসলেন নিজের বার্থে । গালে হাত দিয়ে কী ঘেন ভাবলেন একবার ।
বললেন, শুড নাইট, মাই ব্রাউন ফ্রেণ্ড ।

বলেই মদিরাবেশে মিস রীড তাঁর শুভ্র নয়তন্থ এলিয়ে দিলেন বার্থের
শুভ্র নয়ম বিছানায় ।

আর, কেবিনের নিলজ্জ পোলিশ আলোটা লোভীর মত সারারাত ধরে
গিলতে লাগলো ইংরেজ ললনার নয়-সৌন্দর্য ।

সাগর-নগরে দেখা দিলো শেষ-সুর্ষ ।

নাগরিকদের যাত্রা হলো শেষ । কেবিনে কেবিনে চাকল্য । বাক্স
গোছাবার পালা । টেবিলে সাজানো চিকুণী, বুরুশ, টুথপেট, রেজার, সাবান,
সেন্ট, পাউডার—সব একে একে ঢুকলো স্কাটকেসে, বাক্সে । স্লিপিং স্কাট,

ড্রেসিং গাউন, রুমাল, টাই, সার্ট, স্কাট, ব্লাউজ ইত্যাদি কিছুই যেন বাইরে পড়ে না থাকে।

সাগর-নগরের সঙ্গে আর কয়েক ঘণ্টা পরেই চুকবে সব সম্পর্ক। চলমান জীবনের চাকা তখন চলবে মাটির নগরের মাটির পথে। তখন তো আবার বসতে হবে দোকান সাজিয়ে, সংসার সাজিয়ে? তখন লাগবে না ঐ দৈনন্দিন জিনিসগুলো?

লাগবে। তাই সংসারীরা গুছিয়ে তুললো ছড়ানো তাদের জিনিসপত্র।

ব্রেকফাস্টের ঘণ্টা বাজলো। রোজকার মতই।

বসলেন সবাই। তবে সেই হৈ-হৈ আর নেই। শুধু বিদায়-বেদনার গুঞ্জন।

এই শেষ দেখা হয় তো।

না, না। নিশ্চয়ই যাবো আপনার বাড়িতে। আপনিও আসবেন কিন্তু।

নিশ্চয়ই।

বেশ কাটলো ক'টা দিন। না?

সত্যি! এ স্মৃতি ভোলবার নয়।

এখন কেবলি বাড়ির কথা মনে পড়চে।

পড়বেই তো। কতদিন পরে দেখা হবে সকলের সঙ্গে!

আমার ওয়াইফ তো বসে পর্যন্ত আসতে চেয়েছিলেন। আমি কায়রো থেকে বারণ করে নিগেচি।

আমার মা লিখেচেন, বসেতে যেন একদিনও না থাকি। সোজা কলকাতায় চলে যাই যেন।

আর আমি ভাবছি আমার দিদির কথা। উঃ, তার ঐ বেশ দেখবো কি করে ভাবতেও পারচিনে। মাত্র চার মাস আগে ভগ্নীপতিটি মারা গেছেন।

সত্যি। দেশে গিয়ে কত কী যে বদল হয়েছে দেখবো!

আবার তাঁরাও দেখবেন আমরা কত বদলে গেছি।

ডাইনিং হলের এক কোণের একটি টেবিলে বসেচেন মিসেস ডাট আর মিস ইলিয়ট।

মিসেস ডাট কক্ষের কাপে ছোট্ট একটা চুমুক দিয়ে রান হেসে বললেন,
মিস ইলিয়ট, স্বার্থপরতার মত আমার কি মনে হচ্ছে জানো?

কি ?

মনে হচ্ছে, জাহাজখানা যদি বসে না পৌঁছে আজীবন সমুদ্রময় ঘুরে
বেড়াতো, তবেই যেন ভালো ছিলো। অথচ দেখো, তুমি হয়তো ভাবচো,
জাহাজখানা বসে পৌঁছতে এতো দেরি করচে কেন? না? তোমাদের
বিষয়ে কবে ?

মিস ইলিয়ট বললেন, ডেলহি-তে পৌঁছলে উইলির সঙ্গে কনসাল্ট
করেই দিন ঠিক হবে।

মিসেস ডাট বললেন, এই সবহারাই ইণ্ডিয়ান দিদিটি তোমায় সর্বাঙ্গকরণে
আশীর্বাদ করচে, তোমরা সুখী হও।

তুনে মিস ইলিয়ট ভাবাবেগে মিসেস ডাটের হাতখানা ধরে মূহু চাপ
দিলেন একবার।

ঐ, ঐ যে দেখা যাচ্ছে !

সমুদ্র সীমায় লম্বাটে কালো দাগ। বসে।

‘বাতরির’র ডেকে একদিকে প্রায় সবাই হয়েছে জড়ো। ঐ যে তাদের
দেশ, স্বদেশ। ইণ্ডিয়া।

ক্রমে কালো দাগ বড় হলো। সবুজ হলো।

শস্ত্র-গ্রন্থাভারতবর্ষ !

কখন ঐ সরস মাটির পরশ পাবো? সবাই বুঝি তাই ভাবচে।

লাঞ্ছিত ঘণ্টা পড়লো।

শাশুর-নগরে শেষ ভোজনপর্ব। নাগরিকদের শেষ প্রার্থ্য মিটিয়ে দেবার
আয়োজন।

খাওয়ার দিকে মন নেই কারোর। কোন রকমে পেট ভরানো। মনে
উৎকর্ষা, হুঙ্কার।

কারণ? কাষ্টমস্-এর বেড়া।

ঐ বেড়া পার হলো, তবে শাস্তি। অনেকেই সন্তায় সিগ্রেট কিনেচেন,
যতগুলো সঙ্গে নেওয়া যায়, তার চাইতেও বেশি। কারোর কাছে ছুটো

ব্রিষ্টওয়াচ। একটা হাতে; একটা পকেটের মধ্যে। রেডিওটার অন্তে
আবার ডিউটি ধরবে কিনা কে জানে? অনেকের স্মার্টকেসে সম্ভাব্য কেনা
ব্র্যাণ্ডির বোতলও স্থান পেয়েছে।

দুর্ভাবনা অকারণে নয়।

আরো, আরো কাছে এগিয়ে এসেচে বসে। বসে বন্দর। ভারতবর্ষ!

‘ওই ভারত! ওই আমার যৌবনের বৃন্দাবন, বার্ককোর বারানসী—
ভারতভূমি! ওই আমার ইহকালের সাধনা, পরকালের কামনা—
ভারতমাতা!

বন্দরে নোঙর করা জাহাজগুলো ঝিমুচ্ছে। পোর্ট অফিসটা মাথা উচু করে
দাঁড়িয়ে। ঐ যে গেটওয়ে অব ইণ্ডিয়া: পঞ্চম অর্জের ভারত পদার্পণের
স্থাপত্য-স্বাক্ষর। আর ঐ—ঐ তো তাজমহল হোটেল।

বাইনাকুলার চোখে লাগিয়েচেন অনেকেই।

বাইরে থেকে ইণ্ডিয়াকে কেমন দেখা যায়, দেখতে হবে না? অনেকেই
ক্যামেরা তাক করে দাঁড়িয়ে। ইণ্ডিয়ার ফটো তুলতে হবে।

মি: এবং মিসেস গ্র্যাটন রেলিং ধরে একদৃষ্টে দাঁড়িয়ে আছেন। আ,
ইণ্ডিয়া! দূশো বছর আমাদের ইংল্যান্ডের অধীনে ছিলো ঐ ইণ্ডিয়া। এখন
কমনওয়েলথ কাণ্টি!

হয়তো ফার্স্ট ক্লাস ডেক থেকে মিসেস হোরও চেয়ে আছেন ইণ্ডিয়ার
দিকে। গীটা-র দেশ। লর্ড কৃষ্ণার লীলাভূমি! হাউ ফরচুনেট আই
অ্যাম!

ধীরে ধীরে—অতি ধীরে সাগর-নগর এসে ঠেকলো মাটির নগরের গায়ে।
বাধা পড়লো বন্দরের লৌহ-বন্ধনে। পাতা হলো সিঁড়ি।

চাকল্য দেখা দিলো সাগর-নগরে। শুক হলো পোর্ট কুলিদের
আনাগোনা। শুক হলো কেবিন থেকে বাজ বয়ে নামানো আর যাত্রীদের
নামা।

‘দল’ ভেঙে গেছে।

এখন সবাই নিজেকে নিয়ে ব্যস্ত। নিজেরটুকু নিয়ে ব্যস্ত। কোথায়

সানিয়ার ? কোথায় রামবাহী ? কোথায় ডাঃ সেন ? আর কোথায় বা
দাড়ি-শাড়ি ? গ্যাংগুলি-এলিস ? হক-রীড ? ডাট-ইলিফট ?

ব্যস্ত । বড় ব্যস্ত সবাই ।

অবশ্য একে একে নেমেচেন সবাই । দাঁড়িয়েচেন সবাই ডকের কাষ্টম-
হাউসের সামনে । লাইন করে দাঁড়িয়েচেন সবাই । বেড়া পার-হলেই ছড়িয়ে
পড়বেন মাটির-নগরে ।

পরে হারিয়ে যাবেন, মিশে যাবেন মাটির নগরের জনতার সঙ্গে । ভারতের
জনতার মাঝে ।

‘বাতরি’ দাঁড়িয়ে আছে ডকে । তার কর্তব্য শেষ । বৃষ্টি বিশ্রাম নিচ্ছে ।
বিরাত সাত তলা জাহাজখানা সমুদ্রকে আড়াল করে দাঁড়িয়ে !

অদূরে লাইন করে দাঁড়িয়ে আছেন প্রাক্তন সাগর-নাগরিকরা—মাটির
নগরে নাগরিকত্ব লাভের আশায় ।

ঐ বাঃ ! আমার ম্ভাজোড়া কেবিনে পড়ে আছে যে ?

কিউ-এ দাঁড়ানো রেজা প্রায় আত্ননাদ করে উঠলেন : আমি আসচি,
আমার জায়গাটা রাখবেন তো ।

ছুটলেন রেজা জাহাজে ।

কেবিন থেকে শেষ মালপত্র নামাচ্ছে কুলিরা ।

রেজা লোহার সিঁড়ি বেয়ে উঠলেন । ছুটলেন অতি পরিচিত অলি-গলি
দিয়ে তাঁর কেবিনের দিকে ।

নির্জন প্যাসেঞ্জরগুলো নিঃশব্দ । কেবিনগুলোর দরজা খোলা । ফাঁকা ।
লাউঞ্জের সীটগুলো খালি, বেকার । লোক নেই, জন নেই । মাঝে মাঝে
ছ’একজন টুয়ার্ড বা টুয়ার্ডেস গল্প করচে ।

তরতর করে নেমে গেলেন রেজা নীচের ডেকে, তাঁর কেবিনে । খোলা
পড়ে আছে কেবিন ।

ঐ যে, ঐ যে ত্রাকেটে ঝুলচে তাঁর ম্ভাজোড়া ! ইস্ ! বড্ড ভুল হয়ে
যাচ্ছিলো ! প্যারিস থেকে কেনা তাঁর সাথের ম্ভাজোড়া !

বেরিয়ে এলেন রেজা কেবিন থেকে । ফিরে চললেন ম্যাট্রেস পাতা
প্যাসেজ দিয়ে, সিঁড়ি দিয়ে, উপরের ডেকের লাউঞ্জের ভেতর দিয়ে ।

ভুঁ তাঁর পায়ের ধপ ধপ শব্দ।

কানে বেহুরো লাগচে রেজার। অদ্ভুত লাগচে। অসহ্য মনে হচ্ছে।

বেকুবর সিঁড়ির কাছে হঠাৎ একবার থমকে দাঁড়ালেন রেজা। চেয়ে দেখলেন জনহীন প্রাণহীন সাগর-নগরের দিকে।

নীলব, নিঃশব্দ, প্রেতপুরী।

জলসার শেষে ঘেন নাট-মন্দির!

গুডবাই বাতরি।

সেলুট জানালেন রেজা।

তারপর লোহার সিঁড়ি বেয়ে নামতে লাগলেন—সাগর-নগরের শেষ নাগরিক।

ফাঁপা জাহাজের লোহার সিঁড়িতে তাঁর জুতোর শব্দ হতে লাগলো :
ঠন-ঠন-ঠন।

